



Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.6.577




Early European Books, Copyright © 2012 ProQuest LLC
Images reproduced by courtesy of the Biblioteca Nazionale Centrale di Firenze
CFMAGL 2.6.577

2. 6. 57⁹.

Q. S. C.

XL
LEGION. in
Causis.




F. L V Y S I I L E
G I O N E N S I S A V G V S T I
N I A N I D I V I N O R V M L I
B R O R V M P R I M I A P V D S A L
M A N T I C E N S E S

INTERPRETIS.


I N C A N T I C A C A N T I C O R V M S O L O
M O N I S E X P L A N A T I O.

*Ad serenissimum Principem Albertum, Austriae
Archiducem, S. R. E. Cardinalem,*



S A L M A N T I C A E,
Excudebat Lucas à Iunta. M. D. LXXX.
C V M P R I V I L E G I O.

19.1



FR. Petrus Xuarez ordinis D. P. Augustini in Prouin-
cia Castellæ prior prouincialis Fratri Luyfio Legio-
nensi Theologiæ professori, atque magistro eiusdem ordinis,
& voti. S. Quoniam officij nostri est, religionis bono &
honori, in ijs præcipuè rebus quæ ad publicam proximorum
utilitatem spectant, omni ratione seruire, & ad idem excita-
re, & adhortari omnes huius prouinciæ viros à quibus id com-
modè fieri posse intelligimus. quoniamque scimus te plura &
ad sacrarum literarum explanationem, & ad Theologicas
quæstiones pertinentia scripsisse, quæ si edantur sint publicè
utilia futura, idcirco tenore præsentium, & nostri officij au-
thoritate in virtute Spiritus sancti, & in meritum sanctæ obe-
dientiæ tibi præcipimus, vt quos habes confectos in Canticum
Canticorum Solomonis commentarios primum, deinde reliqua
omnia, quæ & in sacras literas & de Theologicis quæstioni-
bus commentatus es, typis mandes. Datum Salmanticæ
XI. Calend. Ianuarij. Ann. M. D. LXXVIII.

F. Petrus Xuarez,
Prouincialis.

* 2 EX-

EXPLANATIONEM Canticorum Salomonis, Luy-
sy Legionensis Augustiniani, Salmanticensis Academiae doctis-
simi professoris, legi sanè libentissimè: est enim eiusmodi, ut magnope-
re, non solum sententijs aptissima quadam serie, quod erat in hoc opere
valde difficile, coherentibus, sed etiam sermonis puritate, & elegantia,
antiquitatem illam cultam & perpolitam redoleat. Quamobrem eden-
dam censeo, perque manus & ora hominum peruagari: cum sit nō tan-
tum orthodōa, sed ad pietatem promouendam, & verum religionis cul-
tum amplificandum aptissimè composita.

Sebastianus Petreius Doctor Theologus.



DON PHELIPPE por la gracia de Dios Rey de Castilla, de Leon, de Aragon, de las dos Sicilias, de Hierusalem, de Nauarra, de Granada, de Toledo, de Valencia, de Galicia, de Mallorca, de Seuilla, de Cerdeña, de Cordoua, de Corcega, de Murcia, de Iacn, de los Algarues, de Algezira, de Gibraltar, Duque de Milan, Còde de Flades y de Tirol, &c. Por quato por parte de vos el Maestro Fray Luys de Leon de la orde de S. Augustin, nos fue hecha relacion q auades còpuesto vn libro sobre los Cantares de Salomó, y nos suplicastes os diessemos licencia para imprimir lo, y priuilegio. Y agora auades compuesto vn tratado sobre el Psalmo veynte y leys, suplicandonos os diessemos licencia, para que juntamente con el dicho libro sobre los Cantares le pudiessedes imprimir (o como la nuestra merced fuessè) lo qual visto por los del nuestro consejo: por quanto en el dicho libro se hizieron las diligencias que la prematika por nos hecha sobre la impresion de los libros dispone: fue acordado que deuiamos mandar dar esta nuestra carta para vos en la dicha razon, e nos tuuimos lo por bien. Por la qual vos damos licencia y facultad, para que por esta vez qualquier Impressor destos nuestros reynos pueda imprimir los dichos libros juntos, sin que por ello incurra en pena alguna. Y mandamos que despues de impresso no se pueda vender, ni venda, sin que primero se traya al nuestro consejo, juntamente con el original que en el fue visto, que va rubricado y firmado al fin de Iuan Gallo de Andrada nuestro escriuano de Camara, de los que residen en el nuestro consejo, para que la dicha impresion se vea, si esta conforme al original, y se de licencia para lo poder veder, y se tassè el precio a que se vuere de vender cada pliego del, so pena de caer e incurrir en las penas contenidas en la dicha prematika y leyes de nuestros reynos, principalmente de la nuestra merced y de diez mil maravedis para la nuestra Camara. Dada en Madrid a veynte y dos dias del mes de Março, de mil y quinientos

nientos y ochenta años.

Antonius
Episcopus.

El Licenciado
Fuenmayor.


El Doctor don Inigo
de Cardenas çapata.

El Licenciado
Couarruuias.

El Licéciado Luys El Licenciado Chuma
Tello Maldonado. cero de Sotomayor.

Yo Iuan Gallo de Andrada, escriuano de Camara de
su Magestad la hize escreuir por su mandado, con
acuerdo de los de su consejo.

EL REY.



O R quanto por parte de vos Fray Luys de Leon Maestro en sancta Theologia, y Cathedratico en la Vniuersidad de Salamanca, nos fue hecha relacion que vos auia des compuesto vn libro en Latin que se intitulaua in Canticum Canticorum Salomonis interpretatio, el qual os auia costado mucho trabajo, y seria de mucha utilidad a la Republica, supplicando nos os mandassemos dar licencia para lo imprimir, y priuilegio para lo vender por tiempo de veynte años, o como la nuestra merced fuesse: lo qual visto por los del nuestro consejo, por quanto en el dicho libro se hizo la diligencia que la prematica por nos hecha sobre la impresion de los libros dispone por os hazer bien y merced; fue acordado que deuiamos mandar dar esta nuestra cedula para vos en la dicha razon, e nos touimos lo por bien. Y por la presente os damos licencia y facultad, para que vos, o la persona que para ello vuestro poder ouiere y no otra persona alguna, podays hazer imprimir y vender el dicho libro que de suso se haze mencion en estos nuestros reynos de Castilla, por tiempo y espacio de diez años, que corran y se cuenten desde el dia de la fecha desta nuestra cedula, so pena que qualquiera persona, o personas que sin tener para ello vuestro poder lo imprimiere, o vendiere, o hiziere imprimir, o vender, pierda toda la impresion que hiziere con los moldes y aparejos della, y mas incurra en pena de cinquenta mil maravedis por cada vez que lo contrario hiziere: la qual dicha pena sea la tercia parte para la persona q lo accusare, y la otra tercia parte para el juez que lo sentenciare, y la otra tercia parte para la nuestra camara y fisco, con tanto que todas las vezes que huuieredes de hazer imprimir el dicho libro durante el dicho tiempo de los dichos diez años, lo traygays al nuestro consejo, juntamente con el original que en el fue visto, q va rubricada cada plana, y firmado al fin del de luã Gallo de Andrada nuestro escriuano de camara
de

de los que residen en el nuestro consejo, para que se vea si la dicha impresion esta conforme a el, y se os de licencia, para lo poder vender, y se tasse el precio a como se huuiere de vender, so pena de caer e incurrir en las penas contenidas en la dicha pre-matica: y mandamos a los del nuestro consejo, y a otras qualesquier justicias destos reynos que guarden, y cumplan, y executen, y hagan guardar, cumplir y executar esta nuestra cedula, y todo lo en ella cōtenido. Fecha en Sant Lorenço, a treze dias del mes de Octubre, de mil y quiniētos y setenta y nueue años.

Y O E L R E Y.

Por mandado de su Magestad.

Antonio de Erasso.

ERRATA SIC EMEN- DENTVR.

<i>Pagina.</i>	<i>Linea.</i>	<i>Lege.</i>
38.	18.	Ecclesiastæ.
47.	18.	גא
78.	5.	que.
83.	3.	iucunditatis.
85.	12.	cum labore.
88.	8.	præcedas.
90.	16.	cū dicitur, id nimirū dicitur
92.	25.	his.
93.	26.	media.
96.	5.	implorantem.
96.	19.	Palæstinis.
98.	21. & 22.	esse.
102.	11.	vnà.
103.	13.	Pinguium.
107.	5.	de , vt.
110.	1.	perueniat.
121.	18.	Et sicut.
122.	9.	fragilitatis.
124.	4.	de , reuertere.
127.	18.	tamen.
138.	17.	quia.
148.	5.	iusti viri faciūt, facere certè.
155.	26.	eiusmodi.
160.	9.	desponsationis suæ & in die lætitiæ cordis sui.
170.	23.	contendo, amorum spiritua- lium declarandorum causa, describi, scilicèt, hic.

174.	25.	לצמח
194.	8.	istæ.
208.	12.	participamus.
208.	14.	efficimur.
212.	25.	expectando.
213.	4.	impellente.
214.	18.	expectans.
237.	13.	non id petere spõsum facit.
240.	3.	omnes quamuis tenuis.
248.	21.	questum.
258.	6.	posset.
278.	22.	tertiæ Abrahami vxoris.
281	3.	hortum nucum, à nuce arbo re in eo confita sic dictum, descendi itaque in hortum, vt &c.
284.	9.	ipfos.
284.	10. & 11.	beatos atque fœlices.
301.	19.	pes.
305.	12.	vereantur.
315.	24.	inficiebatur.
216.	25.	an fractibus.

S E R E-

SERENISSIMO

PRINCIPI ALBERTO AV-
STRIAE ARCHIDVCI S. R. E.

Cardinali, F. Luyfius Legionensis

Augustinianus

S. P. D.



QVOD, ET LITE-
rarum studia colis, & stu-
diosos literarum diligis, id-
que præ te ipse fers, & cun-
ctis notum esse vis, in spem
veni, Alberte Principum de-
cus, si hos meos in Cantica
Salomonis Commētarios tuæ celsitudini, quod
nunc facio, dicassem, id tibi non ingratum futu-
rū. Eoq; magis adductus sum, id vt facere aude-
rem, quòd memineram superiore anno, cū obse-
quium tibi meum, atque adeo me ipsum totum
offerrem, quali me & vultus hilaritate & ver-
borum comitate excepisses: quodq; ex Alphon-
so Coloma cubiculario tuo postea cognoue-
ram, memoriam mei non abiecisse te, sed è tuo
isto fastigio ad meam humilitatem nonnun-
quam despiciere, & in tuis sermonibus mentio-
nem

§ 2 nem

nem mei solitum esse interdum facere. Præter
hæc illud etiam vidi, hæc scripta optimè conue-
nire tuæ personæ. Vt, qui ad ecclesiæ imperium,
vt omnes speramus, aliquando obtinendum na-
tus sis, & à Deo electus, adamare iam nunc eccle-
siam inciperes ex his scriptis, in quibus videres
tanto ipsam amore à rege omniū regum Chri-
sto esse adamatam, non solum, vt dominus, atq;
pater illius dici, sed vt amator etiam, & sponsus
haberi: vt quæ ea, sua ex persona scribi voluerit,
quibus in amore nihil scribi potuit ardētius. Est
enim verè diuina virtus amor, charitasque in ho-
mines vniuersos effusa. Cuius tu virtutis, quo-
niam ad eam natura factus videris esse, perfectio-
nem, & absolutionem facilè adsequere huius le-
ctione libri. Qui tibi dicatus, tuæque celsitudi-
nis tanquam numine tectus, non solum in publi-
cum prodire iam audet, sed etiam sperat,
atque confidit gratiorem se, quàm
vnquam antea fuisset, cun-
ctis futurum.
Vale.

LECTO-

LECTORI.



V M superioribus annis rogatu cuiusdam amici mei, qui Latinè nesciebat, Canticum Salomonis in Hispanum sermonem conuertissem, addidissemque eodem sermone conscriptos breues in idem commentarios, quibus verã, & arcanam eius Cantici intelligentiam leuiter attingebam: verborum verò textum, & proprietates, atque similitudinum, quibus is liber abundat, rationes latius explanabam. nam petierat à me is, cuius causa id elaborabatur, se vt docerem, non quid arcani scripta illa continerent, nam audiuisse id à multis, & à singulis suo modo dicebat, sed quo modo rectè quasi construendus esset ille verborum ordo, valdè, vt videtur, perturbatus, & inuolutus. itaque cū id confecissem, & ei, cuius rogatu confeceram legendum dedissem, isque paucis post mensibus reddidisset mihi librum meum, nullo illius apud se exemplo relicto, accidit, vt quidam meus familiaris, è meis scrinijs, me in scio cum accipiens, non solum sibi describeret, sed descriptum à se exemplum alijs item describendum traderet. Ex quo factum postea est, vt multis omnium ordinum hominibus cum librū probantibus, atque petentibus, breui is liber in plura exempla transfusus, & per maiorem Hispaniæ partem sparsus, in manus plu-

rimorum peruenerit. Sed quoniam à rerum fidei iudicibus sanctè erat interdictum, ne quis sacræ scripturæ liber, vulgari sermone cōscriptus legeretur: quidā non nimium amatores mei, causam in eo sibi oblatam ad mihi incommodandū putarunt, eamq; & statim, & auidè arripuerunt. Verum illis iam controuersijs, Deo pro me disceptāte, dijudicatis: meque ipso post multos, & magnos labores, eiusdem Dei beneficio, pristinæ dignitati meæ, atque integræ opinioni aliquando tandem restituto: quo etiam in hoc omnium iudicijs satisfaceret: utque nihil relinqueretur, quod suspicioni locum dare posset alicui, multi me hortati sunt, ut Latinè verterem eum librum, ipsumque peruulgarem atque ederem. Quod & feci, coactus quodāmodo, nec tam meam sententiā, quam plurimorum qui mihi bene volunt iudicia sequutus: propterea quod semper iudicassem, tam multis hac nostra ætate non solum novos libros ipsis edentibus, sed ad aliorum bene scripta carpenda excubantibus, & intentis, scribendi munus hoc tempore, nec nimis utile esse alijs, & ijs ipsis qui scribunt esse valdè periculosum. Sed, ut dicere ceperam, re ipsa penè constrictus Latinum eum librū feci, Latinoque addidi, quæ Hispano deerat, veræ, & arcanae sententiæ perpetuā, & copiosiore explanationem. Quem nunc librum de amicorum meorum sententia edere institui, siue potius iam edo. In quo non diffiteor mihi euenisse, quod euenire necesse est omnibus, qui necessitate potius adducti, quam voluntate aliquid scribunt, sibi
vt

vt in multis eorum quæ scribunt, displiceant. Displi-
ceo enim mihi in plerisq;. Nam dum cogitur, & aliô
quam quo cupit mens vocatur, inuita sequitur, & ob
id parce, atque malignè suggerit & sententias, & ver-
ba. Sed quamuis mihi ipse displiceam, tamen si cui
bono, atque pio aliquid in hoc libello placuerit : siq;
certè, quod vnum maximè cupio, ex eo quis flammū
lam aliquam diuini amoris conceperit, id satis
erit, vt non frustra, sed vt cum maxima utili-
tate arbitrer, susceptum fuisse à me, hunc
istius libri conficiendi
laborem.

* *

*

V O T V M.

Quo mens plena Deo, quantoque exæstuat igne
Inque vicem quanto flagrat amore Deus,
Dum reféro interpres diuini carminis, olim
Numinis impulsu, quod cecinit Solomon,
Supremo, ô virgo, penitus dilecta tonanti,
Ipse amor, è cuius profiluit gremio
Da sensus rectos: da verba decentia: posse
Da sanctos ignes pectore concipere:
Scilicet, vt magno perfunctus munere, laudes
Diua tuas grato carmine concelebrem.

I

CANTICVM CANTICORVM SALOMONIS.



SALOMON HOC IN carmine, quod conscripsit dictante illi Spiritu sancto, mutuum inter Deum, & homines amorem exposuit, id est, Christi tum erga Ecclesiam totam, tum erga fideles singulos amorem. Exposuit autem non ipsos, aut Christum, aut Ecclesiam palam loquenteis inducens, sed introducens tanquam in scenam inter se amanteis coniuges duos, qui Christi, & Ecclesiae personam sustinerent, & mutua erga se charitate exprimerent summam illam, & caelestem coniunctionem amoris, quae est inter Christum, & Ecclesiam. Itaque tota huius libri oratio, figurata est, & allegorica. Allegoricam dico, non ea allegoria, quam D. Paulo authore, inducunt Theologi, cum in sacris literis, à literæ, quem vocant sensu, allegoricum sensum distinguunt: sed quam tradunt rhetores effici ex perpetua metaphora. Constat autem oportere, ut quod isto modo figuratè, & allegoricè dicitur, id omne ducatur ex eius rei natura, è qua similitudo transfertur, id est, ex ea re, quæ palam

*Orig. pro
lo. in can.
Psell. pro
lo. in can.
Hiero. li.
1. aduers.
Ioui. Bern.
nar. hom.
8. in can.
Lyan in
c. 4. cant.
corum.*

A adhibe-

adhibetur, alterius rei occultæ loco. Nam ob eam causam adhibetur, vt in eius ratione manifesta, alterius rei latens natura similitudine quadã, tanquam in speculo, conspiciatur. Quare necesse est, vt eares enucleatè, qualis ipsa est, aptis & verbis, & sententijs, & omnino suis coloribus exprimat: aut certè sine causa adhiberetur. Deinde etiam constat, id genus scripta aliud sensus, atq; sententiæ palàm ostentare, ac præ se ferre, aliud continere intra se inclusum. Diuidique ea omnia in sonum (non enim mihi occurrit in præsentia commodius aliud verbum, quo nomen id, quidquid est, quod istiusmodi scripta statim primò audita significare videntur: quamquam scio priscos Ecclesiæ scriptores historiam id, aut historicam intelligentiam nominasse, sed vocetur nobis verborum sonus.) Itaque diuidi in sonum, & sententiam, vt sonus sit exterior ille, qui oculis obijcitur sensus: sententia verò latens, & occulta intelligentia ea, ad quam exterior sonus transfertur, quæ eadem dicitur, & est literalis intelligentia. Postremò illud etiam est manifestum, quanquam horum scriptorum vera sententia non sit illa, quam ipsa scripta ostentant, quamq; nominauimus sonum, sed ea potius, quam intra se occultant, & includunt, tamen quid, & quale sit id interius, quod latet, ex eo, quod patet, atque conspicitur, quærendum esse, & interpretandū. Quibus ex omnibus efficitur, cum, qui isthæc scripta interpretatur, si quidem suo muneri satisfactorius est: primùm exteriores illos sensus

*Orige. ho
milia. i. in
Canti.*

sus exponere debere: deinde ex eis interiores, & veros eruere, atque explicare. Ne, si ignorata, aut inexplorata eius reinatura, vnde similitudo ducitur, ad interiora explicanda statim accesserit, quasi amisso duce aberret longè à vero, incidatque in absurda, & secum pugnantia quædam: quemadmodum nonnullis harum literarum interpretibus accidisse videmus, & nostra, & nostrorum aorum ætate. Hanc certè nos in hoc libello interpretandorationem sequuti sumus. Itaque singulis in capitibus eius libri separatim de utroque diximus: & ex vno ad aliud gradum construximus nobis, & alterum cõparauimus cum altero. Comparauimus, inquam, ita vt res rebus conferrem, non autem, vt aut singula verba, aut minutatim cuncta, quæ in allegoria dicebantur, referrem ad interiorem intelligentiam. Id enim neque necessarium factu est, nec verò semper fieri potest. Haud enim parum multa in hoc genere ponuntur, magis vt institutæ allegoriæ seruiatur, quàm vt inde transferatur aliquid ad id, de quo agitur. Quod nisi viderem doctis, & intelligentibus hominibus notum esse, non solum magna D. Hieronymi auctoritate probarem, sed etiam perspicuum facerem multis productis exemplis cum ex sacris literis, tum ex aliorum authorum scriptis. Id certè in hoc carmine non semel fit. Quod carmen cum Hebræi Canticum canticorum vocant, id intelligi volunt, præstare ipsum cæteris canticis.

*Hier. in
Ezech. c.
29.*

A 2 C A P.

IN CAPVT
CAP. I.



SCVLETVR ME OSCVLO ORIS SVI: QVIA
MELIORA SVNT VBERA TVA VINO: FRA-
GRANTIA VNGVENTIS OPTIMIS. OLEVVM
EFFVSVM NOMEN TVVM: IDEO ADOLE-
SCENTVLAE DILEXERVNT TI. TRAHME,
POST TE CVRREMVS. INTRODUXIT ME
REX IN CELLARIA SVA: EXVLTABIMVS, ET LAETABIMVR
IN TE MEMORES VBERVM TVORVM SVPER VINVM: RE-
CTI DILIGVNT TI. NIGRA SVM, SED FORMOSA, FILIAE
HIERSALEM, SICVT TABERNACVLA CEDAR, SICVT PEL-
LES SALOMONIS. NOLITE ME CONSIDERARE, QVIA FVSCA
SUM: QVIA DECOLORAVIT ME SOL. FILII MATRIS MEAE
PVGNAVERVNT CONTRA ME, POSVERVNT ME CVSTO-
DEM IN VINEIS: VINEAM MEAM NON CVSTODIV. INDICA
MIHI QVEM DILIGIT ANIMA MEA, VBI PASCAS, VBI CV-
BES IN MERIDIE, NE VAGARI INCIPIAM POST GREGES
SODALIVM TVORVM. SI IGNORAS TE, O PVLCHERRIMA
INTER MVLIERES, EGREDERE, ET ABI POST VESTIGIA
GREGVM TVORVM, ET PASCE HOEDOS TVOS IUXTA TA-
BERNACVLA PASTORVM. EQVITATVI MEO IN CVRRIBVS
PHARAONIS ASSIMILAVI TE, AMICA MEA. PVLCHRAE SVNT
GENAE TVAE, SICVT TVRTVRIS: COLLVM TVVM SICVT
MONILIA. MVRENVLAS AVREAS FACIEMVS TIBI, VERMI-
CVLATAS ARGENTO. DVMESSET REX IN ACCVBITU SVO,
NARDVS MEA DEDIT ODOREM SVVM. FASCICVLVS MYR-
RHAЕ DILECTVS MEVS MIHI INTER VBERA MEA COMMO-
RABITVR. BOTRVS CYPRI DILECTVS MEVS MIHI, IN VI-
NEIS ENGADDI. ECCE TV PVLCHRA ES, AMICA MEA: EC-
CE TV PVLCHRAES; OCULI TVI COLVMBARVM. ECCE TV
PVLCHER ES, DILECTE MI, ET DECORVS. LECTVLVS NO-
STER FLORIDVS, TIGNA DOMORVM NOSTRARVM CEDRI-
NA, LAQVEARIA NOSTRA CYPRESSINA,

EXPLA

PRIMUM.
EXPLANATIO.

5

PRIVS DE EXTERIORE
sententia dicam, posteriùs interiorem, &
veram persequar. Igitur, vt dixi, hîc indu-
cuntur in speciem pastores duo, vir, & fœmina, &
inter se amantes, & inuicem à se distracti: qua ex di-
stractione, mœrore, atque desiderio malè affecta fœ-
mina, lāguère fingitur, itaq̃ue dicere: Osculetur me
osculo oris sui. Videlicet, sociæ vina illi, atque vr-
guenta adferebant, quò eorum vel odore, vel hau-
stu fugientem animam reuocaret: quæ illa respuens
dicit: OSCULETVR ME OSCVLO ORIS SVI. Quasi ita di-
ceret: Amouete ista hinc, atque auferte, nihil enim
ad me morbo liberandum ista faciunt. Desiderio vi-
ri mei langueo: nec, nisi eo viso, morbo liberari pos-
sum. Adsit ille modò; mihiq̃ue suauiorum suorum
aliquid impertiatur, id mihi ad sanitatem recuperan-
dam satis erit: nec, præter id, quidquā erit satis. Ita-
que: Osculetur me osculo oris sui. Hebraicè משיקו
id est de, vel ex osculis, hoc est vno, aut altero
osculo, atque adeò nonnullis osculis. Non enim, in-
quit, multa millia basiorū deposco: vel vno aut alte-
ro illius osculo iam penè amissam vitam recupera-
bo. Ducta est autem hæc omnis oratio nō solum ex
affectu, sensuq̃ue amantium, sed etiā ex natura ipsa
rerum. Nam amantium animi non tam secum ipsi,
quàm cum ijs, quos amant, versantur: quoq̃ue lon-
giùs ab illis absunt, eò magis à se, & à suis corporibus

A 3 disce-

discedunt: minusque vim suam illis impertiuntur, ex quo corpora ipsa macie attenuantur, pallentque, ac viribus animi destituta languent. Qui languor corporis quoniam ex absentia, & aberratione, ut ita dicam, animi totus oritur, ideo corpora ipsa naturae tanto sensu, suoque nutu reuocare ad se animum suum cupiunt. Is autem cum eo, quem amat, versatur, & apud illum habitat. Auent igitur eodem naturae inductu amicos videre, arcteque complecti, & id animi sui, quod intra illos est, haurire quoquo modo possint, & ad se transferre. Quod quoniam iungendis osculis, anima quoque legenda videtur maxime posse effici, ex eo fit, ut in amore tanta sit dissuauandi vel cupiditas, vel voluptas. Languet itaque sponsa ex amore: cuius languoris medicina omnis in deosculatone sita est. Recte igitur id vnum flagitat, dicens: Osculetur me osculo oris sui. Recte quoque caetera fomenta, vina, flores, vnguenta à suis sibi oblata aspernatur, aut certe aspernari fingitur. Quare etiam adiecit: *QVIA MELIOEA SVNT VBERA TVA VINO.* aut, ut alij; *AMORES TVI:* Quoniam verbum Hebraicum ad utrumque est anceps: quanquam & ipsa vbera pro amoribus in sacris literis translata ponuntur. Et quod sequitur: *FRAGRANTIA VNGVENTIS OPTIMIS.* Non solum, inquit, vino praestant, sed vnguentis excellunt. Nec adeo cuiusquam animum ita aut vinum exhilarat, aut vnguentorum odor oblectat, atque ipsa viri mei amore, atque blanditijs reficior, atque confirmor. Sed quod vetus interpretes posuit: *FRAGRANTIA VNGVENTIS OPTIMIS*

OPTIMIS. Alij ex Hebræo non admodū diuerso sensu
 vertunt: ODORI VNGVENTORVM. Est enim præcisè di-
 ctum, & cum admirationis significatione quadam,
 quod ita commodè: Porro fragrantiam vnguento-
 rum, deest autem: Quis dicendo assequatur, vt expli-
 cet? Ac si dicat: Amores quidem tui vino quantūuis
 generoso præstantiores sunt. Nam de odore, quem
 vnguenta, quibus es delibutus, spirant, quid attinet
 dicere? Nam: OLEVM EFFVSVM NOMEN TVVM. Tam be-
 nè, inquit, oles, vt non odoratus modò, sed vnguen-
 tum ipsum, ipseque bonus odor dicare, atque nomi-
 nêre. Nota est figura loquendi, cū ad alicuius in
 aliquo genere præstantiam declarandam, illi nomē
 tribuimus, eius ipsius rei, in qua excellere dicitur. Si-
 cut Christus dominus Simonem, Apostolorū princi-
 pem, & Ecclesiæ firmamentum futurum, non aut sa-
 xum, aut de petra natum, sed Cephā Hebraica vo-
 ce appellauit, id est, saxum ipsum, atque petrā. Quod *Matt. 16.*
 autem, oleum, hoc loco Hebræi vocant, id Latini,
 vnguenta nominant. Ea autem sunt è floribus, her-
 bisve, aut manu expressi, aut igne elicit, aut sua spō-
 te fluentes, aut alio quouis modo confecti liquidi
 odores. Quod verò additur: EFFVSVM. epitasin habet
 odoris longè, latèque fragrantis, vt sponsus non mo-
 do dicatur ipse odor, sed latè fragrans, & ad omneis
 parteis permeans odor. Nam vnguenta, cū reclu-
 so eo, in quo sunt, vasculo, effunduntur, tū maximè
 ex se odorem emittunt. Sequitur: IDEO ADOLSCEN-
 TVLAE DILEXERVNT TE. Amplificat, quod de odore
 sponsi

sponsi dixerat. Nam eò fit, inquit, vt omnium adolescentularum fœminarû amorem colligas: omnibus charus, & iucundus sis. Quæ oratio ex media vitæ consuetudine expressa est. Nam omnes fœminæ, & maximè puellæ, huiusmodi odorum, atque mundiciarum sunt naturâ cupidiore. Atque vt mihi quidem videtur, Salomon pudori, atque decori seruit, cum Sponsæ tribuit ista verba: nimirum: IDEO ADOLESCENTVLAE DILEXERVNT TE. Nam his illa occurrit, tacitis aliorum iudicijs, seque tacitè purgat. Videbat enim fieri posse, sibi vt crimini daretur, quòd virum suum ad oscula, & amplexus, præter id, quod pudicâ decebat, petulantiùs inuitasset. Id ergò auditorum cogitationibus sibi obiectum, & quauis re falsum, tamen in speciem satis probabile, & à proba fœmina haud quaquam contemnendum crimen omni ratione diluit. Nam & huc pertinet, quòd Sponsum nominauit suprà, oleum effusum, dicens: OLEVM EFFVSVM NOMEN TVVM. vt quòd maiorem boni vim in sponso videremus, eò minus miraremur ipsam præ amore penè sui obliuisci. Et nunc idem agit, cum dicit: IDEO ADOLESCENTVLAE DILEXERVNT TE. Quis enim non concedat illi, quæ viri sui suauissimos erat experta mores, ipsum vt effusissimè diligit: cum videat eundem certatim diligi à puellis omnibus, ad quas modò odor illius aliquis peruenisset? TRAHE ME, POST TE CVRREMVS. Et hoc ad amorem amplificandum valet, sicuti superiora omnia. Nam primùm his verbis docet, se amore ità languere, vt suis ipsa pedibus

pedibus consistere nequeat. Deinde demonstrat, sic se ab eodem amore affici, sicque incendi, atque inflammari viri sui desiderio, ut quamvis languido, & imbecillo corpore, ipsum vel currentem sequutura sit. Languor quippe iste corporis, & in languido corpore ardens istud studium sponsum insequendi, & ab amore effecta sunt, & sunt ipsa eximij cuiusdam amoris illustria argumenta. INTRODVXIT ME REX IN CELLARIA SVA: EXVLTABIMVS, ET LAETABIMVR IN TE, MEMORES VBERVM TVORVM SUPER VINVM: RECTI DILIGVNT TE. Commemorat se compotem esse factam eius ipsius, cuius desiderio ardebat. Nō quod re ipsa compos effecta fuerit, sed quod rei desideratæ imago, quæ illius animo obuertabatur, efficiebat, ut futura, & optata bona pro præsentibus haberet: ex desiderantiū videlicet more, atq; affectu. INTRODVXIT, inquit, id est, introducet, ex proprietate sermonis Hebraici: in quo sæpè præterita pro futuris ponuntur ad significandum eorum, vel quæ prædicuntur certos euentus, vel quæ desiderantur, non frustrandos finis. REX. Personæ, quam agit oblita, regem illum vocat ex Hebræorū item loquendi consuetudine, qui in amore huiusmodi appellationibus vtuntur, mi frater, mi rex IN CELLARIA SVA. id est, in intimas ædeis: aptum, scilicet, ad amorem vacandum locum: ex quo existit, quod sequitur: EXVLTABIMVS ET LAETABIMVR IN TE. Quibus verbis significatur lætitiæ genus quoddam eximium, è mutuo amantium colloquio, & congressu exortum: non illud quidem
B caducum,

caducum, & leue: sed stabile, & manens, sui que me-
 moriam in animo impressam relinquens. Et idcirco
 addidit: MEMORES VBERVM TVORVM. id est, amorum
 tuorum SUPER VINVM. Atque eius, inquit, gaudij, at-
 que lætitiæ, quam è tuo congressu perceptura sum:
 quæque omni suauitate suauior, & iucundior futu-
 ra mihi est, dulcissima memoria hærebit pectori
 meo semper. Id quod nemo mirabitur eorum, qui-
 bus tu propius es cognitus. Nemo, inquam, eorum,
 quibus tua suauitas morum, tuaque præstans virtus
 nota sit. Te enim recti diligunt, aut, quemadmodum
 in Hebræo dicitur, rectitudines diligunt. Te gratiæ,
 te omnes læpores circumstant: quidquid aut à fortu-
 na optabile, aut ab industria præstans, aut à natura
 excellens inesse in homine potest, omnis laus, om-
 ne decus, egregia omnis, & diuina indoles in te vno
 elucet: nec elucet modò, sed eluxerunt semper.
 Nam præteriti tēporis voce dicitur, DILEXERVNT TE.
 quasi ita dicat: Non aduentitia hæc tua est, aut recēs,
 sed à puero inolita, & innata virtus. Quamquam hic
 versiculus, etsi optimè ille quidem à Hieronymo ex
 Hebræo in Latinum sermonem expressus est, tamen
 potest, quoniam Hebraica hoc loco ad plures sen-
 tentias sunt ambigua, alio modo non incommode
 verti: isto scilicet, memorabimur: seu potius, in me-
 moriam reuocabimus. Id enim propriè sonat זכירה
 Igitur in memoriam reuocabimus: & distinctione
 hic adhibita. Amores tui præ vino, hoc est, vino sunt
 magis optabiles: quia recti, seu rectitudines, diligunt
 te.

te. Ita vt tota ista oratio tribus articulis cōstet, in quo-
rum primo (nam duo reliqui perspicuā habent sen-
tentiam.) Itaque in horum primo quamuis breui-
ter & præcisè posito (qualia sunt ferè omnia, quæ
amantes dicunt) quiddam continetur, valde illis fa-
miliare. Nam qui inter se amant, quoties id euenit,
vt ex interua'lo se aspiciant, post illa, quæ in primo
congressu dici solent, protinus subiiciunt, atque ex-
ponunt vterque alteri, ea, quæcunque ipsis dum à se
mutuò distracti aberant, vel tristia, vel læta euene-
runt. Itaque quoniā poluerat id, quod certa spe per-
ceperat, futurum suum vt sponsum aliquando vide-
ret, subiicit protinus, quæ hos amantium congrès-
sus natura sequitur, commemorationem illam mu-
tui, erga se animi, atque sensus. Ideoque dixit, com-
mentabimur, siue in memoriam reuocabimus, quas
scilicet molestias ab inuicem distracti pertulerimus,
qui estus animorum nostrorum fuerint, quantoque
laborauerimus tum desiderio, tum metu. Sequitur.

NIGRA SUM, SED FORMOSA FILIAE HIERUSALEM, SI-
CVT TABERNACVLA CEDAT: SICVT PELLIS SALOMONIS.
Ad cætera, quæ de hac fœmina, cuius sub ficta perso-
na vera res agitur dicta sunt, illud nunc adijciamus:
facie illam quidem perliberali fuisse dici, cæterum
sub nigro colore, quales fere esse solent omnes, quæ
rurivitā degunt fœminæ: igitur quia se talem agno-
scebat, ne quis fortè putaret, in eo quod se de sponsi
sui erga ipsam amore iactabat, credula spe, atque ina-
ni decipi, nec vero credibile esse, vt eo colore fœmi-

B 2 nam

nam quisquam tam ardentem amaret: utque ne sui iactatione, atque fiducia ista, risum cuiuspiam moueret: propterea his aliorum de se iudicijs occupatione occurrens, & colorem suum purgans docet, cum ea coloris culpa egregium formæ decus, cæterarumque sui corporis partium venustatem compensari debere, sibi que usu venire idem, quod tabernaculis Arabum, quos sacræ literæ Cedar appellant, à Cedar Ismaelis filio, eius gentis authore: qui Arabes quia subinde domicilia, atque sedes mutant, vaganturque; semper, tentorijs plurimum utuntur. Ergo sibi accidere ait quod Nomadum tabernaculis: talemque se esse qualia ea tentoria sunt, quibus in castris reges uti solent: quorum quidem tentoriorum ea pars que imbri, atque soli exponitur coriacea ferè est, quo cœli iniurias perferre melius, atque facilius possit: at interior altera opere Babylonico picta, tum multo auro distincta, multisque gemmis, contuentium oculos perstringit, & splendore, & specie: atque quemadmodum nemo sanus ea ex exteriori specie despiciat, sic se ait à suo sponso ex vno colore, nequaquam pendere: magisque ipsum reliqua totius corporis pulchritudine allici, quam deterreri nigrore? Qua in re Salomon mire expressit, fœminarum ingenium, quæ si quid in ipsis est, quod amatorum oculos possit offendere, id sollicitè occultant, aut si occultare nequeunt studiose, & accuratè defendunt, quod ipsum planius fit ex eo quod sequitur. NOLITE ME CONSIDERARE, QVIA TVSCA SVM: QVIA DECOLORAVIT ME SOL, FILIA.

FILII MATRIS MEAE PUGNAVERUNT CONTRA ME, POS-
 SVERUNT ME CVSTODEM IN VINEIS: VINEAM MEAM NON
 CVSTODIVI. Nam defendisse satis colorem suum su-
 periori oratione videri poterat, & cum hac leui nota
 reliquam formæ elegantiam compensasse, satisque
 aliorum suspicionibus occurrisset pulchritudinis suę
 commemoratione, & expositione illa. Sed quod alijs
 satis est, ipsi non est satis, satis vt appareat quid illam
 mordeat. Itaque vrget idē, & hanc sui coloris quasi
 maculā eluere studens affirmat, id quidquid est ma-
 li, non innatum malum esse, & eiusmodi, quod de-
 leri nequeat: sed dum ruri in custodiendo agro occu-
 patur, & solem nuda facie excipit, id contraxisse di-
 cit, additque tali vitæ generi, non tam sponte sua va-
 casse se, quam iniuria suorum: in quo præclare a Sa-
 lomone seruatum est personæ decorum. Nihil enim,
 quæ rusticam vitam ageret, cur nigra esset, causari
 poterat aut verosimilius, aut suæ personæ magis ap-
 tum, quam si se sole perustam diceret. INDICA MIHI
 QVEM DILIGIT ANIMA MEA, VBI PASCAS, VBI CVBES IN
 MERIDIE, NE VAGARI INCIPIAM POST GREGES SODA-
 LIVM TVORVM. Redit tantisper dum colorem defen-
 dit intermissus amor, atque ex intervallo, vt fit, redit
 intentior. Nam dilationis iam, atque moræ impa-
 tiens sponsa cōtinere se ipsam domi diutius nequit,
 & morantem sponsum expectare: ipsa potius illum
 quærere statuit. In quo amoris vis declaratur, cuius
 est is ardor, vt quæri se, aut rogari ab alio minimè po-
 stulet, sed occurrat ipse potius, suaque sponte se ami-

cis offerat iniussus, & inuocatus. Quare sponsa quā-
uis sibi, & languenti, & perblandē ipsum vocāti, ne-
que sui videndi copiam sponsus fecerat, neque re-
sponsum reddiderat vllum, non tamen ob id, aut ira-
ta ab amando defilit, aut sibi factam iniuriam que-
ritur, aut de pristino suo amore remittit aliquid, in dō
hoc acrius ad amandum accenditur: itaque omnia
accipiens in bonam partem, nec vero illud saltem se-
cum reputans decere se, utpote fœminam, conveni-
ri à viro potius, quam virum ipsam convenire: tan-
tum cognoscere auct, quibus ille in locis versetur:
nam periculum esse ait, si locorum ignoratione in
aliorum pastorum caulas errore fortasse inciderit,
ne pudori suo videatur parū cautē consuluisse.
Quamquam hæc sponsæ oratio variè accipi potest:
vno modo quasi ea purgare se apud sponsum velit,
de cessatione sua, quod illum hætenus sequuta non
fuerit: non id culpa sua factum dicens, sed ignora-
tione locorum, in quibus ille versabatur: quasi ita di-
cat. Utinam, aut tu id mihi renuntiaasses, aut per me
ipsa scissem, quibus in locis versarere iā diu est, quod
vnā tecum essem. Quare quod me hætenus domi
contineo, nec te sequor, atque conuenio nō de fidia
deputare debes, sed ignorationi: timeo enim, ne si
ignata loci in quo es, te quælitūcam, & tempus ina-
niter cōteram, & risum moueam cæteris pastoribus
fodahbus tuis, in quos fortasse incidam errore viæ.
Altero modo, quem magis probo, ut hæc oratio ab
animo tam longas moras non ferente proficiscatur,
conti-

contineatque non tam purgationem desidia aliqua
(huius enim ne color qui denique in tali, tamque arden-
ter virum amante foemina harrere vllus poterat) quam
votum, & desiderium eò veniendi, quo suus esset vir:
& ubi terrarum ageret, ob id ipsum, cognoscendi. Nec
vero quis miretur, aut absurdum putet, quod ab eo
qui abesse fingitur, id quaerat sponsa: nam qui amant
dulci quodam, & ex amore ducto errore cæci, quid re-
rum natura ferat sæpè parum attendunt. Itaque quos
diligunt videre eos, & præsentes alloqui sibi videtur:
iam eosdem querunt absentes, nec ubi gentium sint
rogati possunt dicere, scire tamè valde cupiunt. Iam
illos qui absunt, & à quibus magnis locorum spatij
diuisi sunt percontantur, & rogant, multa que huius-
modi, & dicunt, & faciunt re quidem absurda, amo-
ri tamen conuenientia, atque apta, quo ex more hæc
omnis oratio ducta est. Simul enim eadem, & absen-
tem suspirat virum, & alloquitur præsentem, & à quo
voces suas audiri non posse videt, ab eo petit ut sibi
rogati respondeat, seque doceat ea pascua, in quibus
versatur, quò sine aberratione, sineque pudoris aliqua
iactura celerrimè ad ipsum veniat: vnde sequitur.
NE VAGARI INCIPIAM POST GREGES SODALIVM TVORVM.
Id autem est, ne dum locorum ignara te requiro, ab-
errem per diuersa loca, atque alium ex alio de te ro-
gans, omnes sodalium tuorum caulas circumeam
cū dedecore, & probro. Iam quod Latinus interpres
vertit vagari, & in Hebræo est נָשָׁךְ anceps Verbum
est, quo & vagari, & pallio regi Hebræi significant,
quare

quare alij vertunt, ne sim cooperta, & pallio amicta apud greges sodalium tuorum. Coopertam autem cum dicunt, meretricē intelligi volunt, ex cultu quo meretrices eo tempore vti solitas legimus: nam quæ corpus vulgabant suum, pallio amictæ, & capite inuoluto, in biuijs, aut alijs id genus locis, quo cōmeabant frequentes viri, residentes virorum ad se aditus præstolabantur. quod Thamar fecisse dicitur, quæ tali cultu scortum mentita Iudæ focero suo imposuit. Igitur siue hoc, siue illo modo, timet sponsa, aut aberrationē, aut probrum, aut certè vtrumque, & probrum, & aberrationem. Atque hætenus illa: nam quæ sequuntur sponsi sunt, qui rogatus iam adesse fingitur, atque ita dicere. SI IGNORAS TE, O PVLCHERRIMA INTER MVLIRES, EGREDERE, ET ABI POST VESTIGIA GREGVM TVORVM, ET PASCE HOEDOS TVOS IUXTA TABERNACVLA PASTORVM. De quo postremo loco rogatus fuerat sponsus ad id primo loco respondens tradit sponsæ facillimam rationem sui inueniendi: ea autem est, vt hœdos, quos lacte depulso domi inclusos reliquisset, vt ipso pastores facere solēt, fingamus necesse est, ipsa dūctet in pascua. Etenim illi naturæ inductu vestigia matrum agnoscent, ea-que sequentes se ad illas conferent, id est, ad ea loca peruenient, in quibus ipse sponsus pascit reliquum gregem. SI IGNORAS TE, illud te abundat ex proprietate sermonis Hebraici, nec vim accusandi habet, sed nominandi magis. Hispanè aptè diceretur, si no te lo fabes: non enim sponsam arguit, quod se ipsa ignoret,

ignoret, nec illi rationē tradit qua se ipsa agnoscat. Nam id quā ab huius loci sentētia sit alienum, series ipsa rerum superiūs memoratarum abundē docet: quo tantum loco sponsus cum grege esset, se id ignorare sponsa dicebat, non quæ, aut qualis ipsa esset addubitabat. ad id igitur ei respondit, dicens.

SI IGNORAS TE EGREDI, ET ABI POST VESTIGIA GREGVM TVORVM. id est, si tu quibus in locis ipse verfer ignoras, egredere post vestigia gregum tuorum. Hebraicum autem אַחֲרֵי hoc loco plātē extrema pars est ea quæ calcaneo proxima, impressa quæ pulveri vestigium efficit. egredi verò post vestigia hœdorum, quod hic dicit, illorum est vestigia legere, ac ipsos ponē sequi. ET PASCES HOEDOS TVOS IUXTA TABERNACVL A PASTORVM. Nam inquit, eos tu si sequare eo peruenies, quo ipsos naturæ inductus, & matrum amor perducet: ibi quæ eos pascet, vbi ego reliquum omne pecus pascō. id est, ad me, id quod vnum optas, sine errore peruenies. EQVITATVI MEO IN CVRRIBVS PHARAONIS ASSIMILAVI TI, AMICA MEA. Ipso primo sponsæ, ac desiderato aspectu delectatus sponsus, & amore incensus in hæc verba erupisse aptè fingitur. EQVITATVI MEO. Ad verbum EQVÆ ME AL. Præstant equi inter omnia animantia apta membrorū, & totius corporis compositione, atque figura. inest quæ illis elegans quiddam, atque generosum. id quæ cum molli flexu crurum, tum elatione cervicis, oculorum quæ alacritate, tum spiritu ipso, atque hinnitu præ se ferunt: quæ eadem in equabus, quam in equis specio-

C flora

fiora sunt. Valet ergo hæc ab equabus ducta similitudo ad declarandum liberale illud, & ingenuum, & elegans, quod elucebat in sponsæ facie, atque corpore. nec verò id nouum, aut absurdum est elegantem foeminam adolescentem præsertim, & viri expertem equæ assimilari: notum namque est illud Lyrici.

3. Carm. 11.

*Quæ velut latis equa trima campis
Ludit exultim metuitque tangi.*

3. li. Reg.
capi. 10.

IN CURRIBVS PHARAONIS. id est, aduectis ex AEgypto ex regum eius gentis nota appellatione ipsam gentem significans. Nominat autem currus AEgyptios potissimum, quia AEgyptij currus ea tempestate propter eorum egregium artificium habebantur in pretio. ad hæc alebantur in AEgypto ad vehendos currus equi pulcherrimi. Constat autem ex lib. Regum Salomonem ijs, cum equis, tum curribus abundasse. Sed recedit à pastoris persona, quam induxit, cum equos, & currus commemorat. recedit sanè, sed ut, quod sæpius in hoc carmine animaduerti debet, id nunc semel dicamus, Salomon quanuis plurimum hic sub pastoris persona loquatur, tamè interdum personam exuit, idque hoc loco facit: nam curru, equisque iugalibus inuehi, regij potius, quam pastoralis moris est. Nec verò vnus Salomon hanc in scribendo rationem tenuit, omnes potius scriptores quicunque probati, atque elegantes habentur, idem faciunt in allegoria, eamque variant, atque distinguunt isto modo, vel ut satietati occurrant, quam perpetuus verborum translata positorum usus afferret, vel ut orationi

tionem inferant aliquid luminis: seque ipsi interpretentur. Sic ille cum exorsus fuisset ita.

Non dum subacta ferre iugum valet
cervice, non dum munia comparis
equare.

2. Carm. od. 5.

Addidissetque

Circa virentis est animus tuæ
campos iuuentæ, nunc fluijs grauem
solantis æstum, nunc in vdo
ludere cum vitulis salictis

Prægestientis.

Postea citra figuram

—iam proterua

Fronte petet Lalage maritum.

Et Virgilius Iulij dictatoris necem in Daphnidis persona deplorans cum personæ decorum seruasset ferè in omnibus, in illo tamen.

Daphnis & Armenias curru subiungere tigres
Instituit, Daphnis thyrsos inducere Baccho.

Ecloga. 5.

Recessit à decore: propriè enim, & literatè posuit, quod à Cæsare, quo de agebat, factum est. Is enim sacra Liberi patris è Armenia Romam transtulisse dicitur. Idem ubi apum prælia, atque mores, ducta à remilitari, & Romanorum acie, atque castris translatione persequitur, alternis propè versibus nunc in metaphora insistit, nunc propriè loquitur. trāslatè illud

—namque morantes.

Georg. 7.

Martius ille æris rauci canor increpat & vox
Auditur, fractos sonitus imitata tubarum.

C 2 Litera

Literatè, quod sequitur.

--trepida inter se coeunt pennisque coruscant.

Rursus tranilatè.

*Et circa regem, atque ipsa ad prætoria densæ
miscentur*

Proprie porrò

--concurritur æthere in alto

Fit sonitus magnum mistæ glomerantur in orbem.

Sine metaphora illud

Nec verò à stabulis pluuia impendente recedunt

Longius, aut credunt cælo aduentantibus Euris.

Redit ad institutam allegoriam

Sed circum tutæ sub mœnibus Urbis aquantur

Excursusque breues tentant--

*Chryso. in
6. Esai.*

Sed, ut hos omittā, sacri præfatio scriptores, id quod magnus ille Chrysostomus verè animaduertit, quoties allegorias adhibent, adhibent autem illas sæpissimè, nullus enim tropus in sacris literis est allegoria crebrior, eas aut interpretantur ipsi, aut ita distinguunt proprijs notis earum rerum, de quibus verè agunt, itaque temperant, ut prudens lector faciliè assequatur, quæ sit earum sententia, atque vis, quod ut doceam, exempla nonnulla proferam. interpretantur ipsi, ut Esaias in illa vineæ allegoria. Nam eam postquam perfecit, omnibus artis, & ingenij coloribus adhibita breui interpretatione, è vestigio declarat, dicens, Vineæ domini domus Israel est, & vir Iuda germen eius. Et Ezechiel vates similiter quod de gemina aquila, de quæ vinea ab altera illarum confita, versus.

Esai. 5.

Ezech. 17.

versus alteram autem sarmenta emittente, miris allegorijs inuoluit, referauit, & aperuit mox his verbis: Nescitis quid ista significant. Ecce veniet rex Babylonix in Hierusalem, & quæ sequuntur. Distingunt etiam eas allegorias interdum proprijs notis rerum, de quibus verè agitur, ne quis aut dubitandi, aut ineptè interpretandi locus relinquatur, earumque allegotarum plura sunt exempla, sed illud est in primis nobile, quod est apud Ezechielem, quo loco populi Israelitici ingrati aduersus Deum animi, & impios mores vates describens, fœminam quandam inducit, in eū qui se ab infantia aluerat, & adultam in vxorem duxerat, & præter ea affecerat multis, ac magnis beneficijs ingratam, & infidelem. Nā cum accommodatè ad personam inductam, allegoriceque dixisset: In die ortus tui non est præcisus umbilicus tuus, & aqua non es lota, neque sale salita. & paulò infra. Et transiens per te vidi te conculcatam in sanguine tuo, & dixit tibi cum esses in sanguine tuo, dixi, inquam, tibi in sanguine tuo viue. Citra allegoriam adiecit. Et multiplicatā quasi germen agri dedi te, & multiplicata es. Et statim ad allegoriam rediens. Grādis, inquit, effecta es, & peruenisti ad mundum muliebrem: vbera tua intumuerunt, & pilus tuus germinauit, & eras nuda. Tum illa. Et vestiui te discoloribus. Deinde velut oblitus personæ fœminæ addidit. Profecisti in regnū, & egressum est nomen tuum in gētes. Rursus allegoricè. Et habens fiducia in pulchritudine tua fornicata es, & exposui-

Ezech. 16.

C 3. Iſi for-

sti fornicationes tuas omni transeunti. Iterum propriè. De auro meo, & argento meo quod dedit tibi fecisti tibi imagines masculas. Sicque ad extremum usque ex utroque genere figurato, & proprio orationem suam temperat. Item in prouerbijs Salomon, ad illa quæ figuratè dixerat: Bibe aquam de cisterna tua, & fluente putei tui, & habeto eas solus, ne sint alieni participes tui, & sit vena tua benedicta. Propriè, & literatè addidit, id ex quo facillè intelligeremus, quid illis tropis occultè, & verecunde significaretur. itaque ait. Lætare cum muliere adolescentiæ tuæ, cerua charissima, & gratissimus hinnulus, vbera illius inebriet te omni tēpore, & in amore illius delectare iugiter. Sed exemplorum modus iam sit, eoquæ reuertamur vnde digressi sumus. PULCHRAE SUNT GENAE TVAE, SICVT TURTVRIS: COLLVM TVVM SICVT MONILIA. Perseuerat in laudando sponsæ formam non solum naturali, & suo bono præstantem, sed etiam cultu ipso commendabiliorem redditā, quod ipsum elegantis formæ argumentum est. Nam quæ forma excellunt fœminæ, & incultæ placent, & cultæ nitent. quod cōtra accidit incōcinnis, & deformibus. Quamquam hoc loco & Hebraicorum elementorum similitudo causam variæ interpretationis attulit, alijs ita transferentibus, pulchræ sunt genæ tuæ sicut turturis, alijs in turturibus, sed vtrouis modo se habeat istares, illud certum est, mūdi muliebris partes quasdam, & certi generis fœminea ornamenta his nominibus turturum, & monilium significari, quæ

quæ autem illa, aut qualia sint explicare non est facile: nam quidam Hebraicum תור, quod vetus interpres turtur vertit, catenulas ex auro pertenuas esse volunt: quidam perexiguas gemmas, plures vno filo insertas. quidam sigilla perexigua turturum ex auro, argenteve scitè facta. Memoria teneo signa fœminarum per antiqua vidisse me, quorum capiti inerat mitra cætera ad græcum morem efficta, nisi quod à mitræ margine, ab ea parte marginis, quæ tempora attingit fila per plura ducebantur, quæ ad genas usq; pertinebant. Quod ornamenti genus non solum est per antiquum, sed Palæstinis id, atque Syris fœminis olim fuisse vsitatum ex eo conijcio, quod Arabes, qui nostra tempestate Africam obtinent, plurimum vtuntur ijs, siue filis, siue licijs, nō solum in penulis, quas è lana, & serico conficiunt ad imbres arce-dendos, sed etiam in tyaris lineis, & prælongis, quas multiplici flexu capiti circundant. Verosimile est autem isthæc mitræ marginibus fila pendentia, è lino intorto vulgò fieri solita, ditiores verò, & nobiliores fœminas aurea illa gestasse, aut pro illis vsas fuisse tenuibus ex auro catenulis, aut margaritarum item tenuium, & filo insertarum pluribus ordinibus, quorum ad extrema addita essent sigilla turturum aurea, & perexigua, idque ornamentum vocari Hebræis תורים multitudinis numero. Hæc cum scribebam, didici à quodam Arabe, cuius utebar opera, idē quod ego coniectura ex antiquis signis descripsi fœminæ capitis ornamentum, aut certè illi valdè simile, nūc
in vsu

in vfu esse Arabibus fœminis, vocariq̃ue ab illis p̃a-
 tria lingua Humalhazen. Esse autē vittam lineā acu-
 pictam longam octo digitos, latam tres, eius ab alte-
 ro margine duci plures ordines filo infertorum, aut
 orbiculorum aureorum, aut margaritarū tenuium,
 aut mixtim vtrorumq̃ue, eam vittā cæteris, quibus
 capita ornant, Arabes fœminas superaddere solere,
 religareq̃ue arcto nodo, ita vt margaritarum ordines
 illi, qui è vitta pendent ad cilia fere pertineant, &
 fronti, atque temporibus inuolitent. Atque hæc de
 turturibus. Monilia porrò quæ Latinus interpres ver-
 tit, & Hebraice חרוזים dicuntur nomen, vt quidam
 volunt permutatione vnius literę à חרז deductum, è
 cedro torno elaborati minutissimi globuli perfora-
 ti, & filo iuncti, quibus pro torquibus vtuntur fœ-
 minæ esse dicuntur. ij nunc, vel è corallo, hebenove,
 vel è gagatis minutissimis fragmentis fiunt. Id igi-
 tur colli ornamentum, hoc loco cedri multitudinis
 numero appellatur. simili figura, atque in Hispano
 sermone idem ipsum ornamentum vocitatur, Los
 corales, Los azauaches. Sunt etiam nonnulli, qui id
 nomen à verbo חרז quod attenuare significat dedu-
 ci volunt, sonareq̃ue dicunt Haruzim attenuata, aut
 minuta, vocari verò ea ornamenta attenuata, pro-
 pter exiguitatem, & tenuitatem earum partium ex
 quibus constant. MURENVLAS AVREAS FACIEMVS TIBI,
 VERMICVLATAS ARGENTO. Quod superius turtures hic
 murenulas vertit: nā in Hebræo vtrobique חרוזים le-
 gitur. ex quo intelligitur, vel ipso Hieronymo teste,
 turtures

turtures muliebre ornamentum esse. *M V R E N V L A S*
A V R E A S. Quoniam, ut video, inquit, genis tuis, at-
 que ori decus addunt ista ornamenta: iam et tibi ex
 auro atque argēto facienda curabo, quo eis, & liben-
 tius utare, & ornere magis. *D V M E S S E T R E X I N A C C V B I*
T V S V O, N A R D V S M E A D I D I T O D O R E M S V V M. Alternis
 prope versibus sibi inuicem respondent, & amore
 certant inter se: idque iure faciunt. Est enim turpe in
 amore vinci. Ergo remunerat sponsum nardo, vel
 potius promittit se remuneraturam, pro turturibus
 aureis, quas ab eo dono acceptura erat: atqui ut viro-
 rum est, aurū dare amicæ, quo se ornet, sic scemina-
 rū, vnguentis imbuere amatores suos, officiosasque,
 & amantes erga ipsos se ostendere, hoc præcipue
 officij genere. Aptè igitur Salomon utrique perso-
 næ dedit, quod utriusque erat maximè proprium.
I N A C C V B I T V S V O. Hebraicè *מחב* quod orbem, aut cir-
 cuitum sonat. Accipitur autem hic pro triclinio, sic
 ab Hebræis appellato propterea quod antiqui cu-
 bantes, & thoris cubito innixi, atque in orbem posi-
 ti, cibum capiebant. *N A R D V S M E A*. De nardo Plinius,
 & Dioscorides. Huius radix odore præstat, è qua vn-
 guentum suauissimi odoris olim conficiebatur, cu-
 ius Galenus meminit, de quo vnguento etiam ille.

Nardi parvus onyx eliciet cadum.

Id vnguentum Græci *nard* vocant. Hebræi autem
 eodem, quo fruticem ipsum nomine appellant *נרד*
N A R D V S M E A: suam nominat propterea quòd eo vn-
 guento ipsa, ut cinnamum suauissimo, & odoratissi-

D mo

mo maximè delectaretur. DEDIT ODOREM SUVM à consequentibus rem notauit: perinde igitur est, ac si diceret in te, mi rex, cū discubueris effundam Nardi pyxidem: dabit tunc Nardus mea odorem suum, id est effundetur: nam vnguenta cum effunduntur, tunc maximè emittunt ex se se odoris vim. Sed cur in conuiuio, & non in cubiculo potius? quia seruit suæ gentis consuetudini. Etenim Hebræis in more erat quos ad conuiuium vocabant antequam discubberetur, vel in ipso accubitu, vnguentis perfundere, maximè autem id faciebant, cum aut magistratum, aut superiorem aliquē inuitabant. Itaque apud Ioan-
Ioan. 12. nem Maria in caput domini Iesu in triclinio sedentis nardi preciosissimi vasculum infudisse dicitur. Et Christus ipse apud Lucam in 7. nō sine tacita reprehensione Simonis qui ipsum inuitauerat, & id officium, vel fastu, vel negligentia prætermiserat, huius moris meminit dicens. Oleo caput meum non vnixisti: hæc autem vnguento vnxit pedes meos. FASCICVLVS MYRRHÆ DILECTVS MEVS MIHI INTER VBERA MEA COMMORABITVR. Proximè superiora grati animi indicia erant, hæc autem tenerè amantem animum declarāt. Non solūm, inquit, vnguentis te perfundam meis, quod qui non amant officio interdum, & gratificandi studio, & patrio more magis quàm charitate aliqua inducti faciunt: sed quantum amant fœminæ rosam, quamque illis charum, & gratum est è floribus corollas sibi, & fasciculos concinnare, quos ad nates admoueant, & sinu in suo recōdant: tam ipsa
te,

te, & præ oculis gero, & intra meum pectus verissimo amore recondo. Nam neque tu minus pulcher es quam rosa, neque ego patere rosæ sinus potius, quam tibi pectus meum volo. Ducta est autem omnis hæc oratio ex communi more adolescentularum fœminarum, quibus plurimus est, atque pergratus rosarum, atque florum usus. Myrrhæ porrò fasciculus, qui dicitur, is è myrrhæ floribus atq; folijs confectus, & concinnatus est intelligendus: est enim myrrha humili stipite arbor in Arabia, & Syria maximè proueniens, cuius flores, atq; folia suauis odore sunt.

BOTRVS CYPRI DILECTVS MEVS, IN VINEIS ENGADDI. Eodem quo superiora sensu, etiam hæc dicuntur, nisi quod ipsa similitudinum geminatio, & eiusdè sententiæ repetitio ad amoris vim magis declarandam pertinet. Quid autem copher sit, pro quo vetus interpres Cyprum posuit, quid vineæ Engaddi, incertū sanè, quando vetustate cum rebus ipsis, multorum etiam nominū cognitio oblitterata est. Itaque alij aliud: vetus interpres Cyprum vertit. Cypri autē nomine arborem eā intelligit, cuius meminit Iosephus non Cyprum insulā, vt quidam nimis imperitè arbitrantur, alij Caphuram esse putant: alij genus palmæ quoddā. Qua in dissensione valdè est verosimilis illorū sententia, qui Copher Hebræis dici volūt id arbutū, è quo elicitur balsamū, quod est viti simile. Idq; fit credibilius ex eo, quod additur. IN VINEIS ENGADDI. Nam Engaddi vrbs est ad mare mortuū, vt in lib. Iudic. scribitur, quo in loco vites quæ ferunt balsamum

D 2 mum

mum maximè prouenire Iosephus est author capit.
 27. libri quarti Iudaicæ captiuitatis. ECCE TV PVL-
 CHRA ES AMICA MEA: ECCE TV PVLCHRA. Contentione
 non solùm laudandi studium accenditur, sed amor
 etiam ipse auctior efficitur: & quò plura hi coniuges
 inter se dicunt, eò plura dicere audent. Neque sibi ipsi
 satisfaciunt, mutuoque in aspectu defixi vtrique ab
 altero gratior semper ad oculos species venit: miran-
 turque se inuicem magis, quo magis in se ipsi intuē-
 tur: quæ ex admiratione ista sunt. ECCE TV PVLCHRA.
 ES AMICA MEA: ECCE TV PVLCHRA. Non solùm inquit,
 pulchrè ornata, vt ante dicebam, sed tu ipsa per te, &
 tua sponte pulchra. OCULI TVI COLYMBARVM. Memi-
 nit oculorum in primis, quia in illos præcipuè acie
 ipse oculorum suorum directam, & intentam habebat:
 & ex illorum luminibus dulce ad se transferebat lu-
 men. Ad hæc quia hæc corporis pars magnum mo-
 mentum habet ad pulchritudinem in vtramque par-
 tem, idcirco commemorat oculos, vel solùm, vel pri-
 mum. Etenim turpibus oculis nulla quamuis hone-
 sta facies placeat: pulchri autem, & gratè micantes
 ipsi per se commendare formam possunt. Columbe
 autem, quarum neminit, non Hispanæ, aut Italæ
 accipiendæ sunt, quæ parum certè oculorum pulchri-
 tudine præstant, sed quas Syria, aut Palæstina alit co-
 lumbas, ab ijs similitudo ista ducitur, quarum esse di-
 cuntur formosissimi oculi cum figura, tum splendore.
 ECCE TV PVLCHER ES, DILECTEMI, ET DECORVS. Sua il-
 li verba resignat, nec sine corollario quidem, addidit.
 enim.

enim, & decorus. Pulchritudo in membrorum corporis apta figura cum quadam coloris suauitate consistit: decor verò, & venustas, & dulcedo (nam omnia ista Hebraico *דוג* significantur) nō in partium figura modo, sed in motu etiam, & sermone, inque habitu, cultu, aspectu, ac omni denique actione cernitur, idque recte concinnitas appellatur: concinnique, & apti, & falsi, qui eo præstant, contra qui carent, incōcinni, inepti, insulsi: atque vt pulchritudo ea, quæ ex membrorum apta figura existit, nisi hac concinnitate conditur, insulsa planè sit: ita cum ad eam hic sal accessit, efficitur eiusmodi nihil, vt ea fieri possit conditius, præstat igitur vtraque laude sponsus, id est perfectè, & cumulatè pulcher est, idque ita sponsæ videtur: quod magis declarant quæ sequuntur.

ET LECTVLVS NOSTER FLORIDVS, TIGNA DOMORVM NOSTRARVM CEDRINA, LAQVEARIA NOSTRA CYPRESSINA. Non solùm inquit tu pulcher es, sed lectulus etiam noster, nostraque domus tota, à te pulchritudinem mutantur: & ob id ipsum quia tua sunt, florere mihi omnia videntur, atque aurea esse: quod ex amantium loquendi consuetudine ductum est, vt cætera omnia. Quanquam in eo, quod lectuli mentionem illa fecit, ad mutua amoris gaudia inuitasse ipsum videtur, tacitè tamen, vt vtriusque scilicet, & amantis, & pudicæ fœminæ personam à Salomone induci intelligamus. Nam lectuli commemoratione facta, & illius amœnitatis exposita, pudore impedita sponsa reticuit, ac desiderij sui indicem, penè iam erumpen-

D 3 tem.

tem vocem verecunde cohibuit. Cuius ego rei mentionem idcirco facio, quia video inesse in eo aliquid quod ad sublimiorem illam, & solam veram intelligentiam apto, & utili sensu possit transferri. Quod hoc loco dictum intelligi volo observari à me, & in alijs locis ubi quidpiam simile attigero. Atque hactenus verborum, quem diximus sonum persequuti sumus, & quasi in scæna res ageretur, suas cuique personæ voces dedimus, siue potius à Salomone datas sumus interpretati: iam sub ijs personis, & corporeorum amorum imaginibus, quid arcani, ac diuini lateat aggrediamur dicere pro eo quantū nobis Deus intelligentiæ, ac sermonis concesserit. Est enim magna res, & planè supra hominis vires, & deniq; eiusmodi, ut vix possit intelligi, nisi ab ijs, qui eam non tam doctoris alicuius voce, quam ipsa re, & suaui amoris experimento à Deo didicerunt, de quorū numero non esse me, & fateor, & doleo. Sed qui nos in hanc scribendi, siue voluntatem, siue necessitatem induxit Deus, is, uti spero, scribētes adiuuabit, ea ut doceamus, quæ cum ipsi, cui vni gratum facere cupimus accepta, tum sanctæ Romanæ ecclesiæ, cui omnia nostra probari volumus, sint utilia. Deo igitur auspice sic ordiamur.

EXPLANATIO.



On stare video ferè inter omnes, in his personis effictos animi iusti amores, & expressam imaginem vitæ spiritualis declarari: amorem inquam Dei erga suos, ipsorum item erga Deum

Deum prona, & incensa studia: quæ expiè acta vita
oriantur voluptates: quam sint dulcia virorum bo-
norum cum Deo colloquia, quam familiares con-
gressus, aliaque item omnia, quæcunque pertinent
ad hanc vitæ rationem. Sed vtrum hic singulorum
tantum, an communiter omnium bonorum ratio
explicetur, id est, vtrum in hoc carmine declaretur
amor Dei erga singulos bonos, an potius erga ipsum
cætum, & conuentum bonorum, quæ græco voca-
bulo ecclesia dicitur, in eo non omnes consentiunt,
quanquam mea quidem sententia cur dissentiant
causa nulla est: cum vtrunque non solum verum sit,
sed necesse sit esse. Nā & ratio totius semper ex par-
tibus existit: & in natura ipsa qualis est descriptio
vniuersi talis est ratio singularum eius partium, pro
portione tamen cuiusque partis. Quare fateamur in
his personis non ecclesiæ modo, sed cuiuslibet etiam
pij, ac fidelis hominis imaginem inesse, & posse hoc
diuinum carmen aptè referri ad vtrumque genus. Id
quod priscis, & nobilibus scriptoribus placuisse vi-
deo, quorum vestigijs libenter insisto. Sed quemad-
modum hos probo, ita illos probare nullo modo
possum, qui vtrumq; interpretationis, & sententiæ ge-
nus dū simul sequi volunt, neutrum assequuntur; sed
confundunt, atque miscent vniuersa: carminisq; hu-
ius partes quasdam ad Ecclesiam propriè pertinere
volunt, quasdam alias de singulis pijs hominibus in-
terpretantur. cum contra deberent, aut tantū in al-
terutro genere interpretationis insistere, aut vtrūq;
exequi

exequi ad extremum vsque integrè, & non interrupto filo. Nec enim adduci possum, vt existimem, partem vnã carminis huius in vnã ecclesiam quadrare: partem aliam singulis iustis propriè conuenire: sed totum illud cum singulis, tum vniuersis verè accommodari posse arbitror: id què factum à Deo credo, vt cum in vna ficta persona sui erga nos amoris imaginem expressisset, eamque notis nobis rerum corporearum, & verbis & sententijs formasset, obieciissetque oculis contuendam nostris: in eam nos intuètes, cum de Ecclesia, id est, de omnibus bonis communiter, tum de singulis bonis propriè cogitaremus. Maneat igitur hoc, quod moueri non debet, in hoc carmine, non solum de vtroque genere agi, sed totum ipsum, cum ad singulos, tum ad vniuersos communiter pertinere: illosque errare, qui in eo, quod vnum, atque continens est, partitiones sine causa faciunt. Mihi porro non est in animo de vtroque genere scribere in præsentia. Effet enim nimis longum, mihi que id permolestum, qui ad has scriptiones, non vt alij animi, aut oblectationis causa, sed necessitate quadam compulsus accessi. Non igitur agam de vtroque, sed id exequar tantum, quod ad singulos pertinet: atque ita exequar, vt demonstrẽ Dei amantem hominem per singulos amoris gradus ad summum vsque euehẽ, atque perducĩ: & quos progressus ille in amore facit, & quo ordine facit; eos, eodem ordine, & via, miroque, & rerum, & sententiarum textu in hoc libello explicari. Nam
quod

quod nonnullis visum est non cohærere satis inter se partes huius carminis, nec certo aliquo ordine, atque vinculo iungi, sed ex diuersis tanquam cento nibus constaretotum, vtpotè conflatum è pluribus amatorijs sententijs magna diuini amoris mysteria explicantibus, verùm nullo certo copulatu inter se cohærentibus, id ego falsum puto, atque eo magis puto quò magis attento animo singula, quæ hîc dicuntur, considero. Initia profecto, & tanquam incunabula diuini amoris primo dicuntur: progressus deinde, & incrementa: postremo ad supremum amoris gradum dicendo peruenitur. Et qui ordo rerum inter ipsas est, idem carminis totius, eiusque sententiarum existit. Nec est aliquid eorum, quæ in hoc amoris tanquam stadio currentibus accidunt, vel in carceribus, vel prope carceres, vel in ipso spatio, vel cum ad metas est peruentum, quod non hîc suo quodque loco ponatur. Idque vt ita censeâ multis, & magnis causis adducor, quas omnes si iam explicare vellem, carminis huius propè verba omnia hîc in ipso initio, & interpretationis introitu, percurrere mihi essent, & interpretanda: confecissemque iustum commentarium in ipso commentationis vestibulo, quod esset perabsurdum. Quare suis quæque locis commodius explicabuntur. illud vnum modo. Cum in hoc animi ad Deû amoris ascensu sint tres gradus, è quorum infimo per medium ad supremum peruenire quisque potest, & verò multi perueniunt: quos gradus viri sancti, & horum amorû periti, & distinxerunt

E

stinxerūt olim, & notauerunt proprijs nominibus. Nam qui in infimo gradu esset, cum incipientem appellarunt: cum idem ad vltiora profecit, proficientium gradum tenere dixerunt: vbi autem ad supremum euasit, iam perfectum ipsum nominantes perfectorum in gradu collocarunt. Igitur cum hæc ita sint, dico ad hanc tripertitam vitæ, atque graduum diuisionem, hoc omne carmen à Solomone accommodatum esse: & illos tres gradus, quamuis nominibus eorum tacitis, re tamen ipsa, atque vi positos esse ab eo in hoc carmine affirmo. Deum amare incipientis affectus, atque voces describuntur, à capite. 1. vsque ad capitis. 2. partē illam. Vox dilecti mei, ab eo loco ad illum capitis quinti, vbi eadem verba, scilicet: Vox dilecti mei, repetuntur, proficientis in amore tota ratio declaratur. Reliqua verò carminis ad finem vsque, perfectorum in amore propria planè sunt. Itaque his tribus in locis, trina fit pulchritudinis sponsæ commemoratio: eaque laudibus celebratur ter. Primo parcius, idque à solo sponso: deinde vberius, cum ab sponso, tum à nonnullis alijs: postremo effusissimè, & copiosissimè, & ab sponso, & ab omnibus. Ex quo intelligitur hîc amoris quosdā gradus describi, & quid intersit inter ipsos poni: tum quomodo à primo ad medium, ab eoque ad summū perueniatur doceri: huiusque rei demōstrationem, verum huius libri augmentum esse: eoque tanquam in finem referri, omnem illius orationem, omnesq; sententias. Quem nos finem præcipuè intuentes in
cum,

eum nostram interpretationē maximè dirigemus:
ac primum dicemus exordia amoris, eorum scilicet,
qui in primo, & infimo amandi gradu consistunt
Spiritus sancti verba, & tanquam vestigia legentes,
quorum initium hoc est. O S C U L I T V R M E O S C V L O O R I S
S V I. In animi ad Deum ascensu, ut diximus, sunt gra-
dus tres: horum autem singuli plures, atque varias
res in se se continent. Cōmune est omnibus, ut à vo-
catione Dei initium sumant: nam nisi Deus nos, aut
viæ oblitos vocet, aut languentes in via atque resi-
dentes, ad institutum iter peragendum excitet, atq;
adiuuet, neque de principio iustitiæ iter aggredi, ne-
que id ingressi in eo progredi postea possimus. Igi-
tur vocemur à Deo necesse est, siue qui in peccatis re-
sidemus adhuc, ut noxium torporem à nobis repella-
mus, siue qui in bono aliquos iam progressus habe-
mus, ut ad vltiora, & meliora contendamus. Porro
qui vocati sunt, neque ad eam vocem aures obtura-
uerunt suas amare Deum statim incipiunt, ac esse cū
eo vnà quærunt. Deus verò hunc eorum amorem,
& desiderium sui, primū obiecta aliqua re molesta,
ac difficili probat. Etenim multi sunt, qui vocati au-
diunt, & cælestis dulcedinis primo gustu capti, atque
inescati amore erga Deum ac desiderio accendūtur.
Sumus enim natura omnes voluptatis appetentes,
atque auidi. At iidem, si accadat, ut ob pietatis cau-
sam, subeundus sit illis labor aliquis, aut quidquā mo-
lesti perferendum mutata voluntate, ab instituto
amore discedunt, suntque de illorum numero de
E 2 quibus

Luc. 8.

quibus Christus. Qui super petram, ij sunt qui cum gaudio suscipiunt verbum Dei, & in tempore tentationis recedunt. Igitur quos vocat Deus, & à quibus se diligi, atque amari videt, eos primo probat, deinde pertentatos, atque probatos fauore complectitur: eorumque desiderio, atque honestæ, & probabili voluntati obsequens, illabitur iucundè in ipsorum animos: ipsoque illapsu, eos tum erudit interioribus sermonibus blandis, & salutaribus: tum ingenti quodam gaudio, atque voluptate perfundit. Hoc autem illapsu, & eruditione humana mens se maior efficitur: itaque supra naturam elata suam ad corpus deficit, & ad Deum tota rapitur. Tot igitur rebus, nimirum vocatione Dei, amantis animi desiderio, eius probatione, illapsu interiori, amatorio, & dulci sermone, ac tandem raptu, siue, vt græco verbo significantius dicitur *κοινωνία*, eorum singulorum, quos diximus, graduum tota ratio cōstat, atque perficitur. Singulorum dico, ne quis putet ex ijs quædā esse propria eorū qui in primo gradu cōsistunt: quædā ad eos qui profecerūt, aut iam perfecti sunt pertinere. Vniuersa namque in singulos gradus cadūt, expressiora illa quidem, & illustriora sunt in altioribus: omnia tamen in singulis inueniuntur: quod ipsum in hoc carmine non obscurè perspicitur. Nam cum omne id diuisum sit in partes tres, quarum singulæ singulorum graduum continent explicationē, omnia ista quæ diximus, è quibus vniuscuiusque gradus ratio completur, in singulis partibus rerum corporea-

corporearum vocibus, & velaminibus mire tecta describuntur, terque eadem omnia quamvis pluribus verbis, illustrioribusque sententijs in vna quam in alia parte amplificata, & exaggerata magis: tamē eadem ipsa ter in hoc libro repetuntur, neque præterea quicquam aliud additur, aut commemoratur. Sequamur igitur hoc filiū, quo nullo neque magis certo, neque magis fido vti poterimus ad huius carminis tanquam labyrinthi ambages, & sinuosos flexus sine errore obeundos. eoque fissi pedem in hæc adyta inferamus: quorū in vestibulo, ac primo limine imago nobis occurrit animæ recenter ad Deum amandum conuersæ, ipsumque desiderantis, ac se ex desiderio afflictae, itaque dicentis. OSCULETUR ME OSCULO ORIS SVI. Prætermissa vocationis Dei commemoratione, & expositione, hanc primā partem Solomon exorsus est, à desiderio amantis animi, quod meritò, ac iurè fecit. Nam illa vocatio prima qua reuocatur ab impietate homo, non ad amantem fit, sed ad inimicum, atque hostem. nequē quia nos aliquid prius fecimus, quod gratum Deo, & acceptabile esset, idcirco vocamur, sed contra potius quia vocamur, quia quē cælesti hausto lumine videre incipimus quam præcipiti, & periculoso in loco versemur, nos colligimus ipsi, pedemque ab impietate reuocamus, sicut scriptū est: Non quasi nos ^{1. Ioan. c.} dilexerimus Deum, sed quoniam ipse prior dilexit ^{4.} nos, & rursus: Quoniā Deus prior dilexit nos. Quia igitur qui ad primam iustitiam vocantur, non dum

E 3, ipsi

ipsi iusti sunt, aut Deum amant, sed ad id potius vocantur, ut iniusti esse desinant: Deumque amare verè & ex animo incipiant: ideò nō decuit, ut in eo carmine, quod totum amatorium est, quodque ad mutuos Dei, atque hominis inter se amantium sensus explicandos comparatum est, atque confictum: eius rei mentio fieret, quæ ad eos propriè pertinet, qui Deo inimici sunt. Id enim si factū à Solomone fuisset, inducendus etiam ab eodem esset, ac verbis fingendus homo, quales sunt qui vocantur, animo à Deo auerso, & in terram prono, atque defixo. Contineretque hic liber non tam animæ Deo nuptæ epithalamium, quàm læsi, & violati amoris reconciliationem. Quare illa Dei prima vocatio, omninò hic inferenda non fuit, sed ex alijs, qui à Solomone conscripti sunt, libris, quique hoc carmen ordine præcedunt sumenda. Qui profectò libri toti, Prouerbiorū, & Ecclesiastę libros dico, in hac vocationis ratione, atque doctrina multum versantur: idque maximè agunt, ut partim monitis, partim minis, atque terroribus homines à flagitiosa vita reuocent ad honestam. Itaque in ipso libri Prouerbiorum initio, aut paulò post initium diuina inducitur sapientia, omnia vrbs loca obiens: atque è loco edito intenta, & exaudibili voce clamitans, itaque dicens. Intelligite paruuli astutiam, & insipientes animaduertite. Ad hæc ancillas mittens, quæ suis verbis illis dicant. Si quis est paruulus, veniat ad me: & insipientibus locuta est. Venite, comedite panem meum, & bibite vinum

Prov. 8.

Prov. 9.

vinum, quod miscui vobis, relinquit infantiam, & viuite, & ambulate per vias prudentiæ. His igitur vobis, & hortatibus qui paruerunt, quique ab erroris itinere, quod instituerant, pedes retrahentes suos, in domicilium sapientiæ se contulerunt, & pulchritudinis illius amatores facti sunt: eos præceptis iam, atque monitis satis instructos ab se dimittunt illi libri: traduntque Salomoni per Itabirium, atque Libanum, perq; Carmeli myrteta ad Ierosolymam vsq; id est, per amoris gradus omnes ad culmen ipsum amoris hoc carmine perducendos. Atque quemadmodum hoc carmen libros illos sequitur: ita quod illis in libris perfectum iam est, hîc haud repetit Salomon, sed eo posito ad ea, quæ sibi perficienda restabant progreditur. assumitquè hominem iam è superioribus suis scriptis satis edoctum, & ad Deum conuersum, id est, iam vocatum à Deo hominem, & ex peccatore iustum effectum: eiusque hominis, quæ deinceps vitæ ratio futura sit, quivè amoris cursus aggreditur explicare: non quasi de altero loquens, sed eum ipsum qui vocatus est, sub ficta persona inducens loquentem, &, quod vocationem statim sequitur, aspirantem, & anhelantem ad Deum, cuius iam aliquem gustum in ipsa vocatione perceperat. Vocationem cum dico, eam, quæ interius in animo fit, intelligi volo: quæ tota diuini luminis infusione, & cælestis voluptatis sensu perficitur. Etenim Deus quos vocat, eo vocat, quòd illorum mentibus immittit lumen suum, facitque sicut scriptum est, lucem splendescere.

splendescere in tenebris: quodque præbet illis aliquem sui gustum, quo gustu efficitur, ut incipiat illis esse dulce & optabile: quod antea non ad palatum modo, sed ne ad aspectum quidem admittebant. Sed iam isto dulcedinis, & voluptatis illicio inescata anima, quid dicat, audiamus. OSCULETUR ME OSCULORIS SVI. Præterita, inquit, mea studia condemno:

Chrys. homilia de turtura.

August. in solilo. c. 1.

quidquid ante hoc tempus dilexi, frustra me illud, & sine causa dilexisse fateor: quod iudicavi suave aliquid in vita, aut dulce esse, errore deceptam me iudicavisse dico: verorum bonorum, tuique in primis dulcissimi amoris gustu priorum amorum omnem sensum amisi: fastidio illos iam, abominor, detestor. Quantum à veritate umbra distat, aut potius quantum interest inter dulce & amarum, tantum tua bona illis bonis antestant. Illa vino similia, inanem lætitiā, modo, & spes fallaces, & gaudia vana quædam afferunt: eosque qui ipsis indulgent dementes, & ebrios reddunt: illa caduca sunt, turpia, misera: at vbera tua, amoresque tui suavissimi: promissa tua, & ea quæ exte sunt bona, vera, æterna, gloriosa, plena lætitiæ plena honestissimæ voluptatis. Hæc sola appeto, solaque bona esse duco. Horum quoniam quædam ex parte, compos effecta sum, quoniamque ex turpi vita, & meretricia abs te erepta, magnoque abs te eodē in precio habita sponsa tua esse cœpi, iam in thalamum tuum introferri ardentissimè cupio, idque vnum suspiro. Nam quæ hactenus abs te accepi, ea non tam cupiditatem meam expleverunt, quam incitarunt

incitarunt & auxerunt desiderium. Quo enim plura ex te haurio, eo ad te magis sitio. Confirma igitur quod in me operatus es: tuum beneficiū, atque munus amplifica, possim te præsentē præsens amplecti: fas mihi sit dulci tuo ex ore legere sanctissimū illum spiritum, cuius iam nonnullam partem accepi, cuius communionē viuo & spiro: cuius vel primus gustus tam dulcis mihi fuit, ut præ eius dulcedine vel ipsum vinum, quod hominis cor latificare maximè dicitur, hoc est, vniuersa ipsa mortalium studia, & quidquid terreni, ac falsi homines pro suauis, ac dulci habent, sordere mihi, & putere iam incipiat. Porro non sine causa Solomon in ipso sermonis exordio tam multus est in vini, vberum, osculorum, amorum, id est, rerum quibus voluptas, & dulcedo significatur commemoratione. Nam est id incipientium, de quibus nunc agitur, proprium, ut in ipso suę ad Deum conversionis initio, colliquescant voluptate toti, utpotè qui afficiantur dulcedinis quodam genere maximè conspicuo, atque sensibili & ad corpus ipsum non solum ad animum pertinente. Etenim ea tamquam cœa capiuntur à Deo, captique aluntur eo usque quoad tenera illorum vis, & quasi infans virtus sensim adolescens, ac viribus aucta maioribus solidioris cibi redatur capax. Est enim illis pastus is omnium convenientissimus, & aptissimus. Nam homines corporeis voluptatibus dediti, eisque diu, ac multum assueti: haud facillè possent exuere, earū amorem, ipsasque contemnere, nisi alterius melioris illius quidem, sed

.E non

Psal. 33.*Matt.* 11.*Psal.* 30.*Psal.* 35.

non alienæ à corpore voluptatis sensu delinirentur. Ob eamque causam in sacris literis Deus voluptatis potissimum, & dulcedinis ostentatione peccatores ad iustitiam inuitat: vt est videre multis in locis. Gustate, & videte quoniam suavis est Dominus. Iugum meum suaue est, & onus meum leue. Quam magna est multitudo dulcedinis tuæ, quam abscondisti timentibus te. Et illud maximè. Torrente voluptatis tuæ potabis eos. Ex quo etiâ efficitur, vt istorû erga Deum amor imperfectus, & parum purus sit. Habet enim adiunctum eum amorè quo se quisque, suasque res diligit immodice: qui non solùm impurus amor est, sed impuritatis atque vitiorû omnium seminarium atque caput. Itaque quoniam in virtute colenda, Deoque amando, qui istius gradus atque ordinis sunt corporis illam dulcedinem, non solùm animi lætitiâ, atque iucunditatem, id est, quod sibi gratû, atque dulce est, si minus præcipuè, tamen valdè cupide sequuntur, atque expetunt: idcirco id vt doceret, aut potius vt tacitè significaret Solomon talibus exordijs vsus est. OSCVLETVR ME OSCVLO ORIS SVI, QVIA MELIORA SVNT VBERA TVA VINO, FRAGRANTIA VNGVENTIS OPTIMIS, OLEVUM EFFVSVM NOMEN TVVM. In quo, quid audis præter voluptatem, aut quæ efficiunt voluptatem? oscula petuntur, côm memorantur vbera, prædicantur amores, vnguentorum mentio, atque vini fit: nec nisi voluptatem ex Deo capere sponsa, & ob id ipsum cum illo coniungi velle videtur. Sed videam⁹ quod sequitur. FRAGRANTIA VNGVENTIS OB

TIMIS.

TEMIS. Tribuit odorem Deo, & vnguentorū fragrantiam, quo significet non solum gustatu dulcē ipsum esse, sed etiam olfactu. hoc est, non solum piorum hominum desideria dulcedine afficere solere, sed ad eorundem etiam mentes influere cum voluptate. Non enim solum cum amatur delectat animum, sed etiam cum intelligitur voluptate ipsum afficit, dum videlicet ex omni natura fluentes suæ diuinitatis species, atq; significationes nobis odorandas obijcit. Odor namque, vt in ijs rebus, quibus propriè inest, sic ad diuina translatus, non naturam ipsam Dei significat: sed illustria eius naturæ signa, siue in naturis rerum expressa, siue extantia in sacris literis: attamen quanuis Dei natura odor non sit, tamē isto odore testatur Deus se non procul abesse à nobis. Quæ autem hîc odoris nomine significantur indicia aduentantis, aut præsentis Dei, ea in libris Regum, ^{3. Reg. 19.} ventorum, & procellæ, atque ignis nominibus declarantur, cum Deus scribitur visus in monte Oreb ab Helia propheta, quorum nominum singula suas habet, & arcanas significationes, de quibus aliàs fortasse dicemus. OLEVM EFFVSVM NOMEN TVVM. Rectissime Deus oleum effusum nominatur, quo intelligatur eius naturæ se per omnia diffundentis potestas, atque vis. Etenim si, vt modo dicebam, odoris nomen in Deo, non tam naturam Dei significat, quàm eius naturæ significationes, & indicia nos illius admonentia, & non longè à nobis abesse ipsum testantia, consequens est Deum, qui tot signa sui in omni

F 2 natura

natura impresserit, verissimè non odoratum modo, sed odorem ipsum, atque adeo effusum odorem appellari. Non enim possumus pedem ponere, nisi in aliquo illius vestigio, quidquid intueamur, quocunque conuertamus nos, certatim ex omni parte confluunt, & in oculos nostros incurrunt variæ, ac multiplices diuinitatis species: quæ nos commouët, & nisi simus plane stupidi accendunt amore Dei, sicut scriptum est. *Psal. 18.* Cœli enarrant gloriam Dei, & opera manuum eius annuntiat firmamentum: Dies dei cruciat verbum, & nox nocti indicat scientiam. Nec solum in illustribus illis, & æternis naturæ partibus cœlum dico, & stellarum lucentes globos clara species diuinitatis elucet, sed etiam in ijs naturis, quæ infimæ omnium, atque despectissimæ habentur, in terra, & in ijs quæ terra continetur & aluntur, magna bonitatis Dei vestigia apparêt, & existût. Sequitur. IDEO ADOLESCENTULÆ DILEXERVNT TE. Vox Hebræa נָחַם puellam innuptam, & viri experte significat: ducitur autem id nomen ab occultando. Nam *Chrys. homilia 14. in Marc.* נָחַם Hebræis occultare est. Significat igitur alma si rem sequamur adolescentulam: si etymon, quod ita est abditum, atque reconditum, vt non modo hominum vsibus, sed ne oculis quidem pateat. Ex ijs igitur significationibus, nimirum ex eo quod nomen ipsum significat, & ex nominis notatione ipsa: (nā ex utroque similitudinum translationes in sacris literis duci solere, idque metaphore genus maximè proprium esse earum literarum, postea fortasse opportuno.

portuno magis loco dicemus.) Igitur iuxta has duas rationes arbitror hoc nomine declarari duo piarum mentium genera sagacissima omnium ad Deum odorandum, ex ijs quæ diximus signis, atque vestigijs. Nam quemadmodum nō omnia corpora æquè sensu valent, sed pro corporis constitutione diuersa, aut pro victus ratione varia, alij obtuso sunt, atque hebeti sensu ad olfaciendū, alij sagaci, atque acri, sic mentium, atque animorum variæ sunt species: eisdemq; è rebus, alij parum, alij permultum afficiuntur. Sunt igitur in hac diuini odoris per omnes cœli, atque terrarum tractus sparsi percipiendi, atque sentiendi facultate, atque munere maximè præstantes, atque sagaces: primo eorum mentes, qui puellarum innuptarum modo puri, & integri, & in semel suscepto iustitiæ bono stabiles permanentes nullam maiorem labem ex quotidiano hominum conuictu contraxerunt: deinde illorum qui vitia, quibus aliquo tempore oppressi tenebantur, exuerunt tandem aliquando: & non modo ad bonam frugem se receperunt, sed in portum quietis longe ab hominum frequentia semotū etiā, se contulerunt, vitæ genus sequentes abditum, & ab hominum tumultu, & interpellationibus liberum, & secretum. Horum vtrorumque animi, tam illorum qui integritate adolescentulis sunt similes, quam illorum, qui secretum illud vitæ genus sequuntur, in odorando, id autem est, in Dei significationes omnes, quanuis tenuissimè datas, præsentiendo maximè vigent. Etenim id vt possint

F 3 illis.

illis præstat ea animi puritas quam nitent: illaque tanquam mundities mentis vix vlla vnquam sorde maculata. Hi verò idem propè consequuntur, fugiendis, vt hominibus, humanisque studijs magnam sibi animo requiem, & curarum atque cupiditatũ tranquillitatem comparent. Nam sicut corporibus obiecta specula, quo vel à natura, vel ab arte leuiora, & nitidiora effecta sunt, eo corporum illatas imagines absolutiores, & magis conspicuas reddunt: sic quorũ animi, vel conseruata innocentia vitæ, vel comparata ex secessu mentis tranquillitate, quam purissimi sunt, omnium facillimè, has naturæ Deum testantis atque prædicantis tanquam voces percipiunt. Et quemadmodum ipsi à naturali, & recto animi statu, vix vnquam discedunt: nec suam naturam peruertunt, atque deprauant peccato, aut iniquitate grauiore aliqua: sic quidquid naturale est maximè cum illorum mente, atque sensibus congruit: seque ad illorũ animos perfacile insinuat, expeditissimeque ab eis intelligitur. Nihil autem tam naturale est, quam vt quæ à Deo condita sunt, ipsum Deum testentur conditorem esse suum. Has igitur voces, & tanquam testimonia naturæ, quæ eorum hominum, qui vitijs immerguntur occupatas, siue potiùs obturatas aures, velleuiter perstringunt, vel certè præteruolant, ij soli quos diximus, & maxima facilitate audiunt, & earum hortatu vocum ad Deum amandum atque laudandum maximè inducuntur: & ex vniuersi inspectione eum sensum percipiunt, qui omnium suauissimus

simus est sensus, maximèque naturalis. Ijs namque verè cādidi dies fluūt, ijs soles meliùs nitent. TRAHE ME POST TE CVRREMVS. Trahēdi verbum Latinorum vsu significationem habet cum quadam violentia coniunctam. Nam trahere propriè significat motum alteri iniicere, neque duci se volenti, neque ductori parenti: vnde est illud

Fata volentem ducunt, nolentem trahunt.

Cæterum vt ab hac verbi exquisita, & subtili interpretatione non nihil hoc loco discedamus, res ipsa postulare videtur: atque eo magis quod verbum Hebraicum מִשָּׁךְ pro quo Latinus interpres posuit trahere in sacris literis motum magis amore à volente elicitum significat, quam vi expressum à nolēte, quod illa sanè indicant. In vinculis Adam traham eos, in funibus charitatis. Item Ieremiæ illud: Id circò attraxite miserans: nam ad significandum motum inuitis, & repugnātibus iniectum Hebræi verbis מִשָּׁךְ & מִשָּׁחָה potius vtuntur. & quidē cum in motu violento duo sint, alterum quod, qui mouetur vi ab altero sibi addita, & impressa mouetur, alterum quod inuito illi & repugnanti externa illa vis additur, & immittitur, Latini id vtrumque vno trahendi verbo satis significant: prius autem illud à posteriori secretum, id est motum inditum, & incitatum ab externa facultate, quam facultatem is qui cietur, non inuitè suscipit in se se Hebræi מִשָּׁךְ verbo proprie significant, Latini vno fortasse verbo non expresserint. His expositis facile intelligitur, quid sponsa dari sibi ab sponso, & concedi

*Osca. ii.
Iere. 31.*

concedi velit. ardet illa quidem studio ipsum inse-
quendi, sed eam vires deficiunt: itaque non induci
vt velit sequi, sed vires sibi suffici vt possit, id verò
cupit, atque orat. Nam quamuis non solùm quæ in
posteris, & consequentibus, sed etiam quæ prima
susceptione honesta sunt, Dei inductu à nobis, & in-
stituantur, & perficiantur: nec solùm ad præclarè ali-
quid agendum, sed ad honestè etiam cogitandum,
atque adeò ad primos, & interiores animi motus, ad
celestem salutem modo, & fœlicitatem pertinentes,
vires nobis Deus, & copias suppeditet. sicut scriptũ
est. Qui dat nobis, & velle & perficere pro sua bona
voluntate: tamen quemadmodum nō omnes se ha-
bent eodem erga pietatem modo, neque eosdem in
virtute progressus faciunt omnes: sic non petūt om-
nes eadem. qui in peccatorũ, atque carnis cœno de
fixi hærent, ij petant non solùm vt recti officij obi-
tus atque defunctio, sed etiam vt ipsa rectè obeundi,
rectèque agendi officiosa voluntas sibi detur à Deo,
non solùm vt salui sint, sed etiam vt se saluos aliquã-
do tandem verè, & ex animo velint: quoniã in vtro-
que infirmi sunt, & in rectè facto, & in rectè faciendi
honestam voluntate (rectè factum, honestamque vo-
luntatem cum dico eam intelligo in qua meritum
est beatæ vitæ) itaque qui huiusmodi sunt ea petant
si possunt: nam id ipsum vt petere studiosè, & arden-
ter possint est illis à Deo tribuendũ. Qui verò à pec-
cati iugo liberati Deum iam studiosè amant, sed quã-
uis amant, is eorum amor varijs, & crebris curis, &
difficul-

ad Philip.

2.

difficultatibus impeditur, ita vt quod animo satis comprehensum habent, ad Deum sibi esse, & velis, & remis contendendum re ipsa præstare, atque exequi vix possint: in quo genere ponendi sunt ij, quos incipientes vocamus, & quorum voces, atque sensus hoc capite contineri, atque explicari diximus. Multa enim ex priore consuetudine, atque vita ad progrediendum in amore impedimenta in eorum carne, atq; sensibus remanent: multi interiores, atq; immites hostes, qui honestarum actionum tanquã itinera obsident & infestant. Plurima, eaquæ arctissima à cognatis, ab amicis à domesticis iniecta vincula, quæ illos quamuis inuitos, & ea omnia abrumperre cupientes, varijs tamen modis implicatos, & irritos detinent. Igitur qui tales sunt spiritu prompti, *Proue. 7.* carne autem infirmi: quique cum Paulo dicunt, velle adiacet mihi, perficere autem non inuenio, non tam volunt induci se vt Deum ament: quippe quem iam ab eodem ipso Deo amandi facultate accepta vero amore, & charitate prosequuntur, quàm orant, & omnibus votis expetunt, vt illa, quibus ipsorum ad Deum cursus retardabatur, impedimẽta: illa arcta vincula Deus ipse dissoluat, viresque suggerat ipsis languentibus, & parum adhuc firmis, horumque propria vox ista est. TRAHE ME. Quod autem additur. POST TE CVRREMVS. Id primum valet ad Christianæ charitatis ingenium declarandum; quæ, quas sibi dari optat vires, atque copias, eas in illos vsus confert, qui propriè ad amorem erga Deum alendum, & in

G maius

maius prouehendum spectant. Non enim qui Deū amat præstare auct vllis corporis aut animi dotibus, nisi quibus fiat instructior ad amorem nauandum meliorem operam. Deinde inest in hoc Christiani officij imago quædam, atque descriptio, Deo ante tot annos per suum vatem Euangelici instituti perfectionem docente. Etenim non solum sequi Deū, sed contento cursu ipsum sequi desiderat. Atqui sequitur Deum qui Dei præceptis tanquam vestigijs, quibus ad Deum peruenitur, insistit: cursu autem sequuntur, qui ad sanctissimi Christi consilia mores suos instituentes opibus se, & honoribus abdicantes, voluptatesque spernentes ab se abijciunt huius terrenæ vitæ non tam præmia, quam honesti cursus impedimenta, in quo Christianæ religionis absoluta perfectio consistit. Sequitur. *INTRODVXIT ME REX IN CELLARIA SVA.* Hic docemur quæ sit eorum qui Deū iā amant, & quanta erga ipsum fides. Illi enim quem admodum à charitate habent, vt vna cum Deo semper esse cupientes dicant. *OSCVLETVR ME OSCVLO ORIS SVL.* ita à fide vt affirmant, *INTRODVXIT ME REX IN CELLARIA SVA.* Id autem est tam firmam illos fidem de veritate, & bonitate Dei concepisse, vt neque aduersis rebus fracti: neque temporum diuturnitate fessi: neque impiorum commotivocibus ijs, quibus, & multum, & sæpe in bonorum studia, atque spes cauillantur: animum vnquam despondeant: nec verò dubitent quin ad optatos, & spe perceptos peruenturi sint complexus Dei, magnasque ex eo, & utilitates, & volu-

& voluptates percepturi. Non enim si cunctatur interdum Deus, idcirco perpetuò suos negligit. Neq; si vocatus nō statim faustus, & salutaris nobis adest, ideò censendus est contempsisse nos, aut non exaudivisse: neque illi profectò quorum erga Deum fides acris, & ardens est, quia illum sæpe vocarunt, sæpeq; suas preces fuderunt coram illo, precum autem & lachrymarum suarum nullum adhuc fructum retulerunt, idcirco desistunt à precando, ipsa potiùs dilatione accenduntur magis, tantumq; absunt ab eo, vt aut spem abijciant, aut animo concidant, vt sicut ignis ventorum flabris paulatim accensus, ad extremum flammarum ingentes globos voluit, sic illorū fides ipsis difficultatibus, atque ipsa Dei tanquā cunctatione sensim aucta, atque crescens in eum tandē modum ipsorum animos afficit, vt sæpe id quod sperant, bonū pro adepto habeant: speq; quā re nō secus læti dicere non dubitent. INTRODUXIT ME REX IN CELLARIA SUA. Idque adiungant quod sequitur. RECTI DILIGUNT TE. quasi ita dicentes. Idcirco amaris, atque diligeris, quia tametsi differas interdum, nunquam tamen frustraris vota tuorum: imò, verū si dicimus, ne differs quidem, sed cum maximè nostri oblitus videris, tunc ad benefaciendum obseruas, & ad opitulandum nobis, quod maximè opportunū sit, atque aptum tempus. ac si minus citò quam ipsi cupimus, at nunquam non eo tempore, quo nos cupere oportet propitius. & salutaris ades. Quod si huius fidei rerum aduersarum contentione auctæ exē-

plum aliquod in sanctis viris quærimus, illud certè Dauidicum perillustre est. Is enim cū tantum abesset ab eo quod illi pollicitus fuerat Deus futurum, vt Iudæorum populis imperaret, vt regis inimicissimi, & potentissimi iram metuens profugus, atque ipso natali solo carens, de vita quotidie, non modo de fortunis cæteris periclitaretur, essetque vel sua ipsius confessione valdè miser, atque ærumnosus, vsque eo non defecit, vsque eo fide in Deum vixit, vt illo ipso tempore quò se maximè oppressum malorum multitudine, atque magnitudine videbat, & prædicabat, non dubitaret, & regnum sibi polliceri, & eos vanos atque mēdaces appellare, qui ipsius fortunam in melius verti posse negarent: itaque scribere de hac sua, & fuga, & spe, Credidi propter quod loquutus sum, ego autem humiliatus sum nimis, ego dixi in excessu meo, omnis homo mendax. Cū inquit, patriam fuga linquens aditum mihi ad meliorem fortunam interclusisse, & omnem bonam spem abiēcisse ita videbar alijs, actum vt de me iam esse dicerent: dixi, omnis homo mendax: mentiri illi quidem certè possunt, & verò mentiuntur, tua autem promissa rata, & firma manebunt. INTRODVXIT ME REX IN CELLARIA SVA. Sed quæ nam sunt ista cellaria quærat aliquis, ad quæ pias mentes Dominus introducit? Hic quanquam non est necesse vt similitum inter se omnes partes conueniant, tamen rectè dicemus, ijs cellarijs eas significari res, in quibus exhibet se visendum, & contemplandum Deus, aliqua illu-

illustriori ratione. atque ut præteream cæleste templum, quod est Dei proprium Domicilium, id enim est maximè interius penetrale, in quo, qui introducuntur non imaginem aliquam Dei, sed ipsum qualis est, Deum aspiciunt, sed ut hoc præteream, quoniam ad id nemini patet aditus in hac vita, tria reliqua cellaria sunt, triaque penetralia, in quæ dum hîc viuitur, introduci à Deo incipientes solent, ad gaudia ex ipso capienda. Incipientes inquam, nam qui robustiores iam ac perfectiores sunt, interdum corporis omni sensu deposito, mente obeunt, altiora quædam & cælestis, ac intelligibilis lucis magis plena loca. Igitur minores versari solent interiùs, & iucundè cum Deo ab ipso intromissi: primùm ad rerû naturæ inspectionem, deinde ad cognitionem sui ipsorum: postremò ad earum rerum contemplationem, quas Christiana disciplina, ac literæ continent. In primo genere elementorum vires: temporum vices, ortusque, atque altus animantium, cælorumq; in primis atque syderum species, atque motus continentur rati, atque constantes: alterum cõstat ex corporis, atque animi, & eorum partium omnium, & earum singularum muneris & officij, tum etiam ex summi boni cognitione: ad tertium atque postremum pertinent legis Dei: non eius modo quæ natura indita, atque innata est hominum mentibus, sed illius potiùs, quæ sacris literis traditur, & rerum à Deo hominum causa gestarum, quarum historia eisdem in literis continetur, inspectione, &

G 3. intelli-

intelligentia. His namque in adytis, & tanquam penetralibus domus Dei, penetralibus inquam: nam etsi harum rerum nonnullæ oculis, & sensibus subiectæ nostris, in primo limine huius, de quo agimus domicilij, inque ipso eius vestibulo esse videantur, tamen re ipsa ita abditæ sunt, itaque sunt difficiles ad intelligendum, quomodo quidem à pijs hominibus intelliguntur, ut opus sit à Deo intromitti nos, atque duci, quo fructum aliquem ex earum inspectione capiamus. His itaque in cubilibus incredibile diu est pij homines, quot, & quantas voluptates percipiāt, ut gaudeant, ut sermones familiares cum Deo conferant, ut erudiātur ab eodem ipso, ut denique in eius dulci foelicique complexu acquiescant. Qua in re vel vnus David, quem cælestis spiritus per omnia diuini domicilij quamuis interiora loca perduxit, testis est satis locuples: nam de spectabili cæli, mundi-que specie, rerumque naturæ & varietate, & admirabilitate, vigesimum primum, & centesimum tertium Psalmos scripsit. Humanæ verò naturæ præstantiam breui quidem illo, sed magnis sensibus pleno carmine est complexus: is autem est Psalmus octauus. Postremi porro ita sæpe, itaque multum meminit, ut ferè nihil aliud concrepent illius scripta omnia, quàm studij, & meditationis in lege Dei laudem, & commendationem. atqui est quædam horum penetralium inter ipsa distinctio. Nam sunt alia alijs interiora, atque diuina magis, tum pro eo, quantum quisque nostrum in virtute profecimus magis, minusvè

minusvè nobis patent: quanquam sunt omnia illa eorum, qui in primo amoris gradu consistunt propria loca: non quod alij vegetiores nunquam eo introducantur, sed quod imbecilliores propterea quod parum adhuc à cōmercio sensuum corporis recesserunt necesse habent commoueri, atque pelli hac rerum sensibilibus imagine. Atque ob eandē causam arbitror sic cellaria nominari multitudinis numero. Nimirum quia incipientes, vtpotè qui sint rudes, & infirmi, nisi multiplici doctrina instruantur, nisi quæ varia eruditio exhibeatur illis, vix possunt induci ad Deum, vti æquum est, diligendum. Nam illi perfecti vnum habent, vt antea dixi, id quæ altius & multo istis interius penetrabile. Itaque hoc ipso in carmine inferius cap. 2. quo loco in amore proficientiū persona, & oratio explicatur: sponsa non iam in cellaria intromittitur, sed in vnam cellam, eam quæ vinariā. Ex quo intelligimus illos, proficientes scilicet, atque perfectos, quippe quorum animi vires multo magis quàm superiorum vniuntur, atque conspirant in amorem Dei, minus multis egere rebus, quibus prouocentur ad amandum: tum eosdem frui contemplationis Dei quodam magis dulci, magisque vno genere, quam priores. Quid? num à me ista finguntur, an potius ex ijs exemplis, quæ nobis suppeditat sacræ literæ petuntur, atque ducuntur? Iudæi quandiu per deserta Arabiæ loca perrexerunt, quoniam Aegyptiæ vitæ, atque morum residens in illorum animis recens memoria efficiebat, vt crebrò respectarent,

rent ad AEgyptum: quoniam què in amando Deū
erant plane rudes, atque tyrones, quot & quam va-
rijs modis inducti sunt ad id, vt colere Deum ex ani-
mo, atque amare vellent, quam illis Deus exhi-
buit curam multiplicem: quot patefecit aditus, qui-
bus tanquam intrare in amorem possent. Primum
per mare rubrum sine ratibus, incolumes illos trans-
uexit, AEgyptiorumque ingentes copias, quę ipsos
insequebantur eodem summersit mari. deinde no-
ctu flamma, interdium fumo, ac nube, eorum castra
præcedens vasta cremo, atque inuia pro duce illis
fuit. Eosdem per continuos quadraginta annos cæ-
lesti aluit, atque suauissimo cibo: & quod fidem su-
perare videtur, toto eo tempore vestes eorum vsu,
aut vetustate consumi non est passus: ad hæc aridissi-
mo, ac maximè sterili loco, atque adeo è rupe ma-
gnam aquæ vim, qua illi vterentur, elicuit. Eodem-
que postremò pertinuit, quod mons Sina treme-
re, quodque montis cacumen ignibus ardere visum
est: quodque ipse Deus palam vulgo est auditus lo-
qui, leges æquissimas ferens. at posteaquam iidem
illi in terram ipsis promissam sunt inducti, & officij
obseruantiores effecti, Deus omnes rationes proui-
dentia suæ erga illum populum, veluti coegit, atque
contraxit in vnum locum, quem in locum è tota
prouincia conuenire omnes voluit, quicumque vel
sacrificare sibi vellent, vel in dubijs rebus ipsum con-
sulere. Iam quando illius populi status cum nostro,
id est, cum Euangelica lege collatus, pueri illi, & im-
becilles.

becilles, vt Paulus scribit nos firma ætate viri, quod *Gali. 4.*
 ad cognoscendum, & amandum Deum attinet cen-
 sendi sumus, quanto paucioribus nos, quàm illi ad
 pietatem, vel ceremonijs prouocamur, vel legibus
 erudimur, vel ritibus instituimur: nosque ipsi quan-
 to simpliciore, ac veriore, ac magis vno modo à mori
 Dei vacabimus, ei que adhærebimus, cum ad perfe-
 ctam virtutem euecti, in eam ciuitatem recepti fue-
 rimus, quam scribit Ioannes, auro illam quidem & *Apoc. 21.*
 gemmis exædificatam, omni que ex parte beatissi-
 mam, sed ita vacuam ab omni operosa, & varia co-
 lendi Deum ratione, vt ne templum quidem in ea
 sit, quoniã ipse Dominus templum illius est. Ex quo
 intelligitur perfectos homines minus multis egere
 rebus, quibus rebus ad amandum excitentur, & mo-
 ueantur, ac multiplicia ista cubicula ad insinuandum
 se in amorem Dei imperfectorum esse propria. sed
 quo propriè afficiatur modo hominis iusti animus,
 quidve illi accidat, vbi ad isthæc cubicula semel est
 admissus, si roges: ex ipsa sponsa statim audies. EXUL-
 TABIMVS, inquit, ET GAUDEBIMVS IN TE, MEMORES V-
 BERVM TVORVM SUPER VINVM, RECTI DILIGVNT TE.
 Primùm enim exultat, hoc est, effertur gaudio, non
 sine cõmotione corporis, ac sensuum gestiente qua-
 dam lætitia. quod proprium exultantis esse videatur
 corpore cõmoueri, atque exilire. idque fit notius ex
 eo verbo, quod huic voci in Hebraico subiicitur *והא*
 Guil enim non sine gestu corporis, atque etiam læto
 vocis sono, atque plausu fit. quo de genere canit Pro-
 pheta:

H pheta:

Psal. 83.

pheta: Cor meum, & caro mea exultauerunt in Deū
 viuum. itaque exultat primum. Etenim, tum dulces
 lachrymæ fluunt, tum ducuntur ex imo pectore ar-
 dentia suspiria, tum piæ querelæ audiūtur, tum deni-
 que ardere sibi videtur homo totus, atque æstare:
 correptus videlicet ab ipso numine, seque haud ca-
 pit ipsa mens. Itaque exultat, deinde gaudet, id autē
 est, Deo paulatim progrediente, suamque vim in ho-
 minis animum penitus insinuante, omnesque illius
 vires sibi subijciente, tandem inferiores illæ, & cor-
 poreæ facultates, quæ se dudum ad insolitam numi-
 nis præsentiam commouerunt, venerabundæ silef-
 cunt, & quietem iussæ agunt: mens verò ipsa con-
 iuncta cum suo bono, & magna ab eodem luce per-
 fusa haurit ex ipso, cum tranquillitate summum, &
 defecatum gaudium, & post commotionem, vt scri-
 ptum est, succedit sibilus auræ tenuis, dicitq; & ipsa
 interdum foelici illo gaudio ebria: Domine bonum
 est nos hic esse. Sed quoniam vitæ huius ratio id non
 patitur, corporis videlicet, cuius tuendi munus, atq;
 cura ipsi incumbit, vocibus ipsam interpellantibus,
 & à Dei tanquam complexu diuellentibus, ac distra-
 hentibus, id vbi fit, vt aciem oculorum suorum ad hæc
 humana referat, & cogitationum suarum partem ali-
 quā corpori impertiatur: illud tamen obseruat quod
 sequitur. MEMORIS VERVM TVORVM SUPER VINVM.
 Desert enim secum dulcem memoriam vitæ foelici-
 ter modo astæ cū Deo, ac hæsītans, multaq; aduersa
 reuertens, crebroque ad litus respiciens fluctibus cu-
 rarum

rarum committit se illa quidem, sed ita committit,
 ut, siue secum agat aliquid, siue cum alio contrahat,
 propositam ante oculos habeat eius pulchritudinis,
 & ordinis quem in Deo conspexit effigiem, quo ex
 eo exemplari, quoad res ipsa patitur, exemplum ali-
 quod ad actiones suas transferat: idque vnum sem-
 per agat, bonum ut illud, quod vidit, quodque ada-
 mauit in omni sua actione exprimat, atque imitetur.
 Namque is demum probandus est, qui hæc interio-
 ra cum Deo colloquia sequitur, eisque vacat, non tã
 ut oblectet se se, quàm ut exempla inde sumat, qui-
 bus, vel suam, vel aliorum vitam regat: quique ex hoc
 beatæ contemplationis tanquã otio, ad vitæ obeun-
 da munera redit paratior, & instructior: & id est
 quod sequitur. RECTI DILIGUNT TE. id est, ex eo quod
 diligunt te, ac tecum colloquuntur, familiariterque
 versantur, recti efficiuntur, & quod bonum in te con-
 templati sunt, & cuius memoriã retulerunt secum,
 id ad actiones deducunt: sequitur. NIGRA SUM, SED
 FORMOSA FILIA HIERUSALEM, SICUT TABERNACULA CE-
 DAR, SICUT PULLES SOLOMONIS. Quod sæpè iam dixi-
 mus, incipientium voces, & ingenia hoc capite po-
 ni, id, vel ex hoc loco, facillimè perspicitur. Nam qui
 sunt huiusmodi, primum multa retinèt de ante acta
 vitiosa vita, quibus recens inductus pietatis color
 in illis quodammodo obscuratur, & inficitur. pro-
 pensiones, scilicet, in malum multas: plurimas vul-
 nerum cicatrices: nonnulla item vlcera, ad sanitatẽ
 illa quidem propè perducta, sed nõ plane sanata, aut

H 2 omnino

omnino puris vacua, & quod maximum est, remanet adhuc in eis, vetus ille, & domesticus hostis, dormitus potius, quam extinctus. Itaque rebellat interdum, & incendia miscet, quibus rebus fit, vt, & formosi, & nigri sint. formosi propter nouam vitam, nigri propter veteris reliquias, quas in se habent: quare isti meritò dicunt. NIGRA SUM, SED FORMOSA FILIA HIERUSALEM. Id est, quamuis nigra ob proximè actæ vitiosæ, & prauæ vitæ reliquias, quas nondum prorsus abieci: formosa tamen, propter charitatem Dei, quæ cordi meo diffusa est: propterque illius gratiæ communionem, qua proxime accedo, ad diuinę pulchritudinis similitudinem. Quæ oratio ex superiori oratione consentaneè orta est. Etenim desiderio, & spes, & timor natura agnatus est. Nā, qui in magno desiderio sunt, ijs natura occurrit, primū vt mente pertractent, vtq; metuant omnia illa, quæ sibi quominus id quod cupiunt assequantur, impedimento esse possunt: deinde, vt ijs opponant alia spem efficientia, eorumque oppositione, metum extenuent, ac bene sperare sibi iubeant: eodemque ex desiderio, & contrahuntur metu, & eriguntur spe. Quia igitur superius, in hac sponsæ, & persona, & imagine inductus est homo, ad Deum amandum proxime conuersus, & eius potiundi desiderio ardens, & sibi de illo omnia fausta, & læta promittens: ideò apte, & conuenienter nunc idem inducitur, quæ suæ persuasioni, atque cupiditati putabantur obstare, ea, & metuens, & extenuans. Nam dum anhelabat ad Deū, subijt

*Orige. ho
mili. 1. in
can.*

subijit illius animum præteritorum peccatorum, eorumque fœditatis recordatio: ex quo graui perculsus metu labascens, ac loco prope motus, de spei gradu pene deiectus est: sed exoritur rursus ab eodem ipso desiderio excitata, & roborata spes, qua sibi vere persuadet, non tam se ex peccati reliquijs, quæ in ipso remanserunt, deformem esse, quam ex gratiæ, & donorum Dei splendore formosum: siquidem ea dona in se habeat: nam vtrum habeat, de eo nemo iustus plane certus est: suspicatur tamen se habere, multis, & magnis coniecturis ad ita opinandum inductus, audetque dicere. NIGRA SUM, SED FORMOSA. Et quamuis nigra, multò magis formosa: nec tam ob nigredinem despicienda, quàm ob decus, atque pulchritudinem amorè, atque fauore prosequenda. Verum enimvero isthæc sceleris admissi, & vlcis atque fœditatis, id est malæ propensionis, ex peccato relictæ, commemoratio, cuiusuis iusti animum, quamuis recuperata diuina gratia sanum iam, & valentem, angit tamen ipsum, atque cruciat: quod peccatum omne ab animi natura, atque indole sit alienum. Quapropter discessisse ipsum à se aliquando, suamque naturam deprauasse, vbi meminit, nimis dolet, nimisque miratur, se potuisse eorum amore capi, quæ tantopere auerfetur, & horreat. Itaque tanti mali causam inquirat. qua in inquisitione cognoscens omne illud existere à corpore, & à sensibus corporis, quibuscum affinitate ipse est, & fœdere naturæ coniunctus, de eorum violentia, atque iniustitia conque-

H 3 ritur:

ritur: & prauè à se factorum culpam in eos ipsos sensus, qui culpæ suafiores illi & authores fuerunt deriuat. vbi autè ista querimonia, & criminis deriuatio? NOLITE, inquit, ME CONSIDERARE, QVIA FVSCA SVM, QVIA DECOLORAVIT ME SOL: FILII MATRIS MEAE PVGNAVERVNT CONTRA ME, POSVERVNT ME CVSTODEM IN VINEIS, VINEAM MEAM NON CVSTODIVI. Quain oratione peccatorum atque malorum omnium fons aperitur, ita apta similitudine, atque translatione verborum, nihil vt putem commodiùs potuisse dici. Quod quo magis perspiciatur, pauca quædam de animæ partibus, de quæ illarum inter ipsas mutuo ordine altius repetamus necesse est. Animi humani tres sunt, siue partes eas, siue vires, facultatesve nominari velimus. Vna quæ vacat corpori alendo, atque curando, quæque idcirco vegetabilis dicitur: communis nobis non cum animantibus modo, sed etiam cum stirpibus. Altera quæ corporis varias species, coloresque, atque sapores percipit, sentiens appellata, animantibus nobiscum etiam communis. Tertia rationis, intelligentiæque particeps, veri vna cultrix, atque amatrix, vt hominum propria, ita præstantior, atque excellentior ceteris omnibus, quæ est ratio, atque mens. Est porro earum unicuique suum à natura attributum bonum, & tanquam de paterna, & communi hereditate pars unicuique data sua, apta videlicet cuique, atque conueniens, pro ratione cuiusque. Nam illi vegetabili parti primæ, atque infimæ, bonum vtile datū est, quod excoleret: sic enim appellamus

appellamus ea bona, quæ ad vitam, & alendam, & defendendam valent. quod esse diximus huius partis munus proprium. Altera, quæ huic succedit, pars sentiens, dulcedinis sensu mouetur, voluptatifq; est auida. Itaque bonum delectabile ex paternis bonis, & tanquam prædijs, vnum prædiū est fortita, in quo se iacet, atq; dominetur. Mens verò, atque ratio, vt est omnium altissima, ita capitur, atque alitur altissimo bono, id autem est bonū intelligibile, quod contemplationi propositum veritas est, ad regendas actiones translatum appellatur honestum, quod nihil aliud est, quam ad veritatis præscriptum moderata actio: cuius tantus est splendor boni, tamque plena dignitatis species, nihil vt ea sit, neque pulchrius, neque admirabilius. Atqui considerandum & illud est. Has animi partes, hæc bona, & vti ea appellauimus, prædia, quæ à natura acceperunt, non accepisse illa instrumento vacua, sed instructa potiùs, & ornata omnibus ijs rebus, quæ ad opus faciendum necessariae sunt. quod quidem instrumētum, etsi partibus sit multiplex, tamen genere reducit ad duo, quorum vnum euellendis ijs, quæ sunt noxia seruit: alterum verò bonis, & vtilibus asciscendis, atque capiendis. Sunt quæ hi duo motus contrarij, istis animæ partibus à natura sati: alter fuga, alter accessu constans. quorum altero vnaquæq; earum partiū, ex eo agri, quantum cuique datum est legit, atque demetit, ea, quæ sibi sunt conuenientia: altero vero noxia, & inimica reuellit, atque abiicit. Sed quamuis sint omnibus

nibus animæ partibus isti motus communiter dati, tamen non æquè in omnibus eminent, sed vna in parte ardentiores sunt, obscuriores in alia. Itaque aliàs alijs nominibus appellantur: nam in vegetabili, dicuntur cōtractio, & dilatatio, in sentiente odium, atque cupiditas: in mente, atque ratione voluntas, & quæ huic contraria est, nomine quæ Latino caret, sed dicatur ea tamen nobis modo docendi causa inuoluntas. Horum primi hebetiores reliquis sunt, & magis obscuri, postremi stabiles, & trāquilli: inter vtrosque interiecti, & medij, odium nimirum, atque cupiditas acres natura, atque ignei, vbi semel corpori, atque sensibus incubuerunt, eos commouent, atque perturbant, itaque inflammant, vt vel ipse ignis præ illis frigere putandus sit. atque huic diuisioni, descriptionique partium, illud etiam est adiungendum: eas omnes, quarum tamen singulæ singulis generibus datæ sunt, vni homini à natura fuisse attributas, & naturali quodam, & arcto fœdere inter se se amabilibus charitatis vinculis colligatas, atque constrictas. atque ne quid tumultus, atque rixæ inter ipsas vnquam exoriretur, lege ab eadem natura lata, sancitum fuisse, vt minores illæ, & inferiores, vegetabilem, atque sensilem dico, quippè quæ rationis, atque arbitrij expertes ipsæ & ad seruiendum omnino naturæ sunt, rationi, atque menti parerent. ratio autem ipsa non dominatum modo in illas exerceret, sed patrocinium etiam earum, & procuracionem susciperet. Nam quoniam illæ cæcæ, & inconsultæ sunt, &

impetu

impetu feruntur in sua bona, quæ tamen ipsa neque parare sibi possunt, neque si iam parta sint, administrare ea ut decet, aut illis frui intra modum sciunt: ideo natura voluit, ut in mentis tutela essent, quæ primum eis sufficiat copias naturalium ipsarum bonorum, deinde præscribat modum, quem in fruendo seruaturæ sint, ut scilicet, eatenus suis fruatur bonis, quatenus, nec sibi ipsis nimia copia, inopiæ vendicium afferant: neque hominum societati, atque generi, cuius in bono suum ipsarum bonum continetur, aliquid incommodent. Voluitque præterea, ut in ea rectione rationis, & quasi tutelæ administratione maxima honestatis vis inesset, utque ex eo accenderetur maximum dignitatis lumen, quo vno bono mens ipsa capitur, ne labores suscepisse tantos illa, sine ullo præmio, sinequæ mercede vlla videretur. Ac fuit tempus quoddam, cum has naturæ leges homo obseruabat, cum, & sensus, & qui in eis existunt affectus rationi dicto audientes erant, quocumque illos ratio duxisset, & ratio ipsa veluti in vigilia quadam corporis manens, & exquisitis imperijs regabat illud, & ab omni externa, & inimica, vi tutum reddebat. Ex quo etiã factum est, ut omnibus animæ partibus inter se conspirantibus, & consentientibus, cum nulli tumultus essent in homine, nulla intestina seditio, sed omnibus in vnum collectis suis viribus, & totus, & semper sibi præsens adesset homo, faciliè in reliqua vniuersa imperium obtineret. Cuncta enim illi tanquam iustissimo Domino, qui quæ in se ipso

I ostende.

ostendebat totius ordinis, atque iustę gubernationis clarum exemplum vltro subijciebantur summa, & facilitate, & voluntate: quo etiã tēpore iustitię, temperantię, pietatis, ac reliquarum omnium virtutum chorus, terras obtinuit. Verum malus dæmō nostro inimicissimus generi, videlicet inuidens hominibus tantam fœlicitatem, passus non est, ea vt nobis, aut perpetua, aut etiam diuturna esset. Et quoniã videbat hominem à se superari non posse, quandiu secū ille consentiens, omnibusque è suis partibus aptus, & cōcinnus permaneret, coniunctionē illam & conspirationem, & mutuum consensum partium dirimere, & in mentis, atque rationis regno seditiones concitare, & turbas ciere in primis conatus est. Itaq; fraude armatus, & serpentis speciē, ob id ipsum quia astu, atque dolo furtim obrepebat, indutus, hominemque aggressus, illum induxit, noxijs, vt illis, & interdictis cibis vesceretur, eisque cibis ipse suum virus immiscuit, facesque occultē subiecit, atque ignē inspirauit. Quo ex cibi esu, veneni que, atque ignis afflatu, hæ partes, quę infimę sunt in homine flammis statim correptę, ac vehementer accensę ruptis omnibus pudoris, atque modestię legibus efferre se, atque liberius agere, fœdusque illud sanctum discindere, turbidęque, & tetrę ferum quiddam, atque belluinum præ se ferentes, & cōtra rationem rebelantes, ruere præcipites, ac turbare omnia cœperūt, ac tandem animi imperium per tyrannidem occuparunt. Nam ratio acriter primo repugnans, tandem
illarum

illarum accensis cupiditatibus, & incredibili importunitate victa concessit : ac deposito regali cultu, & specie, obsequuta illis est seruillem in modum, ipsoque deinceps ex obsequio, atque seruiendi usu, à naturali sua pulchritudine quotidie discedens magis; magisque in deformem, & turpem habitum demutata, à foelicissimo statu, ad summas miserias est deuoluta. Atque hæc prima nostri mali labes fuit. hæc humani peccati primordia: à primo quidē illo homine initio prodita: sed postea propagatione, & nascendi lege in omnem eius posteritatem deriuata. Simul enim cum carne, atque sanguine, quā ab illo nascendo ducimus, etiam contrahimus non solum, labem in animo, sed etiam veneni illius contagione infectū corpus, & ad malum pronos sensus, id est, fomenta quædam, & incendia peccati, ex serpentis afflatu nostræ naturæ iniecta & immissa, quæ latent illa quidē interdum, atque occultantur, sed tempus atque causam nata se produnt, flammæque ore vomunt: quibus inflammati, atque efferati sensus nostri, ac tandem præcipites acti, secum vnâ rationem in consensum trahunt, ad omne dedecus, atque flagitium. Quæ idcirco à nobis enucleatius, & pluribus verbis sunt exposita, vt ij, si qui sunt, qui has literas vel ignorant, vel rudes putant, admirari post hac incipiant, atque adorare ipsarum, non solum in sententijs diuinam vim, sed etiam in eloquendo rationem aptissimam, & elegantissimam. Nam quæ nos tam longa oratione vix explicauimus, ea paucis verbis, ijsque

I 2 transla-

translatis Spiritus sanctus hoc in loco perfectissimè
 complexus est. Nam in persona hominis à peccato,
 ad iustitiam translatus inquit: Nolite me considerare
 quod fusca, vel fuerim antea, vel nunc etiam sim, ob
 reliquias præteritæ vitæ, *QVIA DECOLORAVIT ME SOL.*
 aut sicut in Hæbreo est, *QVIA ASPEXIT ME SOL.* Nam
 Sol hoc in loco, est vis illa ignea malæ concupiscen-
 tiæ nostris sensibus indita, & à capite humani generis
 in nos lōgo ordine successione transfusa, cuius ardē-
 tissimis cupiditatibus, quasi Solis æstu quodam adu-
 ritur, nigraque efficitur hominis mens: & quoniam
 id illi non sua propensione accidit, est enim honesta-
 tis, atque iustitiæ appetēs natura sua, sed aliorum in-
 iuria, atque impulsu, id vt doceret statim subiecit.
FILII MATRIS MEÆ PVGNAVERVNT CONTRA ME. Qui
 autem sunt isti filij? haud dubie corporis sensus ipsi,
 illæque partes animi, quas diximus eodem naturæ sa-
 tu, cum ratione fuisse generatas, & eidem attributas,
 quas regeret, sed dæmonis astu in fraudem impul-
 sas, postea rebellasse. Nam illæ ab eodem parente or-
 tæ, & vnà simul eductæ, aduersum rationem pugnāt,
 aut vt in Hebræo dicitur, excandescunt, & incendun-
 tur, igne scilicet eo, quem ex serpente conceperunt.
 idque eo vsque faciūt, quoad custodem illam ponūt
 in vineis, hoc est, in eis bonis, quibus ex bonis ipsæ
 fructum aliquem lætitiæ, atque iucunditatis perci-
 piunt, efficientes vt ipsarum cupiditati ratio mini-
 stre. Hæc enim vis est huius custodiæ, quam vocat,
 nempe seruire mentem corpori, totamque vacare
 seruitio.

seruitio sensuum:& quæ illis brutis,& infimis animæ
partibus dulcia,& vtilia sunt, ea sola quærere, confi-
cere,& amplificare. Qua ex custodia id sequitur, vt
mēs amittat honestatē,& dignitatē suam:& dū alio-
rū fundos colit, suum ipsius fundū sentibus,& virgul-
tis siluescere patiatur. Itaque elegantissimè & verif-
simè additur. VINEAM MEAM NON CVSTODIUI. Illud
nimirum honestum, cuius possessionem, atque fru-
ctum amisit, dum indulget sensibus, quod ideo vo-
cat vineam suam, non quòd tueri aliarum partium
bona ad rationis curam non pertineat: sed quod hoc
sit illi proprie attributum bonum. Vnde rectè in He-
breo pronomē geminatur hoc modo כרמי שלי לאנשרתי
quod Latine non incommodè vertas vineam semel,
atque iterum meam: eam inquam, quæ propriè vi-
nea mea est, non custodiui. INDICA MIHI QVEM DILI-
GIT ANIMA MEA, VBI PASCAS, VBI CVBES IN MERIDIE.
Crescit ipsa tractatione rerum diuinarum animæ er-
ga Deum amor, seque ipsa melior sensim efficitur,
quòd ijs, qui hoc amoris iter agunt, diligenter obser-
uandum sit, vt nunquam resideant: nam cum quie-
scunt retro referuntur. Sed vt cursum suum ad hoc
sponsæ exemplum, fictum illud quidem, sed tamen
omnibus numeris absolutum semper dirigant. Nam
quæ paulo antè duci se, atque adeò trahi volebat, iā
amantior, & valentior effecta, ipsum iter propè ar-
ripit: tantum impediri se dicit hominum æstimatio-
nis timore quodam, quem tamen ipsum deponet,
atque abiiciet paulopost. Nunc tamē impeditur illo,

I 3 quia.

quia quamuis profecit, tamen non eo usque profecit, ut perueniret ad eam charitatem, quæ omnem pellit timorem. INDICA, inquit, MIHI QVEM DILIGIT ANIMA MEA. Quid? parumne multa sunt, quæ Deum indicent, atque testentur, ut ipse rogandus sit, se uti in lucem prodat, atque manifestet, sui ut nos certiores faciat? Testatur quidem certe omnis natura Deum esse, sed quibus in oris pecus ducet, aut ubi locorum meridietur, quoniam ijs translationibus ea significantur bona, quibus bonorum hominum pastus in hac vita constat: in futura verò requies, & accubitus, quæ altioris ordinis bona sunt, quàm ut ad ea natura duce ascendere, aut peruenire possimus. Ideo necesse est, ipse ut nos doceat, atque deducat, se quæ nobis ipse ac sua ista altioris ordinis bona cælestia, atque diuina, maiore illato lumine ostēdat, & cognoscenda proponat. Quare semper orandus nobis Deus est, ut indicet nobis vbinam locorum ducet oves suas, easque pascat: idcirco quia in eo semper ipso doctore, atque duce indigemus, sequitur:

NE VAGARI INCIPIAM POST GREGES SODALIVM TVORVM.

Quamuis infirmitatis in amore, & imperfectionis sit, quod timet, tamen dum sic affectus animus est, iure sibi cauet, ne dum pietatem, ac cæteras virtutes persequitur, errore viæ in vicina, ac similia virtutibus vitia incidat, ne pro pietate, hypochrisim, pro religione, superstitionem, pro seueritate, crudelitatem sectetur. Nam eæ, atque ijs similes animi labes, falsa honestatis specie conuelatæ virtutes mentiuntur,

ac

ac se pro illis haberi volunt, ductantque & ipsæ, magnos perditorum hominū greges, sequitur. SI IGNORAS TE, O PVLCHERRIMA INTER MVLIERES. Adest precanti Deus, qui propterea hīc potissimum, atq; huic petitioni vltimę respōdisse dicitur, vt ex eo intelligeremus, ex omnib⁹, quæ Solomō in sponsæ personā Dei amatoribus dici, atque agi hactenus expressit, nihil æquē gratum Deo esse, quā quod domo, atq; vrbe relicta demigrare in agrum velle, sponsa professā est, eius videndi, atque fruendi causa. Nam id Deus à suis in primis petere solet, vt se terrenis curis subducāt, seq; vindicent in quietē, & libertatē aliquā quo ipsi vni per ociū vacent: cuius rei in illo ipso, qui nationis piorū primus habetur parēs in Abraham, scilicet, exemplum proditū est. Eienim dixit Deus, *Gene. 12,* egredere de terra tua, & de cognatione tua, & faciā te in gentem magnam. Igitur quia hāc sponsæ vocē libentissimē Deus audiuit, ideo statim à Solomone sponsus inducitur respondens, & sponsæ votis annuens: hoc est, in sponso Deus inducitur exhibens se atque omnino insinuans amanti animæ, & ad illius rogata omnia respondens. quæ iam ad eam partem pertinent, quam diximus ex illapso, & doctrina constare. Quid autem respōdet, aut docet? EGREDERE, ET ABI POST VESTIGIA GREGVM TVORVM, ET PASCE HOEDOS TVOS IYXTA TABERNACVLA PASTORVM. Sed qui greges isti quæso, quorum proponit sequenda vestigia? hīc si ex gregum, & pecudum natura rem interpretemur, necesse est intelligamus significari quasdam naturæ

Pfal. 118.

naturæ partes sensu, & ratione carentes: quarum tamen ex inspectione, & contemplatione inducitur homo ad cognoscendum, & amandum Deum, quales cæli sunt, & astrorum ignes, & mundi totius species, ornatus atque descriptio. Nam isthæc proponi à Deo rudioribus, quo eorum ducatu ad ipsum perueniant testis est sacer vates, cum inquit, Cæli enarrant gloriam Dei, & opera manuum eius annuntiat firmamentum. Sin autem nobis ipsi cōstare volumus, idque agimus, quod harum literarum, atque scriptorum interpretes agere omnino debent, vt hæc cum superioribus aptè cohæreāt, vtque hæc spiritualis intelligentia cum illa corporalium rerum explicatione consentiat, & ex illa ducta omnino, & deriuata videatur, dicendum plane est in ijs gregibus conuentus bonorum ac piorum hominum significari, eosque viros declarari, qui non modo ipsi pietatem colunt, sed voce, atque vita alios ad eiusdem cultum inuitant, qui vnà nobiscum in hac vita versantur, & tanquam domi apud nos inclusi manent, diuisi videlicet ab illo beatiori cœtu, atque grege, quem verus pastor Iesus, beatis in locis reficit sempiternæ pastu voluptatis. His adde etiam eos, qui horum conuentuū, atque cætuum authores olim, & institutores fuerūt, qui ipsi quamuis vita functi sunt, vitæ tamen ipsorum atque virtutis imago viget, ac viuit: quorum sunt incipientibus sequenda vestigia: quia vt sancti doctores tradunt, in ipsis vitæ spiritualis initijs, atque primordijs, dum animus in virtute rudis est, & inexperiens,

riens, & ad lapsiones facilis magis expedit vna cum alijs eiusdem voti, atque propositi hominibus vivere, quàm solitariam vitam degere. Nam solitarium illud, & vere monasticum viuendi genus aptum est solis illis, qui suas cupiditates satis iam edomitas, & compressas habent: itaque perfectorum illud est, im perfecti verò, & incipientes in conuentu, atque grege bonorum sese ad virtutem exercere debent, nec ipsi sibi nouam viam munire, sed inire veterem, atq; aliorum vestigijs, atque itineribus tritam. Quae de re hîc non sine causa admonentur. Nam incipientes vni ex omnibus solitudines amare maximè solent: statimque contemplationi Dei vacare volût, & charitatis vno igne corripî, atque succendi. Quare qui huiusmodi sunt, hæc sibi à Deo dici putent, legant vt prius gregum suorum vestigia, tabernacula pastorum adeant: religiosi hominibus se regendos permittant, communiter cum bonis viris vitam degant: habeant qui se ignaros viam doceant, qui lâguentes excitent, morantes impellant, praefestinantes cohibeant, reuocent aberrantes, vtanturq; aliorum oculis, consilio, rectione, vsque eo quoad cupiditatibus sedatis, & maioribus in animo collectis viribus, ipsi sibi præesse & dominari rectè possint: id cum effecerint, tunc secreta tutò, & beatas illas solitudines petant, ad quas solitudines inferiùs iidem inuitantur, cum scilicet, ad proficientium iam, aut perfectorum gradum peruenerunt: nunc autem quando incipientes sunt, ad pastorum tabernacula commorari iuben

R tur,

tur, alijsque parere: ideoq; sequitur. *EQVITATVI MEO
IN CVRRIBVS PHARAONIS ASSIMILAVI TE AMICA MEA.*
Nam isti eatenus probantur Deo, non si ferarū mo-
do agrestes, & indomiti vitam degant, sed si iugo
sua colla subdi, frēnumore accipere, ac curru iungi,
habenisque torqueri, atque circumagi voluerint.
His namque rebus paratur atque alitur Christianæ
humilitatis maxima illa, maximèque necessaria vir-
tus, quæ tanquam fundamentum, atque solum est
virtutum reliquarum: sequitur. *PVLCHRAE SVNT GE-
NAE TVAE SICVT TVRTVRIS.* Interiorem illapsus quo
Deus efficitur quodammodo præsens animæ, duo
sicut suprà diximus, sequuntur, nempè, eruditio, & vo-
luptas: vel potius ipsius illapsus duplex est vis, vna e-
rudiēs, altera voluptatis efficiens: vtrūq; porrò in ho-
mine operatur Deus, pro portione amoris, quo ab
ipso diligitur, & pro eo gradu, quem in amando obti-
net is, cui se se infundit. Et quidē quod attinebat ad
doctrinam eorū, quorum nūc persona agitur, pro-
ximè explicatum est: nunc quod sequitur, alterā par-
tem continet, quæ ad efficientia voluptatis spectat.
Voluptas autem maximè efficitur ex Dei, atque ani-
mæ inter ipsos dulci, & amatorio colloquio. Ea ergo
nunc colloquia Solomon exponit, quo vno modo
res tanta exponi potuit, ipsos scilicet, inducens mu-
tuo se laudantes, & quam blandissimè compellan-
tes se, eaque dicentes, quæ dici non solent nisi ab ijs,
qui in rei amatæ sinu infusi voluptate nimia colli-
quescūt, ac primo Deus. *PVLCHRAE SVNT GENAE TVAE
SICVT*

SICVT TVRTVRIS, COLLVM TVVM SICVT MONILIA. Lau-
dat nunc parcius omnia, eadem postea cum ad al-
tiorē amoris gradū anima peruenerit, vberius lau-
daturus. Vera animę pulchritudo, charitas in Deum
est. Ea enim vna in cælestis naturæ habitum demu-
tati efficimur Deo similes. Est autem charitas in in-
cipiente imbecilla & exigua, quippequę adolescere
tunc incipiat, & cupiditatibus carnis, quarum adhuc
magna vis est in corpore tanquam quibusdam spi-
nis obsideatur. Cæterum quamuis charitas minus
proferat lumen suum in incipiente: tamen extant in
illo atq; enitent aliæ virtutes, illæ nimirum, quæ ani-
morum cultrices habentur, & ideo καθεστῆσαι, id est pur-
gatoriæ appellantur: quoniam purgandis animis ad-
hibentur. quarum munus est quidquid ex corpore,
& ex ante acta vita existit, quod nocere, aut obstare
charitati possit, id reuellere, & quasi agrum sic ani-
mum sarrire, quo radices altius agere in eo charitas
& melius fruticari valeat. Quæ virtutes, illustrāt illæ
quidem & cohonestant animos nostros, sed nō qua-
si in eis ipsa pulchritudinis vis, & summa absolutio
sit, sed quasi ornamenta accersita, & exterius adhibi-
ta pulchritudinis conciliandę causa. Igitur qui hunc
gradum amoris tenent, in ijs purgatorijs virtutibus,
suam industriam potissimum probant: fiuntque &
ipsi ob hasce virtutes spectabiles, atque conspici
laudeque, & honore digni: quod ipsum hic significa-
tur ijs verborum inuolucris, quibus sponsa pulchra
esse dicitur, non tam propter membrorum aptam

K 2 compo-

compositionem; aut propter coloris suauitatem: ex quibus ipsum pulchrum est, quam propter ascita, & extrinsecus adiuncta ornamenta. PVLCHRAE SVNT GENAE TVAE SICVT TVRTVRIS. Id autem est, licet adhuc parum charitate valeas, parumque amore mei incalescas: in quo vno summa animi pulchritudo consistit, licetque plurimum terreni, ac sui amantis insit in te adhuc, tamen isti ab te suscepti labores cupiditatum extinguendarum causa, vigiliae istae, ista ieiunia, illi luctus acerbi, illique lachrimarum riui largissimi, multum verè pulchritudinis, atque spiritualis decoris tibi addunt, atque conciliant: sed quid monilibus cum lachrimis, aut quæ huius translationis ratio potest esse? Hic ad ipsa Hebraica nomina, pro quibus interpres, & turtures, & monilia posuit recurramus oportet: eaque vnde nata sint, & à qua significatione verborum deducta videamus. Igitur alterum nomen, id est, תור ab eo, quod est disponere, & in ordinem redigere ducitur: alterum ab eo quod est attenuare, & gracilem reddere: vtrumque autem quis est, qui non videat aptissimè cadere in vnam temperantiæ virtutem, cuius officij est carnem luxu exultantem attenuare, & cupiditates se turbide efferentes compescere, & cogere intra certum ordinem. Temperantia porrò ad id efficiendum illis vtitur, quæ commemorabamus ieiunijs, vigilijs, precibus, lachrimis, quæ partim ipsa ex se parit, atque producit, partim ab alijs virtutibus precario sumit, & in suos usus conuertit. Nec verò id solum ex Hebraicorum nominum

minum notatione probamus, sed multo etiam magis ex eorundem significatione, id est, ex ijs rebus, quas ad res significandas assumuntur: nam turturū gemitus, atque querelæ nobiles sunt: ijs autem querelis in arcanis literis animæ vitia detestantis, ac præteritā vitā dolentis lamenta, significari solere sancti & probati scriptores tradūt. monilia verò, quæ collo circūiecta ipsū arctē cōstringūt atq; circūdant, eo nimirū ipso arcto cōplexu atq; ambitu, haud ineptè referri possunt ad declarandum seuerum illud, & austerū vitæ genus, quod seueris continentia legibus coercita, & quasi circūscripta omni immodica & superflua cupiditate, animum constringit, ac circumcirca cōcludit: quod autem sequitur. M V R E N V L A S A V R E A S F A C I E M V S T I B I V E R M I C V L A T A S A R G E N T O. I n e o Deus primū hunc suum amatorem admonet, vt perseueret in eisdem pœnitentiæ & temperantiæ operibus, vtque sibi ex eo virtutum genere maiora adiungat quotidie ornamenta. Deinde illi pollicetur effecturum, vt isti labores, & dulces, & fructuosi ipsi sint, auro videlicet, atque argento pretiosiores: cuius spe promissi erectus ille, gaudioque perfusus, de præsentia Dei, è vestigio respōdet. D V M E S S E T R E X I N A C C V B I T V S V O, N A R D V S M E A D E D I T O D O R E M S V V M. Vide licet, ne quis ipsum ingrati tudinis arguere posset, promittit pro virili sua parte vicem relaturum: hoc est, effecturum boni exempli odore bono, vt à cunctis hominibus laudetur, atque celebretur Deus. sed cuius quæso rei odore? Nardi, inquit, habet autē Nar

K 3. dus.

dus symbolum pœnitentiæ ex charitate profectæ, &
 cum charitate coniunctæ: ex quo intelligi potest quā
 inter se consentiant ista omnia: nam quia iusserat illi
 Deus, vt in instituto pœnitentiæ & temperantiæ of-
 ficio perseveraret, quia quæ eidem promiserat, se pro
 eo quantum in eis virtutibus elaborasset magna præ-
 mia repensurum, ideo apte respondet, se nardo sua
 eaque odoratissima perfusurum ipsum, id est se tan-
 diu perseveraturum in cœptis pœnitentiæ, ac tempe-
 rantię operibus, quoad non modo ipse bonus effi-
 ciatur, sed etiam alijs videatur talis esse: quoad in-
 quam non solum ipse eas sibi conciliet, & in se effi-
 ciat virtutes, easque comprehendat, atque comple-
 ctatur intra se se, sed etiam eo vsque quoad multus
 & suauissimus boni exempli ex eis odor exiēs, & ad
 alios perueniens eos moueat, atque excitet ad lau-
 des Dei. Sed cur præcipuè purgatoriæ istæ virtutes
 odoratæ dicuntur? curve odoris nomen potissimū
 attribuitur illis? quia hominum oculis magis quam
 reliquæ expositæ, maximè eas homines præsentit, &
 maximèque omnes admirantur. quod enim factū
 difficillimum esse iudicat, id quisque admiratur ma-
 ximè: nihil autem difficilius existimatur, quam ex-
 pertem voluptatis vitam in labore, & contentione
 animi semper ducere, propterea quod suis cupidita-
 tibus vulgo omnes inserviunt. Itaque si quem volu-
 prates aspernantem, cultu tenui, atque victu vtentē,
 sanctisque laboribus vacantem vident, vident autē
 facillimè, ex meliore atque diuino quodam genere
 homi-

hominum illum putant, Deumque ob eam rem laudant, quæ Deo est gratissima laus. Igitur hoc loco homo iustus pœnitentiæ operum odore bono cunctos mortales ad Dei laudes excitaturum, eaque laudum voluptate, & tanquam dono Deum remuneraturum se esse, nec ab eo studio edendi quotidie, ac proferendi sibi vtilis, Deo gratos, cunctis hominibus salutare, & prædicabiles pœnitentiæ fructus desitutum vnquam cōfirmat: ideoque adiecit. FASCICVLVS MYRRHÆ DILECTVS MEVS MIHI INTER VBERA MEA COM-MORABITVR. & quod in eundem sensum, eandemq; sententiam statim sequitur. BOTRVS CYPRI DILECTVS MEVS MIHI IN VINEIS ENGADDI. Nam Cyprum, id est, vt supra diximus, opobalsamū corporibus illitū corrumpi ea prohibet, quod item myrrha facit, ideoq; vtrumque apte transfertur ad significandas pœnitentiæ, atque temperantiæ virtutes, quæ immodicis cupiditatibus obsistunt, eisque animum corrumpi non sinunt, quarum virtutum tanquam fasciculis è myrrhæ & Cypri floribus concinnatis sinus suos hic iustus refertit, quo ostendat cordi sibi illas virtutes esse, & quamuis amaras, gratas eas habere. ECCE TV PVLCHRA ES AMICA MEA, ECCE TV PVLCHRA, ET OCVLIVS TVI COLUMBEARVM. Ex sermone instituto cū Deo, eque ipso amoris actu, animus ipse pulchrior, ac melior sensim efficitur, iamque illius amantis species ipsa per se, non solum ob adiuncta ornamenta placere Deo incipit. ECCE TV PVLCHRA ES AMICA MEA. Pulchram, & amicam vocat, & ea re pulchram, quia
amica

amica est: pulchram autem nondum ex omni parte, propter turbidos quosdam motus, quos nondum compressit, sed quod ad oculos attinet. OCULI TVI, inquit, COLVMEARVM. Quod in corpore oculi, id in animo ea vis est, quæ in vltimum, & extremum bonorū appetitu, & amore fertur: quæque à nostris Theologis non prorsus inepto verbo intentio appellatur. nam sicut oculi sunt in motu duces, quibus sine ingredi, sine offensione vix possumus, ita finis vltimi, extremique bonorum voluntate ducimur, atque dirigimur in omni vita, vsque eo, vt neque instituire à principio aliquod opus, neque semel institutum, id rite exequi vllō modo possimus, nisi ea nos vis & inducat, & regat: ex quo ea vna vel recti cursus, vel postremi erroris, aut omnis, aut certè præcipua causa censetur. Nam si ad id quod verè bonū est, semel appulsa in illud intuebitur, & spectabit semper, haud dubie vitæ quasi navis cursum in hoc seculi vasto, & procelloso mari ad certissimam cynosuram dirigēs hominem in portum fœlicitatis inducet: sin autem pro vero bono falsum bonum complexa fuerit, naturam hominis, & naturæ consentanea officia peruertens, illum præcipitabit in interitum, verum autem hominis bonum Deus est. Hunc igitur qui sibi pro fine constituunt, & in eius vnus amorem, atq; cultum omnes suas cogitationes atque studia referunt, ij quamuis interdum impediuntur affectibus, quos nondū exuerunt, quo minus in omni sua actione efficere, atque consequi perfectè possint illud honestum

nestum quod cupiunt, quodque contendentibus ad Deum vnicum, atque directum iter est: tamen multum valent ea ipsa voluntate animi in Deum tanquā in verum & supremum finem, efficaciter per eiusdē Dei gratiam intenta, atque directā: nam ab illa habent, vt & boni & iusti viri sint, & vt Dei filij, & eius ipsius Dei naturæ participes similiter nominentur: non quod nihil deforme, nihilque quod resecari debeat in illorum insit animis, sed quod huius partis vbi illa bene erga Deum per gratiam affecta est, ea vis sit, vt virtute, atque efficientia reliquarum omnium partium perfectionem & absolutionem in se ipsa cōtineat, sicut scriptū est: Si oculus tuus lucidus *Matt. 6.* est, totū corpus tuū lucidum erit. Quare qui animus isto modo affectus est, appellatur sane pulcher, sed eatenus quatenus obtutu, atque intentu oculorum, id est, intentionis ipsius directione in diuinum lumen, ipsiusque diuini luminis atque gratiæ communionē, ignea & micantia lumina columbarum refert. Oculi tui, inquit, columbarum: cui illa. ECCE TV PVLCHER ES DYLECTE MI ET DECORVS. Et quidem sine exceptione vlla, sequitur. ET LECTVLVS NOSTER FLORIDVS, ET TIGNA DOMORVM NOSTRARVM CEDRINA, LAQVEARIA CYPRESSINA. Variè hoc exponitur, lectuli nomine, alijs priuata cuiusque studia, alijs vitæ institutum, vnicuique hominum generi proprium, alijs quiescendi in eo quod quis adeptus est, desiderium & cupiditatem intelligentibus: nos omnes has sentētias, quoniam in singulis illarum aliquid veri inest,

L expone-

exponemus. Qui priuata studia ad quæ quisque natura & inductione animi fertur, in lectulo intelligunt ita dicunt. Cupere omnes, præsertim eos qui in virtute, haud multum profecerunt, Deo gratum facere ijs in rebus, quæ ipsis item grata sunt: nec tam Deum sequi velle, quam ipsum ad se trahere, ac deuocare cupere, eosque propriè dicere. ECCE, TV PVLCHER ES

Hos arguit Bernardus in sermo. 46.

DILECTE MI, ET DECORVS, ET LECTVLVS NOSTER FLORIDVS, ET TIGNA DOMORVM NOSTRARVM CEDRINA, LAQVEARIA NOSTRA CYPRESSINA. Quibus verbis ita fatentur, se affici diuinæ pulchritudinis amore, itaque coniungi cum Deo velle, vt tamen tacitè ad lectulum suum, & ad delicias suas ipsum inuident, pertrahereque conentur ipsum ad ea quæ ipsis dulcia & grata sunt: hoc est, cupiant, atque desiderant probare Deo suum laborem in eis operibus, muneribusque obeundis, quæ ipsi munera atque opera obeunt cum voluptate. Altera sententia & interpretatio est, lectuli atque domus nominibus, translata significari vitæ cuiusque institutū. Etenim vniuersi homines, quo id assequantur, quod sibi summè expetendū proposuerūt, certū aliquod, & ad id, quod quærunt, aptum atque conducent vitæ institutum, atque rationem sequuntur: eiq; vacant maximè atque incumbunt tanquam lectulo. qui diuitias amant, rem augent mercatura, qui honores ambiunt, in populi aut principum gratia colligenda laborant, quos voluptuosa iuuat vita, ij molle ocium persequuntur, ijsque artibus vacāt, quibus fornicularum amor facillimè conciliatur. atque celestis vitæ


vita cum Deo degenda cupiditate tenetur, vita genus eligunt, durum, monasticum, voluptatis expers, laboris plenum, in quo minimum iucunditatis sit, laboris verò, & ærumnarum plurimum. Quia in vita & omnium quæ in vita iucunda sunt negatione, atque fuga, Deum cum inuenerunt, non solum id assequuntur, ut Deus illis, qualis est omni ex parte pulcher, & amore dignus appareat, neque solum id assequuntur, ut ex Deo inuento summas voluptates percipiant, sed etiam, ut illa ipsa quæ inueniendi eius causa subierunt mala, labores dico illos, vigilias, ieiunia, dulcia illis & iucunda, & ampla, & optabilia sint, assequuntur, & obeam rem dicunt. ECCE, TV PVLCHER ES, ET DECORVS, LECTVLVS NOSTER FLORIDVS. Id est, non solum tu pulcher & decorus es, sed hæc etiam viuendi ratio tui inueniendi gratia suscepta, lectulus inquam, hic in quo sedemus, qui quæ nobis per angustus quondam ac vix ferendus est visus, iam vel rosa ipsa mollior sit, atque gratior: nec dubium est, non modo quin ita sentiant isti, sed quin re ita sit, quod illi maximè experiuntur verum esse, quibus res aduersæ aliquando euenerunt: ij enim, si tamen (quod illos facere iustum est) moderatè ipsa mala ferentes Deum æquo animo laudant, ei quæ uni fidunt, eam in medijs malis ex Deo, qui iniuria oppressis semper adest, consolationis, ac suauitatis sentiunt magnitudinem, ut iam non modo constanti & forti animo fortunæ damna perferant, sed ut pro bonis ea, & optabilibus rebus habeant, ex animo quæ, ac vere dicant.

L 2 ET

ET LECTVLVS NOSTER FLORIDVS EST, ET TIGNA DOMO
 RVM NOSTRARVM CEDRINA, LAQVEARIA NOSTRA CYPRES
 SINA. Tertia ac postrema ratio est ea, quæ ex lectulo
 ac cedrina domo quietem in eo bono, quod quis
 adeptus iam est intelligit, atque interpretatur: quæ
 mihi ratio ob id probatur maximè, quod affert sen-
 tentiam, & interpretationem valdè cum superiori
 oratione congruentem & consentaneam. Nam con-
 sequutione optati boni natura sequitur desiderium
 in eo quiescendi, atque sponsa quod vnum optabat
 videre spòsum, atque alloqui, id iam assequuta dici-
 tur. quid igitur restat, nisi vt quod assequuta iam est,
 eripi sibi nolit, vtque perpetuum sibi id, atque pro-
 prium esse cupiat. Hanc igitur illius cupiditatem &
 natura consequens desiderium, hoc loco explicat Solo-
 mon, cum ipsam inducit domum suam & lectulum
 communem, quæ quietis atque ocij sunt loca, lau-
 dantem & prædicantem: nam dum laudat, tacite si-
 gnificat quietem se amare iam, & ad eam votis om-
 nibus aspirare. Et sanè cum omnibus qui labores su-
 bierunt, alicuius adipiscendi causa, insitum est, id post-
 quam adepti sunt, vt cessare non nolint, tum id est
 maximè proprium eorum qui multis, & ardentibus
 cupiditatibus circumfessi, pœnitentiæ labore, tan-
 quam ferro, per medias hostium acies, viam sibi ad
 Deum aperuerunt, id est, incipientium de quibus nunc
 agimus: nam illi quo propter insolentiâ, & Dei col-
 loquia dulciora ipsis, & pœnitentiæ officia magis
 aspera accidunt, eo magis optant vacationem sibi,
 ac

ac requiem aliquam laborum dari, eoque egrius à iā
degustato bono dulcissimo diuelluntur, & ad insti-
tutos pœnitentiæ labores reuocantur: cuius rei ex-
emplum D. Petrus prodidit in sese: nam quemad-
modum ille cælesti, nec opinata luce, Christi que latè *Matt. 17.*
splendentis plena diuinæ maiestatis specie perstri-
ctus nesciens quid diceret, aiebat. Bonum est nos hîc
esse, sic istis ad primos Dei congressus amore diuino
ebrijs, ac quasi debellatum iam esset, de sola pace co-
gitantibus, in mentem non venit, vt cogitent resta-
re ipsis adhuc in suo corpore multa ex veteri homi-
ne, magno sibi & labore domâda. Quare illis paulo
post, id est capite sequenti merito dicit, SICVT LILIVM *cum*
INTER SPINAS, SIC AMICA MEA INTER FILIAS. Cuius ora-
tionis, quæ sit vis dicemus, cum ad id loci peruene-
rimus.

CAPVT. II.



GO FLOS CAMPI, ET LILIVM CONVAL-
LIVM. SICVT LILIVM INTER SPINAS, SIC
AMICA MEA INTER FILIAS. SICVT MALVS
INTER LIGNA SYLVARVM, SIC DILECTVS
MEVS INTER FILIOS, SVB VMBRA ILLIVS,
QVEM DESIDERAVERAM SEDI, ET FRV-
CTVS EIVS DVLCIS GVTTVRI MEO. INTRODVXIT ME IN
CELLAM VINARIAM, ORDINAVIT IN ME CHARITATEM.
FVLGITE ME FLORIBVS, STIPATE ME MALIS, QVIA AMO-
RE LANGVEO. LAEVA EIVS SVB CAPITE MEO, ET DEXTE-
RA ILLIVS AMPLEXABITVR ME. ADIVRO VOS FILIAE HIE-
RYSALEM. PER CAPREAS, CERVOSQVE CAMPORVM NE SV
L. 3. SCITETIS,

SCITETIS, NEQVE VIGILARE FACIATIS DILECTAM QVO
 VSQVE IPSA VELIT. VOX DILECTI MIHI, ECCE ISTE VI-
 NIT SALIENS IN MONTIBVS, TRANSILIENS COLLES. SI-
 MILIS EST DILECTVS MEVS CAPREAE HINNULOQVE CER-
 VORVM, EN IPSE STAT POST PARIETEM NOSTRVM RESPI-
 CIENS PER FENESTRAS, PROSPICIENS PER CANCELLOS.
 EN DILECTVS MEVS LOQVITVR MIHI, SVRGE, PRO-
 PERA AMICA MEA, FORMOSA MEA, ET VENI. IAM FINIM
 HYEMS TRANSIIT, IMBER ABIIT ET RECESSIT. FLO-
 RLES APPARVERVNT IN TERRA NOSTRA, TEMPVS PVTA-
 TIONIS ADVENIT: VOX TVRTVRIS AUDITA EST IN
 TERRA NOSTRA. FICVS PROTVLIT GROSSOS SVOS, VI-
 NAE FLORENTES DEDERVNT ODOREM, SVRGE, PROPE-
 RA AMICA MEA, SPECIOSA MEA, ET VENI. COLVMBA
 MEA IN FORAMINIBVS PETRAE, IN CAVERNA MACERIAE
 OSTENDE MIHI FACIEM TVAM, SONET VOX TVA IN
 AVRIBVS MEIS. VOX ENIM TVA DVLCIS, ET FACIES
 TVA DECORA. CAPITE NOBIS VVLPES PARVVLAS QVAE
 DEMOLIVNTVR VINEAS, NAM VINEA NOSTRA FLORVIT.
 DILECTVS MEVS MIHI, ET EGO ILLI QVI PASCITVR
 INTER LILIA, DONEC ASPIRET DIES, ET INCLINEN-
 TVR VMBRAE. REVERTERE SIMILIS ESTO, DILECTE MI
 CAPREAE HINNULOQVE CERVORVM SVPER MONTES
 BETHEL.

EXPLANATIO.

HAEQVITVR, quod exponere in-
 stituit mutuum inter istos coniuges a-
 moris, atq; laudum certamē. EGO FLOS
 CAMPI, ET LILIVM CONVALLIVM. Ambi-
 guum est vtrius illorum hac oratio sit,
 nam ex vtriusq; persona accipi potest, nisi quod ipsa
 rerum

rerum natura postulare videtur, vt eam sponsa tribuamus, nam se laudare foeminas magis quam viros decet. Quare mea quidem sententia, hec cum proxime prateritis adnectenda sunt, & cuncta vno prolatu dici intelligenda, vt post lectuli flores & post domus laquearia cedrina, quibus illa sponsum ad vna secum permanendum inuitat, adijciat nunc sponsa se etiam esse pulchriorem rosa, dicatque continenti & nusquam interrupto spiritu. LECTVLVS NOSTER FLORIDVS EST, ET TIGNA DOMORVM NOSTRARVM CEDRINA, LAQVEARIA CYPRESSINA, ET EGO FLOS CAMPI. Quo videlicet omni ratione lectuli amoenitate, domus magnificentia, sua ipsius pulchritudine & venustate ad se amandum sponsum prouocet, & alliciat. EGO FLOS CAMPI. Quod flos interpretis vertit, id in Hebraeo est, הבצלת Habaceleth. porro tradunt genus esse rosae colore nigro, quidem, sed specie venusta, & odore suauis quod valde quadrat sponsae, quae item nigra & formosa superius dicta est. פרחים flores sunt senis folijs. Conuallium verò epithasim habet: nam in conuallibus laetius haec omnia proueniunt propter humoris maiorem copiam. SICVT LILIVM INTER SPINAS, SIC AMICA MEA INTER FILIAS. Haec iam a persona sponsi dicuntur, qui ab eo quod postremum in oratione sponsae fuit, initium faciens, eam iterum laudat, & quod lilio conuallium similis ipse, dictus est, docet id sponsae aptissime, conuenire: nec id solum vt lilio similis sit, sed vt inter spinas lilio, & sibi attributas laudes in sponsam retorquens auget eas, & amplificat:

Bernard.
homi. 48.
in canti.

plificat: nam quæ iuxta spinas nascuntur rosæ, eo pulchriores videtur, eoque magis oblectat oculos, quo spinarum, quibus obsidentur, horridior est species: nam horrore illo illustratur rosarum nitor. Itaque dicit quod me lilio sponsa adsimilas, id in te planè quadrat, quippè quæ & ætatis virore & specie, liliū omnino refert, vt quantum rosa ab spinis distat tantum ipsa forma præcellas reliquas fœminas, atque vt lilia spinarum iuxta positarum appositu videntur pulchriora, sic reliquæ fœminæ tecum compositæ formę decus tuum illustrius reddunt. SICVT MALVS INTER LIGNA SILVARVM, SIC DILECTVS MEVS INTER FILIOS. Quantum, inquit, malus & amœnitate foliorū, & pulchra pomorum specie, aut ilicem, aut quercū superat, rigidas & incultas arbores, tantū meus spon sus elegantiā formæ vincit reliquos. Et certè multū amœnitatis habet malus arbor cum folijs, tum pomis abundans: nam folia præterquam quod figurā habent valdè concinnam, viridi inficiuntur valdè amœno: pomis verò ex albo, aureoq; modice rubentibus nihil ad aspectū pulchrius fieri potest. Ex quo intelligitur maiorem laudem, quam quæ sibi tributa fuerat sponsam in sponsum contulisse, vberiusq; illum laudasse: nam lilia, quorum similis dicta ipsa est, nullos ex se fructus edunt: malus verò utroque excellit, & pomis, & specie. Quoniā porrò usu sæpè venit, vt malus arbor, ijs qui ipsam intuentur amœnitate umbræ, pomisque suis desiderium inijciat accedendi propius, & desidendi sub ipsa, inibi que dū
se

se æstus remittit commorandi, pomaque ex carpendi: ideò in cœpta similitudine persistens, ac longiùs sponsa progressa commemorat, sponsum suum cum ipsa vidisset, in eandem voluntatem, atq; cupiditatem se inductam fuisse propius, scilicet, accedendi, pomaque carpendi, idque ita fecisse. In vmbra, inquit, illius, in qua desiderabam desidere, scilicet, & quietem capere, sedi, id est, quod optabam obtinui, perfeci quod cupiebam. *ET FRUCTVS EIVS DVL CIS CVTTVRI MEO.* Hoc est voti mei compos effecta, quã summam optabã, mihi dari illius copiam consequuta sum. Atqui optarat non solùm alloqui, sed & de osculari, & amplecti: id igitur factum ab se esse honesta verborum translatione significat. Nã viri sui optato aspectu cominota, atque eiusdem sermone, atq; blanditijs penitus inflammata, media inter verba in complexus illius irruisse intelligenda est: intelligenda inquam est, non quia fecerit, sed quia fecisse fingitur, & ad eam rationem, oratio eius accommodatur: itaque adhærens viro suo, collumque ipsius arte complexa, cupita legisse oscula intelligitur, & ipsos inter amplexus, atque oscula interruptis vocibus illa dixisse. Nam vt suo postea dicemus loco, eadem ista accidunt in congressu animæ cum Deo, cuius congressus imago hîc exprimitur. *INTRODVXIT ME IN CELLAM VINARIAM.* Vini nomen, atque rem ad voluptatem significandam transferri solere, superiùs dictum est. Cella igitur vinaria, summam quandam & exaggeratam voluptatem, vel potius cumulum atq;

M conuen

conuentum voluptatum omnium significat, quō
 sponsus sponsam introduxisse dicitur, quia suum er-
 ga illam amorem, quibus potuit maximis documen-
 tis testificatus est, quare subdit. ET ORDINAVIT IN ME
 CHARITATEM. Eo enim introduxit illam in cellam vi-
 nariam, id est, in gaudij atque voluptatis domiciliū,
 quia ordinavit charitatem, id est, maximā ipsam, ma-
 ximeque excellenti, atque conspicua charitate com-
 plexus est. Nam ordinandi verbum, vt in re militari
 vsurpatur cum ordinare acies, cumque ordines mili-
 tum dicimus, sic hoc loco est accipiendum, vt ex He-
 bræa voce, cuius loco ponitur, intelligitur: nam לָרִיף
 propriè significat vexillum erigere, translātè verò
 eminere, aut insignem esse in re aliqua, vt in acie si-
 gnifer eminet: igitur suam erga sponsam charitatem
 ordinasse sponsus, cum dicit, id nimirum dicit, nihil
 illum ad summū amorē fecisse sibi reliqui, magna &
 maximè illustria amoris documēta ostēdisse ipsum,
 & tanquam sustulisse amoris signum quoddā, quod
 illa signum, vt strenui milites faciunt, intrepide se-
 quuta facilè passa est quocumque ille voluit duci se,
 atque intromitti: nam charitas quemadmodum ipsa
 nemini insidias facit, ita strui sibi ab alijs, haud qua-
 quā credit: charitas nihil timet, omnia sperat. FVLCI-
 TE ME FLORIBVS, STIPATE ME MALIS, QVIA AMORE LAN-
 GVEO. Ea est animi nostri imbecillitas & infirmitas, vt
 per æquè gaudio, atque ægritudine lædamur. Itaque
 haud multo plures sunt, quos ægritudo conficit, quā
 quos effusa & immoderata lætitia, quod in amore
 maximè

1. ad Co-
 rinth. 13.

maximè cernitur: propterea quod amor, vt in defiderando est omnium ardentissimus, ita in gaudendo est effusus, & immoderatus maximè: quamobrè qui ardentè amant, crebro animo deficiūt, & propè exanimantur, nunc acri defiderio, nunc subita obiecta lætitiæ victi, neq; ad sperandū fortes, neque ad letandum valentes, sed ad vtrumque æque imbecilles, & magis quam viri, fœminæ, quarum animi imbecilliores sunt, & ob id impotentius amant: ex quo affectu ducitur hæc oratio: nā magnitudine gaudij quod ex complexu sponsi hausit victa sponsa est, & nimix lætitiæ vires corporis concesserunt. Itaque exanimata, & inter sponsi manus collapsa, vel dum collabitur potius sibi deficiēti, quibuscumque rebus possint, vt opem ferant, à suis comitibus petit, aut certè petijssè fingitur, non quidem se animo deficere simpliciter, dicens, sed ea loquens quæ, quos animus deficit, loqui solent, quod est multo venustius. Ac profecto vt hoc loco dicam, quod singulis propè huius carminis locis iure dici potest, incredibilis est, & maior fortasse, quam quæ vllò ingenio explicari possit, & harum literarum præstantia, & rerum naturæ inter ipsas consensus. Nam, vt de harum literarum præstatiā primo dicam, cum poësis nihil aliud sit, quam pictura loquens, totumque eius studium in imitanda natura versetur: id quod quidā nostri poëtæ, qui amatoria scripserunt, parum certè attendentes cum se putarent optimè dicere, ab optimi poëtæ officio longissimè recesserunt. Verum vt cœpi dicere, cum

M 2 poësis

poëlis naturam imitetur, eamque quodammodo lo-
 qui doceat, ac nihil aliud ad oblatum argumentum
 afferat præter apta & decentia verba. Cumque in eo
 vno Poeta maximè elaborare debeat, vt quæ insunt
 in re proposita, aut quæ pro illius rei natura inesse
 ipsi par est, ea sententiarum, atque verborum tan-
 quam coloribus expressa, atq; descripta ita exhibeat
 oculis conspicienda, vt non tam dici, quam agi vi-
 deantur: vt quod de Ennio dictum est, si quæ ab eo
 dicta præclarè, & scripta sunt, eadem dicere musæ
 vellent, eas nō alijs verbis, quàm quibus Ennius vsus
 est, vsuras fuisse, idem efficiat ipse, suumque argu-
 mentum ita perficiat, eoque cuncta eloquatur mo-
 do, quo modo natura ipsa eloquutura esset, ei si lo-
 qui liceret. Cum itaque omnis Poëticiæ præstantiæ,
 atque laudis gloria in hoc vno sita sit: affirmo in hoc
 amorum argumento, & in hac duorū inter se aman-
 tium, mutui amoris expositione, Solomonem reli-
 quos omnium linguarum, atque gentium Poëtas, &
 oratores omnes, tam longè, tamque multum supe-
 rasse, vt si quæ illi scripserunt, cum eius scriptis con-
 ferantur, statuendum sit, in illorū literis amoris qui-
 dem inesse vmbra[m] quandam pertenuem: solidam
 autem, & expressam, atque adeo viuam, & spirantē,
 his atque agentem imaginem contineri in ijs Solomo-
 nis scriptis. Nihil enim eorum, quæ in amore acci-
 dunt à Solomone, vel est prætermissum, vel non ita
 dictum: quomodo dici optimè, & significantissimè
 potest: nam quæ prima in amore sunt desideria, at-
 que

que suspiria, eorum primo loco mentionem fecit: ijs adiecit colloquia præsentium mutua, verborumque blanditias, quæ natura desiderio succedunt: hæc sequuntur corporum complexus, & animæ atque spiritus communio, quibus ex rebus incredibilis voluptas exoritur, & existit: & qua in re honestè explicanda alij vehementer laborare solent: itaque vel taciti totum eum locum prætereunt, vel præter decorem pudoris iacturâ faciunt, eam Solomon ita aptè exposuit verbis translatis, & mali arboris similitudine inducta, vt quamuis rem ipsam oculis propè subiecerit, honestas tamen, & verecundas aures nihil offenderit. Ac demum ne qua in re deesset suscepto argumento, quia interdum contingit, vt ingenti voluptate liquecens, & in lætitiâ effusus amatorû animus corpus destituat, quoniamque id non tam sæpè viris, quam fœminis accidit, quorum est ingenium imbecillius, ideo sponsam inducit ad extremum lætitiæ, veluti oneri succumbentem, ac omnibus cum corporis, tum animi viribus dissolutis collabentem. Atque hæc ille omnia nō commemorat vt facta, sed quo plus, & viriû haberet, & suauitatis oratio, quasi agerentur exponit, personas ipsas agentes ea, atque loquentes inducens. Nec vero ad eorum expositionem adhibet à se excogitatas aliquas, & ingeniosè elaboratas, aut sententias, aut verba: sed è mediâ hominum vita, atque consuetudine sumptas voces numeris dulcissimis alligat, vt non tam carmen panxisse videri possit, quam amorem ipsum, affectusq;

M 3 amoris.

amoris omnes, & quæ in amore accidunt vniuersa
excitasse, & motum illis, ac vocem dedisse, in cænaq;
introducitis imperasse, suam vt quisque personā age-
ret, eaque diceret, quæ pro natura cuiusque apta cui-
que, & conuenientia essent, vt vel hoc ipso satis con-
stet prodita hæc scripta fuisse à maiore facultate, at-
que vi, quàm est humana facultas, atque hæc de præ-
stantia harum literarum. Quod verò ad rerum natu-
ræ consensionem attinet, quis non miretur, tam ar-
ctis similitudinum vinculis res genere, & natura plu-
rimum distantes esse colligatas: tamque consonare
inter se ea, quæ maximè dissentire videntur, humana
scilicet, atque diuina, corporea & expertia corporis,
vt ad cælestes amores, & eorum motus omnes expri-
mendos, nullis ex rebus propriores, atque expressio-
res similitudines, & imagines petantur, atque ducan-
tur, quàm ex humanis amoribus. Nam quamuis ap-
petitus ille pulchri, qui est in vtroque amore, arden-
tior in vno sit, quam in alio: tamen pro portione
vtriusque eadem in vtroque amore exordia sunt, ab
eisdem, aut à similibus rebus incrementa suscipiūt:
similes ac fere iidem motus, & affectus existunt in
vtroque: progressiones denique vtriusque absolu-
tionesq;, & fines sunt prorsus pares, atq; vt pulchri
ea species, quæ in corporibus cernitur, & qua vulgo
notus amor excitatur, ab intelligibili, & incorporea
pulchritudine ducitur, & participatur: estque tan-
quam vmbra quædam pulchri, quam ipsum veri pul-
chri, veluti corpus in terras iacit, sic corporeus ipse,
& ter-

& terrenus amor diuinum, & cælestem amorem imitatur, & iisdem, quibus ille vestigijs ingreditur: itaque non solum quia huius amoris terreni, scilicet, atque humani natura, atque ratio nota nobis est, Solomon; aut potius per Solomonē Deus eo voluit vti, ad insinuandum in animos nostros aliquam notionem amoris sui: sed quia inest in illo sui amoris imago, ea qua nulla esse potest, aut expressior, aut melior, idcirco eo vsus est, idque habuit causæ, quare tam exquisitè, tamque omnibus suis partibus integrè, constantem humani amoris effigiem in hoc libro perfecit. Nimirū, quia videbat nihil in illo amore esse, quod non aptè, atque commodè posset ad diuinos amores transferri: ex quo erat consequens, vt quo plus in hac veluti imagine perficienda elaboratum esset, & quo plus in ea perpolienda curæ positum, adhibitis omnibus, & artis, & ingenij coloribus, eo aptior efficeretur, ac notior diuini amoris vis, atque natura, cuius in lucē proferendæ, & illustrandæ causa omnia ista elaborabat. Sed de hoc, quoniam aliàs dicemus, vel potius, quoniam toto opere sparsim dicendum est, nunc plura dicere supersedeamus, & eo reuertamur vnde sumus digressi. Animo, inquit, destituor, nec lætitiæ vim ferre sustineo: accedite propius, flores date, vina spargite, fugientem spiritum quibuscumque potest reuocari rebus, floribus, vino, pomis reuocate, & ad ipsum sponsum conuersa fulci, inquit, tua læua, languidum meum caput, vincta dextra occiduum corpus, meque ruentem retine.

Huiusmodi

Huiusmodi namque dici in animi deliquio solent, dicitque ea hic sponsa deficiens, aut certè fingitur dicere, atque ea cum dicit, non solum illam defecisse intelligimus, sed deficientem, & collabentem, opè implorat ipsam, eiusque iam decliue caput, & suffusas pallore genas pene videmus. ADIVRO VOS FILIAE SION PER CAPREAS, CERVOSQUE CAMPORVM, NE SVSCITETIS, NEQUE EVIGILARE FACIATIS DILECTAM, DONEC IPSA VELIT. Animi deliquio somnus succedit, natura videlicet, id agente, quo quiete languidum reficiatur corpus: igitur quasi ex deliquio in somnum sponsa incidisset, eam sponsus molliter in lectulo collocasse fingitur: conuersusque ad sponsae socias eas adiurasse, quietem ut ipsae agerent tantisper, dum illa somnum capit. Obtestatur autem per capreas, ceruosque camporum, propterea quod cum sponsa ipsa, tum sponsae comites virgines inducuntur vitae rusticae deditae, & venationis studiosae ex illius gentis more: etenim de Tyrijs virginibus, quae Palaestinijs vicinae sunt, extat illud Poetae.

Æneid. 1.

Virginibus Tyrijs mos est gestare pharetram.--

Et quoniam ita communis ratio sermonis, atque usus fert, ut à quibus aliquid obtinere volumus, eis prospera imprecemur in eis ipsis rebus quarum studio tenentur, itaque ad militiae deditum agentes, ita te victorem complectar, ad magistratus studiosum, ita te consulem conspiciam dicere solemus, & Poeta Lyricus naui quae in Græciam trajiciebat Virgilius, quo ipsum incolumem Athenis redderet, Pollucis benedi-

benignum sydus, ac secundos ventos ita precabatur.

Sic te diuapotens Cypri,

lib. 1. ad. 3.

Sic fratres Helenæ lucida sydera,

Ventorumq; regat pater

Obstruētis alijs præter Iapiga

Navis, quæ tibi creditum--

Debes virgilium.--

Quia igitur ita consuetudo, atque ratio nostri sermōnis fert, idcirco ceruorum, atque caprarum, quarum illæ venationi studebant mentionem intulit, obtestaturque sponsus sponsæ comites, pro eo quantum cupiunt, dum venantur capreas sibi dari, quas certis ictibus iaculando conficiant, vti parcant cubantis sponsæ, & somno indulgentis placidissimam quietē rumpere: atque hæc hætenus. Nam quæ sequuntur tanquam ex alio nata principio, noua argumenta amoris continent. VOX DILECTI MEI, ECCE ISTE VENIT SALIENS IN MONTIBVS TRANSILIENS COLLES. Dubium est, vtrum hîc inducatur sponsa vigilans, & ea quæ sibi vigilantî euenerunt exponens, an dormiens potiùs, & somnorum visis affecta inter dormiendum id loquens, quod per quietē sibi videbatur videre. Non nullis placet, quod item mihi non displicet, noui argumenti hîc exordiū poni, sponsamque induci commemorantem sponsi ad ipsam reditum: nam postquam illa quieti se dedit, discessisse ab ipsa sponsus fingitur, & in agrum se contulisse, paulò post reuersurus. Adduntque ijdem non oportere, in ijs amatorijs sermonibus quærere quid rerum natura posita

N let,

let, sed quid amātium vsus atque ratio ferat. Etenim illam domi inclusam reuertentem sponsum, & mōtium iuga cursu superantē videre, haud quaquā potuisse: sed desideranti illi, & de viri sui reditu cogitanti, redeuntis illius, & præfestinationis speciem vt fit, ad animū occurrisse: accidisse autem, vt ad cogitationem aptè euentus caderet, vtque ille rediret, cuius de reditu sponsa cogitabat, quemque iam aduentare animo præcipiebat: nam euenire sæpè, vt corū quos amamus, & à quibus absumus proximos, & instantes reditus, species quædam veluti nuntij præcurrāt, quæ nobis de amicorum nostrorū reditu nihil alioqui, aut cogitantibus, aut certi, exploratique habentibus de repente se offerunt, & subito desiderio nos accendunt, voluntatemque nobis iniiciunt, & cogitandi de illis, & agendi: denique efficiunt, vt pro eo ac cupimus, iam se in viam dantes illos, iam iter facientes, maturantes, aduentantes, limenque ipsum superantes domus, sic animo quasi oculis videamus: quod vtrum casu fiat, an rerum naturæ arcana consensione aliqua incertum sanè est, quin autem fiat non est dubitandum. Hanc igitur rationem si sequamur priora illa. VOX DILECTI MEI, ECCE ISTE VENIT SALIENS IN MONTIBVS TRANSILIENS COLLES. Quæ de aduētu sponsi sui ipsa sibi sponsa desiderando fingit continere debebūt: posteriora verò. & quæ proximè illa sequuntur, nimirum. ECCE IPSE STAT POST PARIETEM NOSTRVM. Quid acciderit re ipsa, vel certè id quod fingitur accidisse explicabunt. Quod quo planius

nus intelligatur ipsam loquentem inducamus, itaq;
dicentē: Nescio quid certè boni meus mihi præfagit
animus, vtrum fallor, an sponsi mei vocem ego au-
dio? certè audire mihi videor, ipsumq; concitato cur-
su redeuntem videre: at ò nunquam amantis ani-
mus fallax, en adest ipse, nec opinione falsa sum: a-
dest certè, iamq; ipsum limen domus superat, me-
q; è ianua salutat: sed quò ille disparuit, quòve a-
biit? vt se oculuit postibus, vt rursus apparet, rursus-
q; occultitur, vides vt caput intulit fenestrę, vt emi-
cuit pulcher. Alijs videtur, quorum nos sententiam
libentius sequimur: propterea quod præteritis præ-
sentia aptè connectit, & ad ea quę in re euenire solēt,
se se valdè accommodat: itaque alij dicunt, quem-
admodum animi deliquium natura somnus sequi-
tur, ita somno insomnia agnata esse, in ijs maximè,
quorum animi grauioribus curis sollicitantur, qua-
les sunt amantes omnes: quare sponsam quę hacten-
us dormire dicta est, nunc consentaneè fingi, dum
dormit, audire ea, atque videre, quę cum vigilabat,
versabat in animo, quęque optabat, atque cupiebat.
Itaque omnia ista dormientem ipsam secum egisse,
ac loquutam fuisse, aut certè quasi per quietem ea
egisset, atque vidisset commemorari, pulchrèq;
quadrare, vt quę superius inducebatur, se ipsa excru-
cians, quod suo sponso carebat, ea nunc fingatur per
quietem, habens sponsi sui redeuntis, & aduentan-
tis imagines eiusmodi, quales fingi à desiderante, &
somniaute solent, non quales re ipsa contingunt, So-

lomonemque ipsum adeo incubuisse, animumque intendisse in morum, atque naturæ imitationem, ut quoniam dormientibus, non eadem, quæ vigilantes obierunt, occurrunt videnda, sed similia illis, aut affinia, aut aliqua ex parte coniuncta, idcirco obseruasse ipsum, ut verba, quæ vigilantis sponsæ, & magno desiderio flagranti carminis huius initio dedisset, eidem dormienti nunc, & ex desiderio somniorum visis affectæ, non eadem quidem illa tribueret, sed eiusmodi, ut ex illis videri possint deriuata, atque deducta. Quæ eo verisimilius dici mihi videtur, quia mox capite sequenti, in lectulo per noctem sponsum suum quæsiuisse, nec tamen inuenisse illum sponsa dicitur: ex quo apparet illam cubantem nunc, & indulgentem in somnijs induci. Adde quod ipsa totius orationis ratio, ipsaque varietas, & inconstantia dictorum speciem, atque imaginem insomnij præfert: quod enim insomniorum visis fit, ut multarum rerum imaginibus multis vna coeuntibus, atque confusis, nec temporum, nec locorum, nec ordinis, aut naturæ vlla ratio seruetur, sed præsentibus præterita coniungantur, & plurimum inter se loco distantia conferantur in vnum locum: eius in hac oratione perfectissime expressa imago extat. Est enim videre in ea sponsam tecto quidē suæ domus inclusam, agros tamen, & nemora peragrantem, iam videntē sponsum suum, iam ipsum quærentem, eodemque momento temporis, & in agro illum, & secum vnā dormiēse dicentem, magna que, & propè mirabili cele-
ritate,

ritate, fenestras, agros, nemora, cancellos, colles in
vnum conferentem, vt quanta visorum esse solet,
tanta sit orationis huius, atque sententiarum varie-
tas: sed iam quid dicat, audiamus. VOX DILECTI. Ex
abrupto atque præcisè, qualis dormientium, aut subi-
to gaudio affectorum sermo esse solet. ECCE ISTE VE-
NIT. scilicet corpore, solutus animus distantia æquè,
atque proxima videt. ECCE STAT POST PARIETEM NO-
STRVM. Vt maturant amantes ad ea quorum cupidi-
tate tenentur dicenda, atque fingenda: quot enim &
quanta camporum, atque montium spatia, quantu-
lo temporis spatio confecit? ECCE STAT. Quod nõ re-
ctà ad sponsam ingressus sponsus, sed per rimas pro-
spectasse dicitur, id ex amantium consuetudine, at-
que ingenio, mirificè expressum est: nam amatores
interdum obuoluto capite ad amicas adeunt, quò
nec opinatò postea se ostendentes ipsas maiori læti-
tia afficiant. Interdum verò ægre se illis ostendunt,
& quanquam videri volunt, nolle simulant, ludosq;
sibi ipsis mutuò de se præbent, pertentantque sæpè
& explorant ijs lusibus, vterque alterius amorem er-
ga se mutuum: ipsum denique amorē conditiorem,
vt ita dicam, & dulciorem hoc tanquam sale reddūt,
ex quo est illud.---

Virg. Eccl. 3.

Et se cupit ante videri.

Prospiciens per cancellos propriè & simpliciter ver-
tit, quod in Hebræo positum est translàtè, & ele-
gàter, nam. *רֹזָה* propriè de rosa, & floribus dicitur,
cum è folliculis erumpunt. Vnde per similitudinem
quella si mostra 'ale sporcel' urzrosa. Politianus N. 3, trans-

transfertur ad sponsum proferentem caput per fenestram. Nam ut flores cum primò erumpunt latiores, & nitidiores nobis videntur, quàm cum foliorum orbem explicauerunt, nec apparent tunc toti, sed capitulorum acumina tantum ostendunt: sic omni flore, omnique rosa pulchrior sponsus caput fenestræ intulisse, & roseum os aperuisse sponsæ visus est. LOQUVTVS EST DILECTVS MEVS, Et hæc audire sibi sponsa videtur. SVRGE PROPERA AMICA MEA, SPECIOSA MEA ET VENI. Quoniam plurimum ipseruri versatur eodem ipsam vocat, hoc est, ad vnam secum commorandum inuitat. Quāquam quod sæpè admo-neo, quæ hîc dicuntur facta dictave, ea neque Solomon ipse cum alio, neque pastores vlli coniuges inter se egerunt, aut dixerunt vnquam, sed è quotidiana vita sumpta, personisque ijs attributa, quas maxime deceret ea facere, ac dicere, ad Christi, & Ecclesiæ mutuos amores significandos sint cuncta relata. SVRGE PROPERA AMICA MEA. Hortatur ut sine cunctatione aliqua agros, & rura petat: nam ea loca & languentibus salubriora esse solent, & inter se amanti-bus multo gratiora, & quo facilius illi persuadeat primò blandissimè appellat illam, deinde nouo veris aduētu ruris amœnitatem exaggerat. Surge, inquit, ut decubuisse illam intelligas. IAM HYEMS TRANSIIT, IMBER ABIIT ET RECESSIT. Ne scilicet, aut frigus, aut noxios ægro corpori ventorum flatus causari possit, FLORES APPARVERUNT IN TERRA. Descriptio veris à coniunctis, siue accidentibus, vernat tellus, ergo ver est

est, vt in illo.

*Iam veris comites quæ mare temperant
Impellunt animæ Linthea Thraciæ.*

Horat. 4. LAR. OD. 12.

TEMPVS PUTATIONIS ADVENIT. Ex Hebræo alij, tem-
pus cantionis, vtrumque autem & verbo Hebræo si-
gnificatur, & vere fit. Nam vere appetente, & putan-
tur vites, & vinitores dum opus faciunt cantillant:
quanquam cantus omnino cum vere maximè con-
iungitur: nouo enim solis accessu auctus sanguis cor
animatum complet, & lætitia insolita afficit, ex quo
canendi cupido sequitur, tam in hominibus, quam
in volucris, vnde in veris descriptione ille.

*Ducunt in tenero gramine pinguium
Pastores ouium carmina fistula.*

ibidem.

VOX TVRTVRIS. Nam hyeme ineunte turtures è Pa-
lestina discedentes, calidiores regiones petunt: veris
autem initio reuertuntur. COLUMBA MEA IN FORAMI-
NIBVS PETRAE, IN CAVERNA MACERIAE, OSTENDE MIHI
FACIEM TVAM, SØNET VOX TVA IN AVRIEVS MEIS.
Iam cuius rei causa ipsam vocet aptè, & verècundè
explicat similitudine ducta à columbis, quæ ex omni-
bus volucris maximè inter se amare dicuntur. Co-
lumbis inquam non cicuribus, sed feris quæ in rupi-
bus nidulantur, vaganturq; per agros, quo magis
omnia inter se consonarent: nam ad idem vitæ ge-
nus rusticum, videlicet, vocabat ipsam: itaque dicit.
Quod autem te in agrum voco, quo non ego modo,
sed valetudo tua te, aërisque ipsa, & locorum amœ-
nitas vocat, tellusque ipsa floribus vernans, vineæq;
pampi-

pampinis vestitę iam, & late fragrantę inuitant: itaque quod te voco, ideo voco, vt quantum columbę, quę rupes, & rura colunt, amorı vacant suo, tantum nos ab omni cura vacui indulgeamus nostro: in agrum itaque veni, & mecum vna viuito ad exemplum columbę, quę sociam sequuta, eamque iuxta afsidens, ac mutua, atque dulcia murmura, atque oscula miscens, in amore ætatem degit. Innuit porrò, atque quodammodo tacitè illam docet rationem eam, qua se amari ab ipsa velit. Nam columbę vt sunt maximè inter se amantes, ita fidei obseruantes sunt maximè, & ob id ipsum sunt mirum in modum suspiciosę: quod potissimum in maribus cernitur. Nam, vt est videre, peregre reuersi, vt compares aspiciunt, statim nescio qua mala suspicione tacti grauius commouentur: itaque tumet illis statim pectus, & raucum quiddam, atque irę plenum frementes, caudaque contingentes humum maxima celeritate, vt & iratum animum, & sui impotentē facilè agnoscas, illas obeunt circum circa, ac rostro ipso interdū acriter feriunt, læsę pudicitię ipsi dum aberant, & violatę fidei, aut certè ipsorum sinistra suspitionis veluti pœnas repetentes ab innoxijs, quę illę omnia mira mansuetudine tolerant. Nam neque ab illorum aspectu se subtrahunt, aut longiùs abscedunt, aut quamuis grauius percussę referunt ipsę illos aliquando, sed eo vsque perferunt, quoad ipsarum patientia marium ferocia victa, animum item illi induunt placatum & mitem, & irarum ac suspitionis obliuiscuntur.

obliti, de integro amicitiam incunt, rostra, scilicet, atque oscula mirabili charitate iungentes, quæ omnia ad spiritualia, & diuina relata magnos significatus habent, vt suo postea loco dicemus, nunc satis sit vidisse, quàm aptè columbarum natura, atque ratio ad amoris transferatur significationē. CAPITE NOBIS

VVLPE PARVVLAS QVAE DEMOLIYNTVR VINEAS, NAM VINEA NOSTRA FLORVIT. Non satis constat quis ista dicat, & quidem si sponsæ sunt hæc verba, quam ego

sententiam magis probo, quanquam videri possit alicui parum illa cohærere cum superioribus, tamē verè multum cohærent, & ex illis ducuntur, res ipsa si quemadmodum se habet, attentè consideretur. Est enim familiare fœminis quo tempore se à suis viris maximè amari vident, de eo quod ipsis vel triste aliquando accidit, vel periculosum in futurum imminet agere, atque queri nullo sæpè agendi idoneo argumento ipsis oblato, & planè intempestiuè. Nam ab amore ipso, & ab experta erga se virorū suorum voluntate, atque charitate inducuntur ad querelas huiusmodi, quibus illæ querelis quodammodo testificantur, & quam ipsæ viros suos tenerè diligant, & quam se ab eis diligì, atque amari credant, vtque arbitrentur, atque confidant illos sibi in omni suo periculo præsidium allaturos. Igitur sponso vocanti & inuitati, & blandissimis verbis testificanti amorem suum, nihil ad id, de quo agebatur respōdisse sponsa dicitur, præter id verò ex fœminarum ingenio nimis aptè dixisse. CAPITE NOBIS VVLPLS PARVVLAS QVAE DE

O

MOLIYNTVR

MOLIVNTVR VINEAS, NAM VINEA NOSTRA FLORVIT.

Nam ex eo quod nouo veris aduentu vineæ palmites agere dictæ sunt, recordata fingitur vineæ cuiusdam suæ, cui florescenti iam, & palmites agenti, à vulpibus vinearum vastatricibus periculum imminabat, ideoque prætermisiss alijs id vnum orasse virum suum, daret operam, eas vt caperet, sicq; vineam suam ab ipsarum incurfu defenderet, & tueretur.

Iudic. 15. CAPITE NOBIS VULPES PARVVLAS. Iudæam regionem abundare vulpibus ex libro Iudicum, & Sanfonis facto satis liquet: illas autem vinetis afferre solere pestem omnibus est notum, idque maximè cum parue sunt: nam postquam adoleuerunt, maiores prædas agunt, ideoque paruas vulpes nominauit, easq; antequam vineæ florere inciperent capi voluit: nam postquam vites folia, atque palmites protulerunt difficilius capiuntur, propterea quod ijs folijs, atque palmibus se se occultant. DILECTVS MEVS MIHI, ET EGO ILLI QVI PASCITVR INTER LILIA. Quanta est in visis quæ somnianti occurrunt, tanta est in huius oratione, atque sententijs varietas: nam modo præsentem sponsum hortabatur vulpes, vt caperet: nunc ad absentem ipsum & in pastu pecorum occupatum agit, illumque vocat, & vt reditum maturet hortatur. DILECTVS MEVS MIHI, ET EGO ILLI. Vocandi significationem ista habent, ac si dicat, heus dilecte mi, meq; ipse diligens, qui pascis inter lilia. Pascere autem inter lilia dicit, non quod lilia sint pascua, sed quia amantes fœminæ semper in ore habent rosam, lilia, gemmas,

gemmas, ebur, atque ijs alia similia: sed quid vocat,
aut orat ipsum. DONEC ASPIRET DIES, ET INCLINEN-
TVR VMBRAE. REVERTERE SIMILIS ISTO, DILECTE MI
CAPREAE HINNULOQUE CERVORVM. Id autem est vt si-
mul atq; Sol ad occasum vergere cœperit, vt reditū
ipse maturet, iterq; quāprimū arripiat, arreptūque
conficiat summa celeritate. DONEC ASPIRET DIES ET
INCLINENTVR VMBRAE. Pomeridianum & vespertinū
tempus, his verbis significari arbitror non matuti-
num, vt quidam putauerunt: nam occidente Sole,
lenes auræ plurimum spirare incipiunt: vnde ille.

*Aspirant auræ in noctem, nec candida cursum
Luna negat.*

Itaque auræ spirant cadente Sole, & vmbrae quæ cor-
porum obiectu fiunt, quæque dum medium cœli te-
nebat Sol stabant quodammodo produci longiūs &
moueri, atque adeo festinare videntur.

Et Sol crescentes decedens duplicat vmbrae.

Et ita quod Latinus interpres vertit, inclinentur: He-
braicè דָּוָדָּ dicitur, id est fugiant, dicuntur autem fu-
gere vmbrae, occidente Sole, id est maturare, ex pro-
prietate sermonis Hebraici, in quo fugere pro matu-
rare ponitur, proque ocyus moueri: quale est illud
quod hoc ipso in carmine postea dicitur, fuge dile-
cti mi, id est matura: quod etiam ipsi septuaginta in-
terpretes satis expresse runt, quippè qui hunc locū
isto modo conuertunt καὶ πύρρονται οὐρανὸς significa-
tur igitur ijs verbis, vespertinum tempus à con-
iunctis, idque tempus, & non matutinum significa-

O 2 ri

ri ipsa instituti sermonis ratio postulabat: nam amā-
tem foeminam, & ex amore ægram, atque decum-
bentem, qualis hîc sponfa fingitur, hoc nimirum de-
cebat, vt nollet se solam noctu relinqui. Rogat igitur
virum suum, vt, quoniam rei familiaris, atque pe-
cuniaræ causa discessit, seque ægram deferuit, illud
saltem sibi & ægræ, & amanti concedat, ruri ne per-
noctare, domoque abesse velit? sed expositis iam hu-
ius capitis vocibus, veros earû sensus exquiramus.

EXPLANATIO.



GO FLOS CAMPI, ET LILIVM CONVALLIVM
Hæc, vt diximus, ad superioris capitis
finem referuntur, eiq̃ue adiungenda
sunt, & ab sponfa dici accipienda, quæ
videlicet, contenta eo amoris gradu,
ad quem peruenit, manere velit in eo. Nā incipiētes
vti diximus, quo magis præter eorum spem atque
meritum participes sunt effecti bonitatis, atque vo-
luptatis diuinæ, eo citiùs suæ cupiditati modum sta-
tuere volunt: nam facilè sibi persuadent se ad sum-
mum peruenisse, ergo quia lectulus illorum iam flo-
ret, & quia eorumdem domus electa è materia con-
structa nitet, hoc est, quia vt ipsis videtur arefacta ra-
dice peccati, pietas in ipsis germinare cœpit, floresq̃;
proferre: id est, vt iterum interpreter, quia se colloca-
tos vidēt in ea vita, quæ non solū honesta & Deo pla-
cens, sed grata etiam ipsis est, & iucunda, iucunditas
vt

ut ea perpetua sibi sit, cupiunt atque optant. Et LECTVLVS, inquit, NOSTER FLORIDVS, ET TIGNA DOMORVM NOSTRARVM CEDRINA. ET EGO FLOSCAMPI. Vt nihil sit, quare non perpetuo manere mecum velis, mihi que stabile & proprium efficere gaudium, hoc quod est tuo colloquio & congressu percipio. FLOS CAMPI. Alij flos saturitatis, aut vbertatis, quod Hispanè aptè diceretur. Flor de buen año. Quod ideo verè, ac rectè dicitur, quia iusti, ut iusti, & probi ac Deo grati sint, non à se ipsi habent, sed præcipuè à cœli indulgentia, hoc est, ab eo, cuius de plenitudine omnes accepimus, suntque propterea flores vbertatis, id est, ab illa vberimorum bonorum copia, quæ in Christo est, producti flores. SICVT LILIVM INTER SPINAS, SIC AMICA MEA INTER FILIAS. Ita laudat, ut simul erudiat incipientem Deus, nimium citò quietem appetere, & ab honestis laboribus vacationem, multa ei restare perferenda, antequam eò perueniat, quo se iam peruenisse falsò putat. Eatenus ipsum esse pulchrū, & iustum, si cū spinis, id est, cum ijs hominibus comparetur, qui cupiditatum aculeis cruentantur: nondum autem eo peruenisse, ut perfectis viris connumerari possit, aut conferri. Nam residere adhuc illū in infimo bonorum ordine, nec ad illum ascendisse gradum, in quo qui sunt, non iam ex cōparatione maiorum pulchri habentur, sed amatis puellis omnibus, concubinisq; id est, incipientibus, & proficientibus in virtute viris anteferuntur: turpe verò illi, & perniciosum esse cessare velle, antequam ad eum gradum

O 3 perue-

perueniant. SICVT MALVS INTER LIGNA SYLVARVM Christo digna, & vere illi tributa laus: sed videamus quod sequitur. SVB VMBRA ILLIVS QVEM DESIDERAVERAM LEDI. Declarat voluptatem eam, quam ex diuino illapsu percepit. Quamquã vmbre ratio, atq; nomen tã sæpè trãsfertur in sacris literis, ad Dei gratiã significandã, vt nobis videatur arcanũ aliquid, & cognitione dignũ latere in eo, & quidẽ in vmbra, quod cum gratia, & fauore Dei habeat communionem aliquam, ex quo vmbre nomen ad gratiam significandã possit transferri: vnũ ferè est, quod ad arcendos æstus valet: nam, quæ illi insunt cætera, leuitas, fugacitas, lucis vacuitas, cum eo de quo loquimur, nihil affine aut cognatum habet: sed nunquid in nobis aliquod incendium aliquisve ignis conceptus latet, aut in legis Dei cultu, eiusque gratia, & fauore refrigerandi, & æstus arcendi inest aliqua vis? Est certè vtrumq;, & in nostris sensibus ex illo primo, & noxio serpentis afflatu magnum inclusum incendium, & in diuina gratia eius restinguendi facultas summa, modo illi ne obistamus nos, sed permittamus ipsi vires suas, & efficacitatem omnem, vt in nobis exerat, atque explicet. ET FRVCTVS EIVS DVLCIS GVTTVRI MEO. Consentaneè, scilicet, nam vbi id euenit, vt sub gratiæ Dei vmbra anima quiescat, restincto, aut certè magna ex parte refrigerato malarum cupiditatum ardore tum plene percipit, quanta dulcedinis magnitudo insit in amore Dei, ex quo etiã sequitur. INTRODVXIT ME IN CELLAM VINARIAM, ET ORDINA-

VIT

VIT IN ME CHARITATEM. Nam hæc iam ad ecstasim pertinent. Sed cum eius duplex genus sit, vnum diuini luminis illatione constans, in quo luce cælesti perfusa mens & magnarum quarundam, & sublimium rerû cognitionibus occupata aciem suam, ad externa hæc & sensibilia referre non potest: alterum quod efficitur, atque exilit abundantia ex Deo perceptæ voluptatis, dico ad hoc posterius genus quæ hîc dicuntur pertinere, quod satis apparet ex eo quod additur. ET ORDINAVIT IN ME CHARITATEM. Et continenter. FVLcite ME MALIS, STIPATE ME FLORIBVS, QVIA AMORE LANGVEO. Nam ex illapsu, hoc est, ex ijs sermonibus blandis, & prædulcibus, quos cum Deo anima habuit, sensim atque paulatim auctus amor penitus exarsit, & tanquam incendio quodam corripuit omnes animi vires, & in Deum conuertit ipsum totum. Ex quo factum est, vt nō iam ampliùs corpus curare, sed vacare vni amori, vnumque Deum quā arctissime complecti, eique adhærere omninò cuperet: vnde sequitur. LAEVA EIVS SVB CAPITIBVS MEIS, ET DEXTERA ILLIVS AMPLEXABITVR ME. Quæ proculdubio diuinis amplexibus fruētis, inque Dei sinu quiescentis, nec modò amanti Deum, sed etiam in ipso amoris actu voluptate colliquefcentis, verba sunt. ADIVRO VOS FILIAE HIERSALEM PER CAPREAS CERVOSQUE CAMPORVM, NE SVSCITETIS, NIQVE LVIGILARE FACIATIS DILECTAM DONEC IPSA VELIT. Qui vacantis Deo animi quietem, & sanctum illud, & fructuosum bonorum ocium interpellant, atque perturbât, vel molestijs.

lestijs inferendis, vel offensionis, atque peccati causis afferendis, quique è delicijs paradisi pertractos sanctos homines in medias huius vitæ turbas coniungunt: & tanquam per vim diuellunt à diuino complexu impij & virtutis hostes homines, nō secus ipsi faciunt, quam caput ipforum fecisse legitur, aduersus primos humani generis parentes: atque quemadmodum similiter faciūt, ita similem exitum metuere atque horrere debebunt. Nam detestatur Deus, ac pelsimè odit eos homines, qui eo vsq; prauo, & corrupto animo sunt, vt non solum peccandi nullū modum ipsi faciant, sed vt omnes in peccando similes sibi esse velint, adeo vt quoscunque honestæ vitæ sectam sequētes viderint, ad suum gregem pertrahere illos & aggregare summo studio conentur, aut si id minus illis successerit pro inimicis, atq; adeo pro infestissimis hostibus sibi eos habendos ducāt. Etenim in eiusmodi homines, siue potius hominum pestes, illa Christi quamuis mitissimi, haud dubiè seuerissima verba intenta sunt. Qui scandalizauerit vnū ex pusillis qui in me credunt, expedit ei vt suspendatur mola asinaria ad collum eius, & demergatur in profundum, eademque est huius adiurationis sententia. ADIVRO VOS FILIAE HIERUSALEM PER CAPREAS CERVOSQUE CAMPORVM. Nam his verbis sine dubio hortatur, atque monet Deus homines vniuersos, quantum sua cuique vita, atque fortunę charæ sunt, tantū vt ablineāt à tam immani facinore, neve bonorum studia virtutum impedire, aut debilitare audeant,

Matt. 18.

deant, aut quouis modo ipsis bonis molestias exhibeant, ipsi potius illos sequantur: ad eorumque exemplum, mores suos, atque vitam instituant. Atque hoc modo, atque ijs verbis ecstasis incipientium describitur, ad quam ipsi cum peruenerunt ad summū eius gradum peruenisse putandi sunt. Itaque quę sequuntur iam ad secundum, id est, proficientium gradum spectant: ea autem sunt hæc. *VOX DILECTI MEI.* Dum corporis sensibus consopitis vni Deo vacat iusti animus ad altius virtutis, atque amoris genus vocatur, idque meritò: quia creditum sibi & ad rem augendam datum talentum, non defodit humi, sed ad mensam numularijs dedit. Itaque, quia propositi stadij prima spatia ritè confecit, ad ea quæ restabant, simili nauitate obeunda vocatur: semper enim Deus in maius eos prouehit, qui quæ ab ipso acceperunt, dona, ritè collocant: cupit enim pro sua immensa bonitate, quod quidem ad se attinet, ad summum omnes euehere. Atque quemadmodum Sol, sine personarum, aut gentis aliquo discrimine lucis, quos ex se emittit, radios vnde quaq; diffundit, neque suum lumen vlli mortalium inuidet, imò vltro offert ipse se atque infert, modo ei non obsistatur, tantumque ex eius lumine quisque haurit, quantam illi præbet facultatem inferendi se se, atque introeundi, sic ex inexhausto diuinæ bonitatis fonte manans, & ad omnes mundi partes pertinens munificentia, atque largitas Dei vltro se offert nobis, atque ingerit, nullumque sibi constituit benefaciendi modum, nisi quate-

P. nus

nus ei nos vel morum prauitate, vel certè imbecillitate, & angustia animi aditum intercludimus, locūque adimimus. Adimimus autem, cū, quæ ab ipso accepimus bona, aut infructuosa ea, & sterilia manere in nobis patimur, aut pessimè collocata in prauos vsus cōuertimus. Quam ille habet maximam, atque iustissimam causam de nostra cæcitate querendi, quod cum natura ipsa & beneficus sit, & benefacendi infinitè cupidus, nostra vel socordia, vel auersione animi, & tanquam obstructione efficitur, vix vt extare in nobis possit beneficentiæ suæ in nos aliquod munus, quod illi tam molestum est, quam ipsum benefacere gratum est, atque charum. Nam profectò quicumque largitati Dei obsistunt, eamque ingredi ad se ipsos non sinunt, ij, quod in ipsis est, ex Deo, cuius est maximè propria munificentia, atque largitas diuinam naturam tollunt. Quare illos odit meritè Deus, atque auersatur, & tandem nudos, atque spoliatos relinquit, ea auferendo ab eis beneficia, atque dona, quæ priùs in illos contulerat. Nam qui bona quæ acceperunt à Deo per suam socordiam, vel inutilia reddunt, vel in suam perniciem conuertunt, satis eo ipso docent, se esse indignos, quibus ampliùs benefiat. Itaque hos odit Deus: contrà autem eos amat, atque quotidie amplioribus beneficijs auget, quos rem cælestem quotidie, & talenta sibi ab ipso credita, diligēter augere videt: vnde est hoc. VOX DILECTI MEI. Nam vt dixi, vocat ijs verbis Deus incipientem, quia gratiæ sibi ab ipso collatæ rectè vsus est

est ad maiorem gratiae gradum, hoc est, ad proficien-
tium in amore gradum, ad quem significandum ap-
tissimè utitur veris similitudine: propterea quòd si-
cut vere ineunte in serenum aër purgatur, sic ad illū
gradum cum peruenitur, animi libidine, atque con-
cupiscentia, cuius ex halitu cupiditatum nubila in
nobis, & fœdæ tempestates existunt, magna ex parte
compressa, cælum primò nitescere, & animi bonorū
serenari quodammodo incipiūt. Tunc cæleste illud
ac diuinum semen, quod Christi beneficio satum est
in incipientibus exerens suam vim, atque in lucem
proferens, vberiusque germinans, virtutum fundit,
atq; bonorum operū lætissimos flores. Tūc hyemis
transactæ, & malorum, quæ euaserunt, cogitatio iu-
storum subiens animos, præsentis status compara-
tione, gaudium in illis excitat, & ex gaudio Dei lau-
des canendi voluntas exoritur. Tunc maiori studio
quam antea, quidquid virtuti obstare, aut impedi-
mēto illi esse, vllō modo potest, quò minùs sua edat
germina amputatur, & abijcitur. Tunc eo succo, quē
à Christo vera vite, trahunt atque ducunt palmites,
non solū ipsi viuunt, sed etiam tanquam virore, &
floribus, sic rebus optimi exempli oculos intuentiū
oblectant. Tunc vetus illud Christi maledictum me-
tuens ficus grossos sedulò profert. Tunc insolito &
ante id tempus, non satis expertopacis sensu affecti,
se peregrinari in hac terra iusti sentiunt, ardereque
incipiunt desiderio cælestis patriæ, suspirantque ad
illam crebrò, sonatq; in ipsorum cordibus turturea

Mar. 11.

P 2 Spiri-

*Chrysost.
homilia
de turtu-
re.*

Spiritus sancti vox gemitibus inenarrabilibus: sed videamus quod sequitur. EN DILECTVS LOQVITVR MIHI, SVRGE PROPERA AMICA MEA, COLUMBA MEA. Nō iam columbæ quod attinet ad oculos similem, sed columbam absolutè ipsam nominat, vt intelligamus ad meliorum numerum, atque gradum amatricem hanc animam peruenisse. Et certè ipso columbæ nomine satis ostendit, quem ad vitæ statum, quemque ad amoris gradum ipsam vocet, perinde ac si dicat. Iam res ipsa abste, tempusque postulat, vt amoris erga me tui maiora documenta exhibeas, vt quemadmodum veris aduentu flantibus Zephyris quæ hyeme horrebat, tellus vernare incipit, sic tu cui ego iam sum factus proximior, meo ex spiritu calorem concipiēs, vberiores fructus edere incipias, vt ad illas purgatorias horridiores, & asperiores virtutes, quas protulisti adhuc, addas alias nitidiores, quibus animus humanus illustratur magis, quæq; propriè pertinent ad hunc gradum, ad quem te voco, vt sicut vere cælum nitescit, sic his luminibus mens tua feretur & illustretur, mihiq; ipsa posthac, non solum sis colūbæ similis, quod ad oculos attinet, sed sis tota columba. Quod cum dicit, mirum est quot, & quantas res hac vna columbæ voce, & appellatione concluderit. Nam primū docet charos habere eos homines, qui ipsi colūbis similes sunt, id est, eos qui non aliud ore promūt, aliud pectore occultant, sed sui vbique similes sola simplicitate pollent: quod enim cuique simile est, eo delectatur maximè, est autem Deus natura.

tura sua maximè vnus atq; simplex, ac omni ex parte sibi similis, semperque idem. Deinde declarat causam propter quam in agro potiùs, quam in vrbe se à suis conueniri velit, videlicet, quia est consortis impatiens: quare columbas appellat eos, quò intelligât sicut columbæ, non promiscuè coeunt, sed vna hæret vni perpetuò, sic ipsos (si tamen verum illud amoris fœdus inire cum Deo cupiunt) desertis vrbibus, id est, omnibus terrenarum rerum curis spretis, omnes alios amores repellere à se, & eradicare debere. Postremò significat futurum aliquando, vt illorum in amando constantiâ exploraturus permittat ipsos aduersis rebus premi, atque vexari: quod cum euenerit, quemadmodum columba coniugis sui suspiciones, atque iniurias patiēter, & mansuetè fert, sciant, atque intelligant, sibi æquè patienti animo Dei flagella esse toleranda, eaque vbi paululum pertulerint, confidant esse finienda, sperentque futurum, vt patienter agendo, conuerso tandem ad clementiam Deo superiores, & multò quam à principio fuerunt lætiores, & fœliciores euadant: sed cur obsecro additur?

OSTENDE MIHI FACIEM TVAM, SONET VOX TVA IN AVRIBVS MEIS, QVIA ELOQVIVM TVVM DVLCE, ET FACIES TVA DECORA NIMIS. Quia profectò præcesserat.

COLVMBÆ MEÆ IN FORAMINIBVS PETRÆ IN CAVERNA MACERIE. Etenim tum iustitiæ pulchritudo quanta sit plenè perspicitur, tum ad Dei aures grata, accedit bonorum vox, cum sedatis, atque compressis cupiditatibus, vt columbæ desertis in locis, ardua que in

P 3 rupe:

rupe nidulantes, tranquilliter in amore viuunt, sic illi in Deo adhærētes, in ipso collocatas habent omnes suas cogitationes & spes. Sequitur. **CAPITE NOBIS VVLPES PARVVLAS QVAE DEMOLIVNTVR VINEAS:**

Chrysost. *in Psalm.* *96.* *Pfellus* *Et tres pa-* *tres in ca-* *tica.* **NAM VINEA NOSTRA FLORVIT.** Quod Paulus praecepit dicens: Cum timore, & tremore salutem vestram operamini. Eius praecepti vis, & opportunitas, hoc loco, vt opinor, ab Spiritu sancto explicatur. Nā ista noti humani amoris imagine Spiritus sanctus, non tam explicat quid ipsi iusti interdum faciant (nam illi naturae ipsius fragilitate interdum victi deficiunt, atque prolabuntur interdum, ipsique charitati, quae in illis est, non semper permittunt, vt vires suas in ipsis proferat, eo ordine, atque via, quibus proferre apta est) itaque non tam explicat Spiritus sanctus quid illi interdum faciant, quam quid illis sit faciendum, nec quo ipsi ament modo, sed quae ipsa sit caelestis amoris vis, ei nisi obstituerimus, docet. Atqui illud in primis solet placere Deo, vt ij quorum in animis sua collocavit dona submissè de se ipsi, & humiliter sentientes eis non abutantur ad superbiam, sed omnes peccati, atque offensionum causas summa solitudine vitent: & quò plura dona confert in illos, eò maiorem modestiam, & cautionem requirit ab iisdem, quae propter, simul cum ipsis gratiae donis sensum Christianae humilitatis infundit. Humilitatem porrò, quae propriae infirmitatis consideratione constat, sequitur decidendi à gratia Dei, & offensionis, atque irae divinae metus. Deus igitur cum dona sua in nobis auget, simul

simul subiicit nobis cogitationes humiles, admonet
 que nos infirmitatis nostræ, ex quo cadēdi ab eo sta-
 tum metus oritur, & ex metu sollicitudo atque cautio.
 Ergo quoniam vocationis gratia ea, qua nō quidem
 impij ad iustitiam, sed iustitiam, & in pietate probati
 ad altius iustitiæ genus vocantur, quæ & ipsa Dei do-
 num est magnum, atque optabile, explicata est pro-
 ximè superiore oratione, idcirco nunc aggreditur di-
 cere, quem effectum in nobis illa habitura sit, quidve
 effectura eius si impulsus sequamur. Est autem eius
 vt diximus, in primis subijcere mentem Deo, admo-
 nereque hominem propriæ infirmitatis, reddereque
 in amore vigilantem & cautum. Eam itaque cir-
 cumspectionem, eam cautionem, atque metum, &
 ex metu opis implorandæ studium, nos vt in sponsa
 doceret, simul atque ab sponso vocata est, sic illā re-
 spondentem induxit. CAPITE NOBIS VULPES PARVV-
 LAS QVÆ DEMOLIVNTVR VINEAS: NAM VINLA NOSTRA
 FLORVIT. Nam hæc profectò oratio non se efferen-
 tis de spōsi erga ipsam amore est, sed timētis potius,
 ac sibi suisque bonis sollicitè metuētis. Quid autem
 quæso metuit? vastationem & direptionem vineæ
 suæ, hoc est, boni sibi omnium charissimi amissionē.
 Sed à quibus metuit? à parvis vulpibus. Quæ porro
 vulpes istæ sunt, aut quæ huic voci vis subiecta est?
 Aduertamus animum obsecro, vt quod sæpè iam ad-
 moneo, quantus huius carminis textus sit, quamq;
 illius omnia in hos, quos distinximus, amoris gradus
 aptè conferantur, liquidò perspiciamus. Humani ge-
 neris

neris inexorabilis hostis, quāuis nos oppugnare nunquam desistit, tamen non semper nos oppugnat eodem modo: nam quoties aperto Marte, & palam indicto & professo bello parū proficit, arte, atque doli agit, idque varijs rationibus tentat, pro re ipsa dolose agendi atque fallendi subiens diuersas formas. Impugnat autem apertè illos, quos cum prius peccatorum vinculis constrictos, sibi; ob eam causam in feruitutem addictos tenuisset, exuere peccati vincula ipsos postea, & se in libertatem vindicare velle videt: hos enim summa vi retinere nititur. Itaque accurrit statim in ipso conuersionis illorum principio, manusque illis iniicit, & reluctantibus faces admo-uet, & præteritarum voluptatū obiectis imaginibus aciem animi illorum perstringens, ad nō ita pridem deserta flagitia eos apertè vocat, omni-que ratione illis instat acerbis, atque molestis. Verū ubi euenit vt superato ab ipsis hoc priore certamine in virtutis studio, atque cultu proficiant, ei-que ita assuescant, vt peccati tetra, & fœda species ipsis qualis est, ita appareat, vtque eam aspernentur, & horreant morte ipsa peius, tunc ille, nō iam palam & apertè, sed insidiosè, & per cuniculos quosdā ad certamen aggreditur. Itaque illis non iam suadet vt peccent, neque vt redeant ad flagitiosam, quā dereliquerunt vitam, sed parua quædam, & minuta, & honesti specie interdum tecta, quæque & difficulter dignosci qualia sint, & facillimè admitti possint obijcit, vt ubi ea tanquam parum in vtramque partem referentia ad
animum

animum suum illi, & ad voluntatem admiserint eorum studij intentio paulatim remittatur, paruisque in rebus sæpius cedendo habiles efficiantur, ad id ut aliquando tandem superentur. Atque quemadmodum ipse Sathanas cum apertum bellum hominibus infert propter cædis studium, & sanguinis humani sitim appellatur leo, sicut scriptum à Petro est, Quia *1. Petr. 5.* aduersarius, vester diabolus, tanquã Leo rugiens circuit, quærens quem deuoret: sic cum ad alias nocendi artes insidiosas, & plenas fraudis se conuertit, ex ipsa re & fallendi studio vulpes iure dicitur, eaq; parua vulpes, non quia parum noceat, demolitur enim vineas florentes iam, & vberes fructus promittentes, & speratum, & propè adeptum iam, perfectæ virtutis bonum nobis eripit è manibus, sed quia recti specie decipiens, & in peccata leuia, ac vix eo nomine digna, bonos, sed non bene cautos viros inducens eos in exitium, tandem præcipitat, & sicut vulpes carpendis vitium folijs, palmitibusque decerpēdis, quæ ipsa ad cætera, quæ sunt in vite relata minima sunt, eo pestem & interitum viti affert. Nam neque educari vix possunt, neq; maturescere vite folijs nudata, ipsaque tandem vitis, quippè quæ cortice morfu vulpium scisso iniurijs cæli pateat, amittiteam omnem vim qua viget, atque viuit: sic ille dū astu agens bonos, nudat ijs rebus quæ virtuti educandæ pro folijs esse solent, dumque ipsos imprudentes leuioribus peccatis implicat, viam sibi munit ad inferendū maiora damna, vulpesque imitatur, tum arte aggrediendi

Q

diendi

diendi fallaciatque subdola, tum ratione ipsa paruis
è malis mala graua efficiendi, quas vulpes vt capiat,
hoc est, vt procul arceat Deus, illi in persona sponsæ
iusti petunt, quorum iam vineæ floruerunt, qui que
iam eo se profecisse vident, vt non solum prauas
actiones fugiant, & quales sunt, tales eas esse iudicēt,
tetro, & horribili aspectu, sed vt excellentium operū,
flores magna vberioris prouentus spe edere inci-
pant. Petunt autē ab ipsa vocationis gratia, suæ fru-
*frag*ilitatis admoniti, & ad petendum inducti: petunt-
que id omnium primū, quoniam eodem gratiæ
dono ipsos docēte intelligūt in eo amoris gradu ad
quem vocantur, & quem tenere iam incipiunt, sibi
maximē metuendas esse istas vulpes, has videlicet,
sub specie boni latentes fraudes, hos in leuioribus re-
bus crebriores lapsus, hunc Angelum lucis menti-
tum, & amica specie pestem celantem, tetrum, & in-
festum, & quo occultiore, eo nocentiorē hostē.
Et quoniam malum hoc duplici ratione Deus repel-
lit, vna facultatem adimendo vulpi huic adeundi ad
hominem, & fraudulentē ipsum pertentandi, & ad
malum alliciēdi, quod est vulpes capere, atque vinci-
re, id est seuerissimis imperijs nequid moliantur, aut
noceant constrictas tenere, altera inferendo animis
honorum lumen, atque robur, quibus & insidias suæ
vitæ fieri intelligere possint, & detectis dolis insidia-
torem repellere. Hæc igitur cum ita sint, iusti tamen
illud præcipuē, atque maximē a Deo petunt, vulpes
has vt capiat, & vinculis coërceat. Est enim optabile
certami-

certaminum, ac periculorum expertē, in amorē Dei vitam degere: deinde si eueniat (quemadmodū euenire necesse est) vt pugnandum illis sit, id summo pereorant Deum, vt antequam illis occidat is lætitiæ, & tranquillitatis dies quo fruuntur, vt primum spirare grauior aliqua ventorum vis, & malorum tanquā vmbre augeri cœperint, id est vt statim, in ipso pugne initio, & certaminis conflictu, antequam tubatum quidquam sit, præsto illis, & salutaris adsit. Hanc enim vim habet quod sequitur. DILECTVS MEVS MIHI, ET EGO ILLI QVI PASCITVR INTER LILIA, DONEC ASPIRET DIES ET INCLINENTVR VMBRAE, REVERTERE DILECTE MI, SIMILIS ESTO CAPREAE, HINNULOQVE CERVORVM SVPER MONTES BETHEL. Est enim ab eadem illa humili cognitione sui, ab eodemque illo in peccatum decidendi timore, quo boni sollicitantur profecta vox, qua blande à Deo, & pro iure mutue charitatis amicè postulant, vt inclinatio iā ad occasum die, & irruentibus periculorum, tentationumque tenebris sibi auxilietur, nulla mora interposita. SIMILIS ESTO CAPREAE, HINNULOQVE CERVORVM. Quod sine metaphora propriè & literatè David dicebat: Domine ad adiuuandum me festina, & rursus: Domine accelera vt eruas me. Quodque non solum causa incitandi Deum, & vt auxilium ferre maturet efficiendi, ab sponsa dicitur, sed etiam quo nos doceat, vt in ipso statim prauæ cogitationis initio, vt primum mala libido subire animū cœpit, ad primos hostis aspectus, imò verò ad primos rumores, atque

Q 2 suspicio-

suspiciōes belli, antequā ob negligentia turbārum in nobis, atq; tumultus aliquid oriatur: attollam⁹ ad cælū oculos, & ad Deum cor nostrum penitus conuertamus, illudque cum lachrymis iterantes reuertere. REVERTERE DILECTE MI SIMILIS ESTO CAPRAE, HIN NVLOQVE CERVORVM. Salutemque illi nostram. ardentissimè commendantes, vt acceleret, atque festinet liberare nos, non à malo solū, sed etiam à suspiciōne mali ab ipso petamus.


CAPVT III.



N LECTVLO MEO PER NOCTEM QVAESI-
VI, QVEM DILIGIT ANIMA MEA, QVAESI
VI ILLVM, ET NON INVENI. SVRGAM, ET
CIRCVIBO CIVITATEM PER VICOS ET PLA
TEAS, QVAERAM QVEM DILIGIT ANIMA
MEA, QVAESIVI ILLVM, ET NON INVENI.
INVENERVNT ME VIGILES, QVI CASTODIVNT CIVITA-
TEM, NVM QVEM DILIGIT ANIMA VIDISTIS? PAVLVLVM.
CVM PERTRANSISSEM EOS, INVENI QVEM DILIGIT ANI-
MA MEA, TENVI EVM, NEC DIMITTAM, DONEC INTRODV
CAM ILLVM IN DOMVM MATRIS MEAE, ET IN CVBICVLVM
GENITRICIS MEAE. ADIVRO VOS FILIAE HIERVSALEM,
PER CAPREAS, CERVOQVE CAMPORVM, NE SVSCITETIS,
NEQVE EVIGILARE FACIATIS DILECTAM DONEC IPSA
VELIT. QVAE EST ISTA QVAE ASCENDIT PER DESER-
TVM, SICVT VIRGVLA FVMI, EX AROMATIBVS MYRRHAE,
ET THVRIS, ET VNIVERSI PVLVERIS PIGMENTARIJ? EN
LECTVLVM SALOMONIS, SEXAGINTA FORTE AMBIVNT,
EX FORTISSIMIS ISRAEL. OMNES TENENTES GLADIOS,
ET AD BELLA DOCTISSIMI, VNIVSCVIVSQVE ENSIS SV-
PER

PERFOEMVR SVVM, PROPTER TIMORES NOCTVRNOS. FER-
CVLVM FECIT SIBI REX SALOMON DE LIGNIS LIBANI.
COLVMNAS EIVS FECIT ARGENTEAS, RECLINATORIVM
AVREVVM, ASCENSVM PURPVREVM, MEDIA CHARITATE
CONSTRAVIT PROPTER FILIAS HIERVSALEM. EGREDIMI-
NI FILIAE SION, ET VIDETE REGEM SALOMONEM IN DIA-
DEMATE, QVO CORONAVIT ILLVM MATER SVA, IN DIE
DESponsationis ILLIVS, ET IN DIE LAETITIAE CORDIS
EIVS.

EXPLANATIO.



SOLVIT A somno sponsa, atque ex-
perrecta, sponsum quicum modo lo-
qui sibi per quietem visa est, vna secū
iacere arbitrata, ipsum quæsiuisse, at-
que eo non inuento è lecto exiliuisse,
domoque egressa, vrbis loca omnia illum quæritan-
do obiisse dicitur. In quo non quid re ipsa gestum sit,
commemorasse intelligēdus est Solomon, sed quid
rei de qua agitur, natura fieri postulet accommodatè
ad ipsam rem, atque aptè exposuisse: quod exteri
etiā poëtæ sæpè faciūt, vt pro suscepti argumenti ra-
tione, quid fieri debeat, tametsi id neque factum sit,
nec fieri fortasse possit, tamen commemorent tan-
quam factū: quod si suæ personæ id arbitrantur, con-
uenire non posse, alias fingunt & inducunt perso-
nas ad ea quæ ex argumento dicunt, atque confin-
gunt accommodatas. Sic igitur hoc loco Solomon,
quia si primariam, & illustri loco natam foeminam

Q 3. indu-

induxisset loquētem, videbat sibi aut recidenda esse ex hoc carmine, atque omittenda perplura eorum, quibus amoris vis maximè exprimitur, aut longè à decoro recedendum. Nam cui probaretur regiā fœminam in tempesta nocte, hortante amore, sine custode, sineque comitibus per urbem circumcurfasse dici? Itaque quia intellexit, aut decorum à se negligi, aut bonam huius carminis partem omitti deberi, idcirco personam sumpsit de medio, rurique eductam fœminam induxit, quò decore seruato exprimeret in ea omnem amoris vim. Quid verò hæc? IN LECTVLO MEO PER NOCTES QVAESIVI, QVEM DILIGIT ANIMA MEA, QVAESIVI ET NON INVENI. Fœminæ amantes semper illæ quidem, sed præcipuè noctu viros suos abesse egrè ferunt, eosque requirunt. Nimirum incitatae partim ab ipso amore, cuius vis nocturno tempore silentibus alijs curis magis accenditur: partim à suspicione, & timore: suspicione quod sibi alias præferri fœminas, seque negligi à viris suis malè suspiciantur: timore quod verētur, ne quid fortassè mali illis in tenebris accidat. Est enim iniuriæ inferendæ opportunum nocturnum tempus. His igitur amoris, atque suspicionis tanquam stimulis sponfa excita, imperare sibi non potuit, vt quoad luceret, domi maneret: sed exiliuit statim, & neque tenebris deterrita, neque nocturnos casus metuens, neque sui rationem vllam habens, vnumque amorem ducem sequuta virum suum peruestigauit. SVRGAM ET QVAERAM. Pro præteritis surrexi, & quæsiui ex proprietate Hebraici sermonis.

monis. Nā sequitur. QVAESIVI ET NON INVENI. Quod autem additur. INVENERUNT ME VIGILES QVI CVSTODIVNT CIVITATEM. Ex quotidiano more ductum est. Nam qui noctu oberrant inexcubitores atque custodes vrbis sæpè incidunt, NUM EVM VIDISTIS QVEM DILIGIT ANIMA MEA? Nam vero simile erat vidisse, qui omnes vrbis angulos scrutarentur: sed quàm hoc ex arte à Solomone confictum est. Primum non illam pudet fateri amorem suum, quia, quod est propriū amantium, non dubitabat quin omnibus æquè, atq; ipsi ea res honesta, & prædicabilis videretur: deinde quasi de re cunctis nota, illos quamvis ignotos, & alienos rogat, consueto, scilicet, amantium errore ducta, qui ex suo ipforum sensu alios æstimantes arbitrantur neminem latere posse, quid ipsi cupiāt, atq; amēt, atque hæc illa. Cui custodes, quippè qui de homine ipsis ignoto rogarentur, nihil respondisse dicuntur. Ipsa tum, quod ~~amantem~~ decuit, perseveravit inquæredo. Itaque à custodibus digressa, illū tandem inuenit, inuētumque apprehendit, & domum deductum cubiculo inclusit, verita ne iterum se defereret: at quam belle, quamque elegantibus, & verbis, & numeris ista persequitur? INVENERUNT ME, inquit, VIGILES QVI CVSTODIVNT CIVITATEM? NUM EVM VIDISTIS, QVEM DILIGIT ANIMA MEA? PAVLV-
LVM CVM PERTRANSISSEM EOS, INVENI QVEM DILIGIT ANIMA MEA, TENVI EVM, NEC DIMITTAM, DONEC INTRODVCAM ILLVM IN DOMVM MATRIS MEAE, ET IN CVBICVLVM GENITRICIS MEAE. *tamen*

tes

tes fœminæ loqui solent, sequitur. ADIVRO VOS FILIAE HIERSALEM PER CAPREAS, CERVOQUE CAMPO-
RVM NESVSCITETIS, NEQUE EVIGILARE FACIATIS DILE-
CTAM DONEC IPSA VELIT. Quamquam in Latina ver-
sione perspicuum sit hæc dicere sponsum, tamen ex
Hebraico textu ab vtrouis dici, possunt intelligi. Ete-
nim ex ipsa re, vel sponsus ipse, qui ad multam noctē
vigilasset, cubiculum ingressus somno statim corre-
ptus fingitur, vel certè ipsa sponsa, quæ illum quæri-
tando se se labore cōtriuerat, eum postquam adeptā,
atque complexa est, in somnum incidit. Nam alter-
utrum horum accidisse erat verosimile. Est autē pro-
positum Solomoni, vt antè diximus nihil eorū, quæ
in re accidere solent, prætermittere: sed ita exequi
vniuersa, vt hæc duorum inter se amantium imago,
omnibus suis numeris absoluta cernatur, quo quan-
to ea fuerit absolutior, & suum exemplar proprius
referens, tanto amoris diuinationes in ea elucen-
tes facilius discamus, quarum rationum declaranda-
rum causa omnia ista sunt comparata. Quam ean-
dem ob causam nos, quod ante diximus, sed propter
tardos quosdam sapius est repetendum, non vere-
mur curiosius singula inquirentes, omnes huius vul-
gati amoris sensus, quorum modo in hoc carmine
aliquod extare vestigium conspiciatur dicere, & in
lucem proferre, ad Solomonis iudicium atque pro-
positum, nostrum ipsi iudicium, atque interpreta-
tionem accommodantes, ex quo eodem iudicio &
naturæ imitationis studio nata sunt, quæ sequun-
tur.

tur. QVAE EST ISTA QVAE ASCENDIT DE DESERTO, SICVT VIRGVLA FVMI EX AROMATIBVS MYRRHAE, ET THVRIS, ET VNIVERSI PVLVERIS PIGMENTARIJ. Nam verò simile erat, quæ vna cum viro suo rure domum reuerteretur. (Nam ruri inuenisse illum, ex hoc loco apertè colligitur.) Itaque verosimile erat, eā obuios habuisse aliquos sibi ignotos homines, qui eius admirati pulchritudinē, vel secū ipsi, vel alios rogando dicerēt. QVAE EST ISTA QVAE ASCENDIT DE DESERTO? Id est, rure atque agro: nam rus Hebræis sæpè desertum appellatur. SICVT VIRGVLA FVMI. Aut vt ex Hebræo alij, sicut columna fumi, quod non tam ad corporis proceritatem declarandam pertinet, quam ad fragrantiam odoris. Itaque odorationē eam esse prædicant thure, atq; myrrha. Quod autem virgulam, aut columnam dicunt, ideò dicunt quia thus, atque myrrha, & id genus alij odorati pulueres cum igne supposito cremantur, vna cū fumo qui ex ipsis exit, odorem emittunt. Fumus porrò natura fursum, atq; è regione ascendens columnæ speciem præ se fert. Sed sponsa hos reuocat ab ipsius contemplatione, atque laudibus, & ad viri sui præstantiam contemplandam, & celebrandam potius conuertit. Itaque dicit. EN LECTVLVM SALOMONIS. Nā hæc verba sponsæ esse, dubitandum nō est, quibus illa verbis in cælum fert opes, cultum, pulchritudinem viri sui, quem non iā personatum inducit, sed suo illum, & propriè nomine notat, Solomonem ipsum appellans, eaque commemorans, quæ Solomonem habuisse constat ex li-

R. bris.

bris Regum. Ex quo intelligitur Solomonis personā
 versari in hoc carmine, nō quod de se, aut vxore sua
 propriè hæc scripserit Solomon, neque quod suos a-
 mores quamuis illustres, nam eximiè illam adama-
 uisse scribitur, aliquo modo studuerit exponere, sed
 quod sua persona, atque nomine qua in persona, &
 nomine diuinitus edoctus sciebat, sustineri personā,
 & nomen Chrissi, vti voluerit ad illius erga homines
 immensum amorem, ijs imaginibus adumbrandū:
 igitur inquit. EN LECTVLVM SALOMONIS SEXAGINTA
 FORTES AMBIVNT EX FORTISSIMIS ISRAEL. Quasi ad
 illos qui se admirabantur sponsa conuersa dicat eis,
 iniuste vos, aut certè inconsideratè facitis, quod me
 vnam intuentes, & admirantes viri mei mecum vnā
 reuertentis, & multò me præstantioris penè obliti vi-
 demini, quem tamen ad contemplandū, vel ipse ex-
 ternus illius cultus vos conuertere debuisset. Itaque
 de lectulieius maiestate primum, deinde de regij so-
 lij exquisito, & admirabili opere: postremò de ipsius
 regis cum ornatus magnificentia, tum formę præstā-
 tia multa commemorat. Constat porrò vel ex Chri-
 sti verbis apud Matthæum in septimo Solomonem,
 exquisitissimo & pulcherrimo vestitu vsum fuisse.
 EN LECTVLVM SALOMONIS SEXAGINTA FORTES AM-
 BIVNT EX FORTIBVS ISRAEL, OMNES TENENTES GLA-
 DIVM, ET AD BELLA DOCTISSIMI, VNIVSCVIVSQUE EN-
 SIS SVPER FOEMVR SVVM PROPTER TIMORES NOCTVR-
 NOS. Non est tamen hoc loco Hebraici sermonis præ-
 mittenda proprietas, quam adnotasse, tametsi ad
 hanc

hanc rudem, in qua nunc insistimus, expositionē parum certē pertineat: tamen ad veram sententiam de qua mox dicturi sumus, non parum contulerit. Et enim quod vetus interpres rectē vertit. Omnes tenentes gladios, si verbum interpretemur ē verbo, in Hebræo est, omnes capti siue apprehēsi gladijs, enalage verbi passivi pro activo: quod quā vim habeat, suo postea loco dicemus: sequitur. FERCVLYM FECIT SIBI REX SOLOMON DE LIGNIS LIBANI. Ferculum Hieronymus pro lecticæ quodam genere posuisse intelligendus est, à gestando, scilicet, & ferendo, quod eo illustriores viri, atque fœminæ gestarētur. Nam Hebraicum אפרון lectulus gestatorius esse dicitur, quāquam de eo non satis inter omnes conveniat, ergo siue ferculum sella gestatoria sit, siue regalis thronus quod ē lignis libani fuisse dicitur, intelligi debet constituisse ē cedro, quæ appellatur lignum Libani, eo quod Libatonica cedrus maximè esset nobilis. COLVMNAS FECIT ARGENTEAS, RECLINATORIVM AVREVM. Hebraicè רפירה quod alij stratum vertunt, eoque significant lecticæ veluti pauimentum: sed certè רפירה à fulciendo & roborando ducitur. Ex quo rectius reclinatorium, quam pauimentū vertitur, præterquam quod ipsa architecturæ ratio pauimentum, vt aureum sit, non satis certè permittit. Reclinatorium porrò hīc dici puto eius sellæ, quæ intra lecticā erat, latera atque dorsum, quæ reliqua sede eminentiora sunt, & quibus qui sedent, reclinato sæpè corpore, cubitoque innixi incumbunt. Hispanè, recoda-


מוטור

R 2 dero,

dero y respaldar: vnde rectè sequitur. ET ASCENSVM
 FVRPVREVM. Nam ascensushoc loco est ea sellæ pars
 in qua flexis poplitibus sedetur: sic dicta à Hiero-
 nymo quod in eam qui sedet, veluti ascendat, quod
 ita esse facile intelligitur ex Hebraico, cuius loco po-
 nitur, verbo: nam מֵרֶכֶב mercab ab insidere, aut ine-
 quitare ductū propriè significat *ἐπιπταίω*, id est, equi
 fellam. MEDIUM AVTEM CHARITATE CONSTRAVIT PRO-
 PTER FILIAS HIERUSALEM. Charitas autem est ipse So-
 lomon in sella sedens. Sic enim illum appellat figura-
 tè & amatorio more, ipsumque amari dicit à filiabus
 Hierusalem, id est, à Solymitanis fœminis, vel quod
 re ipsa amaretur, vel certè quod amari dignus esset,
 fibique ita videretur. Quod tamen alij fere in eandẽ
 sententiam non ineptè verterunt, & medium tenet
 ipse accensus, seu combustus amore ob filias Hieru-
 salem. Est enim Hebraicum רִצּוֹן ad vtramque sen-
 tentiam ambiguum: quanquam ij amari à Solomo-
 ne fœminas significant: Hieronymus ipsum amari à
 fœminis intellexit. Credibile autem est vtrumq; ve-
 rum fuisse, invero certè & *καρτιάς* Solomone verum
 vtrumque est: de quo tamen suo loco. Sed quoniam
 mentionem intulit Solomonis in solio ornatu regio
 sedētis, id latiùs exequitur ad Hierosolymitanas fœ-
 minas suam orationem conuertens, atque inquiring.
 EGREDIMINI FILIAE SION, ET VIDETE REGEM SOLOMO-
 NEM CVM CORONA QVA CORONAVIT ILLVM MATER SVA
 IN DIE DESPONSATIONIS ILLIVS, ET IN DIE LAETITIAE
 CORDIS EIVS. Diadematis aut coronæ nomine He-
 bræorum.

bræorum loquendi consuetudine omnis corporis cultus elegans, atque aptus significari solet. Illud autem, in die despōsationis, ex communi vita ductum est. Nam quo die quis vxorē ducit cultius ornatur: sed cur à matre ornatus dicitur. An quia matris illius, id est Bersabæ opera & industria David antequam moreretur, regni successorem declarauit ipsum ceteris eius fratribus, quamuis natu maioribus prætermis, vel potius quia hoc sicuti & superiora omnia accommodatum est ad hominum morem. Nam nuptiarum die quæcunq̃ue ad coniugum ornatum attinent, ab eorum matribus curari solent: sed hæc hætenus, iam à capite iterum ordiamur, siue potius contexamus veræ sententiæ expositionem proximè superiore capite interruptam.

EXPLANATIO.



IN LECTVLO MEO PER NOCTEM. Quod illis verbis, fili accedens ad seruitium Dei præpara animum tuum ad tentationem, ijs qui piè viuere volunt denuntiatur fore, vt Deo se se interdum subtrahente, & malorum ad ipsos accessum & incursum, quo eorum erga se amorem probet, non impediēte, rerum aduersarum tempestate, & tanquam fluctibus sæpè agitentur: ad id se comparare omnes debent, nō solum ij, qui incipiunt Deum colere, sed etiam illi, qui in eius amore, aut profecerunt, aut iam

Eccle. 2.

R 3 sunt

sunt planè perfecti. Non enim tam comitatur umbra corpus in luce positum, quam aduersi casus sequuntur eos, qui ipsi pietatem sequuntur, & quo quis maioribus Dei donis affectum se esse cognoscit, eo cogitare debet, instare atque impendere sibi maius aliquod & difficilius certamen quod obeat. Ergo quoniam vir hic iustus, quem describimus, vel potius qui à Solomone figuratè descriptus illustratur, & in lumine collocatur à nobis, vt agnosci faciliè, atque conueniri à cunctis possit: ergo quoniam hic vir iustus incunabula illa amoris deseruit, & in meliore & perfectiori statu locatus, amplioribus gratiæ beneficijs affectus à Deo est: ideò iam quod sequitur, vt strenuè agendo atque certando se ijs beneficijs esse non indignum demonstret, inducitur in tribulationis acie cōstitutus, & tanquam sub armis laborās.

IN LECTULO, inquit, PER NOCTEM QVAESIVI, QVEM DILIGIT ANIMA MEA. Nā in aduersis esse intelligitur primū ex eo quod in nocte est: nā figuratō sanctarū literarū, & arcano sermone, aspera & ærumnosa tempora, noctis & tenebrarum significantur nominibus. Deinde quod Deum absentem quærit. Nam quāuis Deus in omni natura semper sit, suisque similiter semper adsit, propria & peculiari prouidendi ratione, tamen illi quemadmodum cum ipsis bene est, Deū veluti excubantem in suā ipsorum salutem videre sibi videntur, sic rebus in contrarium cōuersis, auersum ipsum à se existimant, & ab alienato ab ipsis animo, custodire ipsos amplius nolle arbitrantur, aut certè quasi

quasi arbitrentur, ita prædicant atq; queruntur: quale est illud Davidis, *Vsquequo Domine obliuisceris* *Psal. 12.* mein finem, vsquequo auertis faciem tuam à me? Quare non est cur dubitemus, quin in malis dicatur esse is de quo dicitur, quod in nocte constitutus Deum absentem requirat: præterquam quod ipsa res & bonorum vitæ ratio poscebat, vt qui vocatus esset, atque sublatu à Deo ad altiore amoris gradum, quique ei vocationi obtemperans, maioribus gratiæ bonis affectus plus virium, atque roboris in animo collegisset, statim educeretur in aciem, & de eius insuperanda tribulatione, strenuitate, & in malis patientia ageretur. Imò si ad ea quæ hoc caput antecesserunt attendimus, haud obscure videbimus hunc sub ista amantis personâ adumbratum iustum virum imminere sibi probationum, id est, laborum tolerandorum, & aduersarum rerû discrimen iam antea præuidisse, atque vt primùm vocarise à Deo, hoc est, augeri maioribus bonis vidit sibi metuere cœpisse, atque ad mox sequutura acerba, atq; tristia se comparasse. Nam profectò hoc illis verbis agebatur. CA-
PITE NOBIS VVLPES PARVVLAS QVÆ DEMOLIYNTVR VI-
NEAS. Itemque illis. DONEC ASPIRET DIES, ET INCLI-
NENTVR VMBRAE: FVGE DILECTE MI. Nam quod vulpiû hoc est, vt diximus, inuisibilibus hostium insidias me-
tueret, quodque Deum precaretur, vt aduētantibus tenebris reditum maturaret, ex eo erat, quia ex no-
uis & maioribus gratiæ donis, quibus se affectû esse sentiebat, coniectura colligebat imminere sibi iam,
& insta-

& instare tribulationis periculū aliquod: & pro pō-
 rione sibi de nouo collatæ gratiæ maiora sua prælia,
 & certamina futura videbat: & quo maius illi gratiæ
 lumen infundebatur, eò clariùs cernebat aduentan-
 tem. iam tristissimis tenebris inuolutam malorum
 noctem, quam ducere vna cum Deo cupiebat. Itaq;
 quæ metuisse tūc dictus est mala, in ijs nūc incidisse
 dicitur, cum in lectulo iacens, & tenebris circumfu-
 sus inducitur, & inter tenebras Dei opem requirens.
 Nec verò recusandum illi fuit, quin communē san-
 ctis omnibus sortem subiret, seque ostentaret Deo,
 atque probaret tolerantia aduersorū. Cæterum quā-
 uis id sit commune omnibus sanctis, tamen sciendū
 est plurimū interesse quo quis probetur modo atq;
 loco. Incipientes enim, vtpotē qui amorem quidem
 virtutis aliquem in se se habeant, firmum tamen il-
 lius vsum, atque habitum non habeant, leuius im-
 pelluntur, ne si in ipso adolescendi initio, cum non-
 dum satis altè radices egerūt, asperius accepti essent,
 pondere ipso malorum obruantur: itaque hos ma-
 la ipsa suspensa veluti manu feriunt: in eos verò qui
 proficientium ordinē tenent, acrius incursant: aduer-
 sus perfectos porrò iusto prælio, & omnibus copijs
 decertāt. Quod ipsum nequis fingi à me putet in hoc
 carmine, & in hac diuinorum amorum expositione,
 figuratē quidem vt cætera omnia, sed tamen accura-
 tissimè & diligentissimè exprimitur. Nam quo intel-
 ligatur per singulos spiritualis vitæ gradus, quos esse
 tres diximus, bonos subire tribulationum procellas:
 Idcirco

idcirco ter inducitur mœrens, seque ex cruciâs sponsa eo quod esset absens vir suus: semel, videlicet, initio carminis. Iterum hoc loco, tertio infra capite quinto. Id porro semper accidere, quotiescunque maiori gratia donati à Deo illi ad altiore[m] virtutis & charitatis gradum vocatur, ita perspicuum est in hoc carmine, ut expositione non egeat. Nam cum primum amare sponsa coepit, statim angidicta est: hoc est in ipso exordio huius libri, eademque ut ad secundum amoris gradum peruenit, hoc est isto, quod agimus loco, iterum dolens inducitur: & rursus infra postea quam perfectior in amando effecta est, sollicitatur gravissimè. Nam post illa, vox dilecti mei, aperiri mihi soror mea, sponsa mea, quibus ad altissimum amoris gradum vocatio & ascensus describitur, continuo sequitur, Pesulum hostij mei aperui, at ille declinauerat, atque transierat: quæsiui illû, & non inueni, vocavi, & non respondit mihi: itemque illud, inuenerunt me custodes qui custodiunt ciuitatem, perculserunt me, & tulerunt pallium meum. Cæterum non eadem ratione vniuersos tentari, sed esse eorum disparia certamina leuiora amare incipientium, proficientium in amore, & perfectorum grauiora, mirum etiam est, quam aptè in hoc carmine, & quam eleganter significetur. In principio enim eius dolere dicebatur sponsa, quod se solam reliquisset suus vir, & hætenus dolere, ut domi ipsa manes, & animi sui desiderium verbis testificans, nihil præterea molesti pateretur: At hic ubi iam maior atque perfectior per-

S sōna

sona agitur, etiam domo egressa, totam urbem obijisse, magnamque in inquirendo illum dicitur laborem suscepisse, atque eum multo maximum, postea cum perfecte amantis imaginem sustinet. Nam præter vias loca noctu, & maxima anxietate animi obita in custodes urbis cum incidisset despoliata, & plagis aliquot acceptis, male ab ipsis mulctata discessit: de quo cum ad id loci peruentum fuerit, dicemus. Quod si quis à me querat causam, quare in ipso honestæ vitæ degendæ, & in cuiusque eius vitæ gradus principio, aut certe paulo post principium viri iusti, malis tribulationum vexandi, atque torquendi tradantur. Huic ego quamuis intelligam, interdum aliter euenire, easque bonorum tribulationes, eaque examina in aliud tempus differri: tamen quia sæpius vsu venit ut statim probentur. Respondeo, id propterea fieri, quia quod cum vocationes istæ omnes, & ad singulos amoris gradus ascensus, magna dulcedinis cælestis copia redudent. (Nam blanditur quodammodo Deus illis quos ad se vocat, eosque illectat delicijs spiritualibus magnis.) Itaque quia ista vitæ sanctæ, & eius omnium partium principia plena voluptatis, & tanquam circumlita melle sunt, si præterea quæ sequuntur, reliqua ex animi sententia iustis placida, & tranquilla euenirent, periculum esset, ne nimia & perpetua voluptate decepti amorem Dei, atque adeo omne virtutis officium voluptate, atque vtilitate metientes, in amando, non tam amorem ipsum, quam quæ ex illo sunt commoda sequerentur, seque ipsi potius amarent,

marent, quam Deū: ex quo etiam fieret, vt ille Dei in hominibus suo amore inflammandis conatus, non solum in nihilum recideret, sed vt contrarium eius, quod Deo propositum est efficere, sortiretur effectum. Nam cum Deus in infundenda cælesti voluptate, atque dulcedine id agat, vt nos ad se amandū inuitet, eius si voluptatis atque dulcedinis vsum nobis perpetuum dedisset, eo ipso quo nos ad se amandum allicit, repelleret, & errare faceret, ab eo quem requirit, amore, vero scilicet, & ingenuo, & in quo Deus ipsius solum causa diligitur. Qui error atque lapsus primo admissus, ac letarum deinceps, ac secundarum rerum successu altus & inueteratus in animo omnem sine dubio honestæ ac beatæ vitæ rationem euerteret. Quare oportuit, vt primo quoque tempore euelleretur is error, vel potius vt obuiam iretur illi antequam germinare, aut omninò posset radices agere: id autem efficitur cum iusti abstrahuntur, ab illa quamuis cælesti, tamen corpus quoque imbuen- te voluptate, cumque in laboribus & rerum asperarum tribulatione continentur: quo sic tandem diligendi Deum veram rationem addiscant, nec quidquā aliud ex Deo præter Deum quærant. Et quemadmodum fulcis mandata, atque commissa semina, si è vestigio cæli clementia, & genitalibus auris excipiuntur in herbam effusa, non temerè ad frugem perueniunt: si autem Aquilonares venti solum durarint, nixque suprâ ceciderit deorsum radices agunt, quibus firmata, ac roborata opportuno tempore vberes

S 2 fruges

fruges gignunt. Sic noster animus postquam diuinæ gratiæ semina intra se semel accepit, nisi molestarū rerum, & ingratarum mole comprimatur, lætitia exultabit inani, ac extra se totus effusus, speciem fortassis aliquam pietatis præ se feret, virtutis tamē eius expers erit, & sibi bene ac volupe esse id vnum amabit, seque pro Deo diliget, quo nihil potest, aut dici, aut esse peruersius. Quare necesse est, vt secundis aduersa succedant, & tristibus læta temperentur, quo eorum alternis vicibus quasi vtrimque æquis ponderibus libratus animus, neutramque in vitiorū partem inclinans semper contineatur in officio. At cū id euenerit, vt in rebus asperis versetur vir iustus quo animo illum futurum, aut quibus armis vsurum dicemus, ad quem confugiet? cuius implorabit auxilium? cuius sibi aduocabit opem aduersus infernas, in seque insurgentes acies tenebrarum? Bonis & iustis viris certè. (Nam scelerati atque improbi cum in mala tali vita digna incidūt, ipsi viderint quid sibi sit faciendum, aut quomodo contra mala nitendū, si tamen illi nituntur vnquam contra, ac nō potius ab omnibus animi bonis flagitiose imparati ferri se atque agi à malis sinunt, seque ægritudinibus & desperationi conficiendos permittunt.) Bonis igitur atque iustis viris, certè vnus Deus pro auxilio, proque perfugio, in omni eorum calamitate, atque malo est. Nam, vt primū nox tribulationis cœpit irruere, statim suum animum ad Deum conuertunt, & toto pectore illum cogitant, ac plus aliquanto, quam antea facere.

facere erant soliti, occupantur in eo amando, cui postquam omnem suam causam exposuerunt, postquamque spes suas in eo vno collocasse, professi coram eodem ipso sunt, illudque addiderunt, intelligere se atque cognoscere, nec sine illius. permisso illa accedisse, nec sine eiusdem iussu mutari ea in melius posse, ac denique ipsum mitius ut secum agere, & irasci iam desinere velit, deprecati sunt, illudque in primis affirmarunt, se id vnum maximè velle, atque cupere, suæ ut ille voluntatis atque gloriæ potissimam rationem habeat, quasi ablegata à se omni rerum suarum cura, Deoque permessa in vna legis, ac promissorum Dei meditatione acquiescunt, humana despiciunt, cælum mente petunt: seque veluti in sinum atque complexum Dei coniungunt, atque abscondunt, in ibique abscondi atque delitescere, & magno amore flagrant, malorum morsus, aut omnino non sentiunt, aut certè leuissimè perferunt. Quod si quod nonnunquam facere Deus solet, non solum molestari ipsos à malis, atque vexari sinat, sed ipse se quasi ab alienato ab illis animo subtrahat, & influere amplius in eorum mentes suauiter & iucundè ut solebat, nolit, eosque in media tribulationis nocte solatio destitutos relinquat, aut ita ipsis videatur relinqui se à Deo, & abijci, & pro despectis haberi, id si eueniat, minimè illi quidem, aut spem abijciunt, aut amorem suum à Deo dimouent. Sed quod sponsa hoc loco fecisse scribitur, id potius ipsi faciunt, quærunt in lectulo, dormi, perquirunt per vrbs vias, per fora, perque compi

S 3. ta.

ta omnia, omnibus vestigijs sequuntur, circumcur-
fant, obuios rogant, nihil denique nō faciunt, quo-
ad voti sui compotes effecti, id quod quærunt, inue-
niant: hoc est nullis malis, nullis rebus molestis & a-
cerbis deterrentur ab amando Deum, beneque de
ipso sperando: si domestico atque intestino malo in-
festantur, vnum Deum requirunt, si publicè in illos
insurgitur, in eodem Dei quærendi studio perseue-
rāt, si calamitati additur calamitas, & alia ex alijs ma-
la nexa sequuntur, si que luctuosas noctes excipiunt
mœsti & lachrymosi dies, siue malum quo opprimū-
tur breue sit, & intra domesticos parietes inclusum,
siue apertum potiùs, lateque patens, & in longum
tempus perseverans, omnibus quamuis fortunæ te-
lis confossi ad cætera stupidi vnum illum dolorem
ad sensum admittūt, & ad animum suum, quem acer-
bissimum capiunt, ex eo quod species illa amabilis
& grata Dei, quæ in ipsorum animo elucebat antea,
iā nusquam appareat. Itaque excitant se se, & ani-
mi sui omnes latebras scrutantur, dictaque sua & fa-
cta omnia seuerissimè examinant, omnesque vias in-
fistunt, quibus ad Deum peruenire quis potest, in-
stant, precantur, supplicant, fletus fundunt, lamen-
tantur etiam interdum, clamores edentes maximos,
illaque Dauidica: Illumina vultum tuum, cur auer-
tis faciem tuam à me. Ne declines in ira à seruo tuo,
sæpius iterantes perseverant, vsque eo dum conuer-
so ad pietatem & clementiam Deo, intermissus ille
iucundissimæ consuetudinis Dei eis redditur, & re-
stituitur.

stituitur fructus, quo ex fructu ipsis restituto atque redito maiorem etiam, quam antea voluptatem capiunt. Itaque nouo quodam & vehementiori amore accensi irruunt in complexus Dei, illumque arcte tenent, & quam possunt intimè intra suum pectus recondunt, nec ab eo diuelli possunt vllò modo, & hoc est, quod sequitur. TENVI ILLVM, NEQVE DIMITTAM. Id porrò vbi assequuti sunt labores & ærumnas suas, non tanti faciunt, facilèque sibi & verè persuadent, quando iam Deus optatum illud vultus sui lumen ipsis ostendit breui futurum, vt malorum suorum tenebris penitus discussis tranquillus ipsis & serenus dies oriatur: sequitur. QVAE EST ISTA, QVAE ASCENDIT SICVT VIRGVLA FVMI? Quamuis vera virtus se ab hominibus videri, aut celebrari non velit. Tamen ne si maximè cupiat, latère eos possit, ab ipso suo splendore & pulchritudinis magnitudine prodita. Itaque vel nolens in oculos hominù incurrit, eosque ita commouet, vt qui nullam ipsi partem virtutis habent: tamen non possint illam non admirari. Sed interest, quis gradus virtutis sit: nam incipiens virtus quòd plurimis, quæ è prauè assueto corpore existit, tanquam nebulis, eius obscuratur, & inficitur lumè, haud facilè suum splendorem foris proferre queat. At eadem vbi aliquantulum adoleuit radios emittit lucis suæ, quoque magis adoleuit, eo magis latè emicat. Itaque in hoc carmine cum de incipientum virtute & amore agebatur intra sponsi, sponsæque personas omnis sermo constitit, omnisque illa amoris

alms
tanquam

tanquam actio intra domesticos parietes, ab his per-
acta duobus spectatore caruit, & applausore. At nūc
cum iam describitur proficientiū virtus, cuius splen-
dor occultari nequit: idcirco præter istorum perso-
nas inducuntur alij, qui dum pulchritudinem spon-
sæ admirantur, nos doceant iustos viros, cum eovsq;
profecerunt in amore Dei, vt in secundo amantium
ordine numeretur, admirationi hominibus esse inci-
pere. Qui quidē homines cum eiusmodi iustum a-
liquem contendentem ad virtutis culmen pleno gra-
du conspiciunt, consistunt primò, atque ipsum velu-
ti noscitantēs diligentius inspiciunt, eoque agnito
recordantur vitæ eidem, eisdemque quibus ipsi te-
nentur studijs illum non ita pridem vacasse, cupidi-
tatibusque similibus seruijsse: itaq; rei nouitate com-
moti percontantur, quo ex genere hominum, homo
ille sit, qui tam subito in nouum, & ab eo, qui erat an-
tea diuersum hominem sit demutatus, quādo, quo-
ve modo ea, in quibus studio detinebatur inculta, &
horrida loca relinquens ad cælestis vitæ lucidas, & su-
blimes regiones tanto virtutum agmine circumse-
ptus cōscenderit. In quo genere illud etiā, sæpius
euenit, vt adhæc cōsideranda, & secū reputanda ho-
mines animum magis aduertant, quoties id accidit,
vt calamitosum aliquem, & graui fortuna oppressū
hominem, cuius de salute iam desperauerant, præter
ipsum spem, ab omni liberatum malo, ac suæ pri-
stinæ dignitati, nec opinatō restitutum videant. Illa
enim fortunæ in melius commutatio tam subita,
acrius

acrius illorum mentes, atque animos commouens efficit, vt intelligere, & cognoscere incipiāt, eius hominis rescuā Deo esse, maiusque omninò bonum aliquod latere in eo, quam quod ipsi vnquam sunt suspicati arbitrentur: quod iam illis bonum, dum ista pertractant, paulatim ex alterius animo emicare & apparere ita incipit, sibi vt videātur illud videre. Itaque quem antea despiciebant, iam eum suspiciunt, atque venerantur, nec solū taciti secum, sed cum alijs etiam loquentes animi sui admirationem expriment. Itaque dicunt. QVIS EST ISTI, QUI ASCENDIT DE DESERTO SICVT VIRGVLA FVM? Quis est inquam hic qui vagus, atque errans, perque urbem modo cursitās, tam subitò latus & beatus est redditus? Qui tot mala quibus opprimebatur, euasit? Qui ab inimicis circumuentus, à suis impiè proditus animi firmitate cunctos superauit? Qui tot illos quibus constrictus tenebatur, laqueos calumniarum exiit? Quem nō carceris pædor confecit: non diuturnitas mali fregit: nō cum summa facultate nocendi coniunctum odium pessundedit? qui tot tela nudo corpore excipiens sustinendo illa, & modestè agendo repulit, inq; eo ipso perstitit, vsq; eo quoad Deus inimicorum eius omnes conatus, vniuersaque consilia, in nihilum redigens, effecit, vt patientiæ audacia, & innocentiae improbitas cederet? Hisque multa similia mutuis sermonibus conferunt. Et hoc causā habuit Solomon, quare simul atque sub ista sponsæ suum virum querentis, & magno tandem labore inuenientis imagi-

T ne,

ne: bonorum virorum tribulationes, & è tribulationibus, nec opinatas liberationes insinuauit, cõtinuò induxerit admirantes, & percunctates turbas: quod illa liberatio bonorũ, statim visa animos hominum admiratione complet. A quo etiam Solomone illud est rite obseruatũ, vt quoniam ista, qua de agitur virtus proficientum, vtpotè quæ non dum peruenerit ad perfectam virtutem, quasi odore quodam boni exempli se ad homines insinuat, nec illis adhuc con-
 tuendam exhibet honesti aliquam absolutam atque perfectam speciem, idcirco curauerit, vt hĩc modicè, aut intra modum potiùs sponsa laudaretur, cõmendareturq; eatenus, nõ vt forma excellere, sed vt optimo præstare odore diceretur. Quæ autem sequũtur.

ADIVRO VOS FILIAE HIERVSALEM PER CAPREAS, CER-
 VOSQUE CAMPORVM, NE SVSCITETIS, NEQUE EVIGILA-
 RE FACIATIS DILECTAM, DONEC IPSA VELIT. ab vtro-
 uis dicta accipiantur, similiter interpretanda sunt. Si-
 gnificant enim illam animi quietem, illamque læti-
 tiæ beatam dulcedinem, quæ iustos iam perfunctos
 laboribus sequi solet: qua de obtestatione, quoniam
 aliàs diximus, hĩc plura dicere superfedebimus. Por-
 rò quæ ab hoc loco, vsque ad finem capitis restant,
 quæ item ipsa, vel ab sponsa dicuntur, vel vt non-
 nullis placet, ab ijs qui proximè inducti sunt laudan-
 tes, & admirantes sponsam: nam & mihi modo hoc,
 modo illud probabilius videtur: hæc itaque conti-
 nent illustrem prædicationem, & expositionem eius
 prouidentia, qua Deus res atque vitam suorum pro-
 priè

priè gubernat. Nam quâuis diuinis rectionibus omnia temperentur, tamen est quoddam peculiare, & si ita loqui licet, reliquis vigilantius & attentius curæ genus quo Deus eos qui se amant prosequitur, quod ad genus, illa pertinent, Custodi me Domine vt pupillam oculi, & Qui vos tãgit, tangit pupillam oculi mei. Illudque Dauidis, Oculi Domini super iustos, & aures eius in preces eorum. Tum Christi illud, Nolite timere, omnes capilli capitis vestri numerati sunt. Et in primis hoc, de quo agimus. EN LECTVLVM SALOMONIS SEPTVAGINTA FORTES AMBIVNT EX FORTIBVS ISRAEL. Nam si in ijs verbis illorum adhuc persona versatur, qui modo sponsam admirati dixerunt: QVAE EST ISTA QVAE ASCENDIT DE DESERTO, SICVT VIRGVLA FVMIS? Valdè consentaneè subiungitur. EN LECTVLVM SALOMONIS. Rectèque ex illis ista sequuntur, id est, ex salutis quæ iustis, nec opinato reddita est admiratione prouidentie Dei, erga eosdem commemoratio rectè, & ordine sequitur. Nam quotiescumque, aut videmus ipsi, aut audimus ab alijs, aliquem præsertim bonum, & modestum virum à carcere, à ignominia, à inimicorum manu, à morbo, à captiuitate, à similibus permultis, præter opinionem hominum liberatum, statim nobis occurrit reuereri, & admirari prouidentiam Dei. Itaque iudicamus diuino nutu cuncta regi, & de omni illius rectione magnificè sentimus, sicut scriptum à Dauide est. Lætabitur iustus cum viderit vindictam, manus suas lauabit, in sanguine peccatoris. Et dicit homo, si

Psal. 16.

Zacha. 2.

Psa. 33.

Matt. 10.

Psal. 57.

T 2 vtique

faciunt,

Theodore
rus in can-
tica.

vtique est fructus iusto, vtique est Deus iudicans eos in terra: sin autē sponsæ ista sunt verba, id quod verius existimo, & de se ipsa interrogantibus, & admirantibus, hisce verbis respondet, id profectò dicit: quod boni & iusti viri facere, certè omnes debent, cū à malis, & tribulationibus liberantur. Nam agnoscetes à Deo se esse seruatos ei vni, liberationem & incolumitatem suam acceptam referunt, eiusque erga homines charitatem laudant, & siue secum agant, siue cum alijs versentur, id vnum in ore habent, id perpetuò prædicant, & quod in ipsis est, omnes homines ad huius charitatis Dei, & erga suos prouidentie considerationem erigunt, & inuitant: dicuntque. EN LECTVLVM SOLOMONIS SEPTVAGINTA FORTES AMBIVNT EX FORTIBVS ISRAEL OMNES TENENTES GLADIOS, ET AD BELLA DOCTISSIMI, VNIVSCVIVSQUE GLADIVS SVPER FOEMVR SVVM PROPTER TIMORES NOCTVRNOS. En inquam, qua voce auditorem ipsum ab eo de quo antea agebatur, reuocant, & ad nouæ alicuius, atque magnæ rei considerationem traducunt, tantumque nō dicunt, causa nō est cur nobis de recuperata præter spē salute gratulemini, curve admiremini fortunæ commutationem tam subitam, quasi nobis ob eam rem aliquid laudis, aut prædicationis tribui deberi, arbitremini. EN LECTVLVM SALOMONIS. Adhas inquam potiùs diuinæ prouidentie, atque custodiæ rationes respicite, illudque considerate, quot, & quam firmis præfidijs Deus eos qui ipsi fidunt, circundet. Nam lectulus hic Solomonis qui dicitur ipsos.

sos bonos, atque iustos significat. Illi enim quemad-
 modum aliàs alijs nominibus, pro eo, ad quod ex vir-
 tute sunt apti in sacris literis variè & figuratè appel-
 lantur: templumque & sedes, & Dei currus dicuntur:
 sic hîc Solomonis, id est, Christilectulus nominan-
 tur: propterea quod Christus in peccatoribus veluti
 laboret, sicut scriptum est. Servire me fecisti in pec- *Esa. 43.*
 catis tuis, præbuiſti mihi laborem in iniquitatibus
 tuis: in iustis verò molliter quiescat. Etenim diuina
 munificentia in illis intra angusta spatia concludi-
 tur, & quodammodo coarctatur, parceque Deus cū
 illis videtur agere, eorum ipsorum culpa prohibitus,
 ut videre est in illo seruo, de quo apud Matthæum in
 vigesimo quinto. In his autem sicut qui iacet in le-
 cto corpus suum effundit atque distendit, ita Deus
 bonitatis, atque largitatis suæ diuitias latè explicat:
 quia ut scriptum est. Habenti dabitur, & abundabit. *Matt. 25.*
 Ea enim est natura, atque ratio donorum Dei, ut alia
 ex alijs semper nascantur: ac veteribus noua succe-
 dant, & minora maioribus cumulentur, semperque
 beneficijs diuinis accipiendis, ijs si quemadmodum
 decet, utamur, ad potiora beneficia accipienda fit
 gradus, quod vel ex illo verum esse intelligitur, quod
 Paulus eleganter scripsit. Nam quos prædestinavit, *Rom. 8.*
 hos & vocauit, quos vocauit, hos & iustificauit, quos
 iustificauit, hos & glorificauit. Deus enim quo ad se
 attinet, voluntatem nobis benefaciendi non inter-
 mittit, sed cum natura pronus sit ad omnē liberalita-
 tem atque munificentiam, quamcumque sibi obla-

T 3 tam.

tam, benefaciendi causam eam arripit, ipsoque bene-
 faciendi, & liberaliter agendi opere gaudet, & exul-
 tat, & tãquam in lecto fufus quiescit. Vnde & Hebrai-
 cum מִתָּהּ mitha quo lectus significatur ab extēden-
 do & dilatando deducitur. At non temerè est quod
 iusti, hoc potissimum loco, in quo de ipsorum recupe-
 rata salute agitur, mitha nominantur. Nam profectò
 quandiu illi in angustis versabantur rebus, tandiu
 Deus similiter videri poterat contraxisse manum
 suam, seque ipsum in arctum locum quodammodo
 inclusisse: quia pro ea qua erga suos uti solet liberali-
 tate, nimis restrictè tunc ac nimis etiam parce visus
 est agere. Nos certè cum bonos viros ærumnis ple-
 nos, afflictos & abiectos videmus; florentibus inte-
 rim & foeliciter agentibus inimicis illorum: tametsi
 non minùs benè, quam par est de Deo sentiamus,
 Tamen minus latam, minusque laxam, & amplam
 sedem in nostris animis, & cogitationibus ipsi exhi-
 bemus, ea certè opinio quam habemus de bonitate
 & munificentia eius, exilior in nobis efficitur, & ve-
 luti contrahitur, at cum eosdem luci atque libertati
 Deus restituit, idque videmus ipsi, cõtra omnia eue-
 niūt: nam primum lætissima quædam, tanquam lux
 diuinæ bonitatis, atque iustitiæ nobis oritur: deinde
 ingens ex eo in eisdem nobis gaudium nascitur. Po-
 stremo eo perfusi, atque imbuti gaudio linguas, quas
 ante id tempus mœror stupore mixto, constrictas te-
 nebat, laxamus in laudes Dei, qui iam nobis, ut est
 ita optimus, atque maximus, & effusissimè bonus,
 atque

atque liberalis esse videtur. Atque hæc de lectulo. Porro septuaginta illi, qui iuxta lectum excubare dicuntur, tametsi propriè illud prouidentia genus significant, quod nominauimus singulare & priuatum, quodque mirabiliter est varium, ac multiplex, tamen verè etiã referunt Ecclesię prælatorum, atque sacerdotum eos ordines, quorum ministerijs Deus vitam, atq; mores nostros gubernat. Qui primo prælati ideò fortes dicuntur, quia non solùm dominicas oues pascendi, atque ductandi laborem perferre, sed quia ultro ipsi, & audacter in infestos Christi ouilibus lupos incurfare debent, eisque se opponere pro grege Dei, neque re ipsa solùm, sed aspectu etiam, atque animi habitu timorem illis incutere: nam ea vis subiecta est voci Hebrææ גברים pro qua fortes Latinus posuit interpretes. Sunt enim Guiborim robusti, & potentes, & cùm corporis, tum animi viribus polentes, belloque gerendo nati homines. Itaque fortes sint oportet: nec enim tantum, & tam multiplex, tamque sollicitudinis, ac periculi plenum munus, quale est Episcoporum, & verbi Dei ministrorum administrari vlllo modo rectè, atque obiri queat ab ijs, qui ipsi cupiditatibus suis cedunt, atque succumbunt, eisque vti addicta mancipia seruiunt: neque tã ceteros antecedunt honoris insignijs, quam auaritia, atque nequitia præstant omnibus. Igitur primò sint fortes: deinde quod non temerè additur ex fortibus Israël. Nam qui ambitionis labores maximos subeunt, & regum domos frequentant, & nihil non
audent,

audent, atque tolerant, quoad consequantur quod cupiunt, id est, rebus Ecclesiæ publicis præfiantur, sunt illi quidem fortes: aliter enim tanto tollendo oneri qui essent idonei? sed non ex fortibus Israël. Possunt illi omnia digna, indignaque perferre: possunt per obstantes eadem ambiētium cuneos, viam sibi labore, & assentatione quasi ferro aperire: possunt eo tendere, vel per medios ignes, quo ipsos per uersa honoris cupido vocat: at à virtute aduersus vitia in acie consistere, consistere dico, vel primum hostium aspectum sustinere, aut si minus militis calonis saltem munus obire, aut omnidò militibus se numerari velle, planè non possunt, suntque fœminis molliores. Possunt quiduis perpeti, duntaxat, dū sibi comparant aliquem gregem in quo se iactent, atque dominantur, at vbi compararunt pascere eū, saluari atque cælesti pastu non possunt. Atqui hæc non est fortitudo Israël, qui dum soceri sui greges pascit, & ducat, infomes plures noctes duxisse dicitur, frigoraque atque æstus maximos tolerasse. Non est inquam fortitudo Israël, qui tametsi ob fraterna odia, & parentibus, & patria domo careret: nullis tamen rerū difficultatibus celsit: quiq; in Lia, atque Rachelis personis rectæ actionis, atque beatæ contemplationis absolutionem adamauit, & coluit: qui denique ne angelo quidem in lucta concessit. Nam hoc fortitudinis genere prælatos Ecclesiæ præstare debere, Israël facta commemoratio significat. Verum quemadmodum versari in acie, aut cum hoste confligere

confligere aliquis inermis non possit: tamen si & corporis, & animi excellat viribus, sic isti ecclesiæ præfecti existimare debent, non sibi satis esse, quod sunt manu fortasse prompti, & parato ad dimicandū animo, nisi præterea arma habeant ea, quibus in hoc genere belli est utendum. Nam idcirco subiicitur. OMNES ACCINCTI GLADIIS. Est autem gladius iuxta harū literarum arcanum sermonem verbum Dei, scientiaque eius, cum legitima docendi facultate coniuncta: ut constat ex illo Apocalypsis: ubi in Christi ore gladius inesse, utraque parte acutus scribitur. Nā cum in ore esse, aut ex eo egredi dicitur, satis declaratur gladio significari verbum, atque doctrinā Christi. Quo certē gladio, id est, rerum, atque legum diuinarum cognitione, atque scientia Ecclesiæ ministri armabuntur, si modo id futuri sunt, quod se esse volunt, atque cupiunt, populi Christiani rectores, doctores veri, magistri vitæ, lumina Ecclesiæ. Nā quod nonnulli arbitrantur, & docent ad Episcopi munus gerendum, verbi Dei, hoc est, sanctarum literarum, & Theologiæ cognitionem necessariam non esse, siquidem eisdem artibus, quibus ab illis comparatur, est administrandū id munus, rectē arbitrantur: compararunt enim illud ambitionis pessimis artibus. Sin autem legis, atque voluntatis Dei ratio habenda est, sique ex ipsius muneris natura est faciendum iudicium, in maximo profectō errore versantur. Quod si illi propter animi sui cæcitatem ad huius legis intelligentiam penetrare non possunt, & ad eius vim in-

V. telligen-

telligendam eorum mentis acies hebescit, veteris illius ecclesiæ, quæ ante mille annos foelicissimè floruit, saltem exempla respiciant. Ecquæ enim è tanto sanctissimorum Episcoporum, & doctorum numero nobis proferant, cuius non fuerit insignis in hac re, de qua agimus scientia? nisi fortè plus videre se, quam viderint diuini illi viri arbitrantur: aut nisi lógo vsuedocti inuenerunt contineri in officio, sine ista arte populos Dei, & probos effici posse? Ego sanè sic existimo, Christianæ reipublicæ antiquos mores, ex eo potissimum tempore in deterius labi cœpisse, cum diuinarum literarum, atque legum imperiti homines cathedras Ecclesiæ occuparunt. Vnà enim cū illis auaritia, vna luxus, atque fastus, vna crudelitas, & immanitas, aliæque innumeræ pestes, in Christianos mores inuectæ Ecclesiam oppresserunt, oppressamque ita tenent, vt regressus ad salutem nullus ferè sit reliquus, futurumque videatur, quod non parū multi pij, & sancti homines, non sine causa, atque argumento verentur: vt quemadmodum orientis populos, apud quos olim Christiana disciplina vige-
bat, tenebris erroris inuolui, illorum offensus peccatis Deus permisit: sic etiam nos, nostris irritatus culpis abijciat, sibi que quærat, atque provideat alios populos humiles, & ad sementem gratiæ accipiendam, & ad fructum proferendum idoneos, ad quos simul cum fide Iesu Christi filij sui transferat, à nobis ablatum cæleste regnum, & Spiritus sancti charismata. Nam & hoc ipsum, iam antè mille annos timuit Augustinus

gustinus: imò non tam timuit, quam præuidit futurum. Itaque literis prodidit. Etenim Ecclesia quando homines erunt, tandiu, ut stet necesse est, sed ut hoc necesse sit, tamen non est necesse, ut in aliquo delecto, & sibi propriè attributo populo, aut natione perpetuò permaneat. Sed ut ad institutum redeamus sermonem, in hos timores, malasque spes, & in has populi Christiani ruinas incidimus ruendi initio facto ab ijs, qui diuinarum literarum ignari, atque rudes non sunt veriti manum ad mouere gubernaculo Ecclesiæ. Est enim quo omnis improba constringitur, ne se effundat, & coercetur cupiditas, veluti frenum, timor Dei. Timeri autem Deus, quæ potest eius legis cognitione, atque scientia de medio sublata? Nã de medio tolli, atque omninò extingui necesse est, si qui maximè illam tenere, atque alijs tradere debuissent, ab ijs contemnitur, & negligitur maximè. Cur enim priuati eas literas, & disciplinas ament: quas videant ab ijs, à quibus coli debuissent, nõ solum ipsas despici, sed etiam professores earum negligi, & pro nihilo haberi, & interdum etiam scurrilibus iocis vexari? Sed de istorum peruerso errore proprio, & iusto volumine aliquando fortasse dicemus, eosque infinita & rationum, & testimoniorum copia obruemus. Quamquam illi non tam ratione reuincendi essent, est enim res perspicua, & planè huiusmodi, ut nefas esse videatur eam vocare indubium, quàm catenis vincendi, nisi quod nobis in hac parte sint foeliciores. Sed aduersus hos aliàs. Nec enim tanta res com-

V 2 mode

mode concludatur intra commentariorum angustias. Nunc illud maneat, quod nobis dant hæc verba Dei enarrari instituta, quos Deus Ecclesiæ suæ custodes præficit, eos non solum fortitudinis eximio genere præstare, sed etiam gladio verbi Dei armatos esse debere: omnes, inquit, tenentes gladium. Sed quod suprâ admonuimus hîc in Hebræo verbi enallagen esse, poni quæ passivum, vbi activum poni debere, res ipsa poscebat, id si qua ratione fiat, quis roget, cognitis ijs, quæ diximus, non est difficile exponere. Nam si viri isti fortes sunt Ecclesiæ ministri, si quæ verbum Dei, & eius administrandi potestas est gladius, iure, atque meritò non ipsi tenere gladium, sed teneri potius ab ipso dicuntur: id namque exigit, atque postulat illorum officium, non ut in suos usus convertant potestatem, quam habent, sed ut ipsi potius serviant ei, ac se ab ea duci permittant, omnesque suas, & curas, & cogitationes ad eorum, quibus præfunt salutem dirigant, atque referant. Sequitur. FER-

CVLVM FECIT SIBI REX SALOMON DE LIGNIS LIBANI. Alia iterum allegoria, idem, de quo agimus providentiæ diuinæ erga suos peculiare genus declaratur, & exponitur: nisi quod superior, eam partem continet, quæ in defendendo, & tuendo versatur: hæc ad eam partem quæ utilitates ipsis, & bona conciliat spectat. Ibi quatenus Deus auxilium ferat suis laborantibus explicabatur: hîc verò scribitur quomodo illos maximis & plurimis bonis afficiat. Itaque quemadmodum ibi lectuli nomine iusti significabantur, sic isto

isto loco significantur ferculi, atque lecticæ nomini-
 bus: atque sicut ob eam causam lectus dicuntur, quia
 effundit atque dilatat in illis Deus, suæ beneficentiæ
 rationes, cum eos ab oppressione malorum liberans
 luci, atque dignitati restituit, sic cū eosdem magnos
 suis donis, & illustres efficit, eis pro lectica atque fer-
 culo, quo ipse se circumgestari gaudet, vti videtur.
 Nam quamuis illi semper Deum gestent in mente,
 & in corpore, tamen quando vel ipsi edunt insigne
 aliquod facinus, vel à Deo illustri quopiam dono af-
 ficiuntur, eorumque ob eam rem virtus populo in-
 notuit, tunc ipsum Deum ita palam circumferunt,
 vt à cunctis propè cerni, & adorari possit. Quocirca
 vniuersa illa nomina, aurum, argentum, purpura, ce-
 drus, quibus ex rebus constare ferculum dicitur, eas
 rationes benefaciendi significant, quibus Deus, plu-
 rimis atque maximis erga suos utitur: vel potius illa
 ipsa bona, bonorumque genera, quæ Deus tribuere so-
 let suis, cum illis benefacit. Nā habent singula illa no-
 mina suas, & arcanas significationes. Nam auro cha-
 ritatem significari liquet, ex illo Apocalypsis. Sua-
 deo tibi emere à me aurum ignitum. Argentum ve-
 rò legis, ac præceptorum diuinorum intelligentiam,
 & obseruantiam significat. Iuxta illud, Eloquia Do-
 mini argentum igne examinatum. Purpura autem è
 qua summi sacerdotis vestis magna ex parte confi-
 citur ad cultū Dei, & ad religionis virtutem refertur.
 Cedri porrò altitudo ad virtutum heroicarum exag-
 gerationem, & ad animi cuncta terrena despicientis

Apoca. 3.

Psalm. II.

V 3 celsitu-

cellitudinem declarandam aptè transfertur. Nec verò illud est omittendum, non copia solum, sed arte etiam præstare hoc ferculum dici, quò intelligatur non solum largum in benefaciendo, sed in ipsa ratione benefaciendi admirabilem esse Deum. Etenim quibus maximè vijs homines existimant se ad interitum duci, ijs sæpè, Deo id ipsum providè disponente, ad salutem illorum, & gloriam contenditur: omniaque illis Deus vertit in bonum, seque ipsum illis præbet, quod est maximum bonum, sicut scriptum est, Et ad illum veniemus, & mansionem apud illū faciemus. Idque hoc loco significatur, cum dicitur. MEDIA CHARITATE CONSTRUIT. Caritas enim Deus ipse est, quod Ioannes scripsit. Qui Deus in his ferculis, id est, iustis hominibus sedens, eosque amans, ac lucis suæ radijs illustrans, ita reddit conspicuos, ut omnia illa, argentum, aurum, purpura, cedri: ille inquam diuinarum virtutum chorus eximius, ex eo quod Deus illi præsidet pulcher potissimum, & spectabilis, pretioque & æstimatione sit dignus. Vnde rectissimè sequitur. EGREDIMINI FILIAE SION, ET VIDETE REGEM VESTRUM SALOMONEM CUM DIADEMATE, QVO CORONAVIT EVM MATER SVA IN DISPENSATIONIS SVÆ, ET IN DIE LAETITIAE CORDIS SVI. Nam beneficiorum Dei commemoratio ipsa, ei in memoriam reduxit, summum illud, & maximum beneficium, & quod certè reliquorum omnium beneficiorum est caput: vtpotè in quo diuinæ providentiæ erga homines excellentia maximè enituit, cum

Ioan. 14.

Ioan. 4.

cū homo ipse effici pro hominibus voluit. Cuius ex consideratione reſponſa cum raperetur in admirationē, & eam animo incluſam continere non poſſet, veluti exclamans dicit. EGREDIMINI FILIAE SION, ET VIDETE REGEM VESTRVM SALOMONEM, CVM DIADEMATE QVO CORONAVIT ILLVM MATER SVA. Quasi ita proſectò dixiſſet. Quid attinet per ſingula, providentiæ Dei erga nos magnitudinem dicere, aut illius vniuerſa nobis collata beneficia commemorare? Cur aut excubias nocturnas, aut regij cuſtodes cubiculi, aut lecticæ referam artificium egregiū? Quid coniecturis, argumentisve probem, ab eo nos diligī, cum videam, oſtendereque cunctis poſſim Dei filiū, & vnigenitum filium, & ſummum etiam ipſum, & patri æqualem Deum, patre ipſo volente eſſe factum noſtri cauſa hominem, & infima conditione hominem? EGREDIMINI, igitur, ET VIDETE REGEM SALOMONEM CVM DIADEMATE, QVO CORONAVIT EVM MATER SVA. ac deſinite mirari, quod in hominibus, quaſi in lecto quieſcat, quod eorum cuſtodix, atque ſaluti tot modis proſpiciat, quod ſe in ipſorū, & animis, & corporibus circungeſtari gaudeat, quod præſidijs defendat illos, quod auro, argento, purpura, ebore, id eſt, maximarum præſtantia virtutum exornet: cū ipſe omnium rerum Dominus, Dominus inquam ipſe, ne nos ampliùs morti ſeruiremus, carnē induere dignatus ſit, & in ea ſeruitutem noſtram ſeruire: & qui olim ſeuerus eſt habitus, iam & ſit, & dicatur Solomon, videlicet, veriſſimæ & beatiffimæ pacis præſtantiffi-

stantissimus author: & qui ante omnia tempora, ex solo patre nascebatur, matrem iam mortalē habeat, ē cuius vtero, mortali & ipse cultu ornatus prodeat, eoq̃ue ita gaudeat, atque lætetur, vt ostentare in eo se, atque iactare quodammodo videatur: nullam certē illo regiam purpuram augustiorem esse putet, nullum diadema. Itaque sequitur. IN DIADEMATE

QVO CORONAVIT ILLVM MATER SVA IN DIE DESPONSATIONIS SVÆ.

Et in die legitur cordus suus.

Et certē desponsationis nomine aperte, & citra vllas verborum ambages assumptæ à Deo carnis sacramentum sponsa declarat: quando, sicut literæ sacræ loquuntur, cum Deus factus est homo, inijt conjugale cum homine fœdus, nullo tempore dirimendum. Cuius fœderis ineundi, & humanæ suscipiendæ carnis tempus, quod verbum sibi antē omne tempus constituit, lætitiæ ipsius propterea dicitur dies, quia si ita loquendum est, Deo omnium lætissimus is dies illuxit, cum humana carne vestitus, & ex homine in lucem ortus, ab hominibus visus est homo. Etenim quid Deus vnquā fecit, quod aut huic operi simile, aliqua ratione sit, aut conferri cum illo aliquo modo possit? Alia certē omnia quæcumque Deus vnquam operatus est, huius rei efficiendæ, & ad exitum perducendæ causa facta à Deo, & comparata fuisse rectē creduntur. Adde quod in singulis alijs operibus, singulæ lucent virtutes Dei, in hoc ita apparent vniuersæ, vt nulla re, aut magis, aut æquē illustrētur. Quod si verē regius Psalter scripsit, Lætabitur Dominus in omnibus operibus suis: quo

Psal. 103.

quo gaudio, quave lætitia affici censendus est, in eo opere suo, quod reliqua ipsius opera, vel si omnia in vnum conferantur, tanto interuallo superat. Nam si documentum aliquod quæritur, diuinę sapientiæ in hoc summa apparet: si bonitatis, nullū hoc exemplo est exemplum illustrius: si potentiæ, si iustitiæ, si equitatis, consilij, magnitudinis, munificentię, cæterarumque omnium virtutū lumen requiritur, ijs completur hoc opus luminibus, nulla vt humana mens, nisi vi roboretur cælesti videre splendores tantos possit. Ac si nobis ea nostra consilia placere maximè solent, quibus cum aut nihil agere, aut aliud prorsus agere videamur, id potissimum efficimus, quod nobis proposuimus efficere, ad exitumque fœlicem, & optatum nostra consilia perducimus, ipsi interim, vt apparet otiosi: lætissimum profectò Deo accidit tantas fecisse res, quantas nullius animi mens, & cogitatio percipiat, re, vt à mundi sapiētibus iudicatur omnium vilissima, & contemptissima, id est carne, atque cruce Christi. Qua de re, verissimè Paulus scripsit: *i. ad Cor.*
 Quod stultum est Dei sapientius est, quam homines, *i.*
 quod infimum est, fortius est hominibus. Itaque Deus *Luc. 3.*
 ob istam causam, Christum ipsum brachium suum, & salutis suę cornu proprietate quadā Hebraici sermonis vocat, id est magnum, atque eximium suum robur, aut certè totius suę magnitudinis, atque præstantiæ clarissimum, & propè vnicum exemplum. Quid? cū tanto antè id futurum denuntiauit, cum toties, & tanta asseueratione prædixit, cum tot

X ad


Proh. 8.

ad id declarandum adhibuit, & verborum & imaginum figuras, nonne satis declarauit, de eo ipsum sibi vehementer placere? sed quid attinet plura conquistare, cum extet ipsius diuini verbi, hac de re perspicuum testimonium? Nam in Prouerbijs, quo loco hoc ipsum diuinum verbum inducitur, sua opera atque facta commemorans, cum exposuisset pleraque eorum, quæ in mundi conditione simul cum patre operatus est, ad extremum sic intulit. Et deliciæ meæ esse cum filiis hominum. tantum non dicēs, reliqua omnia quæcumque fecit, sibi quodammodo labori fuisse, hoc autem vnum, quod pro hominibus homo, & natus & mortuus est, gaudio, atque voluptati. Atque hæc absponsa in persona eorum iustorum dicta sunt, qui cum aliquantulum iam profecissent in amore Dei, & cum rerum aduersarum illatione tentati, atque vexati, postea fuissent liberati, gratias agunt Deo ob suam liberationem. At quod deinceps sequitur, verba sunt Dei illapsi iam arcano quodam modo, atque præsentis in eorumdem iustorum animis, pertinetque ad amatorios illos sermones, quos diximus, de quibus postea suo loco dicemus.

CAPVT

QVARTVM.
CAPVT IIII.

163



VAM PVLCHRA ES AMICA MEA, QVAM
PVLCHRA ES. OCVLI TVI COLVMBARVM
ABSQVE EO QVOD INTRINSECVS LATET.
CAPILLI TVI SICVT GREGES CAPRARVM
QVAE ASCENDERVNT DE MONTI GALAAT.
DENTES TVI SICVT GREGES TONSARVM,
QVAE ASCENDIRVNT DE LAVACRO, OMNES GEMELLIS
FOETIEVS, ET STERILIS NON EST INTER EAS. SICVT VIT
TA COCCINEA, LABIA TVA ET ELOQVIVM TVVM DVLCE.
SICVT FRAGMEN MALI PVNICI, ITA GENAE TVAE ABS
QVE EO QVOD INTRINSECVS LATET. SICVT TVRRIS DA
VID COLLVM TVVM QVAE AEDIFICATA EST CVM PROPV
GNACVLIS, MILLE CLIPEI PENDENT EX EA, OMNIS AR
MATVRA FORTIVM. DVO VBERA TVA SICVT DVO HIN
NVLI CAPREAE GEMELLI QVI PASCVNTVR IN LILIIS. DO
NEC ASPIRET DIES ET INCLINENTVR VMBRAE, VADAM
AD MONTEM MYRRHAE, ET AD COLLEM THVRIS. TO
TA PVLCHRA ES AMICA MEA, ET MACVLA NON IST IN
TI. VENI DE LIBANO SPONSA MEA, VENI DE LIBANO, VE
NI, CORONAVERIS DE CAPITE AMANA DE VERTICE SA
NIR, ET HERMON, DE CVBILIEVS LEONVM, ET MONTI
BVS PARDORVM. VVLNERASTI COR MEVM SOROR MEA
SPONSA, VVLNERASTI COR MEVM IN VNO OCVLORVM
TVORVM, ET IN VNO CRINE COLLI TVI. QVAM PVL
CHRAE SVNT MAMMAE TVAE SOROR MEA SPONSA, PVL
CHRIORA SVNT VBERA TVA VINO, ET ODOR VNGVEN
TORVM TVORVM SVPER OMNIA AROMATA. FAVVS DI
STILANS LABIA TVA SPONSA, MEL ET LAC SVB LINGVA
TVA, ET ODOR VESTIMENTORVM TVORVM, SICVT ODOR
THVRIS. HORTVS CONCLVSVS SOROR MEA SPONSA,
HORTVS CONCLVSVS, FONS SIGNATVS. EMISSIONES

X 2 TVAE

TVAE PARADISVS MALORVM PVNICORVM, CVM POMORVM FRVCTIBVS, CYPRI CVM NARDO. NARDVS ET CROCVS, FISTVLA ET CINAMOMVM CVM VNIVERSIS LIGNIS LIBANI, MYRRHA ET ALOE, CVM OMNIBVS PRIMIS VNGVENTIS. FONS HORTORVM PVTEVS AQVARVM VIVENTIVM, QVAE FLVNT IMPETV DE LIBANO. SVRGE AQVILLO, ET VENI AVSTER PERFLA HORTVM MEVM, ET FLVENT AROMATA ILLIVS, VENIAT DILECTVS MEVS IN HORTVM SVVM, VT COMEDAT FRVCTVM POMORVM SVORVM.

EXPLANATIO.



V O D amatores sæpè faciunt, dum gratificari fœminis volunt, vt vel in tempeſta nocte, vel appetente luce, ante ipſarum ædium fores amatoriũ aliquid ad lyram recinant, quod vel querimoniam, vel preces, vel certè laudes earũ, quas amant, contineat: id hoc loco Solomon, aut tale aliquid certè, quale illud eſt retuliſſe, & in ſuum carmẽ tranſtuliſſe videtur. Nam inducit ſponſum domum iterum reuerſum cantu perſonantem, & ſibi adamatę ſponſę pulchritudinem miris laudibus celebrantem. Conſtat autem omnis iſta laus ſimilitudinũ adhibitione potiſſimum: nam in ſingulis partibus illius laudandis, ſingulas ſimilitudines adhibet, eaſq; è re ruſtica maxima ex parte petit. Quas quidem ſimilitudines fortaiſis non nemo iudicet, nimium abhorrere, nõ ſolũ à noſtra conſuetudine, ſed à com-

mur.

muni etiam omnium hominum sensu, & à probato bonorum scriptorum loquendi usu, atque adeò ab ijs ipsis rebus, quarum declarandarum, atque laudandarum causa adducuntur. Quod forsitan ex eo evenit, id ut nobis ita videatur, quia & hæc scripta antiquissima sunt, & ab eo, ad eosque scripta, quorum & lingua, & mores, & consuetudines vitæ, à reliquarum omnium gentium atque nationum moribus, atque vita mirabiliter differebant. Est autem unicuique genti suus & vernaculus in loquendo mos, atque proprietas: quo sæpè fit, ut alijs obscurda & inepta videantur, quæ ab alijs habentur pro optimis & elegantissimis. Quare omnis hæc & orationis novitas, & translationum, tam à longe petitarum, quasi duricies, quæ politas fortasse & cultas aures offendat, nõ tam in ipsa re, ut ego quidem arbitror, est, quam in dissimilitudine morum, atque iudiciorum nostrorum, ab illorum, quibus hæc prodita primò sunt moribus, & iudicijs. Res enim ipsæ rectæ sunt, & inter se satis aptæ, modo non, ut quidam faciunt temerè, atque de summa velut cute, sed exactè & iudicio adhibito accuratè eas examinemus. In id igitur iam nunc incumbamus. QVAM PVLCHRA ES AMICA MEA, QVAM PVLCHRA, OCYLI TVI COLUMBARVM. Generalis propositio, quam mox per singulas partes cõfirmat. Exornat autem ipsam propositionem admiratione & repetitione quò maiorem attentionem excitet. Porro confirmationem orditur ab oculis, quos columbarum oculis similes esse dicit, à colore videlicet eos

X 3 & splen-

& splendore laudans, vt iā antè diximus. Sed ad id at-
 tēdamus quod sequitur, PRAETER ID QVOD INTRIN-
 SECVS LATET. Hoc in Hebraico vno dicitur verbo,
 scilicet, *תמץ* quod item Hieronymus vno Latino
 potuit reddere, sed quia illo turpe quiddam signifi-
 cari credebat, maluit circuitione vti: itaque vertere
 PRAETER ID QVOD INTRINSECVS LATET. Honestaver-
 borum circuitione videlicet, rem turpem occul-
 tans. Idemque consilij fuit Symmacho, qui & ipse
 Gracè interpretatus est sacras literas. Nam vertit
εκτος της σιωπης id est, præter silentium, aut taciturnita-
 tem tuam. Quid autem illud sit tam turpe & obsce-
 nū, id vt Hieronymo visum sit celari oportere, no-
 lo Lector ex me audiat, sed ex ipso Hieronymo po-
 tius, cuius commentariorum in Esaiam quandam
 partem ad verbum ad hoc ipsum declarandum, nunc
 referam: idque faciam, nō solū ne quis id à me fin-
 gi arbitretur, sed etiam quia pudore quodammodo
 impediatur, ea dicere meis verbis, quæ ille diuinis qui-
 busdam sanctitatis & doctrinæ bonis assequutus est,
 liberè vt posset dicere. Is igitur ad verbum sic. In eo
 vbi nos interpretati sumus, denuda turpitudinem
 tuam, pro quo septuaginta transtulerunt *αποκαλυψιτε*
καλυμα id est, reuela operimentum, Aquila ipsum ver-
 bum Hebraicū posuit *תמץ*, Symmachus *της σιωπης σθη*
 quod nos exprimere possumus taciturnitatem tuā,
 quod taceri debeat præ verecundia. Quod quidem
 & in Cantico Canticorum legimus, vbi sponsæ pul-
 chritudo describitur: ad extremum infert: absque ta-
 citurni-

Iero. libr.
13. Comen
in Esa. ca
pit. 4.

citurnitate tua, nolentibus, qui interpretati sunt transferre nomen, quod in sacra scriptura sonaret turpitudinē. Et paulò infrà. Disputat Stoici multa re turpia, praua hominū consuetudine, verbis honesta esse, vt parricidium, adulterium, & cætera ijs similia, rursusque re honesta nominibus videri turpia, vt liberos procreare, inflationem vētris crepitu digere, alucum releuare stercore, vesicam vrinæ effusione laxare: denique non posse nos, vt dicimus, à ruta rutulam, sic *υποκαθίσταται* à menta facere. Ergo camatheca, quod Aquila posuit, vt diximus, verenda mulieris appellantur: cuius etymologia apud eos sonat, sitienstuus, vt inexplabilem Babylonis indicet voluptatem. Ex his puto liquere, quid hoc loco Hebraicum *חמץ* Hieronymo significet, & quare id simpliciter & apertè transferre noluerit: quò videlicet pudicis Latinorum auribus parceret. Quanquam si quidem res ita se habet, quemadmodum Hieronymo visa est, profectò non video: quare quod iudicauerit Hebraicè, ab Spiritu sancto apertè & honestè dici potuisse, Latine proferri honestè non posse, censuerit. At, quis credat, aut id verbum eam significationem habere, aut vt habeat, in ea positum hoc loco esse ab Spiritu sancto? An quod Hieronymo, atq; Symmacho visum fuit, sine circuitione, honestè Latine dici nō posse, id credibile est Hebraicè, Spiritū sanctū turpiter & apertè posuisse? Vtrū Symmachus, & Hieronymus pudentiores & cautiores fuerunt Spiritu sancto? vel Romani, quam Hebræi magis digni, quibus.

quibus id honoris haberetur à Deo, nullum ut verbū turpe apud eos diceretur? Iam, quid quæso conueniat oculis, cum pudendo muliebri, ut oculorum facta commemoratio, eius statim memoriam afferret? Pulchritudinem quidem certè sponsæ sigillatim describebat spōsus, & à capite exorsus, cum vix ad oculos peruenisset, tot rebus quarum est eximia, & maximè commendabilis pulchritudo in medio relictis, statim ad pudenda descendit. At hoc non gradibus descendere est, sed ruere potiùs, aut se de sublimi loco saltu præcipitem in cœnū dei cere. Quando iterum infrà à pedibus incipiens, ad fœmora & umbilicum, & inde ad pectus, & ad caput vsque laudando conscendit, silentio eam partem præteruehitur: & hîc, cum de oculis diceret, impetrare à se non potuit, ut de pudendis reticeret? Quamquam quis vnquam obsecro, cum alicuius laudaret formam, in pulchritudinis parte numerauit, & posuit, quod natura ipsa, ut tetrum atque deforme ab oculis omnium remouit? aut quo modo credendum est Spiritus sanctus in à se conscripto libello, in aspectum atque in lucem proferre voluisse, quod maxima adhibita diligentia, tam occultuit in corpore? Sed de tota ista, siue Symmachi sententia, siue Hieronymi doctis & prudentibus viris iudicare permitto, meum ego iudicium non interpono. Illud tantum dico Hebraicum צמה pro ea capillorum parte solere accipi, quæ fronti, atq; temporibus imminet: quos capillos fœminæ, quibus natiui defunt, supposititios gestare solent.

solent. Hos igitur capillos, quod ex antiquis signis
intelligere licet, adolescentes fœminæ nō cōstringe-
bant nodo vt reliquos, sed liberè dependere sine-
bant ante oculos, illisque pro velo utebantur: & cer-
tè sub ijs capillis oculi latentes atque micantes, ne-
scio quo pacto ipso capillorum errore, atque motu
cōmendati pulchriores apparere solent. Quare, vt de
eo, quod D. Hieronymo visū est interim fileam², ver-
sionem certè ipsam vulgatam, ex ista verbi Hebraici
significatione aptè possimus interpretari. Nā quod
scribitur. PRAETER ID QVOD INTRINSECVS LATENT. sic
intelligimus, commendari sponsæ oculos, nō solūm
à nitore, propter quem columbarum oculis prædi-
cantur similes, sed etiam ab eo, quod intrinsecus la-
tent, id est, ex eo quod positi sub ijs capillis, qui illius
fronti inuolitabant, tanquam ex insidijs, quod in a-
matorio sermone dici solet, incautos adoriebantur,
eosque vulnerabant. Nam profectò motu ipso & tre-
more supra oberrantium capillorum efficitur, lumi-
na vt oculorum vibrare videantur, & lucis radios ex
se se, tanquam tela quædam iacere. CAPILLI TVI SI-
CVT GREX CAPRARVM, QVAE ASCENDERVNT DE MON-
TE GALAAD. Ab oculis in quibus fœminæ formæ de-
cor præcipuè spectatur, ad capillos, qui ipsi magno
ornamento fœminis esse solent, commendandos
accedit. CAPILLI, INQUIT, TVI SICVT GREX CAPRARVM.
Sed quid capillis cum caprarum grege convenit?
aut quomodo hæc inter se cōferri, nisi absurdissimè
possunt: maximè vbi de laude capillorum agitur? Nā

Y si vitu-

si vituperarentur fortassis ratio esset, quare non im-
 meritò caprarum gregibus similes dicerentur, & cer-
 tè nonnullis ita videtur, ista si ad corpus referantur,
 omninò esse perabsurda. Quare volunt Solomonem
 hoc loco, atque adeò ijs omnibus similitudinibus,
 quibus sponsæ pulchritudo commendatur, nullâ ha-
 buisse rationem eorum corporis membrorum, quæ
 nominat, sed ad internos, & latentes huius carminis
 sensus, & ad eas animæ vires, quas hæc membra signi-
 fican, omnia retulisse. At si vniuersa alia quæcum-
 que hoc carmine continentur, è media vitæ con-
 suetudine, & amatorum moribus aptissimè ille, &
 elegantissimè duxit, vt per singula ostendimus, cur
 hîc potissimum ab instituto suo discessisse putâdus
 est? Et si pluraque huius capitis ad corpus relata ita di-
 cuntur aptè, nihil vt à quoquam aptius dici possit,
 quî potest credi hanc vnâ similitudinem nò qua-
 drare cum corpore? Quare ficut non dubitò, quin ani-
 mî præcipuè & eius partium ratio, & habita à Solo-
 mone sit in ijs similitudinibus adhibendis, & sit ha-
 benda à nobis in eisdem interpretandis: sic quod ini-
 tio huius interpretationis dixi, verum omninò illud,
 & retinendum esse contèdo, describi, scilicèt, hic cor-
 poreos amores, eorumque rationes omnes in singu-
 lis huius libri partibus explicari, atque ita demum de
 amore diuino translata ista dici, vt possint omnia in
 corporeum istum amorem literatè conferri, quo sen-
 su principio admonuim⁹. Nā si se aliter haberet res,
 nulla causa esset, quare amorum spiritualium decla-
 randorum

*amoz spiritualiu causa
 declarandoz*

randorum causa, Spiritus sanctus in hoc carmine similitudines è visibili amore transferret. Nam si nominibus quæ corpora, & corporeos amores significant, ea quæ ijs amoribus congruere non possunt, dicuntur, tenebrę profectò nostris mentibus offunderentur: non autem induceretur id lumen, quo quæ occulta sunt, & remota à nostris sensibus illustrari solent, rerum nobis notarum, & quotidiano usu perceptarum adhibitione. Est igitur hæc similitudo, neque dura, neque absurda, aut à longè petita, sed elegans cum primis, & ad id, de quo agitur, declarandū valdè apta modo rite expendatur. Ac primū omnium quod hæc similitudo è re rustica sumitur, decoro egregiè servitur. Deinde quod capilli capreis dicuntur similes, intelligi debet, non capreis ipsis, sed earum pilis similes dici: nam deest orationi illi aliquid. Plenè enim diceretur. CAPILLI TVI SICVT PILI GREGIS CAPRARVM. Ac præterea considerandum est fœminarum capillos, à copia, & à nitore, & à colore commendari solere: & quod ad colorem attinet, id quoque sciri debet, quemadmodum in occiduis regionibus flauus probatur color: ita in orientalibus niger, aut ex purpureo, rubroque mistus, quem colorem medicamentis solent inducere, eo quæ capillos inficere Arabes illæ fœminæ, quæ nostra hac tempestate eam Bethicæ Hispaniæ partem incolūt, quæ interaneo mari alluitur. Dico igitur ista tria, quibus capillorum omnis laus, & commendatio perficitur, hac caprarū similitudine mirificè declarari. Nā

Y 2 pro

pro soli natura capreae Galaaditicae plurimum, aut nigrae sunt, aut subrufae. Obpascuorum autem bonitatem & copiam. (nam totus ille mons, & circumiacentes campi omnes, qui Rubenitis, & Gaditis, & mediae tribui Manasses possidendi sunt traditi, ut liquet ex Numerorum libro, erant maxime pascui.) Igitur ex soli natura nigrae, obpascuorum bonitatem pingues illae capreae intelligendae sunt fuisse, & ob id ipsum non squalentibus, ut in macie attenuatis gregibus sit, sed nitentibus pilis: nec solum quia pingues erant, earum nitebant pili: sed quia resinosis arboribus abundabat ille mons, quod ex Iere. & Zachar. & Amos vatibus constat: consentaneum profecto est capreas, quae iuga eius montis pascebant, contactu arborum resina, in qua cutis poliendae vis quaedam inest, inunctas nitidiores & comptiores aliarum regionum gregibus euasisse: quod vel ex Hebraico verbo *וְהָא*, quod hoc loco pro Latino ascendere ponitur, possumus intelligere. Nam id non solum ascendere, quod Latinus vertit interpres, sed etiam pectere, aut polire significat. Itaque licebit etiam vertere. CAPILLI TVI SICVT GREX CAPRARVM, QVAE PECTVNT SESE IN MONTE GALAAD. Dicuntur autem se se pectere, ideo quia veteres & deciduos earum pilos resina euellebat, novos & firmos polibat, & in decentem ordinem redigebat, ex quo efficiebatur, ut tanquam si essent pexi & bene culti praeniterent: nihil ut fortasse cum formosis foeminarum capillis, conferri possit similis. Nec est minus aptum quod sequitur.

DENTES

DENTES TVI TANQVAM GREX TONSARVM, QVAE ASCEN-
 DERVNT DE LAVACRO, OMNES GEMELLIS FOETIBVS,
 ET STERILIS NON EST IN EIS. Indentibus hæc spectan-
 tur, primùm vt candidi sint, deinde, vt sint æquales,
 ita vt neque promineat, neque extet alius alio ma-
 gis, ad hæc vt sint benè iuncti, & qua parte gingiuis
 inferuntur, vt nequid hiet, aut hiulcum sit: quæ vtrū
 vna aliqua similitudine significari cuncta possint,
 haud scio, hac certè ita explicantur omnia, vt propè
 oculis videnda subijciantur. Nam cum plures oues
 gregatim vnà eunt, ita inter se corpora iungunt, vt
 procul aspicientibus, vnum omnium earum corpus
 esse appareat, idque album totum: nam de albo peco-
 re, hoc loco Solomon loqui intelligendus est. itaque
 album per omnia & æquale, quales sunt formosi dē-
 tes. At quam consideratè quod addidit. OMNIS GE-
 MELLIS FOETIBVS ET STERILIS NON EST IN EIS. Nam
 plurium ouium vnà euntium tātum supernè vnum
 apparet esse corpus, nam infernè inuicem à se distāt.
 Quoniam enim earum crura sunt gracilia, corpora
 autem obesa, vt maximè corporibus coniungantur
 & hæreant, tamē cruribus, atque pedibus diuidūtur.
 Cæterùm vbi accidit, vt oues sint fœtæ, & fœtus
 suos vnà secū ducant, etiam infernè vnum omnium
 earum corpus videtur esse. Nam agniculi matribus
 hærentes, & inter ipsarum crura iniecti, & eis vtrin-
 que inserti, totum id spatij complent, quod vacuum
 restare videbatur. Sequitur. SICVT VITTA COCCINEA
 LABIA TVA ET ELOQVIVM TVVM DVLCÈ. Vtrumq; suis

Y 3 & pro-

& proprijs laudibus ornat: labijs namque ruborem in quo labiorum pulchritudo consistit: ex quo ab alijs labia coralina dicuntur: eloquio dulcedinem tribuit. Eloquium porrò hoc loco, id quod ex Hebraico verbo medabar, cuius loco ponitur, intelligitur, non tam sententiarum, aut eorum quæ dicuntur ornatus, quam dictionis, atque pronuntiationis quidam significatur habitus: qui tonorum præcipuè, vocisq; & spiritus moderatione, atque oris quodam gestu constat. Ex quo in pronuntiando alij agrestes, atque vasti dicuntur, alij insuaues, alij contra cōcinni, atq; læpidi, quæ concinnitas hîc dulcedo nominatur.

SICUT FRAGMENTUM MALI PUNICI, GENAE TVAL. Hebraica vox נֶקֶר pro qua Latinus interpres genas posuit, propriè tēpora significat, sic ab Hebræis appellata, ppter tenuitatem cutis, atque carnis earum. Nam נֶקֶר ab eo deducitur verbo, quod Hebræis attenuare significat. Sed siue genæ sint, siue tēpora, constat rectè conferri cum malo punico, aut mali punici fragmento. Nam in tēporibus cutis candor modico rubore suffunditur, & in genis candorem mistus rubor inest, aut si minus inest, purpuris illito, ut inesse videatur foeminae efficiūt: cui similis est is color, qui aparet in mali punici granis. Sequitur. PRAETER ID QUOD INTRINSECVS LATENT. Hebraicè ut superi⁹ נֶקֶר, q; eadē ratiōe, & eodē cōsilio, nō verbū pro verbo, sed circuitiōe à Hieronymo versum est. At id, quomodo supra exposuimus, intelligi etiā hîc debet. Tēpora aut genas sub ijs capillis, qui supra ipsas inerrabāt latētes pulchriores,

res, & formosiores videri. Quod si çama id est, quod
 esse Hieronymo est visũ, quĩ credi potest, in sanctissi-
 mo carmine, tã verbũ turpe toties ab Spiritu sancto
 inculcari atq; repeti? aut quĩ cõueniebat, vt mulieris
 pudenda, cum temporibus atque genis coniúgeret?
 SICVT TURRIS DAVID COLLVM TVVM QVAE EST AEDI-
 FICATA CVM PROPVGNAVLIS, MILLE CLYPEI PEN-
 DENT EX EA, OMNIS ARMATVRA PORTIVM. Corporis
 pulchritudo non solũ membrorum cũ singulo-
 rum per se apta figura, tum inter se omnium conue-
 nientia & proportione constat, sed iusta quadam
 magnitudine ac proceritate totiũs corporis, qua de
 proceritate nũc agitur. Itaq; dicitur. SICVT TURRIS
 DAVID COLLVM TVVM. Collum nominat, figuratẽ, &
 aptẽ corpus totum, aut certẽ corporis totius elegan-
 tis, atque erecti habitum, colli nomine & appellatio-
 ne significat. Nam Hebraica proprietate, collum læ-
 pẽ in proceritatis significatione ponitur: quemad-
 modum & in Hispano sermone, descollados, voca-
 mus eos, qui alto, & procero sunt corpore. Confert
 autem Daudis turrem potissimũ, eo quòd illius ædi-
 ficiũ ob egregium eius opus ea tempestate, specta-
 bile admodum, & celebre esset, vtpotẽ eius operis,
 quod à rege opulento & magnificẽtissimo constru-
 ctũ fuisset. Nec verò quisquam tam absurdus, &
 ineptus sit, vtpalmo ista metienda putet, aut collum
 huius existimet, turri æquale magnitudine dici: sed
 proportione, non minus ipsum spectabile, quam il-
 la fuerit turris intelligat affirmari: vt quantum illa
 turris

turris præstabat cæteris, tantum hæc fœmina habitu corporis eleganti, atque procero reliquas superasse dicatur. At quod additur. CVM PROPVGNA CVLIS. Id in Hebræo est מִשְׁלֵחַלְלָהּ anceps & variæ significationis verbum. Itaque alij, aliter vertunt. Sequitur. MILLE CLIPEI PENDENT EX EA. scilicet, vel insculpti in ea, vel additi, vel appensi. Vtrouis enim modo rectè intelligatur, quanquam appensi videntur magis, quam additi. OMNIS ARMATVRA FORTIVM. Quod tamen per poëticam digressionem dictum intelligi debet, nec necesse esse, vt ei aliquid in allegoria respondeat. VBERA TVA SICVT DVO HINNVLII CAPREAE QVI PASCVNTVR IN LILIIS. Nihil conferri similius potuit, nihil aptius à pastore dici. Inest namque in capreolis, festiuum quiddam atque lætum, & quod alliciat eos, qui se intuentur ad propius accedendum, & manibus ipsos contrectandum, quæ similiter insunt in papillis fœminarû. Propriè autem similitudo ducitur à capitibus hinnulorû, in quibus māmaram quædam imago inest. Nam caput ipsum magnitudine, & figura instar vberum est: oscula autem ex rubro & pallido modicè subrubetia, mammarû capitula imitātur. DONEC ASPIRET DIES ET INCLINENTVR VMBRAE, VADAM AD MONTEM MYRRHAE, ET AD COLLEM THVRIS. Interrumpit institutam laudationem, quo magis varium efficiat ipsum carmen. Igitur quasi inter canendum recordetur sponsus rustici alicuius, & necessarij operis, cuius, studio ipso canendi, atque sponsam laudandi memoriam amiserat: ita Solomon inducit ipsum

ipsum subitò abrumpentem sermonem institutum, dicentemque. DONEC ASPIRET DIES ET INCLINENTVR VMBRAE, VADAM AD MONTEM MYRRHAE. Veluti se ipse tacitè arguat, atque reprehendat, quod præ amore rem suam familiarem penè neglexerit, quale est illud Poëtæ.

*O Coridon Coridon, quæ te dementia cepit
Semiputata tibi frondosa vitis in vlmo est,
Quin tu aliquid saltè potiùs, quorū indiget vsus
Viminibus, molliq̃ue paras detexere iunco.*

Ecloga. 2.

DONEC ASPIRET DIES ET INCLINENTVR VMBRAE. Periphrasis est tēporis vespertini à coniūctis, vt antè dixi. VADAM. Id est, quin potiùs id ago, quod mihi facere incumbit. AD MONTEM MYRRHAE, ET AD COLLEM THVRIS. Vbi, scilicèt, agellū habuisse fingitur: cui coniunctus erat hortus, de quo infrà capite sexto. TOTA PVLCHRA ES AMICA MEA, ET MACVLA NON EST IN TE. Rursus rei domesticæ cura deposita & abiecta ad institutam laudationem redit. Sic enim amatorum animi variare sæpè solent, & in plures, atque diuersas partes diuidi, quorum hîc imago à Solomone ponitur, summo artificio descripta. Dum vacabat amori, suæque sponsæ laudibus indulgebat rei domesticæ, & familiaris ipsius animum subiens cura momordit: iam abire parantem, amor iterum illum reuocat, & penè manu reprehendit, dicereque cogit. TOTA PVLCHRA ES AMICA MEA. Quasi ita dicat. At res domestica non est tanti, vt eam ob rem relinquenda tu mihi sis, & deserēda, quæ quanta es, tota pulchra es. Sed quo

Z niam

niam rursus studium, & curare rei domesticæ recurſabat, & perurgebat ipsum, adiecit. VENI DE LIBANO, VENI CORONABERIS DE CAPITE AMANA, DE VERTICE SANIR, ET HERMON, DE CVBILIBVS LEONVM, ET DE MONTIBVS PARDORVM. Rogat enim ipsam, se vt eūtem comitetur, & quo facilius illi persuaderet, pollicetur ipsam ducere in eos mōtes, qui omnium, qui in Iudæa erant amœnissimi habebantur, & cognitu dignissimi. VENI DE LIBANO, VENI. Id est, Veni mecum ex itinere visura Libanum. Libanus autem non Phœnicie mons intelligendus est is, ex quo abiegnæ, ac cedrina traves, ad construendum templum Dei, Solomoni iussu sunt comportatę: sed alius in Iudæa, qui etiā saltus Libani interdum nominatur, à Iudæorum regibus, multis & peregrinis arboribus confitus, & propter similitudinem aliquam, quæ illi erat cū illo Phœnicie, Libanus appellatus. CORONABERIS. Hebraicè כִּרְמִין quod circūdare, (ex quo coronare Latinus verbi interpret) atq; etiā despicere significat. DE CVBILIBVS LEONVM, ET PARDORVM. Appositio est. Nā quod ex sacris literis satis constat, Iudæa regio leonibus abundabat, quorū lustra in his montibus erāt. VVLNERASTI COR MEVM SOROR MEA SPONSA, VVLNERASTI COR MEVM IN VNO ASPECTV OCVLORVM TVORVM, ET IN VNO CRINE COLLI TVI. Nā, inquit, ipsa veni mecum, quoniam ipse diuelli à te nullo modo possum, luminibus tuis, nō solum amore faucius, sed etiam pulcherrimis tuis crinibus, aut, vt in Hebræo est, torquibus tuis deuinctus, atque cōstrictus. VNO, inquit, OCULO,

IT

ET VNO CRINI COLLI TVI. Veluti si tacitè argumētetur
ac dicat. Nam si vel vno tuo aspectu, me mihi subri-
puisti, si quæ vel vnus crinis tuus mihi est pro vincu-
lo, tot corporis tui, atque animi dotibus, quo modo
affici me, atque incendi in amore putes? Quo etiam
magis illi suadet, se vt sequatur, ne, scilicèt, videatur
parū gratè respondisse sponsi tanto erga ipsam amo-
ri. Atque sequuntur, quasi illi iam persuasisset spon-
sus vt in agrum pergeret, eamque ipse secum duce-
ret, & inter eundum coniunctis osculis, ex dulci illius
ore dulcem spiritum legeret, & quod ea de re gaudiū
percipiebat, quibus verbis maximè posset explana-
re gestiret, ita mihi videntē dici. QVAM PVLCHRAE SVNT
MAMMAE TVAE SOROR MEA SPONSA, PVLCHRIORA SVNT
VBERA TVA VINO, ET ODOR VNGVENTORVM TVORVM
SVPER OMNIA AROMATA. FAVVS DISTILLANS LABIA TVA
SPONSA, MEL ET LAC SVB LINGVA TVA, ET ODOR VESTI-
MENTORVM TVORVM, SICVT ODOR THYRIS. Quoneq;
elegantius quicquam, neque melius dici potuit. Ne-
que minus est, aut elegans, aut molle quod sequitur.
HORTVS CONCLVSVS SOROR MEA SPONSA, HORTVS
CONCLVSVS, FONS SIGNATVS. In quo, nō iā per partes,
sed vniuersè illam laudat, & ad eam laudandam duas
adhibet similitudines, à fonte integro vnā, alterā ab
amœno horto petitā: quas similitudines, primo pau-
cis ambas proponit: deinde singulas exequitur ea
verborū elegantia, atque copia, vt ne sibi Solomon ad
superandum locum videatur reliquisse. Itaque hor-
tum describit amœnissimum, arboribus consitum

Z 2

multis

multis, tum præterea summa diligentia custoditum & cultum, in quo nihil sit vacans, nihil sterile, sed selectis arboribus & cum specie pulcherrima, tū fructu atque pomis præstantibus omni ex parte plenum: quas arbores nominatim recenset, mira orationis gratia, ita vt ad hunc Solomonis hortum, illi Alcinoi horti, de quibus Homerus, collati, inculti, ac fordidi videantur. Porro hac similitudine id agit Solomon, vt significet similiter in hac foemina, nihil non modo deforme esse, sed, quod ad pulchritudinē attinet, ne mediocre quidem, aut vulgare, sed illius vniuersa apta, venusta, decētia, gratissima & formosissima esse, & quasi ex gratijs tota constaret, ita vndique ex sese amores spirare. **HORTVS. CONCLVSVS.** Id est, & muro, & custode munitus, & ob id ipsum ab incursu & populatione bestiarum tutus. **EMISSIONES TVAE.** Id est, quæ ex te profiscuntur omnia, vniuersæ arbores quas profers. **PARADISVS MALORVM. PVNICORVM.** Nā mala punica Palæstinae foelicissimè proueniunt, & plurimi fiunt. **CYPRI CVM NARDO.** De Cypro inter herbarum scriptores, quid sit, satis constat, at vtrum Hebraicum כפר Copher hoc loco sit Cyperus, id vt antè dixi, non satis constare video. **CVM NARDO.** Huius plures esse dicuntur species, quarum vnā in Syria, & Palæstina maximè prouenire sole re scribit Dioscorides, **FISTVLA, ET CINAMOMVM.** Hebraicè קימון קימון, id, quid sit, non satis illi explicant. Verisimile tamen est, Casia species duas, quarum vna est altera præstantior, ijs nominibus significari,

MYRRHA.

MYRRHA. Arbor, scilicet, ea, ex qua elicitur myrrha,
 ALOE. Hebraicè, הלל. Itaque ex sono vocis, qui aloë
 interpretati sunt, videntur mihi coniecturam fecis-
 se: Aloe verò non arboribus adnumeratur, sed plan-
 tis: est que ea humilis planta, vno caudice, vnaque ra-
 dice folijs crassioribus. Itaque alij sandalum vertunt,
 quod certè huic loco aptè cōueniat: propterea quod
 sandalus sit arbor, & specie, & odore præstans, & po-
 marijs aptior, quam aloë. CVM OMNIBVS PRIMIS VN-
 GVENTIS. Id est arboribus, è quibus aromata conficiū-
 tur. FONS SIGNATVS. Redit ad superiùs propositam
 similitudinem, fontemque describit, qualis optimus
 esse potest, purum, integrum, intactum, deinde ita
 abundantem aquis fontem, vt vnus pluribus hortis
 suppetitet. SURGE AQUILO, ET VENI AUSTER, ET PER-
 FLA HORTVM MEVM, ET FLVENT AROMATA ILLIVS. To-
 tam laudationem concludit elegantissima apostro-
 phe ad Austrum, & Aquilonem ventos, quorū huic
 imperat, vt abeat, id est, vt ne spiret, illum vt veniat,
 id est, vt spiret hortat. Surge, inquit, id est, abi, disce
 de Aquilo. Nā est frigidissimus vêtus, & ob id hortis,
 & arboribus metuendus. Veni, hoc est, spira Auster He-
 braicè מנח, id est, meridies, à qua cœli regione Au-
 stri, id est, temperatæ & maximè genitales spirāt au-
 ræ. ET PERFLA HORTVM MEVM, ET FLVENT AROMATA
 ILLIVS. Nā innato naturis omnibus calore, australi-
 bus auris, quæ & ipsæ tepidæ sunt excitato, & quodā-
 modo accenso plantæ, atque arbores odoratæ, vim
 odoris emittunt ex se se, cumque odorem auræ ipsæ

Z 3 late.

latè dispergunt. Est utem hoc in more nostro quotidiano positum, cum de eo, cuius nobis vita, atque salus chara est, incidit sermo, aut certè quoties commemoramus ipsi alicuius nobis amici hominis bona, atque laudes ad extremum bene illi precari, optareque, id ut bonum proprium illi, atque perpetuum sit. Ex quo perspicitur, quam non solum eleganter, sed etiam ad communem consuetudinem accommodatè hic Solomonis pastor, hac fine suam laudationem concluderit. Nam cum Aquilonem expellit, Austrum vocat: profectò benè precatur sponsæ suæ, ei que omnia fausta, atque felici exoptat. Describat enim ipsius pulchritudinem hortiallegoria. Quare in eadem allegoria persistens, quoniam Aquilone flante, arbores aduruntur, spirante autem Austro, germinant, atque virent, foliaque & flores fundunt, idcirco imperat, vel potius imperando præcatur (inest namque in illo imperio optandi quædam vis, & magni cuiusdam desiderij significatio permaxima) itaque optat, ut ab omni noxio flatu ille hortus immunis, cœli atque aëris indulgentia, semper foueatur, id est, orat ut ad sponsæ suæ, vel corpus, vel animum, nulla vnquam res noxia, atque pestilens vim suam applicet, sed contra potius desiderat, ut omnia ipsi eiusmodi eueniant, qualia maximè euenire conuenit, ad in maius promouendum innatum illius, & naturale bonum, fausta scilicet, atque iucunda omnia. Et quod ab artis scriptoribus præcipi solet, ut in imprecatione ponamus ea, quæ cum natura, aut officio

ficio eius, cui bene, aut secus precamur, conueniāt: quodque ipse Dauid scientissimè obseruauit, in illo lugubri carmine, quod panxit de cēde Saulis & Ionathæ, quos dimicantes, & in fugam conuersos Palæstini hostes, in Gelboe monte ceciderant, Montes, dicens Gelboe, nec ros, nec pluuia cadat super vos: id ipsum etiam hoc loco Solomon fecit: nam cum isti, de quo agimus, horto molles auras precatur, ea certè illi bona optat, quibus arbores, & fata vniuersa, in vtramque partem solent maximè affici. Sed iam iterum à capite ordiamur.

E X P L A N A T I O.



Q VAM PVLGHRA ES AMICA MEA. Hæc vt dixi, ad illapsus, & colloquia interiora pertinent, suntque omnia mysterijs plena. In quo primò admirari licet, Dei erga nos, non dico largitatem, atque clementiam, sed facilitatem, & suauitatem, & propè dicam familiaritatem. Non enim satis habuit, quod homines iustos, filiorum loco reponeret, quod que ad omnem se deiiciens æqualitatem, pro socijs illos haberet, nisi etiam, quod vnum apud homines amoris genus est, & in coniunctione animorum arctissimum, & in ardore vehementissimum, & in consuetudine vitæ, atque adeò in voluptate dulcissimū virorum erga fœminas, sponсарumque erga spon-
sum, &

sum, & ad suam erga nos declarandā charitatē trāsf-
ferret, spōsusque dici ipse, & nominari vellet animo-
rum nostrorū. Nec verò nominari tantū voluit, sed
re ipsa ita esse, adeo, vt omnis illa quāuis arctissima
cōiugum inter ipsos coniunctio, illeq; animorum &
corporum, tot naturæ commendationibus concilia-
tus amor, illeque nexustam arctè constrictus, cū isto
amore Dei conferri, & comparari vix possit, quod cū
alibi sæpè in sacris literis, tum certè hoc in loco miri-
ficè declaratur. Nam quis obsecro vnquam vnus ho-
mo aliquam foeminam, vel tam perditè adamauit,
vel cum adamaret vehemētissimè, prosequutus est
tam exquisitis laudibus, tamque mollibus, & amoris
æstum significantibus verbis, ea vt sunt, quæ à ficta
quidem persona in hoc capite dici, sed à se dicta intel-
ligi Deus voluit? Quis vel testificari amorem suum,
vel ad alterius animū insinuare se, tot modis vnquā
totque blanditijs est conatus? Ecqua huic similis fuit
amoris flāma? Ecquod tantū incēdium? Quod si ipsi
per nos efficere possemus aliquid, quod ipsum per se
honestū, ac Deo gratum, & acceptabile esset, minus
fortassè mirandum esset, nos ab eo tantopere diligi:
nunc autem cum quod dignitatem gloria dignam
habeat, nihil per se efficere homo possit: cumque
omnis ille honestatis splendor, qui lucet in sanctis vi-
ris, ab eodem ipso Deo, & ortum, & incrementum, &
absolutionem habeat. Deusq; nos & diligat, & laude,
atque prēmio dignos putet, potissimū ob ea ipsa, quæ
ab illo accepimus bona: magnum profectò signum
est,

est, nos ab illo nō solū effusē, sed si ita loquēdum est, perditē & impotenter amari. Itaque amore ardens, & animi veluti impotens. QVAM PVLCHRA ES, inquit, AMICA MEA, QVAM PVLCHRA. cum tamē pulchra sit, nec quia ita nata est, nec quia suis ipsa viribus adepta est, vt esset pulchra, sed quia id vt esset, eius ipsius Dei, qui ista pulchritudine capitur, & incenditur, munere obtinuit. Quōd si ista, rerum corporearum, & verbis, & imaginibus inuoluta, totque velata modis, cum vel audiuntur, vel leguntur, tā animos oblectant, quā illi animi voluptate, atque gaudio credendi sunt affici, quibus cum Deus his velaminibus inclusos blandos & cœlestes sermones apertē, & literatē, sine verborum strepitu, omniq̃ remoto velamine confert? Et si ij, qui aliquantulum modo profecerunt in amore Dei, ad quos isti nunc diriguntur sermones, tot ornantur ab ipso laudibus, easque capiunt voluptates, quas humanus sermo non explicet, quo torrente voluptatis credi debent immergi perfecti, & eximiē sancti viri? Ipse certē Deus cū virtutis mediocritatem, tam profusē laudat, cumq̃; homines ad meliora contendentes, non dum tamen summa consequutos, tot encomijs prosequitur, satis profectō declarat, quidquid à nobis ipso potissimū adiuuante, benē, & honeste fit, gratissimum esse illi. QVAM PVLCHRA, inquit, ES AMICA MEA, QVAM PVLCHRA, OCULI TVI COLUMBARVM, PRAETER ID QVOD INTRINSECVS LATET. De oculis quid significant, deq̃ columbis iam antea diximus: quare quod sequi-

A a tur

tur videamus. COMAE CAPITIS TVI SICVT GREX CAPRARVM, QVAE ASCENDERVNT DE MONTE GALAAD. Video cōstare inter oēs, capillorū nomine in ista arcana sanctarū literarū loquēdi ratiōe significari animi atq; mentis cogitationes, nec ratio non quadrat. Nā vt à capite capilli oriūtur, sic à mēte, quę animi veluti caput est, prodeūt cogitationes, magno & numero, & mobilitate, vt etiā in hoc capillorum similes videātur. Quare hoc teneamus. Igitur vt in capillis spectatur, cultus, ordo, atq; nitor, sic cogitationes cōfusæ & incertæ vituperātur: contrā autē illustres, & nō nisi iudicio, & ex rationis p̄scripto in animo versari permittē probātur, atq; laudātur. Quę tñ ipsæ cogitationes bonę, & illustres nō tā per se probantur, quam quā & hoc quoq; (est enim magna earū vis in vtrāq; partē, nec sine causa est scriptū. Cogitationes stultæ separāt à Deo. Illudq; sapiētis. Auferet se à cogitationib⁹ quę sunt sine intellectu) sed nō ob id solūm probantur, & laude, atq; æstimatione sunt dignæ bonæ cogitationes: sed quia etiā magno argumento nobis sunt, bonæ animi valetudinis. Nā sicut male cultus, aut omninō cultura destitutus ager, lolium & spinas profert, cultus verò vberes fruges: sic hominis anim⁹ cui deest cultura cœlestis, inconstās, & vagus, & secū ipse diffentiēs, vt quęq; primò res illi obijcitur, eā statim sine delectu, ad cogitationem admittit, recipitq; quæcumque, & à quibuscumque feruntur malarum cogitationum semina. Itaque ex eo, vanissimas & absurdissimas cogitationes germinat, atque profert,

quarum

Sap. 1.

quarum turba sæpè obruitur, sicut scriptum est. Co- *Sap. 9.*
gitationes mortalium timidæ & incertæ : corpus e-
nim quod corrumpitur, aggrauat animam, & terre-
na inhabitatio deprimit sensum, multa cogitantem.
Contra autem qui diuinis gratiæ, & charitatis excoli
tur bonis, vt ad cupiditatem nihil admittit turpe, ita
nec ad cogitationem absurdum aliquid, aut leue in-
troire patitur: quantumque eius, & studia recta, & a-
more sancti sunt, tātum eiusdem cogitationes sunt
honestæ, & illustres, alterumque semper nascitur ex
altero. Nam quorum quis studio tenetur, ea plu-
rimum cogitationibus ipse sibi subijcit, & in animo
versat. Quapropter rectissimè ab oculis, continuò ad
capillos laudandos accessit, hoc est, à recta erga Deū
voluntate, &, vt iam antea nominauimus, intētiōe
ad bonarum cogitationum lumen, atque honestatē.
Nec verò ratione aut causa caret, quod initio hu-
ius carminis, quo loco primum mentionem oculo-
rum intulit Solomon, de capillis dicere intermisit:
hic verò utrosque laudat, atque commendat. Nam
quod sæpius dictū iam, & vt video, sæpius est repeten-
dū, illic incipientes fingeat, hic proficientes alloqui-
tur. Est autem ita natura comparatum, id quod qui
periculum sui aliquod in Deo amando fecerunt pro-
fectò fatentur, est itaque natura comparatum, vt in-
cipientes qui sunt quoties agere secum ipsi interiùs
volūt, turba vexentur vanissimarum cogitationum,
quæ ab omnibus partibus, omnibusque hominis sen-
sibus excitatæ, & in mentem ingressæ, illius & aciem

A a 2 obtun-

obtundunt:&lumen obscurant, seque moleste ingerunt, vsq; eò quoad ab institutis suis honestis, & præclaris cogitationibus illam abducunt. Quocirca meritò omnis incipientium laus, intra oculos constitit, id autem est, intra ipsorum studium, & voluntatem in Deum. quā tamen si rectam illi, & in Deo collocatam & fixam habent: tamen adhuc infestantur multis & vanis cogitationibus. quod proficiētibus, quorum videlicet, mens ad imperandum cæteris animæ partibus, maiores vires atq; robur collegit, minimè accidit. Nam quemadmodum sole oriri incipiente, ab infimis, atque humidis locis nebulæ excitatæ, & in altum euectæ, ac latè se diffundentes, ipsi soli obstant, quo minus radios lucis suæ ad nos possit transmittere, eodem autem cursu vlteriùs progresso, ac cœli medium capeffente, & quasi de superiori loco lucis suæ tela emittente, nebulæ confidunt primò, deinde planè euanescent, ac purum nobis, & intaminatum luminis aspectum relinquunt: sic profectò similiter de cœlesti illo gratiæ lumine, & tanquam sole cum nobis oriri cœpit, iudicandum est. Siue ob malè agendi, malèque cogitandi vsum, longa consuetudine inolitum id nobis eueniat, siue quod ita sit comparatum, vt nihil nouari in vita possit, sine magno aliquo rerum motu, ipseque communis humani generis hostis, ægrè scilicet, ferens hominem sibi eripi, hoc est, à regno tenebrarum transferri, in admirabile lumen Dei, in ipso initio, & honestæ vitæ ingressu, quando maximè imbecillis est virtus, agmina ista malarum

malarum cogitationum, ad nos loco mouendos subijciat. Itaque nascenti gratia luci opponunt se cogitationes istae erroris, atque tenebrarum plenae: at eisdem iam corroboratae & amplificatae, & ad omnes recessus animi, lumen suum transmittenti concedunt: cuius iam boni qui proficientes sunt, participes esse incipiunt. Quare istorum nunc capillos laudat, quamquam ne ijs quidem in hoc plenam laudem tribuit, sed eam reseruat, perfectis postea suo loco tribuendam. Qui quidem sicut in alijs rebus, sic etiam in hoc bene, atque sancte cogitandi, siue officio, siue virtute, multum excellunt. Illos igitur postea cum de illis aget, cumulatè laudabit: hos verò nunc haecenus laudat, ut tumultum & confusionem, & errorum tenebras ab ipsorum cogitationibus remoueat, id est, ut quae capillis qui similes sint capreis Galaad inesse dicuntur, ornatus atque nitor, ea, aut ijs similia, quoad rei naturam patitur, bona, istorum cogitationibus inesse dicat lucem, atque ordinem. E quibus ordo spectatur in eo quod non, ut quaeque res illorum sensus peruellit, eam statim ad animum suum, & cogitationem admittunt, sed intendunt aciem mentis suae priusque examinant qualis ea res sit, & explorant, & veluti excubant ante fores cordis sui acri cura, atque vigili, ne quis se intro illa loci puritate, & sanctitate indignus insinuet. Itaque nec malarum rerum cogitationes admittunt, neque earum etiam rerum, quae, aut nunquam erunt, aut ne esse quidem possunt, ad se introire patiuntur, nec oblectant se se ea, quae plurimum quidam.

Aa 3 dam.

Sapient. 1.

dam delectantur vanitate, animo sibi & cogitatione inanissima somnia fingendi, quia ut scriptum est, Spiritus sanctus effugiet fictum, & auferet se à cogitationibus, quæ sunt sine intellectu. Splendor autem cogitationum consistit in eo, ut splendida ipsæ sint: id est, ut de rebus splendidis & illustribus, hoc est cælestibus, aut ad vitam cælestem pertinentibus suscipiantur. Id quod sedulò agunt, ferè quæ ià assequuntur proficientes: plurimum enim animo cum Deo versantur, eaque mente pertractant, quæ proferri foras, & in luce constitui honestissimè possunt: cū contra intemperantium, & prauorum hominum cogitationes sint eiusmodi, ut eas non solum in publicū proferre non audeant, sed ut ipsismet, quibus eæ sunt voluptati, sæpè quales sint videantur, horribiles, scilicet, atque tetræ. DENTES TVI SICVT GREX TONSARVM, QUAE ASCENDVNT DE LAVACRO OMNES GEMELLIS FOETIBVS ET STERILIS NON EST IN EIS. Quod in superiore similitudine euenit, ut omnes sacri harum literarum interpretes, in eandem sententiā concurrerent: hīc contra accidit, ut singuli suas, & ab alijs diuersas sententias sequantur. Quas ego singulas enumerare nolo, ne iusto sim longior: id dicam tantum, quod mihi cogitanti, & studium adhibenti, maximè probabile occurrit: id quæ quanta potero luce, & breuitate explicabo. Quod si cui hæc nostra explicatio visa fuerit nimium altè petita, nosq; quis dixerit multis ambagibus vsos, vix eo peruenisse quò tēdimus, cum hoc ego non multum contenderim, dummodo

id

id concedat nobis, quod omnis bonus, atque equus
certè concedet, eam esse istarum literarum & maie-
statem, & obscuritatem, vt omne studium, omni-
que diligentia acris & vehemens, quæ si alijs in rebus
adhiberetur, immodicè adhiberi putaretur: in ijs ad-
hibita literis laudari fortasse debeat, reprehendi cer-
tè nullo modo possit. Igitur dentium vocabulum,
cum ad opera naturæ, & ad res rusticas significan-
das, in literis sacris trāsferitur, inuenio significare so-
lere valles & loca humilia, atq; plana, aruaq; ea, quæ
segetibus ferēdis sūt idonea. Nā qui istas literas Chal-
daicè primus vertit, aut potiùs paraphrasi interpre-
tatus est, cuius est apud omnes grauis autoritas, il-
lud, quod in Genesi, à Iacobo de Iuda filio suo, eiusq;
posteritate dictum scribitur, Pulchriores sunt oculi *Gen. 49.*
eius vino, & dentes eius lacte candidiores, sic ad ver-
bum interpretatur. Montes eius rubicundiores erūt
in vineis suis, distillabunt colles eius vinum, dealba-
buntur campi eius frumento, & gregibus. Oculi igitur
colles vitibus cōsitos, dētes autem arua segetibus
flauescentia translātè significant. Porrò colles ipsi, at
que valles, in arcano sacrarum literarum sermone
etiam transferuntur, ad aliquid aliud significandū.
Etenim colles principes viros, valles verò homines
ignobiles, & tenues significāt, vt in illo Psalmi, Assu- *Psal. 71.*
ment montes pacem populo, & colles iustitiā. Et in
Esaie illo, Omnis collis humiliabitur, & omnis vallis *cap. 40.*
implebitur. Sed est praterea sciendū in homine qui
ipse nō sine causa, minor mūdus dictus est, esse quan-
dam

dam reipublicæ effigiem. Nam eminet in illius animo principale quiddam, & excelsum ad imperandum, & regendum natum, quod est ratio atq; mens: similiter inest in eodem humile aliud & demissum, & alterius rectionis egenum, & omninò natum ad seruiendum, quæ est irascendi, atque concupiscendi facultas. Quibus ex rebus efficitur, si in natura dentium appellatione valles significantur, & si valles in re ciuili & publica, pro ignobilibus accipiuntur, consequens esse partes ignobiles atque infimas, siue reipublicæ totius, siue vnius cuiusque hominis, qui & ipse respublica quædam parua est, isto arcano sacram literarum sermone dentes vocari, hoc est, vocari dentes in republica obscuros homines, in homine verò infimas, & ad humum pronas irascendi, atque concupiscendi partes. Quid? quod ipsa rerum, de quibus hîc agitur ratio, atque natura postulat, vt in dentibus has inferiores vires animæ translâtè significari credamus. Nam primum in virtute, & quasi illius caput est, vt mens, quæ altissima pars hominis est, rectè erga Deum afficiatur, quæ affectio est directio, siue vt dicere cœpimus, intetio mentis recta erga finem vltimum, bonorumq; extremum. Secundum, vt cogitandi leuitas, id est, ad cogitationem admittendi, quidquid sese cogitandum vltro obtulerit, facilitas ab animo remoueatur, adhibeaturq; in cogitando iudicium atque delectus, moderatioque seruetur, ac sanctitas. Tertium, vt mente ad istum modum affecta partes animi eæ, quæ in mentis tutela sunt, ciq;ue

ei que subsunt, ex quibus iræ & cupiditates, omnesq;
ijs similes animi motus existunt, atque adeò ipsi cor-
porum sensus, quorum nuntijs istæ partes, vel dila-
tantur, vel contrahuntur, contineant se intra modũ
à ratione, atque mente præscriptum, ei que parere fa-
cilè & libenter assuescant. Hæc igitur cum ita sint,
cum que de rectitudine mentis, qualis ea in proficiẽ-
tibus esse debeat, sit dictum, quod columbarum ocu-
lis similes oculos habere dicti sunt, & de cogitatio-
num sanctitate similiter: cum sunt eorum capilli lau-
dati, ipse rerum ordo poscebat, vt de inferiorum ani-
mæ partium moderatione statim diceretur. De ijs er-
go agitur, dentesque isti sponsæ, qui tonsarum gregi-
bus assimilantur, proculdubiò has significant par-
tes: in quibus quod in formosis dentibus commen-
datur, elucere idem debet, æquabilitas nimirum, atq;
mundities. Iusti ergo & boni viri, ita eas studio, atq;
cultu virtutum moderatas habent, & quasi ad ratio-
nis amussim exactas, vt quemadmodum in tonsarũ
grege ac dentibus ijs, quos superiùs descripsimus, sic
in illis nihil inæquale sit, nihil eminẽs, aut à se dissen-
tiens. Nam sicut peccatores, & flagitiosi homines in-
numeris, & sæpè inter se contrarijs cupiditatibus, in
varias partes distrahuntur: ita vt nihil magis prauũ,
aut inæquale sit, quam eorum animi: sic contra in bo-
nis atque studiosis viris quatenus à virtute est, nihil
prauũ, nihilque distortum, nihil quod aut subsideat,
aut emineat conspicitur. Non enim vel metu con-
trahuntur, vel efferuntur lætitia, vel dolore conci-

Bb dunt,

dunt, vel distrahantur cupiditate: sed ad id quod vñ
semper, atque idem, sibi que simile est ratio perueni-
re contendens, partibus sibi subiectis, earumque per-
turbationibus moderatur. Itaque refecat atque reci-
dit ab istis partibus, quidquid est nimium atque in-
solens, & ita illas ad mediocritatem & æqualitatem
reducit, vt sicut tonsarum ille grex, sibi vndique est
similis: sic ista sibi ex omni parte consentiant, elu-
ceatque in eis, ex temperatione, moderatione que
ortum, idem illud decus quod in dentibus, quales de-
scripsimus, videlicet, ouium gregi similibus ex pari-
tate relucet. Quod autem sequitur. LABIA TVA SICVT

VITTA COCCINEA, ET ELOQVIVM TVVM DVLCI. Iam

Coloß. 4.

id propriè interpretari licet, vt nihil aliud in eo quam
orationis, atque sermonis iustorum prudentiam, at-
que dulcedinem laudari intelligamus. Est enim illo-
rum sermo non solum mitis & moderatus, sed om-
ninò dulcissimus, & qualis vt sit Paulus optat, sale
conditus. Quam autem opportunè, quam que in lo-
co sermonis mentionem intulit. Est enim animi ima-
go sermo ipse. Quare animi & eius partium pulchri-
tudine, atque cultu laudato, iure sermonis qui ab ani-
mo fluit, ipsum que omninò refert, ornatum laudat:
& exposita interiori honestate ad externum cultum,
qui siquidem verus est, & non simulatus atque fal-
lax, ex interiori ipso cultu effluit, atq; deriuatur, expo-
nendū aggreditur. Laudat itaq; bonorum colloquia,
in quibus animi ipsorum pulchritudo atque præstan-
tia, mirum in modum elucet. Quod autem sequitur.

SICVT

SICVT FRAGMENTVM MALI PVNICI GENAE TVAE, ABS-
QVE EO QVOD INTRINSECVS LATET. pertinet ad exter-
ni huius ornatus, de quo iam agit, eam partem lau-
dādam quæ in motu, incessuque, & oculorum atque
totius corporis habitu cernitur. Nam in genis sedes
pudoris est, & sicut pudor ab innata animi ingenui-
tate ortus genis infunditur, easque grato quodam
rubore afficit: sic animi interior species honesta, atq;
præstans, corpus ipsum, corporisque actus, atque mo-
tus omnes decenter effingit. Ex quo satis apparet,
quam grauiter illi errent, qui huius externi ornatus,
atque cultus nullam rationem, aut ipsi habēt, aut ab
alijs esse habendam ducunt. Nam tametsi accidere
interdum possit, vt qui omni ornatu interiori, omni-
que animi virtute sit vacuus, externè satis honestè
affectus & cultus appareat: tamen profectò nunquā
eueniat, vt qui veris virtutibus animum cultum ha-
beat, eius sit inculta, aut inconcinna, hoc est, indeco-
ra, & à rationis præscripto abhorrens exterior spe-
cies. Sed pergamus ad reliqua. COLLVM TVVM SICVT
TVRRIS DAVID, CVM PROPVGNAVLIS MILLE CLYPEI
PENDENT EX EA OMNIS ARMATVRA FORTIVM. Religio-
nis erga Deum vna pars est ea, quæ in precando ip-
sum versatur, id est, quæ oratione ipsum atque laudi-
bus colit: quæ à nostris oratio vocatur philosophis
ignota, à nobis verò in primis culta, atque eo in pre-
tium virtus habita, vt maximum honestæ, atque spiri-
tualis vitæ non solum præsidium, sed etiam solatium,
& oblectamentum positum in ea esse putemus. Nā

Bb 2 illi

illi quoniam in ea doctrina, quæ ipsorum literis atq;
libris continebatur, satis magnum auxilium ad bene
beateque viuendum, eos habere putauerunt, quicū-
que suos animos ea ipsa doctrina institui, atque exco-
li siuissent: idcirco nihil quod quidem ad virtutem,
aut comparandam, aut alendam pertineret, vel à Deo
petendū esse arbitrati sunt, vel dari à Deo posse cre-
diderunt, sed in cuiusque industria atque nauitate, id
totum positum esse credebant. Itaque huius virtutis
apud illos non solum cultus iacuit, sed etiam ratio
atque nomen ignotum fuit. Nos contra non solum
quia humanæ infirmitatis nobis ipsi conscij sumus,
sed etiam quia Christi diuino beneficio arctissimo
necessitudinis, & charitatis vinculo cum ipso Deo
cōiungimur: quiaque per Spiritum sanctum qui no-
stris mentibus infusus est, perque illius gratiæ donū
diuinæ naturæ cōsortes efficimur, ad Deum adimus
tanquam ad optimum & indulgentissimum paren-
tem, nec in eo spe fallimur. Clementissimè enim ex-
cepit ille nos, vocesque, & vota nostra ad suas aures
admittit, nobisque vicissim respondet, eaque peten-
tibus donat quæcumque ijs qui petunt, vtilia futura
esse cognouit ipse, cui omnia in futurum nota sunt
& manifesta. Est igitur ob hasce causas orationis vir-
tus Christianorum nationis propria, nobisque solis
cognita, & cum summa nō solum vtilitate, sed etiam
voluptate vsurpata. Quæ profectò virtus tātum mo-
menti habet, ad piè, atque sanctè viuendum, vt pro
eo atq; quis huic orationi virtutiq; studet: ita de eius
excel-

excellētia, atque praeſtantia debeat ſtatui. Nullum enim virtutis lumen eſt, nullum cæleſte, atque diuinum bonum, quod iſta orandi virtus, aut non contineat ipſa, aut non obtineat à Deo, & ad nos ipſos adducat. Quare vt quiſq; ſanctiſſimus eſt, ita maximè ſtudio & aſſiduitate orationis excellit. De hac igitur nunc agit Solomom, eam quæ figuratè collum nominat, quoniam in hac boni viri imagine, quā format colli ipſa vicem & officia obtinet multis de cauſis. Nam primum collo, & ducitur anima ea, qua ſpiramus, & traijcitur cibus iſ, quo alimur, & verba atque voces funduntur: ſimiliter oratione patefacimus Deo interiora vota noſtra, & diuinum ab eo ſpiritum, ea quæ gratiæ bona ducimus, quibus maximè alitur noſter animus. Deinde quemadmodum collo iungitur, atque neſtitur capiti corpus reliquum, ſic oratione coniungitur mens noſtra cū Chriſto Eccleſiæ ſanctæ capite. Ad hæc ſicut nerui, quibus totius corporis firmitas, motuſque potiſſimum continetur, à capite principium ducentes, per collū in omnes partes corporis diffunduntur: ſic virtutum robur propè omne à Chriſto capite in nos deriuatur, oratione poſtulatrice, atque interprete. Præterea quod ex habitu colli de reliqui corporis viribus, & habitudine iudicare ſolemus: nam quibus obefum eſt, & toroſum collum, eos viribus pollere dicimus, contra autem infirmos eſſe, & imbecilles, quibus eſt id tenue atq; gracile, id etiam aptè transferatur ad orationis naturam. Valent enim plurimum ſpiritualibus animi vi-

B b 3 ribus.

ribus, & contra omnes malorū incurfus propè inuicti persistunt, qui orationis studiosissimi sunt: contra remissi in eius studio atque negligentes, vtpotè qui viribus gratiæ destituantur, facile cedunt malis, seque vinci permittunt, animumque gerunt varijs morbis obnoxium. Postremò sicut proceritas, & elegantia corporis iuxta colli magnitudine, maxima ex parte efficitur: sic altum illud, & excelsum, quod in bonorum animis cernitur, ex colloquēdum Deo, & orandi ipsum assiduitate existit maximè. Quod si tanta vis ad honestam vitam in oratione est, rectè Solomon expositis honestæ iustorum vitæ dignitate, atque dotibus, quibus ea vita potissimum paretur, & efficiatur artibus, eas artes nunc prædicat, & exponit. Quæ autem est ista prædicatio, atque laus? COL-
LVM TVVM SICVT TERRIS DAVID CVM PROPVGNACV-
LIS MILLE CLIDEI PENDENT EX EA OMNIS ARMATV-
RA FORTIVM. Tribuit orationi eademque recto, & honesto collo tribui solent. Vtor autem cum ista orationis voce, tum alijs vocibus quibus Ecclesiæ scriptores in significandis rebus, quas veteres Latini ignorarunt, vtuntur: ne si vna voce nolim, pluribus mihi vocibus semper sit vtendū. Igitur ea oratio habeatur perfecta, primum quæ non inflectatur ad humum, sed instar rectę cervicis ad sublimia, & æterna semper erigatur, & intendatur. Deinde quæ extet supra humeros, id est, transiliat, atque transcendat terrena omnia quo vsq; animum virtute adolescere, & peruenire faciat, ad mensuram magnitudinis Christi.

Postremò

Postremò quæ sit turris Dauid, cum propugnaculis mille fortium virorum clypeis ornata, id est, quæ sit nobis pro turri, & propugnaculo aduersus omnium malorum incursus. Nec verò illud causa, aut ratione vacat, quod Dauidis turris potissimum est adhibita ad similitudinem. Nam istam turrim Dauid Hierosolymis ædificauit, in Sionis eius vrbe edito, & manu, atque natura munito colle, Iebuseis tamen priùs deuictis, atque vrbe pulsis: quod ad rem nostram relatum declarat, quãdiu malæ cupiditates in animo dominantur, tandiu huic virtuti non esse locum. Quare qui terrenis studijs non solum occupati, sed etiam addicti iustitiæ, atque bonorum morum parum studiosi, huic tamen virtuti studere, & vacare se dicunt, ac se ideò bonis numerari volunt: certè ipsi sibi ita persuadent aliquid se esse, quod stasis horis temporis aliquid orationi, & diuinarum rerum contemplationi impertiunt, vmbram illi quidem inanem huius virtutis fortassè assequantur: ipsam autem veram virtutem non assequuntur, seque ipsi valdè decipiunt. Iebusei namque ex vrbe, id est, ex animo malæ cupiditates priùs sunt expellendæ. DVO VELRA TVA, SICVT DVO HINNVLII CAPRIÆ GEMELLI QVI PASCVNTVR IN LILIIS. Hæc iam ad eas virtutes laudandas spectant, quæ ad alterum referuntur, charitatem dico in homines, & misericordiam, atque beneficentiam: quæ ideò multitudinis numero vbera appellantur, quia duplici officiorum genere diuiduntur, quorum aliud ad corpus, ad animum aliud pertineat. Nihil porro est

est tam naturale, quam ut qui bonus ipse est, alijs etiã prodesse velit, & re ipsa prosit. Nam quemadmodũ ea, quæ natura constant, cum eo adoleuerunt, ut ad sui generis quoad ipsarum ratio patitur, perfectionẽ peruenierint, statim aliud ex se se gignunt, aut certẽ auent gignere, quod sibi simile sit, quodque eius boni, quod in se ipsa habent, particeps possit esse: sic virtute præstans animus effigiem sui in alijs exprimere studet. Et sicut adolescentibus fœminis, ubi ad nubilem ætatem peruenerũt, tumere incipiunt vbera: sic illis, quorum iam est adulta virtus, pectus tumere incipit, studijs alios iuuandi. Quare istis hoc loco vbera tribuit Spiritus sanctus, eaque hinnulis caprarum similia, hoc est, pulchra, & omni ex parte formosa vbera. Fieri enim nullo modo poterat, ut huiusmodi gradus, atque perfectionis virtus sterilis permaneret.

VADAM AD MONTEM MYRRHÆ, ET AD COLLEM THY-
RIS DONEC SPIRET DIES, ET INCLINENTVR VBERA.

Qui nouerunt atque experti sunt, quemadmodum ista Dei cum hominibus sibi charis interiora colloquia se habeant, ita tradunt. sæpẽ accidere, ut in medio sermone disparere subitò, ex ipsorum animis illis videatur ea lux, qua ex Deo perfundebãtur, & rursus breui mora interposita iterum apparere: maiusque quam antea lumen in ipsis accendi, quod quidem quare fiat dicere non habeo, quin autem quoties fit maxima causa fiat, affirmare non dubito. Ad has igitur vices euntis & redeuntis Dei, quibus instituti interiores sermones in medio orationis cursu abrum-
puntur,

puntur, quibusque occultantur, & rursus apparere incipiunt diuinæ lucis radij, hæc verba, vt existimo, sunt referenda. Itaque ad hoc significandum inducitur sponsus orationem institutam primo intermit tens, ac dicens. VADAM AD MONTEM MYRRHÆ. Dein de adeandem rediens, atque subiungens. TOTA PUL CHRA ES AMICA MEA. Et quæ deinceps sequuntur. Nisi alicui fortasse placeat, id quod mihi nō displicet, his verbis, non quidē significari Dei aliquē discessum, aut instituti sermonis intermissionem: sed doceri iu stos, atque admoneri, vt in ijs, quæ modo sunt enu meratæ & celebratæ virtutibus magis ac magis pro ficiant: vtq; non prius à proficiendo desistant, quàm ad montis cacumen, quo in cacumine edito, scilicet, & difficili ad ascendendum loco, virtus domicilium habere dicitur, perueniant, id est, compotes fiant per fectæ & absolutæ virtutis. Nam certè tametsi se abire velle sponsus dicat, tamen discedere ab sponsa velle non dicit: imò cum eam è vestigio iterum laudat, & pulchram, atque omni ex parte pulchram appellat, satis indicat, diuelli se ab ea non posse. Itaque quod dicit. VADAM. admonendi illius & excitandi ad pro grediendum vim habet, non, aut deferendi, aut re linquendi significationem: perindeque est, ac si ita dicat. Vadam ipse: tuque me euntem sequere: vel va dam ipse, quoniam te euntem & pleno gradu ad cul men contendentem comitabor, quod ita esse illa apertè indicat quæ sequuntur. VENI DE LIBANO VENI. In quibus quemadmodum sponsam ad insequendū

Cc sponsus

sponsus hortetur, iam superius expositum est. Sed quò se iturum vnà cum sancta anima dicit sponsus?

AD MONTEM MYRRHAE, ET AD COLLEM THVRIS. Ea autem sunt duo genera maximarum virtutum, quorù alterum purgare animum dicitur, illuminare alterù: ex quo ab istarum rerum scriptoribus aliæ purgatoriæ sunt dictæ, aliæ illuminatrices virtutes. Nam in myrrha pœnitentiæ significari officia, superius satis ostendimus. Thus verò religionis cultù erga Deum

Psal. 140. significat, vt liquet ex illo Psalmi, Fiat oratio mea tãquam incensum in conspectu tuo. Et in Apocalypsi,

Apoc. 5. Habentes singuli phialas aureas plenas odoramentorù, quæ sunt orationes sanctorù. Sed aberat ne ab istis locis sponsa? non illa quidem aberat, sed quod ad perfectionis culmen tendentia quid deerat, nec totum suæ vitæ tēpus expleuerat, id vt adderet quod ipsi deerat, & vt in eo quod cœperat ad extremum vsque persisteret admonetur. At vade diceret. Imò vadam aptissimè: quoniàm vnà ipse nobiscum in omni bono opere vadit. Imò non vadit solùm, sed euntes præcurrit, & vt ire possint, & velint efficit. Etenim ab ipso ducitur, & bene agendi, & in bono proficiendi, perseverandi quæ omne principium. Sed quo fructu, dicet aliquis, in ijs studijs perseverabit: nimirum eo qui sequitur. TOTA PVLCHRA ES AMICA MEA, ET MACULA NON EST IN TI. Perueniet enim ad summã, & perfectam virtutem, atque fœlicitatem perseverando: quod etiam quæ sequuntur, significant. VENI DE LIBANO VENI, CORONABERIS DE CAPITIBUS AMANAE ET

SANIR,

SANIR, DE VERTICE HERMON, DE MONTIBVS LEONVM
ET PARDORVM. Nam si vocem, atque ductum Dei per
seueranter sequamur, videlicet, perueniemus ad Li-
bani, ad Amana, ad Sanir, & ad Hermon, altissimorū
scilicet, montium cacumina: quibus cacuminibus
eximiae & heroicæ virtutes in sacris literis signifi-
cantur. At quam aptè ad rem ipsam, de qua nunc age-
bat, coronaberis, siue quemadmodum Hebræa etiā
verti possunt, despicias dixit. Nam cum quis ad illud
virtutis fastigium peruenit, quid illi nisi vt corone-
tur iam restat? Sicut de se ipso loquēs Paulus scripsit:
Bonum certamen certavi, cursum consummaui, de ^{2. a. Tim.}
reliquo reposta est mihi corona iustitiæ, quam red- ^{4.}
det mihi dominus in illa die, iustus iudex. Ad hæc qui
in isto fastigio versatur, si quando ad hæc terrena, &
inferiora despexerit, quī poterit illa non despiceret?
Despiciet illa certè, & vilia atq; humilia, vt sunt, esse
iudicabit: contemptuque, atque omni despectione
digna ducet. VULNERASTI COR MEVM SPONSA MEA,
IN VNO ASPECTV OCVLORVM TVORVM, ET IN VNO
CRINE COLLI TVI. Non attribuit nouam aliquam lau-
dem, sed attributas amplificat: dum ijs animi bonis
quibus iusti ornati sunt, affici se Deus dicit, & ad amā-
dum accendi. Itaque eadem iterum commemorat,
oculos, capillos, linguam, quo intelligatur, virum bo-
num in eo ipso quod Deus cum illo interius loqui-
tur, sensim proficere, seque ipso meliorem effici: nec
solum nouas gratiæ dotes acquirere, sed eas ipsas,
quas antea habebat ampliores & illustriores redde-

Cc 2 re.

re. Atque hæc ita se habent. Porro quod sequitur, nō uam continet laudem. HORTVS CONCLUSVS, SPONSA MEA, FONS SIGNATVS, EMISSIONES TVÆ, PARADISVS MALORVM PVNICORVM CVM POMOIVM FRVCTIBVS, CYPRI CVM NARDO, NARDVS ET CROCVS, FISTVLA, ET CINAMOMVM, CVM VNIVERSIS LIGNIS LIBANI, MYRRHA ET ALOE CVM OMNIBVS PRIMIS VNGVENTIS. Hæc enim germina, honesta ipsa officia sunt, quæ ex interiori virtute pullulant. Nam explicatis atque laudatis virtutum singulis partibus, hoc vnum restabat, vt exponeret illarum fructus, qui in actione & officio cernuntur, quales ipsi essent quamque præstantes. Id igitur exponit, vt cætera, metaphoricè similitudine ducta, ab eo horto, in quo non modo nulla pars inculta sit, sed ne vulgari quidem, aut mediocri arborum genere confita: qui, scilicet, totus peregrinis & aromaticis abundet arboribus, vt non solum intuentium oculos oblectare possit, sed etiam vitæ hominum magnas vtilitates afferre. Tales quippè iusti sunt, nō torpent ocio: non inertem esse sinunt suæ fidei commissum talentum: non defodiunt humi, aut inuoluunt sudario gratiæ diuinæ sibi dona collata: sed præclare operandi instrumentum id omne, quod acceperunt à Deo ad actiones deducunt, fructusque edunt bonorum operum maximos. Nam præterquam quod illos ipsa eorum interior virtus, ad ita agendum sollicitat: id etiam à se expectari atque requiri sciunt. Itaque in id incumbunt, sibi que ipsi dies, atque noctes instant, nulloque tempore studium intermittunt bonos.

*Psell. in
canti.*

nos fructus alios ex alijs edendi: ex quo efficitur, vt nihil sit eorum animis, vel fructuosius, vel cultius. Sed si ista bonorum operum germina, nec grata Deo sunt, nec prædicatione, aut præmio digna, vt infani quidam nostra hac tempestate docuerunt, cur ea Deus tam exquisitè laudat hoc loco? An contempsisse illa, & pro nihilo habuisse putandus est is, qui ea esse dicit paradiso similia? Qui Cinamomi, & Fistulæ, & Ciperi, & Myrrhæ, atque Thuris translatis, & magnam vim boni significantibus insignit nominibus? Sed vtrum dicunt, vel nihil ab homine iusto effici, quod verè honestum sit, vel, vt efficiatur, nihil illi ad gloriam & ad præmium valere? Insanum vtrumque quidem, ac similiter impium, sed vtrumuis eligant, vel hoc vno testimonio reuinci planè poterūt. Nam cum Spiritus sanctus hæc iustitiæ tantoperè laudat germina, satis apertè vtrumque quidem docet, & à iustis viris edi posse, & honesta illa esse, sibi que pergrata accidere. Nam quæ poterat fieri, vt quæ cælesti fatu edita, cælestique imbri irrigata germinarent, minus honesta essent? Et quæ Deo in primis auctore, & adiutore ab homine fiunt, quæ potest intelligi despici à Deo, atque negligi? Quid vnquã Deus fecit quod non idem probaret? Sicut scriptum est: Et vidit Deus cuncta, quæ fecerat, & erant valdè *Gen. I.* bona. Quod si hoc in natura verum est, in gratiæ bonis profectò erit verissimum. At humani ingenij imbecillitas, & ad malum pronitas, bonorum operum ipsum lumen obscurat. At ea imbecilli-

tas id valet, non ut nunquam honestè agere homo possit, sed ut semper in omni vita non possit rectè & perfectè operari. non efficit, ut omnibus peccatorū maculis inficiatur, sed ut nonnullis quamuis iustus maculetur. non efficit ut omnia iustorum opera praua sint, sed ut sint aliqua. atque ut verum est, neminē ab omni peccato immunem in hac vita esse, ita est certè verissimum, multa à iustis edi bonorum operum germina, ab omni peccati labe atque defectu libera. At detrahatur Christi meritis quidquid arrogatur nostris operibus. Imò nos Christi meritorum veram laudem, & agnoscimus, & amplificamus: vos qui illustratores illius, & dici, & haberi vultis, minuitis eam, & obscuratis. Etenim non ijs sumus, qui cuiusquam hominis quamuis iusti rectissimè factis quidquam tribuamus meriti, nisi in Christo, & propter Christum. Quin illud ipsum honestum, quod in actione cernitur, absolutum omnibus suis numeris, atque perfectum præstitisse neminem dicimus, nisi prius ipse à Deo ob Christi meritum, & animi iustitia sanctificatus, & magnis gratiæ auxilijs ad bene agendum incitatus fuisset, & instructus. Itaque vos, qui Christi ita laudatis meritum, ut nihil ex eo ad nos manare velitis, quod nos re ipsa sanctificet, ac bonos reddat, sed opinione quadam inani, & vanissimis cogitationibus ficta imputatione, rem totam conficitis, vtrum Christi meritis laudem, an labem: amplitudinem, an imbecillitatem tribuatis, & arrogetis etiam, atque etiam videte. Nos certè non modo quā
vos

vos maiorem, sed quanta tribui potest maxima, tantam illi laudem tribuimus. Dicimus enim, & prædicamus Christi merita, cum ipsa per se amplissima & infinita esse, tum ita esse efficacia ad homines iustos efficiendos, eos ut non solum Deo reconcilient, & ex inimicis qui antea erant, amicos haberi efficiant, quod vos dicitis, sed etiam ut quales qui Deo chari futuri sunt esse decet, tales eos reddant, sanctos, scilicet, menteque pura, ac munda præditos: nec solum munditia & puritate mentis, sed cælesti etiam, atque diuino animi habitu ornatos. Affirmamusque illud, ex ea, quæ in ipso Christo est iustitiæ, atque omnis præstantiæ immensa copia, ad iustorum animos deriuari magnam vim: qua primum ad Christi effigiem ipsi & similitudinem effinguntur, atque formantur: deinde ad illa effigie ac similitudine dignas, & consentaneas actiones impelluntur. Itaque illa cælestis iustitiæ excellens forma, ad Christi iustitiæ exemplum efficta, & ex illa deducta, primum in animo iusti existit impressa, postea in actionibus apparet, atque enitet. Quibus in actionibus bonis quo magis insistimus, eo magis Christus ipse meritorum suorum copias nobis communicat, nosque similiores sibi efficit: ex quo rursus sequitur, ut promptius ipsi atque alacrius, atque etiam perfectius bene operemur: ita fit ut honestum quod à Christo in animo nostro est, in actione simile honestum efficiat, ipsumque actionis honestum auctum, & amplificatum, animi, à qua ortum habuit, honestatem iterum augeat: idque totum, quone

ne cogitari quidem aliquid potest in hoc iustitiæ genere præstantius, aut maius in nos Christi sanguis efficiat. Ita, ut si ratione diligenter subducta, cunctisque in vnam summam collatis, de re ipsa, prout est, iudicare velimus, dicere debeamus, quod & dicimus, & libera voce affirmamus, præter Christum, aut quod ex Christo ortum, atque natum sit, nihil in hominum genere, sed neque in Angelorum quidem esse, quod Deo gratum sit, & acceptum: eoque nomine potissimum Deo nos commendari, quatenus iustitiæ eo bono, quod ex Christo trahimus, & participamus, quodque & in animo nostro diffunditur, & in actionibus explicatur ac cernitur, similes efficiamus ipsi Christo. Illa enim Christi in nos imago conspicua, participatione eius boni quod in Christo est, & ab eo in nos deriuatur effecta, diuinum amorem nobis & beneuolentiam conciliat: sicut scriptum est. Quos præsciuit & prædestinavit conformes fieri imagini filij sui. Igitur vos hæretici Christi meritorum gloriæ, & virtuti detrahitis: nos debita illum laude & prædicatione prosequimur. Vos inertem quādam, & ut ita dicam, ociosam vim illis tribuitis: nos energiam, & efficacitatis plenam. Vos in solo Christo hærrere dicitis iustitiæ bonum: nos ad animos bonorum id introducimus, & ab animis ipsorum ad actiones eorundem deriuari contendimus. Vos inherere vultis in vite palmites, nullum tamen à vite succum, qui quidem in ipsis sit, illos trahere, aut ullos fructus edere, qui pretio & æstimatione sint digni: nos libenter

Rom. 8.

ter assentimur Christo dicenti. Ego sum vitis, & vos *Ioan. 15.*
 palmites, qui manserit in me, hic fert fructum mul-
 tum. Vos quidem fontem omnium bonorum Chri-
 stum esse fatemini, sed fontem qui intra se se conti-
 neat aquas suas: nos ex eo fonte, quem item in exhau-
 stum, & Oceano maiorem esse fatemur, largos bo-
 norum omnium riuos deriuari, & ad singulos iustos *Psellus in*
 peruenire affirmamus: quibus è riuis effici dicimus, *canti.*
 vt in singulis iustis, ad quos deriuantur, existant sin-
 guli fontes, eius ipsius fontis, à quo ortum habuerunt,
 proportionem consimiles, ac caelestibus exuberantes
 aquis, sicut ipse Christus affirmat: Qui credit in me, *Ioan. 4.*
 fiet in eo fons aquae salientis in vitam æternam. Et
 Solomon hoc ipso in loco. FONS SIGNATUS, PUTEVS
 AQUARVM VIVENTIVM, QVAE FLVNT MAGNO IMPE-
 TV DE LIBANO. Nā in eo certè, quod hos fontes aquis
 viuentibus abundare & fluere magno impetu dicit,
 satis docet, in ijs riuis, qui ab his fontibus manāt, hoc
 est, in bonis iustorum operibus vitalem inesse vim,
 id autem est, vitae caelestis efficientem. Nam quod
 ad extremum adiungit. SURGE AQUILO, ET VENI AV-
 STER, ET PERFLA HORTVM MEVM, ET FLVENT AROMA-
 TA ILLIVS. idcirco adiungit, quia desiderat, id quod
 omnes boni desiderare debemus, vt fideles suos li-
 beret Deus à vestris istis venenatis doctrinis: vosq;
 ipsos, aut de medio tollat, aut certè dedoceat ista
 dogmata pestifera: quibus quemadmodum ventis
 Aquilonaribus fata aduruntur, sic omnis bene, &
 sanctè operandi alacritas aduritur, omne hone-
 Dd sistu-

sti studium extinguatur, omnes industriæ nerui
inciduntur.

CAPVT V.



ENIAT DILECTVS MEVS IN HORTVM
SVVM, VT COMEDAT FRVCTVM POMORVM
SVORVM. VENI IN HORTVM MEVM SO-
ROR MEA SPONSA, MESSVI MYRRHAM
MEAM CVM AROMATIBVS MEIS, COMEDI
FAVVM CVM MELLE MEO, BIBI VINVM
MEVM, CVM LACTE MEO, COMEDITE AMICI, ET BIBITE,
ET INEBRIAMINI CHARISSIMI. EGO DORMIO, ET COR
MEVM VIGILAT, VOX DILECTI MEI PVLŚANTIS. APERI
MIHI SOROR MEA, AMICA MEA, COLUMBA MEA, IMMACV
LATA MEA, QVIA CAPVT MEVM PLENVM EST RORE, ET
CINCINNI MEI GVTTIS NOCTIVM. EXPOLIAVI ME TV-
NICA MEA, QVOMODO INDVAR ILLA, LAVI PEDES MEOS,
QVO MODO INQVINABO ILLOS? DILECTVS MEVS MISIT
MANVM SVAM PER FORAMEN, ET VENTER MEVS INTRE-
MVIT AD TACTVM EIVS. SVRREXI VT APERIREM DILE-
CTO MEO, MANVS MEAE STILLAVERVNT MYRRHAM, ET
DIGITI MEI PLENI MYRRHA PROBATISSIMA. PESVLVM
HOSTII MEI APERVI DILECTO MEO, AT ILLE DECLINA-
VERAT, ATQVE TRANSIERAT, ANIMA MEA LIQVEFACTA
EST VT LOQVVTVS EST: QVAESIVI ET NON INVENI IL-
LVM, VOCAVI, ET NON RESPONDIT MIHI. INVENERVNT
ME CVSTODES QVI CIRCVMENVNT CIVITATEM, PERCVS-
SERVNT ME, ET VVLNERAVERVNT ME, TVLERVNT PAL-
LIVM MEVM MIHI CVSTODES MVRORVM. ADIVRO VOS
FILIAE HIERVSALEM, SI INVENERITIS DILECTVM MEVM
VT RENVNCIETIS LI, QVIA AMORE LANGVEO. QVALIS
EST DILECTVS TVVS EX DILECTO Q PVLCHERRIMA MV-
LIERVM,

LIERVM, QVALIS EST DILECTVS TVVS EX DILECTO, QVIA
SIC ADIVRASTI NOS. DILECTVS MEVS CANDIDVS, ET
RVBICVNDVS ELECTVS EX MILLIBVS. CAPVT IIVS AV-
RVM OPTIMVM, COMAE EIVS SICVT ELATAE PALMARVM,
NIGRAE QVASI CORVVS. OCVLII EIVS SICVT COLUMBAE
SVPER RIVVLOS AQVAVM, QVAE LACTE SVNT LOTAE,
ET RESIDENT IVXTA FLVENTA PLENISSIMA. GENAE IL-
LIVS SICVT AREOLAE AROMATVM CONSITAE A PIGMEN-
TARIIS, LABIA EIVS LILIA DISTILLANTIA MYRRHAM
PRIMAM. MANVS ILLIVS TORNATILES AVREAE PLENAE
HYACINTHIS VENTER EIVS EBVRNEVS DISTINCTVS SAP-
PHIRIS, CRVRA ILLIVS COLUMNAE MARMOREAE QVAE
FVNDATAE SVNT SVPER BASES AVREAS, SPECIES EIVS VT
LIBANI, ELECTVS VT CEDRI. GVTTVR ILLIVS SVAVIS-
SIMVM ET TOTVS DESIDERABILIS, TALIS EST DILECTVS
MEVS, ET IPSE EST AMICVS MEVS FILIAE HIERSALEM.
QVO ABIIT DILECTVS TVVS O PVLCHERRIMA MVLTIE-
RVM, QVO DECLINAVIT DILECTVS TVVS, ET QVAERE-
MVS EVM TECVM.

EXPLANATIO.



VENIAT DILECTVS MEVS IN HORTVM SVVM
Sui copiam facit, inuitatque sponsum
ipsa, & gratificari illi se velle, atque sub-
mitti in eo quod ipsum cupere intelli-
git, profitetur: hancque illi gratiam, &
concessionem sui rependit pro laudibus, quibus
affecta est ab ipso. Itaque dicit. Tu me esse similem
dixisti horto pulchrè confito: at is hortus, qualis qua-
lis est, tuus est, tuisque vsibus & vtilitati patet. Itaque
veni, & fructum lætitiæ ex eo tuo arbitratu carpe.

Dd 2 Cui

Cui sponsus se venturum respondet, & quo significet sibi id magnæ voluptati futurum, figuratè, & in eadem persistens metaphora, ea in horto effecturum se esse dicit, quæ festo die ab ijs, qui ad epulas, quique genij indulgēdicausa in hortos conueniunt fieri sæpè solent. VENI, inquit, id est, VENIAM IN HORTVM MEVM. MESSVI MYRRHAM MEAM. Nā solent agricolæ in hortis primum aliquid rustici operis facere: deinde vino, atque epulis dare operā. Vnde addidit. COMEDI FAVVM CVM MELLE MEO, BIBI VINVM CVM LACTE MEO. Eis enim cibis pastores & agricolæ plurimū vtuntur. COMEDITE AMICI, BIBITE. ET INEBRIAMINI CHARISSIMI. Imitatio est sermonis mero certantium conuiuarum, & mutuo sibi propinantium. Quamquam inest eclypsis quædam in oratione hac, plenè enim & integrè diceretur: nec solum ipse veniam, sed socios etiam plures mecum ducam, eosq; & cibi, & eiusdem mecum gaudij participes efficiā: dicamque illis, comedite amici, & inebriamini charissimi. EGO DORMIO, ET COR MEVM VIGILAT. Iam ab alio principio noua amoris instituit argumenta. Nam quasi iam discessisset sponsus, atque eo se contulisset, quo se iturum dicebat, sic nunc fingitur sponsa, cum ad multam noctem vigilasset spectando illum, iam propè desperans reditum, & cubitum iuisse, & postea experrecta, quid sibi & cubanti, & dormienti acciderit, ille dum iterum redit, retulisse. EGO, inquit, DORMIO. Id est, dum absentem illum ad multam noctem expecto me oppressit somnus. At
quamuis

quāuis dormiebam, cor vigilabat meum, cura videlicet, & egritudine de viri mei absentia sollicitum. Nam simulatque illo redeunte, & ianuam impellente crepuere fores excitata somno sum, eumque distantem audiui. APERI MIHI SOROR MEA, AMICA MEA COLUMBA MEA, IMMACVLATA MEA. Quia verosimile erat sponsam, quod se delusisset sponsus suus, & noctu solam reliquisset, iratam esse: idcirco adueniens sponsus placare illius animum, atque lenire indignationē conatur mollissimis istis verbis: quibus simul ut ianuam aperiat, ipsam rogat, simul machinas, & quasi tormenta quædam adhibet, blandissimæ orationis, quò ad illius subiratum animum penetrare possit, ipsamque lenire. Hanc enim vim habent appellationes istæ blandæ, soror mea, columba mea, similiterque quod sequitur. QVIA CAPVT MEVM PLENUM EST RORE, ET CINCINNI MEI GVTTIS NOCTIVM. Nam qui inter se amant, & ob aliquam leuiorem causam dissident inter se, tum facillimè in gratiam mutuò redeunt, sibi que ad inuicem placantur, cum aduersi aut molesti aliquid alteri eorum accidit. Amor enim rei amatæ incommodo, atque detrimento perspecto maiorem in modum accensus, omnem dissidij memoriam obliterat. Atque hæc sponsus: cui sponsa respōdisse fertur planè ex ingenio fœminarum. LAVI PEDES MEOS, QVOMODO INQVIRABO ILLOS, EXVI ME TVNICA MEA, QVOMODO INDVARI ILLA? Est namque proprium fœminarum cum rogantur, inepta quædam causificari, & ea se nolle finire,

Dd 3 gere,

gere, quæ maximè & ardentissimè cupiunt. EXVI ME, inquit, TVNICA MEA. Atqui dudum tui viri videndi desiderio, ita ô sponsa flagrabas, vt per niues ipsum, perq; medios ignes sequutura viderere. Sed, vt dixi, fœmineus seruatur & exprimitur mos. LAVI PEDES MEOS. Nam fœminæ lautæ cubitum ire solēt. QVOMODO INQVINABO ILLOS? Quanta mollities? Quanta fœminei moris expressio? Quantaque significatio indignationis propter sponsi moram conceptæ? Quamque etiam vrbane, & ex amatorû consuetudine apte suam sponsa indignationem vlciscitur? Nā quod ait. EXVI ME TVNICA MEA, LAVI PEDES MEOS. Perinde est, ac si diceret. Atqui pernoctare extra domum potius, quam tam sero reuerti domum debuisses: tute oblectas noctu, quibus tibi commodum est, rebus & locis, ac me desertam, ac pene viduam domi iacere finis: ast ego vicissim, nec insomnes noctes ducere ex volui, te frustra spectans, nec nunc aut positam vestem sumere, aut lecto surgens, lautos inquinare pedes tui causa volo. Sed videamus quod sequitur. DILECTVS MEVS MISIT MANVM SVAM PER FORAMEN, ET AD TACTVM EIVS COMMOTA SVNT VISCERA MEA. Nam dum illa cunctatur sponsus moræ impatiens immissa manu qua patebat inter fores aditus, fingitur pesulum interiùs aditū amouere voluisse: quod illa vt animaduertit, omni cunctatione & causificatione deposita exiliens lecto, ac vehementer perturbata, quod ab amore ipso accusarise, & redargui de superiore cunctatione sentiebat, fores aperuisse dicitur.

citur. DILECTVS MEVS MISIT MANVM SVAM PER FORAMEN. Scilicèt, per id foramen, quò clavis immittitur: nā id significat Hebraicū הָהוּר quo intelligendum est, digitos immisisse sponsum dici, quò ianuam aperiret. Nam credibile est, idque vel ex hoc loco satis potest intelligi, Hebræos in occludendis foribus vti solitos fuisse, eo feræ genere, quo Arabes Ismaelitæ apud nos utebantur. Quod erat huiusmodi. Ab interiori ianuæ parte pesulum inditum erat foribus ligneum, cauea item lignea inclusum, supernèq; dentatum ferræ instar: in hos dentes ab exteriori ianuæ parte immissa clavis ferrea incidēs, trudebat ipsum, tum dextrorsum, tum sinistrorsum prout vsus poscebat, quoad vel occlusura infereret illud annulo, item ligneo, qui alteri è foribus inerat, vel reclusura eximeret, atque retraheret. Qui intradomum erant, id pesulum nulla claue, sed sola manu tractum facilè, aut inferebant annulo, aut retrahebant ab eo: qui extra verò, claue quidem plurimum utebantur, tamen interdum & ipsi, eodem quo clavis immittenda erat, immisisis digitis. (Nam erat id amplum foramen proportionem ipsius clavis, quæ item erat oblonga, atque crassa) ianuam recludebant, idque cum faciebant, id est, cum manu citra clauem fores aperiebant, patria illorum lingua Talhor vocabant, ab Hebræo Hahur, non multum dissimili voce: nam claue ianuam recludere aliter illis, scilicèt, Iaphtar, nominatur. Hoc igitur foramine immisisse manum sponsus dicitur, eoque immittente manum, VENTER, inquit, sponsa

MEVS

MEVS CONTREMVIT. Ac si dicat. Ipsum vt vidi manu retrahere conantem hostij pefulum venter meus, id est, viscera mea contremuerunt, hoc est, commota in me sunt. Ventrem autem, & viscera cum nominat, eos animi motus, Hebraico loquendi more significat, quorum in visceribus sedes sunt, vt amorem & misericordiam. Qui loquendi mos haud est alijs linguis ignotus: nam & Græci *σπλαγχνισθαι* pro misereri dicunt. Et ille. Graue Pelidē stomachum, pro implacabili ira posuit. Igitur sponsa amore simul & pudore, atque misericordia, vt præfestinantem vidit sponsum correpta, toto pectore æstuarē cœpit. AD TACTVM EIVS. Vel vt in Hebræo legitur. Super eum, id est, eius gratia atque causa: quod illum fessum atque imbri madidum stare ante fores voluisset, dum pedē ipsa extra lectum efferre recusat. Quam autem vehemens ea perturbatio fuerit sponsæ, ex verbo Hebræo *חמ* hamu intelligitur, pro quo Latinus interpres posuit commota sunt: nam id infremere propriè significat, & de mari irato, & procelloso literatè dicitur: id quæ ad se transtulit sponsa, quò significaret quibus ipsa fluctibus amoris atque pudoris agitata fuisset, quasi ita diceret. Amorem & vires amoris omnes, vitaliaque adeò cuncta intra ipsam motus horribiles commouisse, ipsamque quodāmodo incussasse graui fremitu: quod propter mollitudinem, & desidiā suā permisisset virum suum noctu sub dio manere. Sequitur. SVRREXI VT APLRIREM DILECTO MEO, MANVS MEAE STILLAVERVNT MYRRHAM, ET DIGITI MEI PLENI

PLENI MYRRHA PROBATISSIMA. Ex consequentibus, id quod antecessit, declarat. Manus sponsæ stillauerunt myrrham: igitur myrrhæ plenum vasculum secum tulerat, quò venientem sponsum perfunderet, atque oblectaret: idque fecit non solum iuxta morem gentis suæ, sed etiam iuxta amantium foeminarum consuetudinem: solent enim illæ huiusmodi liquidis odoribus imbuere, atque perfundere amatores suos. At tulit myrrhæ plenum vasculum, eo ut suum sponsum exciperet introeuntem, atque perfunderet: sed dum festinat, neque satis sibi præ amore, atque pudore constat, vase effracto, myrrha per manus effusa, cum ipsa se digitosque suos, tum pesulum ostij cui manus admovebat, infecit. Vnde sequitur. PESVLVM OSTII MEI. scilicet myrrha imbui, nò solum manus. Nam orationem sic esse distinguendam ex Hebræo constat, in quo ad verbum scribitur. MANVS MEAE STILLAVERVNT MYRRHAM, ET DIGITI MEI MYRRHAM TRANSEVNTES SUPER MANVERIA PESVL. Dicitur autem myrrha transiens, vel quod effusa, quomodo dictum est, ad pesulum quoque pervenerit, vel quod magis probo, quodque est sequutus Hieronymus, quod optima atque probatissima esset. Nā verbum חֲבֵר hober de moneta dictum, Hebræis probatam monetam significat. APERVI DILECTO MEC, AT ILLE DECLINAVÉRAT, ATQUE TRANSIERAT. Par videlicet pari. ANIMA MEA LIQUEFACTA EST, UT DILECTVS LOQUVTVS EST. Simul, inquit, me, & amor corripuit, & dolor: amorē accedit vox, atque preces sponsi: dolorē ex
Ec citavit

citavit eiusdem discessus & fuga. Quod quò magis
 mea culpa accidisse videbam, eò gravius, vehemen-
 tiusque commota sum. Doloze igitur, atque amore
 domo egredi compulsa. QVAESIVI ILLVM, ET NON
 INVENI, VOCAVI, ET NON RESPONDIT MIHI. Vocauis-
 se ipsum dicit, non solum quæsisse, vocauisse verò
 intenta, scilicet, & exaudibili voce, ne fortè tenebris
 occultatus ipsam latèret: sed cum frustra vocasset,
 diuque & multum quæsisset, in custodes vrbis, à qui-
 bus malè mulctata est, dicitur incidisse. INVENERUNT
 ME, inquit, VIGILIS QUI CVSTODIVNT CIVITATEM, PER
 CVSSERVNT ME, ET VVLNERAVERVNT ME, TVLERVNT
 PALLIVM MEVM MIHI CVSTODES MVRORVM. Quæ non
 ideò quia gesta sunt, scribuntur, sed quia amore sua-
 dente fieri interdum à fœminis amantibus solent, id
 circò aptè & venustè facta esse finguntur: similiterq;
 quod sequitur. ADIVRO VOS FILIAE HIERVSALEM.
notato rinos à Solomone est scriptum. Nam verò simile
 erat maximis clamoribus ijs, quos sponsa edidisse di-
 citur, vel virum suum vocans, vel iniuriam sibi à cu-
 stodibus illatam deplorans, excitatos multos accur-
 risse quæsitum, quid clamaret, quid sibi vellet, quid-
 ve intempesta nocte fœmina per urbem. quæreretur:
 in quibus aliquot fœminas fuisse, misericordia erga
 iuvenē fœminam præcipuè cōmotas, item est verò
 simile. Adeas igitur ne qua parte sui hæc carminis
 actio manca, atq; imperfecta esset, spōsa cōversa, sic
 scribitur à Solomone loquuta. ADIVRO VOS FILIAE
 HIERVSALEM, SI INVENERITIS DILECTVM VT NVNCIE-
 TIS

TIS EI, QVIA AMORE LANGVEO. Omisit autem dicere sponsa, quemadmodum suo clamore excitata illæ scemine sibi obuiam venissent, ipsamque rogassent, quid quæreret: atque consuli id, & ex arte dicere omisit: propterea quod illa per singulas partes eorum, quæ in re aliqua accidunt exacta expositio animum requirit, à curis & perturbationibus liberum. Qui enim vel amore, vel odio agitantur, cum explicare sensum sui animi volunt, neque cuncta dicunt, neque ordinem in dicendo seruant, sed ad id vnum, dicendum & exponendum festinant, quod illos maxime cruciat. ADIVRO, inquit, VOS FILIAE HIERVSALEM SI INVENERITIS. Atqui sponsa multa alia vel acciderant, vel certè accidisse finguntur relatu atque commemoratione digna. Nam quod ipsam sponsus euocatam elusit, queri profectò poterat: quod item ea re necessitatem sibi attulit, ipsum noctu, horrentibus tenebris, sine comite, & sine duce quærendi, querelæ iustam causam habebat: quod incidit in vrbis custodes, quod plagis ab ipsis affecta est, quod dispoliata discessit commemorare verè, ac lamentari poterat: quod denique dolore victa viciniam excitavit, & ignotos sibi homines, sui amoris testes fecit clamando, sceminæ præsertim pudicæ dolendum maximè, & in primis videretur dicendum: at nihil horum aut ipsa meminit, aut suis verbis sponso dici, à Hierosolymitanis sceminis vult: sed illud vnum duntaxat, se videlicet, ex amore languere. Amoris quippe qui ipsi fuerat magnitudo ipsa, omnem illi ex ani-

Ee 2 mo

mo ceterorum malorum memoriam obliterabat, atque eluebat. Ad hæc planè videbat sponsa, nulla re magis sponsum induci posse, ipsi ut ignosceret, id quod vnum illa maximè optabat, quam si sciret, audiretve, ipsam ex amore languere. Itaque id mandat potissimum, ut viro suo renuncient, quod ad placandum sibi virum suum, & in amore accendendum potissimum esse, sciebat. At quam bellè errat ex amore, quantoque iudicio ipse Solomon omnem vim summi amoris expressit in hac amantis persona. Nā fœminis, quæ neque ipsam nossent, neque sponsum ipsius mandat, ut de suo amore, atque languore suū virum faciant certiores, antequam eas doceat, vel quæ ipsa sit, vel quæ de causa noctu per urbem cursitet, curvæ tãtos clamores, atque eiulatus cieat: quod amore cæca non minus ea nota esse alijs, quam sibi essent credebat. Cuius illæ errorem vel demiratæ, vel miseratæ, comiter ei respondisse ferūtur. **QVALIS EST DILECTVS TVVS EX DILECTO, QVIA SIC ADIVRASTI NOS.** Nos, inquiunt, quis nam sit dilectus iste tuus tantoperè à te adamatus nescimus: sed quoniam adiuratæ abste, tuæ voluntati obsequi cupimus, illumque quærere, mandataque tua perferre ad ipsum volumus, agè, notas expone, quibus à nobis ille possit dignosci. **QVALIS EST DILECTVS TVVSEX DILECTO.** vel, ut in Hebræo scribitur. **PRAE DILECTO,** id est, quod habet in signe, quove antestat dilectus iste tuus alijs iuuenibus, qui & ipsi amore, atq; charitate sunt digni. **QVIA SIC ADIVRASTI NOS.** Nam inquiunt, neque

neque negligere possumus tuas preces, te tam obnixae, obstante nos: neque habemus quâ tuæ voluntati obsecundare possimus, tui istius viri, ad quem nos cum mandatis mittis, ignare. Quibus sponsa isto modo respondet. DILECTVS MEVS CANDIDVS, ET RVBICVNDVS ELECTVS EX MILLIBVS. Primû in genere, deinde per partes spõsi pulchritudo describitur. ELECTVS EX MILLIBVS. Id est insignis, atque excellens inter mille, aut etiam decem mille viros, vt est in Hebræo. Ponitur autem numerus certus pro incerto, vt sit sensus, ipsum eminere inter omnes. Rectè porro vulgatus interpres Hebraicum, Dagul, vertit electus. Est enim Dagul propriè signifer, sed transfertur ad ea omnia, quæ in suo genere eminent. Quare significum cum esse sponsa dicit, hoc est, oris dignitate, & totius corporis habitu reliquos omnes superantē iuuenes: idq; cū dicit, tacitè quodammodo istas fœminas reprehendit, quod de re perspicua, & propter sui excellentiam cunctis nota, quasi de re dubia, & ambigua ipsam rogarant. CAPVT EIVS AVRVM OPTIMUM. Formosum, & adfabrè factum, quidquid est, id in omni lingua non solum in Hebræa aureum, aut ex auro factum dici solet. Vnde & Venus ^{ἄφροδι} & eloquentiæ flumen aureum dicitur. Caput igitur aureū, id valet, quod formosum, concinnèque compactū: estque id ad figuram capitis referendum, non ad capillorum colorem. Nec enim flauos habuisse capillos sponsus dicitur, sed nigros potius. Itaq; sequitur. COMAE CAPITIS EIVS SICVT ELATAE PALMARVM, NIGRAE

Ec 3

QVASI

QVASI CORVVS. חלל Hebris eleuare, aut erigere significat: ex quo חל tumulus dicitur, quasi dicas elatus, & חלחל ad capillos cum trasfertur, crispas eos esse significat: propterea quod eorum extrema sursum versus torquentur, & spectant, & quodammodo eleuantur. Hispanè id verbum nō ineptè hoc loco verteretur: los enrriscados. Ergo elatae quod posuit Latinus interpres, quidā non nomen substantiæ, sed participium esse volunt, comaſque elatas Latinè dici, quo modo חלחלים Hebraicè dicuntur, id est, sursum versus intortas, & eleuatas, hoc est, crispas. Palmarum verò quod additur, aiunt neque in Hebræo, neque in Græco exemplari inueniri, & esse probabile additū fuisse alicuius inſcitia. Sed ego pro certo habeo nō esse additum, sed de Græco ab interprete expressum: quanquam in ijs codicibus, quos nūc habemus, nō reperiatur. Nam Theodoretum Græcum, & per antiquū scriptorem cōstat, palmarum legisse. Nō enim solūm id citat, sed etiam, quæ sint elatae palmarum interpretatur commentarijs in hunc ipsum locum. Itaque septuaginta, aut quisquis alius fuit huius libri Græcus interpres, haud dubiè crediderūt Hebraica voce חלחלים elate significari, addiderūtq; explanationis gratia palmarum. Quoniam ^{παρμη} Græcis nō solūm genus quoddam abietis, in quo falsus fuit nobilis quidam scriptor, sed etiā, vt ex Marcello constat, palmæ summum corticem, atque ad eò palmarum ipsum recens germen, eiusque noui fructus, ac germinis folliculos, atque inuolucra significat. Quibus

bus corticibus & inuolucris credo hic capillos spōsi colore similes dici. Sunt em̄ subnigri illi cortices, & idcirco subiungitur. NIGRAE QVASI CORVVS. Nigri capilli Palæstinis probantur, neque priscis Romanis secus videbatur, vt liquet ex illo.

Spectandum nigris oculis, nigroque capillo.

Sequitur. OCULI EIVS SICVT COLUMBAE SVPER RIVVLOS AQVARVM, QVAE LACTE SVNT LOTAE, ET RESIDENT IVXTA FLVENTA PLENISSIMA. Iam diximus Palæstinas columbas præstare nostris, & figura, & splendore, & fulgore quodam igneo oculorum. Sed quod addit. QVAE LACTE SVNT LOTAE, ET RESIDENT SVPER RIVVLOS AQVARVM. amplificat attributam laudem, quasi ita dicat. Oculi eius similes sunt oculis columbarum, nō quarumcunq;, sed earum, quæ pulcherrimos habent oculos. Nam lacte lotæ, quod dicit, periphrasis est coloris albi: constat autem columbas albas, & decorare, & specie præstare cæteris. Vnde & in Psalmo sexagesimo septimo. Columba argentea, hoc est, candida, pro pulcherrima columba ponitur. Hæc porro earum pulchritudo, & fulgor oculorum enitet, & apparet magis, cum se in flumine lauerunt. Itaque qui eas emunt, probaturi vtrū Palæstinæ columbæ verè sint, aqua eluunt earum oculos, quod ille ipsarum oculorum nitor, sic excitatus, atque auctus magis effulgeat: sed quod Latin⁹ interpres. PLENISSIMA FLVENTA. vertit, & in Hebræo est נֶסֶלִם quod ad verbum plenitudinem sonat, potest etiam non incommode pro ipsarum columbarum sede, atque cubili accipi.

Nam

Nam quod suas sedes, suaque loca ea, quæ ipsi, vel ars attribuit, vel natura, perfectè implet, id Hebræi vocare solent מלח. Dicit igitur, hanc rationem si sequamur, sponsa, sponsi oculos, similes columbarum oculis esse: earum inquam columbarum, quæ candidæ sint, hoc est, omnium pulcherrimarum columbarum: & quoniam pro locis in quibus sunt, earum oculorum decus, atque splendor magis perspicitur, earum columbarum, quæ, vel propter aquam resident, vel in nido suo cubant. Nam eo in loco columbas pulchriores videri solere, vel ex illo colligitur, quod superius sponsus ab ista sua colūba petebat, ut sui videnti copiam ipsi faceret, in foraminibus petreæ, & in cauernis macerie, id est, in sede sua, atque cubili. GENAE ILLIVS SICVT AREOLAE AROMATVM CONSITAE A PIGMENTARIIS. Cōmendat genas à colore ex purpureo & albo mixto qualis visitur in areolis aromatum, ubi flores varij sunt, alij purpurei, candidi alij. CONSITAE A PIGMENTARIIS. In Hebræo dicitur מלחמ Migdaloth, in quo interpretando ne Hebræis quidem inter ipsos satis conuenit. Nā quidam flores, è quibus aromata conficiuntur, quidam turrita vascula, natercia, scilicet, & pyxides, quibus pigmēta continētur, quidam circulos pigmentorum, interpretantur. Circulos autem pigmentorum, ut suspicor, appellant, fictiles catinos, paruos, & orbiculatos purpurisso imbutos, è quibus non inepta similitudo traheretur ad sponsi pulchrè rubentes genas laudandas. LABIA ILLIVS LILIVM DISTILLANTIA MYRRHAM PRIMAM. Est genus

genus lilij quoddam purpureum, vt Dioscorides tradit. quod de genere Solomon intelligendus est loqui: idque dicere spōsi labia purpurea esse, sicutique maximè purpurea sunt lilia, eademque ex se odorē emitte, qualis est myrrhæ probatissimæ odor. Emittere autem dicuntur labia odorem bonum in ijs, quorū anima ea, quæ ore ducitur odorata est. Quod meritò in laude ponitur, propterea quod ijs, quibus anima fœtet, nihil fieri possit tetrius, ac turpius. Hos enim nemo sanus vel ad colloquium, vel ad complexum admiserit: illos contra, quorum ex ore bonus spirat odor, ipso bono odore omnes inuitati, gratos, atque iucundos habent, vtpotè optimè, & animo, & corpore temperatos. Nam profectò ex vtriusque partis bona tēperatione illa suauitas odoris existit. Ego enim, vt quod expertus sum loquar, siciudico: non colloquio solum, sed amicitia etiam, & consuetudine bonorum indignos esse eos, quibus anima fœtet. Nam quantum recordari retro possum, neminem vidi hactenus, tetrum odorem ore exhalantem, quem non postea grauissimis animi morbis obnoxium cognouerim, atque ijs potissimum morbis, qui ex atrabili sunt inuidentiæ, fraudis, perfidiæ, voracitatis, similibusque permultis. MANVS ILLIVS TORNATILES AVREAE PLENÆ HYACINTHIS. Manus, inquit, sponsus meus, atque digitos habet aureos, & quasi torno elaboratos, hoc est, longè pulcherrimos. PLENÆ HYACINTHIS. Hebraicè plenæ Tharsis. Est autem Tharsis pretiosus lapis, à regione in qua gignitur, sic

Ff

appel-

appellatus, colore subrubeo. Itaque hoc loco ad extrema digitorum, id est, ungues significantes aptè transfertur. Nam quoniam digiti aurei dicti sunt, rectè ungues gemmis auro inclusis similes esse dicuntur. VENTER EIVS EBVRNEVS DISTINCTVS SAPPHRIS. Ventrìs vocabulo pectus, ac reliquum corpus comprehendit: id què eburneum dicit ob cādorem, atque nitorem. CRVRA ILLIVS COLVMNAE MARMOREAE QVAE FVNDATAE SVNT SVPER BASES AVREAS. A capite incipiens, peruenit ad extremum: nec tamen insistit in eo, sed addit aliquid, quod ad illius pulchritudinem vniuersè declarandam pertineat. ASPECTVS, inquit, EIVS VT LIBANVS. Aspectus, id est, totius corporis habitus, vultusque ipse, & proceritas, vt Libanus. Nō alitudinē confert, sed amcēnitatem, & quam varietas rerū efficit, pulchritudinem. ELECTVS QVASI CEDRVS. Electa Hebræi procera quæ sunt, vocant. Sic de Saule filio Cis primo Israhēitarū rege, quod corporis proceritate superaret omnes, in libris Regum scribitur, quod erat electus, & bonus, id est, procerus, & pulcher. Nam quod Græci duabus vocibus καλὸς καὶ ἀγαθὸς id vna Hebræi Tob, id est bonum, hoc est pulchrum appellant. Sed & Latinè bonum pro pulchro nonnūquam accipitur, vt apparet in illo.


f. 1. c. 9.

Quem bonum facit barba.

Sequitur vero. GVTTVR ILLIVS SVAVISSIMVM, ET TOTVS DESIDERABILIS. Vel vt in Hebræo, significanter. GVTTVR ILLIVS DVLCEDINES, ET TOTVS DESIDERIA. Nam quis porrò, inquit, illius sermonis dulcedinem, & vr-

& vrbanitātē possit exprimere? singula quippè eius verba melle sunt lita, dulcedine & lepore redundant. Sed quid singula persequor, quæ dicendo quidē vix numerari possunt, multò minus recēferi laudando? Etenim, vtrvno verbo dicam, totus est desiderabilis, ex gratijs totus, & venustate conflatus: gestu, motu, verbis, oculis, vultu, atque omni denique parte sui, omnium sibi animos & amōres conciliat. TALIS EST DILECTVS MEVS, ET IPSE EST AMICVS MEVS FILIÆ HIERUSALEM. Ne videlicet, aut me in amando ipsum deceptam fuisse, aut vos in eodem quærendo, atque dignoscendo multum laboris subituras esse arbitremini. Illæ verò, iterū ipsam rogant, dicentes. QVO ABIIT DILECTVS TVVS O PVLCHERRIMA MVLIERV? QVO DECLINAVIT DILECTVS TVVS, ET QVAERIMVS EVM TECVM? Atque hac finī terminatur hoc caput. Sed nos pedem iam retro referre, & institutā interioris sententiæ explanationem prosequi longiùs debemus.

EXPLANATIO.



VENIAT DILECTVS MEVS IN HORTVM SVVM, ET COMEDAT FRVCTVM POMORVM SVORVM. Quæ superiori capite ex persona spōsi, ad sponsam de ipsa sunt dicta, ad eam partem pertinebant, quæ colloquia illa interiora, quæ diximus, cōtinet, ad quā etiam spectat hoc, quod nunc sequitur: nisi quod ibi Deus loquebatur, laudabatque in anima sancta, &

Ff 2 amante

amante sua munera, hoc est, eam, quā ipse in ea effecerat, cælestem pulchritudinem, & sanctitatem: hinc verò ipsa iusti anima tot laudibus ab ipso affecta, ei gratè respondet. Respōdet autem, quid? breue quiddam, si verba ipsa consideres: at si vim verborū, sententiamq; spectes, quod pro bene longò, beneq; copioso haberi possit, reddit responsum, hoc est, respōsum plenum humilitatis, plenū cognitionis sui, plenum gratitudinis, Deo inquam in primis acceptabile, & gratum responsum. VENIAT, inquit, DILECTVS MEVS IN HORTVM SVVM, ET COMEDAT FRVCTVS POMORVM SVORVM. Primum non se inaniter extulit, neque sibi arrogavit, aut acceptum retulit aliquid eorū quæ sibi tribui Deo laudatore, & prædicatore videbat: sed se ipsam agnoscens, & à quo illa sua tantopere laudata bona ducerentur, intelligēs, Dei dono potissimum constare ea, & ob id ipsius esse munera ingenuè fatetur. VENIAT, inquit, DILECTVS MEVS IN HORTVM SVVM. Nam se, quæ propter bonorum operum germina hortus est dicta, se inquam sponsi sui hortū esse fatetur. Non ob id solū quod possideatur ab illo, quanquam id quodque (nam tametsi Deus dominetur omnibus, tamen bonorum atque iustorū propriè Dominus est) sed non tantū quia possidetur ab illo, sed multo etiam magis, quia ab eodem ipso habet, vt sit amœnus, & fructuosus, & pretio atque æstimatione dignus hortus. Ipse enim de principio eum hortum conseuit: ipse consitum summa adhibita diligentia curavit: ipse coluit, custodiuit ipse, ab eodem.

eodem denique fructus ferendi vim, & facultatem accepit: sicut scriptum est. Dei agricultura estis. Et ^{1. ad Co-} alibi. Neque qui plantat, neque qui rigat, sed qui in- ^{rinth. 3.} crementum dat Deus. Primum itaque ostendit suam submissionem, atque modestiam. Deinde etiam testatur, ac præ se fert, nolle se ea bona quæ à Deo habet, vel in suos, aut alterius cuiusquam usus conu-tere, vel aliquem laudis fructum ex eis deriuare ad se: sed Deo illa statim resignat, eique vni istis bonis placere, & gratum facere cupit: & hoc est, quod nunc sponsa dicit, cum sponsum ad eum ipsum hortum, quem ipse conseruat, atque coluerat, visendum inuitat, eumque hortatur, se ut in eo oblectet, & eius pomis vescatur. Quæ animi, cuncta se à Deo accepisse agnoscētis, & in eundem ipsam, à quo acceperat referentis, modestia atque submitio, Deo sine dubio est gratissima. Quod satis indicant quæ sequuntur.

VENI IN HORTVM MEVM SPONSA MEA, MESSVI MYRRHAM MEAM CVM AROMATIBVS MEIS. Quibus Deus in persona sponsi demonstrat sibi, quod ad hortum inuitatus fuerit placuisse, itaque quod rogabatur fecisse. Etenim Deus quo magis ipsi se submittit humanis, eo magis intimè se in eam insinuat, propiorque illi fit. Venit itaque in hortum suum, hoc est, venit ad eum, quocum iam antea erat, atque loquebatur: atque idcirco de nouo venire dicitur, quia ipso Dei colloquio homo magis eruditus, & in virtute ipsa perfectior effectus fecit, ut Deo dignius habitaculum suus animus esset. Veniens porrò quid? lau-

Ff 3 dis.

dis atque gloriæ fructum sibi vni legit: cæteros verò non modo non minuit, sed etiam magna bonorum accessione auget, & amplificat. De laude quam sibi legit, illud est. *MESSVI MYRRHAM MEAM CVM AROMATIBVS MEIS.* Nam in aromate atq; myrrha, boni odoris vis intelligitur: bonus autem odor in sacris literis ad gloriæ laudem significandam transfertur: ad laudem inquam eam, quæ Deo tribui ab hominibus solet, cum aliquid vident iustè ac præclare fieri à sanctis viris, vt liquet ex illo. Bonus odor Christi fumus, quod Paulus scripsit. Gaudet enim se prædicari à nobis Deus, cui vni omnis prædicatio, atque gloria debetur, & pro innumeris beneficijs, quibus mortaliū genus affecit, hoc vnum sibi à nobis expetit, laudis officium. Nec verò ex omnibus, quæ facere possumus, quidquam est præter laudem, cuius propriè fructus ad Deum pertineat. Nam cum ipsum aut fide, aut spe, aut charitate prosequimur, cum incumbimus iustis operibus, Deo quidem gratificamur ipsi, sed commodamus nobis potissimum: laus verò & gloria ea, quæ iustorum beneficijs debetur, ita propriè Deo competit, vt nullam ex ea partem sibi detrahi, aut decerpi patiatur. Atque hoc illud erat, quare in veteri lege, & in illo ritu, qui iam obsoleuit, Deo pecudes sacrificandi, in omnibus sacrificijs, quæ & multa erant, & vario atque sacro ritu perfectæ, vno odore suauitatis se capi, atque affici Deus dicebat: teste scilicèt, & eo modo, quo vmbra illius legis sine bant, innuens, atque significās in nostris beneficijs
vtile

2. ad Co-
vinth. 2.

Nam. 1. 10. 7.

utile quod est id nobis haud grauatè cōcedere, quod autem laude, atque prædicatione dignum, id referuare sibi vni: sicut & ipse Christus verè, & pro ea luce, quam mundo inferebat, dixit apertiùs. Sic luceat lux vestra coram hominibus, vt glorificent patrem vestrum qui in cœlis est. Tantùm non dicens, nobis eam lucem, eaq; officia vtilia esse velle: gloriosa autem vni sibi. Ex ijs igitur constat, quemadmodum sibi Deus ex isto horto laudis fructũ collegerit. Quod autem reliquos eius fructus, virtutumque bona reliqua, quæ in anima iusti fructificant, suo ipse aduentu ampliora & maiora reddiderit, declarat quod sequitur. COMEDI FAVVM CVM MELLE MEO, BIBI VINVM CVM LACTE MEO, COMEDITE AMICI, BIBITE ET INEBRIAMINI CHARISSIMI. Illa enim sponsus non ex horto legit, sed in hortũ potiùs ipse, & importauit, & intulit. Itaque lac, mel, atque vinum, hoc est, suauissima eorum, quæ eduntur, coniunxit, addiditque præterea ad voluptatem carpendam inuitationem, & ad hortationem vehementem, quo intelligeremus bona ista, quibus Deus hominis huius de quo agimus gradus, id est, eos qui in virtute proficiunt accumulat, dulcissima esse & suauissima bona, & eximio quodam genere voluptatis referta: talia denique vt iam propè ad tertij atque vltimi gradus perfectionem accedant. Itaque simul atque iustorum animus istis bonis afficitur: præ lætitiæ, atque dulcedinis magnitudine ebrius effectus, cæterarum rerũ oblitus, & quasi ad corporeas interpellationes sopitus, corpori atque sensibus

Matth. 5.

sensibus dormit, & Deo ac bonis diuinis vigilare in-
 cipit Itaque dicit. EGO DORMIO, ET COR MEVM VIGI-
 LAT. Quæ iam ad ecstasim pertinent, in qua huius se-
 cundi gradus tota ratio completur. Qua in ecstasi, at-
 que raptu, quid sentiat iusti animus, quo ve modo
 afficiatur, quanta luminis copia illustretur, quibus per-
 fruatur voluptatibus, ineptè atque adeo impie face-
 rem, explicare si vellem: ipsi explicent qui percepe-
 runt, si modo tanta res explicari ab vllō homine po-
 test, illud constat hætenus explicasse neminem. Ita-
 que illi cū de eo, quod in hoc raptu senserunt rogan-
 tur, nihil certiùs habent dicere, quàm arcana se vidisse,
 quæ non licet homini loqui: quemadmodum Pau-
 lus scripsit. Et certè ipse Deus quamuis ad istos suos
 interiores, & cælesti voluptate plenos congressus
 cunctos mortales inuitet: tamen ab ijs, qui illorum
 compotes facti sunt, eos vt silentio tegant atque oc-
 cultent, seuerissimè exigit: & hoc causæ habuit: qua-
 re suis in literis, quoties alicuius istorum incidit men-
 tio, summa parcitate verborū vtatur: rem notet vno,
 aut altero verbo, atque eiusmodi significationis ver-
 bo, vt facilè intelligatur, quod verbo subest arcanum
 esse aliquid, & ineffabile, & quod verbis, quāuis mul-
 tis non possit dici. Nam in Apocalypsi, Manna ab-
 sconditum vocat, & in eodem, calculum candidum
 appellat inscriptum nouo nomine, quod nemo no-
 uit, nisi qui accipit: hoc verò in loco, qui proprius
 erat, si modo vllus esse potest locus huius doctrinæ,
 cum cætera quæ ad amorem istum & charitatem per-
 tineant,

2. ad Co-
 rinth. 12.

Apo. c. 2.

tineant copiosè & enucleatè qualia sint, summa verborum vbertate & elegantia posuerit, & oculis conspicienda subiecerit, ad hoc quoties peruenit, propè obmutescit: remque ea breuitate perstringit, verba vt illi deesse videantur, in somnum incidisse, aut animo defecisse, dicere id satis habet. Quamobrem nos quale istud bonum sit experiri omni studio curemus: verbis verò cuiusmodi sit, supersedeamus exponere. Hunc itaq; locum silentio præteruecti, ad id quod reliquum est, iter conficiendum pergamus.

VOX DILECTI MEI PVL SANTIS, APERI MIHI SOROR MEA. Ab hoc loco perfectorum, id est, eorum, qui in

supremo gradu amoris sunt, ratio describitur. Nam qui secundum gradum tenebat, & pro gradus sui ratione satis in virtute profecit, is hac sponsi voce, ad perfectam charitatem vocatur. Nam vt antè dixi, in omni gradu primum locum tenet vocatio. APERI, *Chrysost.*

inquit, MIHI SOROR MEA, COLUMBA MEA, FORMOSA *homil. 13.*
MEA, PERFECTA MEA. Sed non est prætermittendum, *in matth.*

quid inter istam vocationem, & superiorem vocationem intersit. Nam superius, vt domo atque vrbe relicta in agrum exiret, iustus vocabatur: hic verò rogatur, vt intra domum pectoris sui, Deum ipsum admittat. Nec enim id temere factum, aut variandæ orationis causa à Solomone positum, putare quis debet: sed habita ratione ipsarum rerum, earumque natura diligenter perspecta expressum, & scriptum. Nā sciri debet, qui Deum amant, quo minus in eo amore & pietate proficiant, & ad perfectam charitatem

Gg perue-

perueniant, duobus rerū generibus impediri, atque retardari solere. Primum obstare illis solet, quod terrenarum rerum administrationibus, alij rei familiaris, alij magistratuum gerendorum, alij aliarum rerū implicati detinentur. Nā vt ista charitatis lumen nō extinguāt, vt nō extinguunt certē in ijs, qui Dei amorem cunctis rebus præponunt, tamen cursum quodammodo charitatis retardant, eamque crescere, atque augeri, non faciliē sinunt. Implicant enim animos hominum curis multis, atque peccatis, quibus si minus deletur charitas, illius tamen & lumen offuscatur, & ardor remittitur. Deinde obest isti charitatis incremento, atque perfectioni, vetus qui dicitur homo, concupiscentiæque mala libido, nobis natura inserta, quæ licet opprimatur ab ipsa charitate in hominibus iustis, manet in illis tamen, bellumque sæpè contra charitatem mouet. Itaque pugnant inter se se, & charitati concupiscentia resistit, eamque charitas tandem, si ab ipsa nos duci permittimus studio se agendo, sensim atque paulatim delet & extinguit: quod cum effecit, tum ipsa dicitur, & est iure perfecta. Extinguit cum dico, non id intelligo, posse alicuius studio in hac vita omnes malæ libidinis vires, & cupiditates penitus, & omninò deleri. Id enim si cui vnquam contigit, nam contigisse Dei genitrici dubitandum non est, sed si cui alij contigit, magno priuilegio contigit gratiæ & munificentia diuinæ. Non igitur id intelligo: neque etiam iudico charitatem non esse perfectam, nisi in eo qui omni cupiditate

tate prorsus sit vacuus: sed id tantum sentio, perfectos in charitate ita sedatas, atque compressas, & intra præscriptum diuinæ legis inclusas cupiditates habere, vt mouere se se, & cōtra charitatem efferre vix audeant. Igitur qui ad perfectionis culmen est peruenturus, primum liberari debet à cura rei, vel publicæ, vel priuatæ gerendæ: deinde debet omni turbido, & rationi aduerso motu, quoad fieri potest, vacare. Sic enim Christus dicebat, Si vis perfectus esse, *Matt. 10.* vade, & vende omnia quæ habes: quod est ab omni publica & priuata cura, vacuum habere animum: & sequere me: quod ad cupiditatum extinctionem, & abolitionem spectat. Nam sequi Christum, est, crucē quisque suam tollere, seque ipsum, id est, cupiditates suas abnegare, vt ipse alibi dicit. Qui vult venire post *Matt. 16.* me, abneget semetipsum, & tollat crucem suam. Sed est inter ista duo quidam ordo seruandus. Nam primum curis secularibus renuntiari debet, deinde male cupiditates ex animo sunt euellendæ: primum qui faciunt in virtute proficere incipiunt. Itaque ad id vocantur, qui gradum incipientium rite tenuerunt: scilicet, vt vrbe relicta rura petāt, id est, vt vitæ huius interituræ rebus nuntium remittant, seque vindicēt in aliquam libertatem, hoc est, vt ad superiorem gradum ascendant, & incipientes esse desinant, proficientibusq; annumerentur: itaq; exeunt in agrum, & humanæ vitæ curas abijciunt. In secundo verò maior perfectio quædam sita est: imò, verum si est dicendum, ipsius perfectionis absolutio consistit: vnde qui

Gg 2 perfectus

perfectus esse incipit, intelligi debet magna iam ex parte suas cupiditates non vicisse modo, sed etiam propè extinxisse. Et quoniam ex earum depreſſione ducitur omne principium cum Deo verè amicè, & familiariter agendi, à quo perfecta charitas, tum demū perfectè efflorescit: idcirco, qui iam ad perfectorum gradum ascendit rogatur, vt Deo introire ad ipsum cupienti, id est, familiariter iam, & omninò amice agere cum ipso volenti aperire velit, hoc est, vt in eo elaboret, vt edomitæ cupiditatibus Deus intrare perfectè ad ipsius animum, & ibidem omninò requiescere possit, id est, vt perfectus iam sit, quando satis in secūdo bonorum gradu profecit. Nam quod superioris gradus initium est, id antecedentis gradus summum esse intelligimus. Nam incipiens qui dicitur, cum animum induxit renuntiare seculo ad summum sui gradus peruenit, premereque incipit proficientium gradum: cuius quidem gradus summa effectio est cupiditatum depreſſio, quod vt primum quis assequutus est secundo isto gradu relicto, ad perfectorum gradum euadit: ita fuga sæculi & summum primi gradus est, & initium secundi: similiter deuicta cupiditas, tertij exordium eadem est, & secundi supremum. Ex quo efficitur, vt qui ad proficientium gradum vocantur, ad id vocentur, quod in eo gradu primum obtinet locum, id autem est, vt quod iā animo secum agitant, tandem perficiant, abijciantque ab se opum & honorum, quibus conſtricti tenentur studium: & similiter qui vocantur ad tertium & supremum

premiū gradum, ad perfectē comprimenda carnis desideria vocentur. Quæ quoniā explorata erant, & diuinitus patefacta Solomoni, idcirco ipse superiorē illam vocationem, qua qui profecturi in amore sunt, inuitantur, ad rerum huius vitæ contemptum, quā aptè pro persona inducta significari poterat, sic eam exposuit: sponsū, scilicet, inducens ad id, vt patrio lare relicto secū vna in agro moraretur sponsam hortantem. hīc verò vbi de altiore vocatione agebatur, qua videlicet, non iam vt seculum quis deferat, quæritur: sed vt carnem exultantem, carnisque affectus ita coërceat, vt quoad naturā rei patitur, vix ampliū extē: non id petit sponsus, vt domum sponsa relinquat, id est, vt corpus suum, quod arcano sanctarum literarum sermone domus sēpē vocatur, exuat, atq; conficiat: sed vt extenuatis assidua meditatione virtutum carnis affectibus, quod obstare Deo possit animum intrare, & in eo mansionē facere volenti, nihil relinquatur. Aperi, inquit, soror mea, columba mea, formosa mea, perfecta mea, quia caput meum plenum est rore, et cinnamini mei guttis noctivum. Cui illa. Spoliavi me tunica mea, quomodo induar illa: lavi pedes meos, quomodo inquino illos? Quod non ita accipi debet, quasi vir iustus nolit, Deo volenti pectus suum patefacere, hoc est, melior ipse fieri, & Deo acceptior, & gravior: sed quis sit corporis atq; carnis sensus exprimitur. Nisi enim esset aliquid adhuc in corpore huius repugnans, neque satis æquo animo cedens imperijs, atque motio-

petere sponsum facit.

*August.
in Ioann.
tract. 56.*

Gg 3 nibus

nibus gratiæ Dei, non profectò vocaretur, id est, nõ cum eo ageret Deus, vt bonum id, quod instituit, perficiens, edomaret ita suum corpus, vt nihil ex eo esset quod animum impediret, quo minus ipsum perfecta charitate diligeret: quod igitur aperiri sibi vult, aliquid ingressuro obstare demonstrat. Quid autem obstat, quidve aditum obstruat, ex hac cunctatione sponsæ, & ex his eius vocibus, mollitia plenius colligitur. *SPOLIAMI ME TVNICA MEA, QVOMODO INDVAR ILLA? LAVI PEDES MEOS, QVOMODO INQVINABO ILLOS?* Sed addit. *DILECTVS MEVS MISIT MANVM SVAM PER FORAMEN, ET CONTREMVERVNT VISCERA MEA.* Post voces atq; adhortationes, Deus efficacioris gratiæ vim atque impulsus adhibet: manum inquam ipse mittit suam, hoc est, non leuiter, vt prius, sed vehementius, atque acrius magnam cælestis lucis copiam infundens, totum animũ permouet, id est, efficaciter vocat. Nec verò offensus fuit quod in eo adhuc inesse vidit contumax quiddam & repugnans, nec se satis ab ipso regi permittens: id enim pro nostri corporis atque carnis natura, vt ita eueniret, necessarium esse videbat: sed potius quoniam id plenè vinci, & subiugum penitus mitti ab homine, quamuis studio sine suo auxilio, haud quamquã posse intellexit, id auxilium, & copiosè, & statim exhibuit. Itaque mittit manum suam per foramẽ, eaquẽ commouet totum hominis animum, id est, efficit vt animi vis superior ab ipso adiuta, & maioribus viribus aucta inferiores eiusdem partes, & earum omnes turbidos motus
sedet

fedet & comprimat. DILECTVS, inquit, MEVS. Nam ob eam causam, quia dilectus noster est, hoc autem est, quia nos gratis & sua sponte ipse diligit, nos istis afficit bonis atque muneribus. PER FORAMEN. Quia quacumq; patet Deo aditus ad animum nostrum illac se insinuat. Nullam enim nobis benefaciendi occasionem prætermittit, quod ipsum summæ erga nos suæ beneuolentiæ clarissimum signum est. ET CONTRIMERVNT VISCERA MEA. Aut, vt ex Hebræo ad verbū vertitur. FREMITVM EDIDERVNT SVPER ME VISCERA MEA SVPER ILLVM. Quibus enim motibus, quati putamus iusti animam, quanto tremore concuti: quos ex amore atque ex dolore impotentem fremitus edere, vbi in illam Deus totus incubuit, seque penitus infundit in illam? At quam graphicè. (nec enim possum ab huius loci interpretatione, & tractatione diuelli, tam mihi eius verba singula, & cælesti dulcedine illita, & diuinis sensibus videntur plena.) quam igitur graphicè Solomon vtrumque depinxit, & naturæ nostræ ingenium & infirmitatem, & amoris atque gratiæ Dei efficacitatem, atque potentiam. Nos enim quamuis multū in virtutis studio versati, tamen egrè obtemperamus Deo: Deus verò neque diligēdi nos, neque nobis quamuis cunctatoribus & ingratis mēdendi vllum sibi, aut finem, aut modum constituit. Nos leuissimas quasq; res pro magnis impedimētis ducētes, nobis & cunctādi, & eo quo vocamur nō eū di causas præteximus, diemq; ex die ducimus, ineptē vel potius, impiē causificando. Nā quid, aut leuius,
aut

quamvis

aut frigidius opponi poterat illo, spoliaui me tunica mea? at Deus quæcumque sibi causa datur nobis benefaciendi, eam continuò arripit: perque omnes tenuissimas rimas agit se se intro ad nostrum animũ. Nos, per nos desidia torpemus, ægraque, & infirma membra lecto leuare vix possumus: at vbi Deus nobis ægris manum atque vim suam adinouet, omnem torporẽ à nobis excutit. Itaque incredibili celeritate exurgimus, festinamus, ardemus, idque ipsum quod in nobis cunctabatur ante, & ad humum nos deprimebat, eadem gratiæ & amoris vi non solum edomitum, sed etiam flammis correptum & incensum, sensum suum veterem exuit: nouum verò atque cælestem induit: deniq; ab omni illa sibi innata vetustate propè purgatur: vt ex eo constat quod sequitur. SVRREXI VT APERIREM DILECTO MEO, MANVS MEAE DISTILLAVERVNT MYRRHAM, ET DIGITI MEI PLENI MYRRHA PROBATISSIMA. Nam in hoc, cum magnus quidam charitatis declaretur ardor, tum verò translatè significatur illa, de qua iam tam multa dicimus, carnis cupiditatum, vt ita dicam, plena mortificatio. Huius namque mortificationis symbolum habet, vt ante diximus myrrha, quæ nunc per manus, perque digitos omnes effusa, ipsa manubria pefuli imbuisse dicitur. id autem est, leuioribus illis quæ Deo obstant, perfectè introire volenti mortem propè, & interitum attulisse: quæ est huius, de qua agimus, vocationis propria, & peculiaris effectio. APLERI DILECTO MEO, AT ILLE DECLINAVERAT ATQVE TRANSIVERAT.

Quomodo

Quomodo potuit fieri, vt Deus in eam animam intrare nolet, quæ sui pectoris fores illi aperiat? an id agere illa sine ipso Deo potuit? aut nisi ipsum intra se se haberet, infusum penitus menti suæ, nisi que ageretur ab ipso, non dico tanto erga illum amore flagrasset, sed ne se quidē vnquam suo loco cōmisset? haud dubiè nunquam. Itaque vtrumque verum est, & in huius anima Deum iam versari, & Dei aduentum atque ingressum, ipsam animam latere, & idcirco extra se querere, quem secum & in sinu suo inclusum, & subdentem sibi ad perfectè ipsum amandum ardentissimas faces haberet. Quod idcirco euenit, quia cum duobus modis Deus intrare soleat in animos nostros, vno inspirando studia recta, & ad ea opere exequenda adiuuando: altero cælesti voluptate nos afficiendo: cumq; prior ille intrandi modus, occultus nobismet ipsis sit, posterior verò multò apertior, atque manifestior: (nam quia in eo homo, nihil ipse agens cælesti voluptate perfunditur, idcirco videre sibi Deum videtur, præsentemque tenere, atque amplecti.) idcirco igitur sæpè accidit, vt qui habet Deum intra se adiuuantem, & vires sibi sufficientem ad honestè operandum, quia se affici ab eo voluptate non sentit, abesse ipsum abs se putet, seque deseruisse queratur. Nam non si Deus in nobis existens nos adiuuat, nos etiam semper voluptate perfundit: nec ista duo sunt ita coniuncta, vt alterum sequatur ex altero, contra potius contingit sæpissimè, vt cui est præsens Deus auxilium ferendo, is nō mo-

Hh do

do huius celestis voluptatis inopia laboret, sed maximis etiam animi torqueatur, corporisque doloribus. Quod Deus tunc potissimum fieri permittit, cum, quod antè meminime dixisse, nouum aliquod & solito maius nobis contulit beneficium, cumque nos maioris gratiæ collatione, atque vi ad vberius de se merendum, seque magis amandum excitauit. Tūc enim subtrahere se à nostro conspectu solet, neque iam amplius dulciter & iucundè in nobis illabitur: quinimò aduersi aliquid, vel nobis immittit ipse, vel ab alijs inferri permittit, quasi virtutem nostram isto modo & industriam probare velit. Igitur virum iustum sic in certamen productū, nō quidem sua illum opelatēti, & occulta destituit: sed tamē nudat ipsum interdum atque orbat suo illo familiari congressu, & conspicuo illo atque eximio dulcedinis suæ sensu, qui sensus si adesset, nullus esset malorum & aduersorum sensus. Is verò quid aget, aut quo se vertet simul à consortio & tanquam complexu Dei se distractum videns, simul intenta in se hostium suorum tela conspiciens? quid? ipsum eundem quem abesse putabat, diligentissimè quæret: & quamuis nusquam compareat, quamuisque nihil neque opis, neque lucis sibi effulgeat ab ipso, quæret tamen, neque quærendi nisi eo inuento finem vllum faciet: denique id aget, quod sequitur. ANIMA MEA LIQVEFACTA EST VT DILECTVS LOQVVTVS EST, QVAESIVI ILLVM, ET NON INVENI: VOCAVI, ET NON RESPONDIT MIHI: INVENI-
RVNT ME CVSTODES QVI CIRCVMEVNT CIVITATEM, PER
CVSSE-

CVSSERVNT ME ET VVLNERAVERVNT ME, TVLERVNT
 PALLIVM MEVM CVSTODES MYRORVM. ADIVRO VOS FI
 LIAE HIERVSALEM, SI INVENERITIS DILECTVM MEVM
 VT NVNTIETIS EI QVIA AMORE LANGVEO. Nam expo-
 sita vocatione eius, qui in secundo ordine cum laude
 versatus esset, eiusque etiam exposito in superiorem
 amoris gradum ascensu. (Nam vocationi paruisse
 dictus est, & fores animi Deo pulsanti aperuisse) pro-
 bationem noui huius amoris, & desiderij, quod ex
 eo extitit, magnitudinem iam exponit. Probatio-
 nem in eo quod declinauit ab illo Deus, eiusque con-
 gressum vitauit, simulatque ipsum in meliore gradu
 constituit. Desiderium verò & quidem nimis incen-
 sum in eo quod quamuis multæ & graues difficulta-
 tes ei obiectæ essent, nulla tamen earû ab inquiren-
 do iste homo potuit deterreri. Nam quod dicitur.
 ANIMA MEA LIQVEFACTA EST, VT DILECTVS LOQV-
 TVS EST, voce tantùm audita liquefcere, magni est a-
 moris indicium: quod autem addit. ET QVAESIVI, ET
 NON INVENI: VOCAVI, ET NON RESPONDIT MIHI: INVE-
 NERVNT ME CVSTODES QVI CIRCVMEVNT CIVITATEM,
 PERCVSSERVNT ME, ET VVLNERAVERVNT ME CVSTODES
 MYRORVM: ADIVRO VOS FILIAE HIERVSALEM, SI INVE-
 NERITIS DILECTVM VT RENVTIETIS EI QVIA AMORE
 LANGVEO. nihil ad summi desiderij vim declarandam
 dicere potuit significantius. Sed quo magis perspicia-
 tur verum esse quod initio dictum, sæpius deinceps
 à nobis repetitum est, gradibus in hoc libro, ad amo-
 rem ascendit: age, cōferamus hanc desiderij & proba-

Hh 2 tionis

tionis translata positam expositionem, cum earundem rerum superioribus significationibus: nam oculis intuebimur crescente ipso amore, etiam ista creuisse: & pro ratione maioris gradus, de quo agebatur, sponsam inductam fuisse, tum acrioribus desideriis accensam, tum vexatam malis grauioribus. Nam quod attinet ad desiderij explicationem, dicta est illa quidem desiderare, aut potius est inducta desiderans, & ab sponso osculari se flagitans in ipso carminis huius initio: sed quia de incipientis amore tunc, & de tyrone agebatur, intra verba constitit id desiderium, nec ullum re ipsa sui documentum exhibuit: at postea ubi agi coepta est proficietis, cuius iam est maior virtus, persona, lecto, atque domo relictis, quaesitum sponsum iuisse sponsa dicta est. hoc vero loco, ubi perfectorum in amore ratio describitur, nihil adeo est praetermissum eorum, quibus maximum, & ardentissimum desiderium significatur. Nam & quaesitum iuisse dicitur, & cuncta urbis loca quaerendo lustrasse: vocasse: clamores maximos edidisse: infestos quosdam sibi homines obuios habuisse: quamuis multis plagis ab ijs affecta querere non cessasse: orasse atque obtestatam esse alios: ad omnem denique rationem se deiecisse: nihil intentatum reliquisse. Atque quemadmodum, in hoc gradu maius sanctae animae desiderium exprimitur: ita etiam probationis inest in hoc gradu maior significatio: leuior in secundo, utpote in quo neque plagarum, neque contumeliarum fit mentio: leuissima autem

tem in primo, hoc est, in ipso amoris exordio: nullum enim ibi laborem sponsum quærendi, sponsa subiisse dicitur, sed se quod ille absens esset cruciasse. itaque illa absentia atque cruciatus pro probatione illi fuerunt: ut omnino ex ipsa re, ad quam præcipuè significandam huius personæ actio transfertur, omnis ista oratio ducta sit, & ad id accommodata quod Dei amatoribus accidit. Nā incipientes. (Sunt enim ad grauiiores labores ferēdos minimè idonei) suspensa veluti manu feriuntur, prouectiores, utpote qui sint robustiores maiora subeunt, atque adeunt certamina: multo autem maxima, & difficillima consummati & perfecti, quorum profectò ex persona nunc dicitur. INVENERVNT ME CVSTODES QVI CIRCVMEVNT CIVITATEM, SPOLIAVERVNT ME, VVLNERAVERVNT ME CVSTODES MVRORVM. Mirum porrò alicui videatur, quod semper sponsa in custodes vrbis incurrit, à quibus non modo nihil adiuuatur, sed etiā iniurijs, ac malis afficitur. An est credibile qui fideliū conuentibus præsumt, quiq; præfident ecclesijs Dei, nam ijs vrbis Ecclesiæ, atque murorū custodia conceditur, eos non modo præsidium nullum afferre, sed detrimentum etiam & calamitatem bonis, & Dei amatoribus viris sæpè importare? Atqui series ipsa rerum aliarum ex alijs nexarum, mutuoque se consequentium, ac totius orationis atque carminis ordo, verborumque ratio ipsa eò nos ducit, verum ut hoc esse credamus. Et certè quemadmodum nihil est bonis antistitibus, & qui munus suum ritè obeunt hu-

Hh 3. mano.

mano generi salutarius, ac melius: ita cunctis quidē hominibus communiter, sed præcipuè optimo, & sanctissimo cuique perniciosi sunt, & exitiales, qui potestatem quā acceperunt præsidendi populo Dei in sua commoda, & vsus conuertunt, hoc est, pastores iniusti, atque mali quorum semper, haud parua copia fuit in Ecclesia: quosque huius loci sententia propriè complectitur. Etenim ij sunt, qui pessimo vitæ exemplo hominibus sibi subditis, vitiorum sunt causa maximorum: qui consentaneis ei vitæ sententijs, atque opinionibus religionis puritatem inficiūt: qui Christianæ pietatis ingenuitatem, ut potè quæ ipsorum fraudulentis artibus & institutis maximè inimica sit, pessimè oderunt: nec oderunt modo, sed quocumque aut oblato, aut quæsito colore ad ignominiam eam, & ad mortem rapiunt. Atque quemadmodum in ea republica quæ tyrannide opprimitur, nullus est virtuti, aut ulli excellētiæ locus, propterea quod tyranni cauent sibi atque timent, ab omni eo quod quouis modo præstare, aut eminere putatur: sic isti legitima potestate & nominis splendore magno tyrannorum pectus celantes, ijsque rebus, quas ad salutem hominum acceperunt, potestate, iurisdictione, opibus, atque copijs in hominum perniciem, atque exitium vtentes, quod in ipsis est perfectæ Christianitatis, atque virtutis, ut primum eminere, atque apparere cœpit, decus infringūt. Quod probare possem multis exemplis, quorum nobis non minimam copiam nostra ætas suppeditat: sed ea quoniam com
memo

mēmōrari sine aliquorum offensione non possunt,
 si quis est, qui sibi huius rei fidem magis astrui velit,
 is acie animi sui ad ea, quæ superioribus sæculis sunt
 gesta, cōuertat: inueniet profectò qui sibi æquè noce
 rent, atq; isti nocuerūt, populū Dei nullos hostes ha
 buisse, semperq; omnē virtutis præstātiā in hos po
 tissimū scopulos incurrisse, naufragiumq; fecisse re
 periet. Oēs enim viri sancti, omnes sacri prophetæ,
 quicūq; olim in Iudæorū populo, aut in exilium acti,
 aut ferro perēpti fuerunt, maxima ex parte horum &
 cōsilio, & opera perēpti fuerūt. Non enī illos externa
 vis vlla rapuit, sed contribuliū, atq; eiusdem fidei, at
 que generis hominū, sacerdotū, scilicet, & Pontificū,
 hoc est, ipsius religionis, atq; pietatis custodū occidit
 immanitas. Nostro autē in populo, quāuis Euange
 lica luce perfuso, & perfectissimis præceptis, atque
 exemplis charitatis erudito, quot viri sancti, quot do
 cti, quot Episcopi Ecclesiæ lumina, ab ijs qui se simi
 liter eiusdem religionis, atque doctrinæ Antislites ha
 beri volebant, id est, ab alijs similiter Pontificibus, &
 Episcopis speciem, vt inquit Paulus, pietatis habentibus,
 ipsam rem abnegantibus, aut per calumniam,
 aut per apertā vim, vel loco moti, vel in exilium acti,
 vel acerba affecti fuerūt, & ignominiosa morte. Cer
 tē Christus ipse non solū in se clarissimo exemplo
 docuit, sed etiā verbis testatus est, optimo & religio
 sissimo cuique ab improbis Pontificibus & religio
 nis, atq; ecclesiarum custodibus maximum exitium
 imminere. Nam de veteri synagoga dicit: Hierusalē
 quæ

2. ad Tim.

3:

Luc. 13.

Matt. 24.

quæ occidis Prophetas, & lapidas eos, qui mittuntur ad te. In Ecclesia porrò sua, futuros seruos prædixit, qui quod viderent ipsum moram facere, & ob eā causam sibi persuaderent, eū non esse venturum, seruos & ancillas cōmunes percussuri essent: id est, futuros religionis suæ, atque doctrinæ dispensatores, atque ministros infideles & prauos, qui seruos & ancillas suas, hoc est, sui corporis maximè chara sibi, & præstantissima membra vexarent, calumnijs opprimerent, ferro atque flammis persequerentur. Atque hæc illi faciunt, serui autem Dei, perfecti, scilicèt, & iusti viri, quid ad hæc? A DIVRO VOS, inquit, FILIAE HIERV

SALEM, SI INVENERITIS DILECTVM VT RENVNCIETIS

*Augusti.
in soliloq.
cap. 1.*

ILLI, QVIA AMORE LANGVEO. Omnia, videlicèt, illa sibi ab improbis Ecclesiæ custodibus illata mala, vel quia nihil præter culpam in malis numerāt, vel quia sibi illa ad bonum, & ad maiorem cum Deo coniunctionem valere credunt, contemnunt, atque despicunt: & quasi se ne attingant quidem, quasiq̃ue nullus ex eis dolor ad suum, vel animum, vel corpus perveniat, non modo quæstum nullum edunt, sed ne læsos quidem se esse commemorant: tantum illud vrgent, quod vnum ipsos sollicitat, nimirum, vt Deū quotidie sibi magis amicum, & familiarem efficiāt: vtq̃ue omnes vias insistant, omnesque occasiones arripiant, quibus modo intromittere ipsum ad se se, & ad animum suum, ipsisque præsentem illum reddere, penitusque adiungere, & omninò adglutinare valeant, & possint. Itaque illos relinquunt crudeles hostes

stes pro fautoribus qui esse debebāt, seque ad priuatos conuertūt, eisq; dicunt. ADIVRO VOS FILIAE HIERVSALEM. Semper enim nescio quomodo simplex & humile vulgus, quippè quod ab ambitione, avaritia-que vacuum animum habeat, æquum se atque audiens sanctis hominibus exhibet, semperque lumen illud veræ pietatis, in quocumque elucere incipiat, statim perstringit oculos priuatorum, & humilium hominum, eosque rapit ad se se. Ad hos igitur. ADIVRO VOS FILIAE HIERVSALEM. Nam ab ijs se adiuuari perfecti viri volunt, cum in malis tribulationum à Deo derelinqui videntur, vel quod eos non solum deferunt, sed etiam malis afficiunt, qui eorum salutis patrocinium deberent, in primis suscipere Ecclesiarum custodes, atque prælati: vel certè quod quemadmodum superius dixi, amoris Dei abundantia inducuntur ad id, vt prætermittere nolint aliquid, quamuis minimum, atque infimum eorum, quæ ad inueniendum, magisque demerendum sibi Deum existimat pertinere. QVALIS EST DILECTVS TVVS EX DILECTO PVLCHERRIMA MVLIERV, QVALIS EST DILECTVS TVVS, QVIA SIC ADIVRASTI NOS. Hæc pij atque simplices homines adiurati respondent, quia etsi reiuuare minùs possint, studio tamen iuuandi ardere solent: quibus perfecti, quod magno vsui vtrisque esse possit, qua sit figura corporis sponsus dicunt, hoc est inueniendi, atque assequendi Christum veram doctrinam illis tradunt: quā non dico perfectos solos nosse, sed dico omnium verissimè illos posse trade-

li - re,

re. Itaque nusquam sponsa in hoc carmine docendi munus usurpauisse antè hunc locum scribitur. Sed quid perfecti de Christo sentiât, qualisq; illis esse videatur, audiamus. *DILECTVS MEVS CANDIDVS ET RVBICVNDVS.* Prisci scriptores hæc de Christo, qua homo est interpretantur: quorum ego sententiam maximè probo: quanquam scio nonnullos esse, qui de ipsa natura Dei ista intelligi debere contendant: sed sequamur antiquos, quorum ferè semper est præferenda sententia. Igitur hæc in Christum ita quadrant, vt quacumque ipsum spectes, ei aptè conueniant. Nam si de figura corporis solùm, & membrorum compositione, & externo ipso oris habitu, leporeque sermonis agatur, constat illum omnium qui vnquam nati sunt hominum speciosissimum & pulcherrimum fuisse, Dauide ipso, qui tanto antequam nasceretur, ipsum nasciturum præuidit, eiusque speciem diuina luce perfusus hausit oculis, testante atq; *Psal. 44.* dicente: Speciosus forma præ filiis hominum diffusa est gratia in labijs tuis, propterea benedixit te Deus in æternum: sin autem interiores animi Christi doctes, moresque sanctissimos, & inclusas in ipso diuinitatis diuitias consideremus, & ad ea, membrorum corporis ista nomina, istasque, quas hoc loco adhibet Solomõ similitudines accommodemus, cum ratio tota optimè quadrabit, tum verò interpretatio ipsa non solùm plus grauitatis habebit, sed etiam arcanis sensibus aperiendis, conferendisque rerum dissimilium similitudinibus maiorem pariet voluptatem.

ptatem. CANDIDVS ET RVBICVNDVS. Diuinæ humane
 que naturæ, in vnā Christi personā coitionem atq;
 complexum, hic ex albo & rubro mixtus color signi-
 ficat. Nam in candore, Dei verbi naturam intelli-
 gitur declarat illud, quod in libro Sapientiæ dicitur. Can- *Sap. 7.*
 dor est lucis æternæ. Itemque illud: Deus lux est & te- *1. Ioan. 1.*
 nebræ in eo non sunt vllæ. rubor autem propria no-
 ta est naturæ hominis, ex quo humani generis pri-
 mus parens Hebraico verbo dictus est Adam, quod
 Latinè rubens, aut rubeus significat. Quod autem se-
 quitur. ELECTVS EX MILLIBVS. Aut verbum ex verbo.
 VEXILLIFER IN MILLIBVS. Id, vtroque modo, vel trāsla-
 tē dictum accipi potest, vel propriè: translātē, quia ex-
 cellit omnes: propriè, quia ad immortalitatem nos
 ducit, non solum docendo, sed præeundo ipse tan-
 quam signifer. CAPVT EIVS AVRVM OPTIMVM. Ar-
 cana auri significatio varia est in sacris literis. Nam
 interdum in auro diuina significatur natura, certè ta-
 bernaculum illud iussu & descriptione Dei, à Mose
 legislatore constructum, ad vniuersi similitudinem
 effectum fuisse, omnes probati scriptores fatentur.
 Atqui in illo, arca illa sacra Cherubinis circumsepta,
 & in eius interiori parte latens, imaginem contine-
 bat naturæ diuinæ, quæ similiter in altissima cœli re-
 gione choris cingitur Angelorum: ea autem arca pu-
 rissimo cōtegebatur auro: ex quo intelligitur auri vo-
 cabulum, ad diuinitatem significandam in sacris li-
 teris solere transferri. idem sæpè charitatem omnium
 maximam virtutem significat, quod liquet ex Apo- *Apoca. 3.*

Ii 2 calypsis

calypsis illo, vbi tepido cuidam, id est, vacuo charitatis dicitur: Suadeo tibi emere à me aurum ignitum: potest autem hoc loco id vocabulum vtrius modo accipi. Nam si aurum diuinitas est, verè dicitur Christus ex auro optimo habere caput: quoniam vt Paulus *1. Cor. II.* diserrè ait: Caput Christi Deus. Sin autem in auro charitatem virtutem intelligi volumus, haud dubiè, Charitas Christi caput est reliquarū illius virtutum, id est, principatū obtinet inter omnes: quod satis aperte idem significat Paulus, cū dicit: Charitas Christi quæ superat omnem sensum. Nam tametsi omnes Christi virtutes singulæ in suo genere, summè perfectæ sint, tamen nescio quomodo inter eas omnes extat charitas, atque eminet. Non quidem ita vt cætera Christi bona obscurer illa, aut non apparere faciat: sed ita vt reliquis virtutibus vtatur pro ministris, earumque splendores, & munera in suam ipsius dignitatem, atque vsum conuertat. Etenim quid Christus vnquam aut ipse fecit, aut ab alijs illatum patienter tulit, quod non ad beneficentiā, & ad charitatem generis humani retulerit? Ecquod tam suum ille habet, & tam eximium bonum cuius nos, quoad res ipsa patitur, non participes efficiat? Quanquam hoc loco latet in verbis Hebraicis arcanae significationis quiddam quod prætermitti non debet. Nam quod Latina editio. CAPVT IIVS AVRVV OPTIMVM. Hebraicus textus, caput eius chetempaz, id est, aurum selectū, & aurum selectum. Habent em̃ Hebræi tria nomina, quibus aurum significāt Zaab, quo promiscuè

miscuè aurum significatur, siue syncerum illud sit, siue argento, aut are misto in syncerum. Paz, quo, siue nomen loci sit, vbi electum aurum gignitur, siue electi & defæcati auri nomen certè significatur, id aurum quod adhibito igne ab omni sorde, & alterius rei miltione est redditum purum. Chetem autè & ipsum purum & syncerissimum aurum est, sua tamen sponte, & naturali bonitate purum. Ex ijs igitur tribus nominibus, duobus posterioribus Christi caput ex auro esse significatur ob duas causas: vna, quod ijs solis aurum, quod esset purissimum, significabatur ne quis fortè putaret, imperfecti aliquid, aut in synceri in capite Christi fuisse, id est, in eius gratia & charitate, quæ est quasi caput virtutum reliquarū. Altera, quo cōstaret Christum habere geminam gratiam capitis vnā, personę alterā, vel certè quo significaretur, vt Christi charitas purissima & perfectissima fuerit, tamen, non quò illa, quod fieri non poterat purior efficeretur, sed quò nobis pro exemplo Christus esset, quam esset purè amandus Deus, adhibutum illi à Deo fuisse dolorum, & tribulationum ignem, & quidem maximarum tribulationum. Quade re Paulus scribit. Et quidem cum esset filius Dei, didicit ex ijs, quæ passus est obedientiam, & consummatus factus est, omnibus obtēperantibus sibi causa salutis æternæ, & paulò ante. Non enim habemus Pontificem, qui non possit compati infirmitatibus nostris, tentatum per omnia pro similitudine absque peccato. COMAE EIVS ELATAE PALMARVM NIGRAE QVA

Hebr. 5.

si CORVVS. Sicaput Christi Deus est huius capitis co-
 mæ, id est, consilia atque cogitationes Dei, iure elatæ
 palmarum, & nigræ quasi coruus esse dicuntur: pluri-
 mum enim distant à cogitationibus nostris, sunt quæ
 ad peruestigandum valdè obscuræ & difficiles, de il-
 lis certè ita Esaias scribit: Sicut exaltatur cœli à terra,
 sic exaltatæ sunt viæ meæ à vijs vris, & cogitationes
 meæ à cogitationibus vris. Et Paulus suo more vehe-
 mentius exclamans: O altitudo, inquit, diuitiarum
 sapientiæ, & scientiæ Dei, quam incomprehensibi-
 les sunt cogitationes eius, & imperuestigabiles viæ
 eius. sin autem charitas quæ est in Christo, caput
 eius hîc nominatur, comæ, quas ex se se ista germinat
 charitas, id est, opera sancta à Christi charitate profe-
 cta, elatæ certè palmarum sunt, & nigræ quasi cor-
 uus, id est, omniratione in suo genere pulcherrima
 & speciosissima. Etenim quid aut dici potest, aut
 fingi perfectiùs ijs rebus, quas Christus amore homi-
 num & pro salute hominum fecit? multa hîc possunt
 quamuis rhetoricè & copiosè commemorari, atque
 dici, quamuis ad digne commemorandum oratio nul-
 la suppetit: sed quid oratione opus est, quando ipsa fa-
 cta, certius testimoniū perhibet quā verba, sequitur.
 OCULI EIVS SICVT COLUMBAE Iuxta RIVVLOS AQUA-
 RVM, QVAE LACTE SVNT LOTAE ET RESIDENT Iuxta
 FLVENTA PLENISSIMA. In columba declaratur mite il-
 lud & mansuetum, quod ipse de se prædicat Christus,
 dicens: Discite à me quia mitis sum, & humilis cor-
 de. In earum autem columbarum ardore, & vi illa
 ignea

Rom. II.

Matt. II.

Matt. II.

igneâ, quàm iaciunt ex oculis, ardens item eiusdem amoris vis, in nostram salutem directâ semper, & intentâ significatur. nisi his columbarum oculis malumus significari, Spiritus sancti dona in Christum copiosissimè effusa, inque eo commorantia, atque quiescentia, sicut Esaias scribit: Et requiescet super il- *Esa. ii.*
 lum spiritus timoris Domini, spiritus sapientiæ, spiritus fortitudinis. Nam oculorum nomine ista dona etiam in illo Zachar. tertio: Super lapidem vnum septem oculi significantur, de D. Hieronymi & prisco-
 rum patrum sententia. Quod autem additur: QVAE
 RESIDENT IVXTA FLVENTA PLENISSIMA. idè additur,
 quia sicut scriptum est: Non ad mensuram pater largitus est spiritum Christo, sed plena in ipsum flumina, siue potius Oceanum deriuauit aquarum. aquarum cum dico, Spiritum sanctum intelligi volo, cuius hoc est in sacris literis nomen, vt illa apertè testatur. Qui credit in filium, de ventre illius fluent flumina aquæ viuæ: hoc autem dicebat, vt ipse Ioannes interpretatur, de Spiritu sancto quem accepturi essent credentes in eum. *Ioan. 7.*
 GENAE EIUS SICVT AREOLAE AROMATVM CONSITAE A PIGMENTARIIS. In genis & pudoris, & probitatis, & modestiæ, & omnino animi ingenui, & bene educi indicia apparere solèt: ergo per genas rectè intelligimus significari modestiâ, mansuetudinē, animi probitatem, ingenuitatē, ceterasque virtutes, quibus Christi quasi facies finge-
 batur: quæq; extantes in illo spectabiles, atque conspicuæ ipsum amabilem, & venerandum apud cunctos

ctos reddebant: qui certè concursus, tot Christi & tatarum virtutum meritò similis esse dicitur areolis confitis à pigmētarijs: propterea quod quemadmodum ibi multi & variorum colorum flores, in vnam pulchri speciem conspirant, sic hęc multitudo illa & diuersitas variarum virtutum mirificum quendam concentum conficiunt: itaque mirabiliter concordant inter se, vt ex omnibus vna extet dignitatis species pulcherrima. sed à genis ad labia. Nam sequitur.

LABIA ILLIUS SICVT LILIA DISTILLANTIA MYRRHAM PRIMAM. Hoc quemadmodum verum sit, vel ipsius

Christi inimicorum testimonio possumus interpretari: nam aliquando quidam missi ad comprehendendum illum, cum concionatē audissent, & eius diuina eloquentia capti, atque deliniti sententiam capiendi ipsum mutassent, cur non comprehendissent eum ab ijs, à quibus missi fuerant, rogati dixerunt.

Ioan. 7. Nunquā sic loquutus est homo. Et Petrus alibi. *Ioan. 6.* Quo
Psal. 44. ibimus, verba vitæ æternæ habes. Et Dauid, quasi si ei propositum esset hunc explanare locum, sic dicit.

Diffusa est gratia in labijs tuis, propterea benedixit te Deus in æternum. **MANVS EIVS TORNATILES AVREAE PLENÆ HYACINTHIS.** Manus pro eo quod manu fit, & omninò præregio, & insigni aliquo facto ab Hebræis poni solere notius est ijs, qui sacras literas norunt, quam vt pluribus exemplis sit confirmandum. Sunt igitur manus Christi, id est, vniuersa illius opera summè perfecta: nam istis verbis ea pulchritudo designatur, quanta manibus potest inesse maxima.

xima. VETNEREIVS EBVRNEVS, DISTINCTVS SAPPHRIS
 Meghaim non ventrem modo, sed pectus etiam, at-
 que adeò omnem eam corporis partem, quæ à collo
 ad pubem vsque pertinet, atque etiam ipsius partis
 viscera interiora Hebræis significat: figurato autem
 & arcano sermone, ad cor significandum transfer-
 tur, nō quidē quatenus viscus vitale quoddā est, nam
 eatenus propriè id significat, sed quatenus animalis
 sensus principium, & omnium cupiditatum recepta-
 culum, & sedes esse intelligitur. Sic Iob 32. En venter
 meus quasi multo plenus. & Psalm. 21. Et lex tua in
 medio ventris mei. & 30. Anima mea & venter meus.
 & 43. Humiliatus est in terra venter noster. & Prou.
 20. Inuestigasti omnia secreta ventris. & Esa. 16. Ven-
 ter meus ad Moab. Porro id nomen figuratè hoc lo-
 co dehere accipi, præterquam quod ipsa sententiæ ra-
 tio, cæterorumque verborum translatè positorum,
 ex quibus huius libri textus conficitur, perpetuus
 vsus id postulat: declarat etiam epitheton, quod in
 Hebræo additur. Nam quod noseburneum in He-
 bræo ad verbum: Venter eius candidum ebur: can-
 didum autem Hebræis est כָּהָן quo non solum
 candor significatur, sed etiam cogitatio, atque agita-
 tio ea mentis, in qua veri aliquod lumen elucet. Itaq;
 verti potest. Venter eius, intelligens ebur: ex quo in-
 telligitur, qui venter hîc nominatur, cum cogitatio-
 nis atque sensus non esse expertem. Quale igitur cor
 Christi est? qui sensus eius? affectus Christi cuiusmo-
 di? Ebur, inquit, candidum, hoc est, intelligens distin-

K k

ctum

Etum sapphiris, id est, cor ab omni cæco, & turbulen-
 to motu non solum alienum, nec tantum rationi se
 & suas cupiditates subiiciens, sed ita ex rationis præ-
 scripto cuncta agens, vt nisi illa prius imperaret, at-
 que præciperet, neque cupere aliquid, neque dolere
 possit. Nam qui in nobis extare soleht, & antequam
 ratio non modo imperet, sed omninò quid agatur
 despiciat exardescere, cupiditatum variarum motus
 subiti, eorum in Christo nullus fuit, sed voluntate
 atque iudicio suscepti omnes, & ob eandem causam
 candidi omnes, id est, rationis ac cælestis lucis parti-
 cipes, & ob id ipsum honesti atque prædicabiles, &
 omninò sapphiris comparadi. Sequitur. CRVRA EIVS
 COLUMNAE MARMOREAE, QVAE FVNDATEAE SVNT SVPER
 BASES AVREAS. Christi fortitudo declaratur his verbis.
 Fortitudo inquam, non solum ea, qua ipse fortis est,
 quaque diaboli potentissimi sui hostis, vires confre-
 git, sed ea etiam, quam ipse efficit in nobis, qui fide
 cum illo, & charitate coniungimur. Nam ab illo for-
 titudinem ipsi ducimus, & quia ille inimica nobis &
 infesta aliquando fudit agmina, ideò nos si quando
 incidimus in eadem fracta, videlicet, iam ab ipso &
 debilitata agmina superiores euadimus, nisi nos pro-
 damus ipsi, ac nostra nos sponte vinci sinamus. Itaq;
 Christus hac vna re potissimum nos adhortatur ad
 intrepidè agendum, sic dicens. Verumtamen nolite
 timere, ego vici mundum. Nam profectò qui victus
 est, nocere amplius non poterit, ijs præsertim qui idè
 esse cum victore censentur: ac proinde illo vincente,
 & ipsi

Ioan. 16.

& ipsi vicerunt. Atque hæc de singulis partibus sigillatim sunt dicta: de vniuersa autem Christi magnitudine, quæ statim sequuntur. SPECIES EIVS VT LIBANI, ELECTVS VT CEDRI. Cedri atque montis vocabula in sacris literis transferuntur ad ea significanda, quæ in signi magnitudine præstant. Itaque qui eminent inter alios, quique summum, ac principem locum, in populis obtinent, tum Cedri, tum montes vocantur. Est enim Cedrus altissima arbor, montibus autem in terris elatius nihil est: cum autem & Cedri, & montes in vnum conferuntur, & quæ singula per se magnitudinem excellentem significant, coniuncta simul vni rei tribuuntur, apertè declaratur singulari & eximia ratione ipsam excellere esseque magnam supra omnem modum. Quo igitur doceremur, id quod res est, Christo nihil esse, neque in terra, neque in cælo sublimius, ipsumque ex excellentijs constare totum Cedros in hoc loco, atque montes Spiritus sanctus coniunxit. In quo neque illud quidem causa atque ratione vacauit, quod ex montibus Libanum præcipuè elegit, ex quo similitudinem duceret. Nam præterquam quòd is mons, & altitudine, & magnitudine, & arborum, quas educit, proceritate & copia, earumque materiæ bonitate, plurimarumque item rerum ad vitæ vsus accommodatarum opportunitate, omnes, non solum Syriæ, sed Asiæ ferè totius montes præcedit, quod transferri ad Christum possit, id proprium ac præcipuum habet, quod suppeditauit omnem eam materiam, quæ ad templi à Solo-

K k 2 mone

mone Hierosolymis constructi edificium fuit necessaria: nam inerat in illo templo effigies, eius templi spiritualis atque cælestis, quod Christus ex quo primum homines esse cœperunt, condere cœpit, conditq; semper, nunquãq; quandiu erũt homines à cõdendo & construendo desistet, quod vnum est verũ, & Deo gratissimum templum. Et quemadmodum vnus Libanus suffecit omnes arbores, quæcumque templo illo ædificando necessariae fuerunt: sic huius veri & æterni tẽpli, omnis structura à Christo homine ducitur. Ille enim alit, ille producit, ille sustinet, ille denique perficit, id quidquid est, quod isti ædificio est inferendum: sicut Paulus, tametsi aliud & diuersum translationis & similitudinis genus insistent, luculenter scripsit. Ex quo totum corpus compactum & connexũ per omnem iuncturã subministrationis secundũ operationem in mensurã vniuscuiusq; inẽbri, augmentum corporis facit in ædificationem sui in charitate. Postremò tandem ne quid spõsa prætermitteret, quod pertineret ad Christi laudem, vno verbo plura comprehendens adiecit. *GVTTVT EIVS SVA VISSIMVM, ET TOTVS DESIDERABILIS.* Vel vt significanter in Hebræo legitur. *TOTVS DESIDERIA, TALIS EST DILECTVS MEVS, ET TALIS EST AMOR MEVS FILIAE HIERVSALÈM.* Quæ filia Hierusalem, id est bene erga Deum affecti, simplices tamen & idiotæ homines, cum ista perfectorum hominum oratione illustrati, in Christi, atque rerum diuinarum cognitione promouere cœpissent, studio eodem quo illi Christum quærendi

Ephes. 4.

quærendi atque inueniendi accenduntur: &, quod in amore Dei maximè accidit, vt alium ex alio corripiat, & quasi contagione quadam latissimè & facillimè serpat, inflammantur isti, atque corripuntur ab eo amoris igne, quo ardebant perfecti, mox vt illos ardentes, atque æstuantes viderunt. Quod quæ sequuntur, declarant. DIC NOBIS, QVO ABIIT DILECTVS TVVS, O PVLCHERRIMA MVLIERV, ET QVAEREMVS ILLVM. Pollicentur enim suam operam, non iam vt officiosos se erga amantes, & studio inueniendi Deum flagrantis viros exhibeāt, sed ob id etiam, quia iam & ipsi amatores Dei, eius pulchritudinis magnitudine audita, esse cœperūt: ardentq; illū videndi desiderio, si minus tanto atque illi, certè non multum dissimili. Sed his sic, & verè, & de priscorum patrum sententia maxima ex parte explanatis, quid vetat, quando omnes ferè iltarum literarum sententiæ, multis fœcundæ sunt sensibus, id intelligentiæ, quod nunc mihi succurrit, quodque in hac Christi effigie à Solomone descripta latet, in medium proferre: tametsi ab eo quod modo diximus, nō parum diuersum, sed quāuis diuersum, non tamē aut falsum per se, aut illi priori repugnās. Est autē id, ei quod Daniel Babylo-
niorū regis rogatu interpretatus est, nō dissimile. Nā sicut ille statua ea, aut statuæ simili spectro, quod per quietē rex vidit, regum cū Chaldeorū, tum deinceps eorū qui orbis imperio potiti sunt rationes, dixit significari, atque portendi: similiter ego nunc arbitror in hac Christi imagine, aut Christi imaginis descri-
K k 3 ptione:

ptione, non solum qualis ipse sit declarari, sed etiam significari, ac veluti depingi, regnum illius id, quod in terris nunc habet, quodque ab illius mortis tempore ducens exordium, per omnes deinceps sæculi ætates, ad usque mundi finem protenditur, id est, Ecclesiæ militantis, quæ dicitur, regnum. Etenim huius Ecclesiæ atque regni initium, & veluti caput, primū, scilicet, illud Ecclesiæ sanctæ tempus, quod ab Apostolorum, & qui Apostolis proximè succefferunt doctorum ætate, usque ad Constantini Romanorū regis tempus pertinuit, aurum, quod hīc dicitur, optimum fuit. Tunc enim id quod scire ex historia veteri licet, charitas in primis, & quæ charitatem comitantur virtutes viguerunt: tuncque verè floruerunt illa pacis atque iustitiæ fœcunda sæcula, tanto antea à sacris vatibus, tantoque verborum pondere denuntiata, atque promissa. Atque quemadmodum in capite oculos natura, ac reliquos ferè omnes sensus cōstituit: sic omnis sacre intelligentiæ lumē, quo ad hoc usque tempus quicumque Christiano sumus digni nomine, vitam dirigimus, illo Ecclesiæ tempore emicuit. Tunc illa pulchra Spiritus sancti dona, quibus quasi pro oculis atque sensibus anima utitur, quæque nunc & occultè dantur, & paucis, passim & palā conferebantur. Quæ ex vbertate atque copia diuinorum bonorum, tanquam ex aureo capite dignæ eius capitis comæ, tantus extitit bonorum virorum proventus, tam copiosa seges sanctorū, tot martyres, tot virgines, quæ omni ferè sensu carnis deposito, cælestem

stem in terris vitam degebant, verè vt fuerint similes elatis palmarum. In terris enim positi vita atque habitu humili, & à cæteris hominibus nullo in numero habiti, vertice cœlum contingebant, aut, si verum loqui volumus, cœlum supra erant, animi atque mentis celsitudine. Porro quæ ex hoc Constantini tempore, ad Gregorium Romanum Pontificem virum & doctrina, & sanctitate excellentem, sequuta sunt tempora, in quibus externa Ecclesiæ reddita & stabilita pace florere magis Christiana, & niterè charitas debuit: idque primæ Ecclesiæ aurum, quod tantopere fullit, splendescere magis, nescio quo modo rebus in deterius abire incipientibus, remittētibusque se se paulatim & sensim, omnibus veræ pietatis studijs, non iam aurea, vt superiora certè, sed ex ebore fuerunt. Nam quemadmodum ebur habet quidem spectabilem nitorem, pretiumque in eo ipsa raritas facit, tamen ipsum non est eiusmodi, vt cum auro, vel pretio conferri queat, vel naturali perfectione: sic illud sæculum in comparatione ad primum deterius fuit, & ea potissimum ratione deterius quod charitatis, qua Christiana maximè continetur vita, minus habuit, sed tamen fuit per se ipsum si spectes satis beatum, ac foelix. Multum enim de prima illa puritate vitæ & pietate retinuit, & quamuis maxima ex parte eburneum fuit: tamen id ebur aptis in locis, & auro, & preciosissimis gémis sapphiris, nimirum atque hyacinthis visebatur distinctum. Habuit enim illa ætas Pontifices sanctissimos, qui tanquam digiti
aurei

aurei in illo corpore fuerunt: habuit eos qui nunc habentur Ecclesiae lumina maxima, & sapientia, & sanctitate doctores: monasticum vitae genus, illa maxima aetate ceptum est frequentari. Itaque floruit illud saeculum monachorum sanctissimorum propè innumeris gregibus, qui profectò monachi sapphyri illi fuerunt, quibus huius imaginis venter atque pectus distinguitur. Atque quemadmodum venter atque pectus, in quo humeri & brachia numerantur ad caput relata, ipsum magnitudine superant: sic in ista Ecclesiae aetate secunda Christianum nomen, quod ante id tempus obtinentibus cuncta idolorum cultoribus, angustissimis finibus concludebatur, Constantino Imperatore, tunc nostram religionem amplexo, & pace fidelibus reddita, templis idolorum euersis, constitutoque statu Christianae reipublicae, ita latè propagatum est, ut non solum quacumque patebat Romanum imperium se extenderet, sed ad feras etiam & Barbaras nationes, & ad ultimas terrarum oras peruaserit, totum denique orbem ferè obtinuerit. At ventrem eburneum, crura, atque tibiae exceperunt marmoreae, id est, illi aetati secundae, tertiae Ecclesiae, & ipsa deterior successit aetas: quae incipiens in Gregorio, aut paulò post eius obitum durat adhuc, durabitque ferè usque ad extrema mundi tempora: nam sub mundi finem est desitura. Quae in aetate tertia, id quod sine graui animi dolore commemorare non possumus, non solum nimis in arctum & angustum locum redacta est Christiana respublica:

ca, tot non solum prouincijs, sed etiam nationibus
auulsis, ab Ecclesie gremio, atque fide: sed etiam quan-
tum marmor auro cedit, aut etiam multo amplius
quod ad pietatis synceritatem, atque puritatem atti-
net, tantum degeneratum est ab eo, quod superiori-
bus Ecclesie temporibus floruit. Candorem modo
& firmitatem quandam fidei retinemus, sed qualis
est marmoris frigidam atque lapideam. Vix enim vl-
lum, non dico germane illius, & primae charitatis
quae iam si non omnino, nec enim potest, at maxi-
ma ex parte exoleuit, sed ne prisci quidem, & antiqui
moris cernitur in nobis vestigium. Nam rebus prae-
clarissimis & quibus maxime nostrae religionis par-
tes continebantur, amissis, pro rebus rerum nomi-
bus utimur, & amplexamur umbras quasdam earum
virtutum, quibus in animis nostris nullum locum
esse permittimus: & quae profligauimus e vita, quae-
que plane extinximus honesti lumina, ne odisse nos
lucem quis putet, aut ab eo quod dicimur, cum Chri-
stiani nominari volumus abhorre, ea, specie qua-
dam tenus seruamus. Itaque in eorum locum nobis
substituimus spectra quaedam (nam quid aliud no-
minem nescio, quod fictum totum & simulatum est,
& ad illudendum sensibus hominum comparatum.)
Itaque laruas quasdam foris per angusta specie prae-
ditas, intus vero vita & veritate vacuas in demortua-
rum virtutum locum nobis asserimus: ijsque indu-
ti, atque coniecti laruis vni deinceps ambitioni, aua-
ritiae, luxuriae totos nos damus. At quali auaritiae?

L1 qualique

qualiſque luxuriæ? quam turpi, quam profuſæ, quam etiam apud eos, qui nomen, atque fidẽ Chriſti ignorarunt incognitæ & inauditæ? Huc etiam accedit, quod ipſamet noſtra fides atque religio tam diuerſo ab eo, quo olim tradebatur, nunc traditur & propagatur modo, ſatis vt appareat priſcos illos homines verè fuiſſe aureos: nos autem marmoreos, & quod de Deucalione, & Pyrrha ferunt fabulæ, de ſaxis eſſe natos. Nam quod olim per homines non ſolùm inermes, ſed ab omni etiam humano præſidio mirabiliter imparatos: nec ſolùm non violenter, ſed ne vafrè quidem, & aſtutè aliquid agentes: contra autem inaudita animi ſimplicitate, lenitateq; præditos prædicabatur, & propagabatur Euangelium: id, noſtra ætate nos ipſi vidimus (non quidem principum culpa, aut conſilio, ſed priuatorum rapacitate, & auaritia) inculcari, atque tradi per homines ferro ſuccinctos, auri magis rapiendi, quam veræ religionis in aliorum animos inferendæ cupidus, infinita edita ſtrage hominum, totisque non modo populis, ſed gentibus etiam ad internecionem deletis. Vt qui rem iſtam quemadmodum geſta eſt, ritè cõſideret iudicare omninò debeat, parabolam illam Euāgelij, in qua quod qui inuitati ad conuiuium erāt, venire noluiſſent, alij per vim adducti & in triclinium intromiſſi dicuntur, in hæc potiſſimum tempora, & in hanc Euāgelij prædicandi rationem, relatā à Chriſto fuiſſe. Sed benè eſt quod marmor, quodq; iſte lapideus rigor in aurum tandem deſinet, & baſes aureæ columnas marmoreas

Luc. 14.

reas suffulcient. Sequetur enim quarta ætas Ecclesiæ, eaq; cū Ecclesiæ, tū mundi ipsius ætas vltima, in qua studijs hominum ad virtutis cultum cōuersis, & moribus eorum reformatis in melius, Deo præcipuè copiosè & mirabiliter spiritus sui dona fidelibus imperitante, prima illa & vetus charitas atque iustitia, omnium virtutum choro comitata in antiquum, & verè autum Ecclesiæ solūm tanquam postliminio reuertetur. Nam quin id ita futurum, atque euenturum sit vltimo Ecclesiæ tempore dubitare nemo potest, qui modo, aut rationis momenta, aut sanctorum patrum authoritates, aut certè sacrorum vaticinia Prophetarum, & Apostolorū ritè expendere, & considerare voluerit. Nam primum constat eo tempore rem Ecclesiæ publicam in summum venturam periculum, atque discrimen, & par est pro periculi, atque discriminis magnitudine auxilium illi gratiæ, atque bonorum cælestium, quibus stare firma possit, à Deo affuturum. Inuadent enim in illam cum alij multi hostes externi, tum omnium quos vnquam perpessa Ecclesia est, seuissimus & potentissimus hostis Antichristus impugnet, atque adeò grassabitur in ipsam: vincet tamē Ecclesia huius omnes vires, & machinationes, & ad extremum inuicta persistet. Sed quibus, quæso, credi debet ipsam victuram, ac superaturam armis, nisi eisdem illis, quibus in exordio sui Romanorum Imperatorum in ipsam insurgentium gladios, atque adeò omnium orbis Regum odia, & potentiam superauit? inconcussa, videlicet, in Deum

Ll 2 fide,

fide: in eundem charitate ardentissima, vitæ atque morum summa puritate, donorumque inprimis spiritualium atque cælestium magnis copijs, atque subsidij: ac denique illis eisdem armis, quibus Paulus instructus omnem in ipsum altitudinem mundi insurgentem, se deiecturum credebat, & verò re ipsa deiecit. Ita que de ijs armis scripsit. Arma militiæ nostræ, non carnalia sunt, sed potentia Deo ad destructionem munitionum, consilia destruentes, & omnem altitudinem extollentem se aduersus scientiam Dei, & in captiuitatem redigentes omnem intellectū in obsequium Christi, & in promptu habētes. vlcisci omnem inobedientiam. Deinde eodem Ecclesiæ tempore Iudæorum natio tot iam sæculis, in perfidia & errore versata, Dominum Iesum verum Messiam agnoscens, se in Ecclesiæ gremium recipiet, quemadmodum & noui & veteris Testamenti literis prædictum est fore. Postulat autem ipsa ratio, vt hostanto studio, tantaque multitudine, & numero ad fidem Dei conuersos, vt maximam ipsi Ecclesiastici corporis partem conficiant, Dominus Iesus ijs spiritualium diuitiarum muneribus afficiat, eaq; liberalitate prosequatur, quæ cum natiuâ ipsius bonitatem erga suos supplices, tum præcipuè suum illum & antiquum amorem erga eum populum decet. Et enim lætus de salute, & ad bonam mentem reditu eius populi, quem eo vsque olim dilexit, eo vt ex populo nasceretur, & inter Iudæos numerari, & lumen spei, atque salutis inde cæteris proferre populis atq; gentibus.

gentibus dignatus sit, nullum sibi largitatis modum
 statuet: sed cælestis thesauri copias, atq; diuitias om-
 nes in Ecclesiam effundet. Nam si cum sibi primum
 adiunxit, & quasi desponsauit ab AEgyptiorum ty-
 rannide in libertatem vindicatum hunc populum,
 tam liberalis in illum Deus, & tam munificus fuit
 quantum ex Mosaicis scriptis cognoscimus, qualem
 erga eundem quo animo, quam placabili, quam mi-
 sericordi ipsum futurum putamus, quando post tam
 longum dissidium in gratiam cum illo redire cœpe-
 rit: maximè ipso thalami, atque nuptiarum instante,
 atq; imminente tempore? An non pascet illum cæle-
 stibus bonis, sepositoq; & ad id tēporis reseruato vi-
 tulo, hoc est, eximijs charismatibus saginabit? Sagi-
 nabit profectò, inque eam opinionem me non leuis
 coniectura aliqua, sed vatū testimonia clarissima
 inducunt. Zacharias enim in id Ecclesiæ vltimum
 tempus, & in Iudæos tunc temporis ad Ecclesiæ fidē
 conuersos respiciens ex persona Dei apertissimè di-
 xit. Et effundam super domum Dauid, & super habi-
 tatores Hierusalem spiritum gratiæ & precum, &
 aspicient ad me, quem confixerunt. Nam hoc Za-
 chariæ vaticinium, ad postrema illa mundi, & con-
 uersionis Iudæorum spectare tempora, & D. Augu-
 stinus magnum Ecclesiæ lumen testatur: & ex Ioan-
 ne in Apocalypsi non obscurè colligitur: nam de illo
 agenstempore, ad hæc Zacharię verba alludens scri-
 psit. Ecce enim venit cum nubibus, & videbunt eum
 omnes oculi, & qui eum pupugerunt, & plangent
 & cetera.

Zach. 12.

August.

lib, 20. de

Ciuita. c.

30.

Apoca. 1.

Ll 3.

Ioel 2.

& cetera. Sed quid ait Zacharias? Effundam, inquit, spiritum gratiæ & precum super domum David. Ioel verò qui primæ Ecclesiæ Spiritus sancti donorum abundantiam prædixit, quomodo & ipse loquutus est? Et effundâ, inquit, de spiritu meo super omnem carnem. Vt qui de duobus diuersis temporibus, eadē ferè à duobus vatibus, atque eisdem & verbis, & orationis genere scribi videmus, quin utroque in tempore similiter fœlix & copiosa in bonis gratiæ Ecclesia futura sit, non dubitemus. Esaias porrò cum alijs in locis, tum maximè ultimo capite multa prædicit pertinentia ad hanc cælestium bonorum copiam, quam dicimus futuram in Ecclesia sub mundi fine. Quam ille copiam, rerum quidem & bonorum corporeorum nominibus adumbratam, sed tamen spiritaliter intelligendam maximam, atque summan describit. Nam de illo Ecclesiæ statu, atque vltima ætate ipsum agere, vel ex eo liquere potest, quod expositio illa omnis, atque prædictio mundi finis prædicatione, & commemoratione vltimi iudicij terminatur, & clauditur. Sed nihil est apertius, quam illa Pauli cōclusiō, si quis quam vim habeat, satis attente consideret. Ad Romanos enim scribēs, sic inquit:

Roma. 11. Quod si delictum illorum diuitiæ sunt mundi, & diminutio eorum diuitiæ gentium: quanto magis plenitudo eorum: & infra. Si enim amissio eorum reconciliatio est mundi, quæ assumptio nisi vita ex mortuis? videlicet, à minori argumentum concludens. Nam si Iudæis magna ex parte non agnoscentibus Christum,

Christum, neque fidem suam adhibentibus illi, seq;
ob id, & regia dignitate, & religionis veritate, atque
gloria spoliantibus, Deus ex gentibus sibi Ecclesiam
consecit, eamque locupletauit bonis spiritualibus
magnis, quo vel ista ratione inuidia, atque emulatio-
nis studio accensos Iudæos, in eiusdem fidei assen-
sum induceret, vt idem Paulus in eadem epistola scri-
bit. Dico, inquit, nunquid impegerunt vt caderent,
absit, sed illorum offensio, & ruina salus est gentibus,
vt ad emulationem illos prouocarent. Si igitur, quod
Paulus & illum enarrans August. argumentantur,
Deus vt gentium exemplo ad veram Christi fidem
Iudæos pertraheret, gentes ipsas amore complexus,
saluas illas esse voluit, nec saluas modo, sed cælesti-
bus, ac mirabilibus donis locupletatas, atque auctas:
ipsis tunc Iudæis errore suo agnito, atque deposito
ad Christum conuersis, ipsumque vnice amantibus:
consentaneum profectò rationi est Deum cælestes
suas in Ecclesiam opes, maximalargitate effusurum.
Et si cum abiecti illi à Deo fuerunt, & pro inimicis
habiti, Ecclesiæ gentium benefecit Deus, illi vt par-
ticipes esse cuperent eorundem beneficiorum, &
sic in Ecclesiam intrarēt: cum in eam intromissi iam
fuerint, eamque ipsi bona ex parte compleuerint,
Deoque esse cœperint grati, atque chari, profectò Ec-
clesia ad easdem spirituales opes, quibus olim abun-
dabat, redibit: & ad pristinum illud suum decus resur-
get, viuetque atque elucebit, latèque splendeat in il-
la, quod iam propè extinctum putabatur, omnium
virtu-

virtutum lucidissimum lumen, charitas: erunt quæ similia vltima primis, caput pedibus, aut sicut David elegantissimè cecinit: Ortus, & Occasus Ecclesia maxima cælestis lætitiæ, atque voluptatis perfusi copia pares inter se, atque similes erunt. Etenim ille in Psalmo sexagesimo quarto, in quo Psalmo de Christi regno, eiusque regni ortu, atque incrementis, ac omni denique eius fœlicitate, vt Poëtam diuinū decebat, breuiter, & figuratè, & à rebus rusticis, naturæque operibus similitudinibus ductis vaticinatur, inter alia quod ad propositam rationem pertineat, sic scriptum reliquit. Exitus matutini, & vespere delectabis. Quod enim in vicissitudinibus dierum, ac noctium, oriente Sole, atque decedente contingit, vt eaduo tempora diei læta maximè, atque grata sint, vel cum dies decedentibus tenebris appetere, & rebus suis color incipit reddi, vel cum occidente Sole, & illo pomeridiani temporis æstu remittente se, & leniter spirantibus auris, ipsa iterum cœli atque aëris exhilaratur species: similiter in hoc Christi, de quo agimus regno, Ortus & Occasus, initia atque finis per æquè lætos, atque fœlices dicit esse futuros. Exhilarasti, inquit, occidentis Ecclesiæ militantis vltimum tempus, eo scilicèt, lætitiæ, atque voluptatis genere, quod te maximè decet, & quo ipsos affici homines, atque imbui maximè conuenit, cœlesti atque diuino, scilicèt, quomodo eiusdem Ecclesiæ initia, atque ortus primos exhilarasti: sed iam propositum exequamur.

CAPVT


SEXTVM.
CAPVT VI.

273



ILECTVS MEVS DESCENDIT IN HORTVM
SVVM, AD AREOLAM AROMATVM, VT
IBI PASCATVR IN HORTIS ET LILIA
COLLIGAT. EGO DILECTO MEQ, ET DI-
LECTVS MEVS MIHI QVI PASCITVR IN-
TER LILIA. PVLCHRA ES AMICA MEA,
SVAVIS ET DECORA SICVT HIERSALEM, TERRIBILIS
VT CASTRORVM ACIES ORDINATA. AVERTE OCVLVS
TVOS A ME, QVIA IPSI ME AVOLARE FECERVNT. CAPIL-
LI TVI SICVT GREX CAPRARVM QVAE APPARVERVNT
DE GALAAD. DENTES TVI SICVT GREGES OVIVM QVAE
ASCENDERVNT DE LAVACRO, OMNES GEMELLIS FOETI-
BVS, ET STERILIS NON EST IN EIS. SICVT CORTEX MA-
LI PVNICI, SIC GENAE TVAE ABSQVE OCCVLTVIS TVIS.
SEXAGINTA SVNT REGINAE, ET OCTOGINTA CONCVBI-
NAE, ET ADOLESCENTVLARVM NON EST NYMERVS. VNA
EST COLUMBA MEA, PERFECTA MEA: VNA EST MATRI
SVAE ELECTA GENITRICI SVAE: VIDERVNT EAM FILIAE,
ET BEATISSIMAM PRAEDICAVERVNT, REGINAE ET CON-
CVBINAЕ, ET LAUDAVERVNT EAM. QVAE EST ISTA QVAE
PROGREDITVR QVASI AVRORA CONSVRGENS, PVLCHRA
VT LVNA, ELECTA VT SOL, TERRIBILIS VT CASTRORVM
ACIES ORDINATA? DESCENDI IN HORTVM MEVM VT VI-
DEREM POMA, CONVALLIVM, ET INSPICEREM SI FLO-
RVISSET VINEA, ET GERMINASSENT MALA PVNICA. NE
SCIVI ANIMA MEA CONTVRBAVIT ME PROPTER QVA-
DRIGAS AMINADAB. REVERTERE, REVERTERE SVNAMI-
TIS, REVERTERE, REVERTERE, VT INTVLAMVR TE.

Mm EXPLA-

IN CAPVT
EXPLANATIO.

DILECTVS MEVS DESCENDIT IN HORTVM
SVVM. Cur per urbem tam sollicitè
quærebat ipsum, si descendisse spon-
sum in hortos, sponsa cognouerat? Er-
go hæc non ita accipienda sunt, quasi
id antè nouisset sponsa, sed quasi nunc primum, vel
audita sponsi voce, vel viso aliquo eius alio signo co-
gnouerit, & ex eo signo, voce, gaudio nec opinato
correpta, in hæc verba prorumpat. DILECTVS MEVS
DESCENDIT IN HORTVM SVVM AD AREOLAM AROMATVM.
VT IBI PASCATVR IN HORTIS ET LILIA COLLIGAT. Qui
bus quidè verbis sibi ipsa quodammodo gratulatur
de eo, quod suum virum inuenerit: vel certè subaccu-
sat seipsam tarditatis, & stuporis, quod sibi per sex-
centa loca virum quærenti, de horto cogitare non
succurrisset: itaque dicit. Sed ô me stultam & cæcam
quam nunquam subierit cogitatio de horto. Hem in
horto ille, quemadmodum certissimis signis perci-
pio versatur. Dicit autem, DESCENDIT, quia locus &
tanquam ^{scenæ} huius dramatis cōstituitur Hierosoly-
mis, quæ in edito montis loco sita, eius montis ad ra-
dices hortos habebat, & pomaria amœnissima. Igi-
tur vt illum ascendentem & appropinquantem aspe-
xit, quod in re cupidè quæsita, & præter spem inuen-
ta fieri sæpè solet, præ gaudio animi impos exclamat.
EGO DILECTO MEO ET DILECTVS MEVS MIHI QVI PA-
SCITVR INTER LILIA. Cui ille, ex quo iam rediisse in-
telligi-

telligitur, ita respondet. PVLCHRA ES AMICA MEA, SVA
VIS ET DECORA, VT HIERVSALIM, TERRIBILIS, VT CA
STRORVM ACIES ORDINATA. Suavis in Hebræo nō ad-
iectiuum nomen esse videtur, sed vrbs nomen pro-
prium, nisi quod Latinus interpres notationem ver-
bi Hebraici reddere maluit, quam ipsum verbum re-
tinere: id autem est תרצה Thirsa, quod à suauitate du-
ctum vrbs nomen erat regiæ, atque nobilis in sorte
Ephraim, in qua antequā conderetur Samaria Israë-
litici populi reges residebant. Appellabatur autem
Hebræis Thirsa, quod Latinè redditum sonat, suavis:
propterea quod & agri vbertate, & loci amœnitate,
& ædificiorum magnificentia, atque cultu, apta ni-
mis erat ad vitam iucundè, & suauiter traducendā.
Hierusalem porrò, & ipsa Regum Iuda vrbs regia
fuit pulcherrima, & nobilissima omnium, nō solum
Syriæ vrbiū, sed etiam Asiæ propè totius. Igitur
sponsus qui superius ita copiosè & accuratè laudauit
sponsam, nullum vt, neque cæteris, neque adeò ipsi
sibi vberius ipsam laudandi locum videretur reli-
quisse, se ipse nunc aggreditur superare, & superiori-
bus laudibus, quibus videbat nihil addi posse, magnū
etiam nunc addere parat laudum cumulum. Non
enim vt antea ex agro atque rustica re similitudines
ducit, aut capreas iam hædosve, aut mala punica
loquitur, sed vrbes, & eas omnium pulcherrimas
& nobilissimas vrbes ad similitudinem confert. Et-
enim ea erat spōse pulchritudinis magnitudo, ea oris
atque corporis totius maiestas, aut certè ea videba-

M m 2 tur

tur ipsi esse, tamque illius augusta imago ei, & obuerlabatur ob oculos, & per oculos in animū introibat, vt ea quanta esset non posse declarari putaret, nisi similitudine earum rerum, quæ non solum pulchræ, sed amplæ etiam, & multa rerum varietate præditæ essent, quæque augustissimum aspectum haberent, quales sunt vrbes regiæ, & cum murorum, porticum, templorum, turrium, reliquorumque ædificiorum magnitudine, & varietate spectabiles, tum ciuium numero, & populi vniuersi frequentia, cæterarumque abundantia rerum, quæ ad vitæ cultum spectant insignes. Ex quo etiam genere est illud quod sequitur. TERRIBILIS VT CASTRORVM ACIES ORDINATA. In quo non tam à pulchritudine sponsam laudat, quàmquam & id quoque, est enim omnium pulcherrima res, maximeque aspici digna militum acies instructa, quam etiam laudat ab ea vi, quæ sponsæ ipsi inerat, aut certè inesse sentiebat sponsus ipse: hominum animos, quamuis aggreſtes & feros, & ab humanitate alienos amore domandi. Sic enim militibus sub signis collocatis, ordinibusque eorum dispositis, armorum splendore, & signis militaribus acies effulgens, & ad aspectum est pulcherrima, & ad victoriam potentissima. Itaque ille sponsæ vim, quæ non solum ipsum incendebat, sed etiam animum eripiebat ipsi, atque vt priscè loquar, mentem expectorabat, amplius vix ferens, iure quod sequitur, addidit. AVERTE OCULOS TVOS, QVIA IPSI ME AVOLARE FEGERVNT. Quid enim aliud post tam exaggeratas laudes,

des dicere posset magis consentaneum quod esset, quam ut manu in altum sublata, eaque versus sponsam opposita, vultuque & oculis leuiter auerfis ab ea, eidem diceret, ut auerteret ab ipso oculos tantisper, dum se colligit, dum respirat: incendi enim se illius luminibus, peruri, rapi denique, & extra se propè constitui. Quod quamuis petat, tamen nihil est quod minus fieri velit, sed petiteo, ut elegantissima ista ratione doceat, nihil esse quod ab ipso obtinere sponsa sua non possit, seque totum in illius esse potestate. Itaque amplificauit, & exaggerauit spōsæ oculorum pulchritudinem, multo magis quam si illustriores stellis eos esse dixisset. At auolare, quod septuaginta secutus posuit Latinus interpret, in Hebræo est מהריב quod verbum è verbo, superare me fecerunt, verti potest. Ergo hoc veteri interpreti visum est volare esse, quia qui volant, se in altum sustollunt alij superbire id esse voluerunt: nam qui superbi iidem etiam elati sunt, seque supra ceteros efferunt, & ita verterunt. Auerte oculos tuos, quia ipsi me superbire fecerunt. verteruntque mea quidem sententia rectè omnes ad scriptoris sententiam, sed nihil obstabat quominus verbum etiā verbo redderetur. Nā superare me fecerunt, quod ad verbum dicitur in Hebræo, poëtica inuersio est, pro, me superarunt: sequitur.

CAPILLI TVI SICVT GREX CAPRARVM QVAE APPARVERVNT DE GALAAD. DENTES TVI SICVT GREGES OVIVM QVAE ASCENDVNT DE LAVACRO, OMNES GEMELLIS FOETIBVS ET STERILIS NON EST IN EIS. Quæ quoniam iā.

M m 3 in-

interpretati superius sumus, quod sequitur videam⁹.

SEXAGINTA SVNT REGINAE, ET OCTOGINTA CONCVBINAE, ET ADOLESCENTVLARVM NON EST NVMERVS, VNA EST COLUMBA MEA, PERFECTA MEA, VNA EST MATRISVAE, ELECTA GENITRICI SVAE. Quibus iam verbis nō

tam pulchritudinem illius & venustatem commendat, suis, videlicet, eam, & proprijs laudibus satis superius laudatam, quam declarat magnitudinē erga illā amoris sui docens, ex omnibus suis vxoribus, quas plurimas habet, cum florentes ætate, tum dignitate præstantes, vnam istam esse, quam iste amet, amore eximio, atque præcipuo. Sed vnde isti pastori, tot vxores atque concubinae? Constat Solomonē plurimas vxores habuisse, etiam plures quam hīc numerantur. Nam habuit vxores principes septingentas,

Reg. 3. c.
11.

trecentas verò concubinas, quæ & ipsæ vxores legitimæ erant, sed inferioris notæ, & quasi secundæ classis vxores, quod sine ceremonijs & ritu solenni in potestatem viris dabātur: quodq; plurimum, aut feruæ erant, aut alioqui humili loco natæ, ex quo earum filij à patre non scribebantur hæredes, sicut de filijs

Gene. 25. Ceturæ, tertiæ Abrahami vxorē, in Genesi legimus. Igitur vel Solomon hoc loco sub persona pastoris de se ipse agit, & in se Christi personam, cuius ille typus fuit, repræsentat: vel hæc à pastore isto dici accipienda sunt, per contentionem ad ea, quæ habebat Rex Solomon, ita, vt non dicat se tot vxores habere, sed cum eas habeat Solomon dicat, & affirmet, illū amore in tot partes diuiso variè diltrahi, se in vnus amore,

re, & amplexu acquiescere: illum à plurimis foeminis amari, se nisi à sua vxore, quam eam ob causam quod vnica ipsi sit, columbā nominat, nolle diligi: multas illi voluptati esse, ipsi sibi vnam esse pro multis: quid quid pulchri ac boni in vniuersis illis diuisum conspiciatur, id totum collatum in vnum, atque coniunctū in sua inesse sibi videri, ideòque ipsam appellare suā perfectam: denique pluris à se illam fieri, quam quanti fiant reginæ illæ, & concubinæ omnes à Solomone: seque magis beatum esse vna, quam sit beatus Solomō, tam multis vxoribus, sequitur. *VIDERVNT EAM*

FILIAE, ET BEATISSIMAM PRAEDICAVERVNT REGINAE, ET CONCVBINAE, ET LAUDAVERVNT EAM. Quas superius adolescentulas nominavit, eas nunc filias vocat: filiae autem Hebraeis absolute dictae pro virgunculis accipiuntur. Amplificat igitur cum ista refert sponsus vehementer laudes sponsae. Nam si ab adolescentulis, si à concubinis & reginis, id est, ab æmulis ipsa laudatur, perspicuum est pulchritudinis suae, atque virtutis praestantia, omnem inuidiam superasse. Sed quid istae filiae, quæso, dicunt, quomodoque illam prædicant? QVAE EST ISTA, inquiunt, SICUT AVRORA CONSVRGENS PVLCHRA VT LVNA, ELECTA VT SOL, TERRIBILIS VT CASTRORVM ACIES ORDINATA. Quæ est profectò vberima, & qua nulla maior fingi potest laus. Nā quæ res in omni rerum natura pulcherrimæ sunt, Aurora, Luna, Sol, militū acies instructa, eas in vnū conferunt: & quo plus artis atque venustatis haberet oratio, quasi per quosdam gradus ipsam crescere faciunt:

ciunt: per singula enim verba, quod sequitur verbū, incrementi aliquid addit. Nam vt auroræ species pulchra sit, pulchrior certè Lunæ est, Solis verò longè pulcherrima: acie porrò instructa nihil fieri potest, aut speciosius, aut admirabilius. Quod autem dicunt, sicut aurora confurgens, non est ita accipiendum, quasi ipsa sponsa ascendere ab inferiori aliquo loco dicatur: sed qualis aurora apparet cum ascendit, id est, cum appetente die surgit. (nā vt Latini appetendi verbo in aurora vtuntur, cum ea oritur, sic *Gene. 33.* Hebræi ascendendi, vt constat ex illo: *Dimitte me, quia iā ascendit aurora.*) igitur qualis ea est cum confurgit, talem ipsis sponsam videri, id nimirum prædicant & affirmāt: quod ex Hebraico textu fit planius, vbi pro ascendit *הִרְבָּה* verbum legitur, id est, aspicit aut apparet. *DESCENDI IN HORTVM NVCVM VT VIDEREM POMA CONVALLIVM, ET INSPICEREM SI FLORVISSET VINEA, ET GERMINASSENT MALA PVNICA.* Hæc etiā sponsi verba sunt, non vt aliqui putarunt sponsæ quibus ille, quo omninò læsi, aut imminuti amoris à se remoueret suspicionem, & si quid offensionis in sponsæ animo inerat, id eximeret, atque deleret totum, affert sui discessus probabilem causam: quod, scilicet, rei familiaris curandæ gratia, quod prætermitti sine detrimento, & in aliud tempus differri non poterat, ab ipsa discesserit. Atq;, inquit, cum te tantifaciam, quantum quis plurimi potest, cuius tibi quæ de te prædicaui modo argumēto esse possunt, succensere mihi non debes, quod te cum euocassem prius, atque exci-


excitasset, fores mihi iam aperire volentem, reliqui:
nam dum moraris mihi succurrit rei nostrae familiaris.
Itaque descendit in hortum meum, ut viderem po-
ma conuallium, & inspicerem si florisset vinea,
& si iam germinassent mala punica. Cui illa sta-
tim, & ad morem foeminarum respondet aptissime.

NESCIVI, ANIMA MEA CONTVRPAUIT ME PROPTER QUA
DRIGAS AMINADAB. Aut ut ex Hebræo septuaginta trā
stulerunt interpretes *ὅτι τοι αἰματὰ αμιναδὰβ* id est, po-
suit me currus aminadab. Nam, inquit, quid tibi in
mentem venerit, ut à me discedere velles, aut quo
concesseris, nescio, illud vnum scio, dum te amore
perdita, atque amens requiro, omnia urbis loca cur-
riculo, eaque velocitate obuiisse, ut non sint velocio-
res currus aminadab. Anima mea, id est, desiderium
tui inueniendi, nā anima pro desiderio sæpè in his lite-
ris ponitur: aminadab autē populus meus princeps
Latinè significat. Itaque nō est viri alicuius propriū
nomen, sed duo potius Hebræa nomina, optimates
qui sunt in populo significantia. Ex quo currus ami-
nadab, currus, quibus principes utebantur viri sunt
accipiendi: nam curruum vsus interdictus erat vulgò
Iudæis, vel ipsa lege, vel certè equorum ipsorum ca-
ritate, atque penuria. Hæc igitur ultro, citroque ab
his dicta cum essent, discessuri que iam à scena & cō-
spectu earum foeminarum, quæ vociferanti sponsæ
venerunt obuiam viderentur, illæ, diei orta iam lu-
ce, tenebrisque discussis (nam sub aduentum diei su-
periora intelligenda sunt agi) itaque nocte depulsa

Nn attentius

attentiùs sponsam in lumine contemplari cupientes, ipsam orant, ne se subtrahat ab illarum conspectu, neve abeat tã citò. REVERTERI, inquit, REVERTE RE SVNAMITIS, REVERTERE VT INTVEAMVR TE. Sunamitem illam vocant, id est, Hierosolymitanam ciuem: nam Hierusalem olim dicta est Salem. Ad hæc, quid sponsa responderit, capite sequenti dicemus, si tamẽ priùs explanauerimus, veros huius capitis sensus.

EXPLANATIO.



DILECTVS MEVS DESCENDIT IN HORTVM SVVM. Intra se, pectusque suum, qui hortus superiùs appellabatur, tanto opere à se foris quæsitum Christum versari, ex aliquo signo anima fidelis præsentit. Itaque exposito eius erga Deum ardenti, constantique amore, & amoris probatione iam exposita, ab hoc loco Solomõ illapsus illos Dei, & amatorios illos plenos cælesti voluptate sermones, qui probationi succedunt, incipit explicare. Nec verò causa, aut mysterio vacat, quod tunc primum apparere illi Christus, & lætitiæ cælestis in animo exoriri lumen dicitur, cum primum de eo apud alios agere, & rudes atque ignaros cœpit imbuere cælestibus disciplinis. Hoc enim ab ijs, quorum hîc persona agitur, id est, à viris in charitate Dei, & pietate perfectis exigere solet Deus, vt hunc sanctis monitis alios instituendi subeant laborem, quem certè ad laborem omnium maximè

maximè isti apti & idonei sunt. Verū quoties accidit, ut grauatè id isti faciant (nam iniquo animo sæpè ferunt, diuelli se à complexu Dei, & ab ocio illo sancto ad turbas molestiæ plenas traduci) quoties igitur id recusant facere, aut certè faciunt cunctāter, atq; grauatè, subtrahit se ab ipsorum conspectu Deus, illosq; spoliat ea ipsa, quam tantoperè adamauerunt animi tranquillitate, atque quiete: curarum ipsos, atque rerum aduersarum fluctibus iactari permittens, quoad experimentis edocti intelligant velle Deum, petereque ab ipsis, aliorum ut negotia, suo otio anteponāt: utque participes efficiant eius luminis, quod in animo inclusum gerunt, reliquos populos, & quod in ipsis est, beatæ vitæ eos compotes faciant. Contrā autem posteaquam aliorum salutem suæ anteferre quieti induxerunt animum, restituit illis Deus suam præsentiam, eaque in ipso honesti muneris obitu, illos perfundit lætitia, ut quod detrimentosum sibi futurum ad vitæ tranquillitatem, atque noxium putabāt, fructuosum sibi esse id, pacisque & iucunditatis maximè efficiens experiantur. Quod ubi accidit, dici nō potest, quantum eorum sit, & quam eximium gaudium, eo, quod amabant, & quo se spoliatos esse vehementer dolebant, in eo ipso, in quo minimè inesse putabatur inuento: quod gaudium quæ sequuntur significant. *DILECTVS MEVS MIHI, ET EGO ILLI QUI PASCITVR INTER LILIA.* Indicant enim ista, atque demonstrant animum magno sibi aliquo præter spem oblato bono subita ita oppressum lætitia, non modo

N n 2 vt

vt non eloqui, sed vix vt sibilicuerit, exclamare. Nā exclamantis simul atque admirantis, letitiaque prægestientis ista oratio est, eademque qualis admirantium, atque lætantium esse solet, verbis breuis, viautem atque sententijs fœcunda. Nam cum dicunt. DILECTVS MEVS MIHI ET EGO ILLI. hoc planè dicunt primum tantoperè à se desideratum sponsum, tandè aliquando venisse: deinde quod venerit magnum illius erga ipsos amoris indicium esse. ad hæc, vel ob id, ipsum à se redamari debere: denique se beatos, atque fœlices esse. Hæc igitur illi. Deus autè ad interruptam consuetudinis suæ, atque sermonis suauitatem rediens tanto cum illis familiariùs, dulciusque agit, quanto illi inferioribus iam superatis gradibus, se ipsis effecti sunt maiores, atque meliores, vt ex his quæ sequuntur, apparet. PVLCHRA ES AMICA MEA, ET SVAVIS, ET DECORA SICVT HIERVSALEM, TERRIBILIS VT CASTRORVM ACIES ORDINATA. Hæc enim tribui non possunt nisi perfectis, eisque solis verissimè & aptissimè tribuuntur. Nam & Christus in Matthæi Euangelio, illos ciuitati in edito loco sitæ similes esse dicit: & proculdubio illa absolutio & perfectio, copiaque & multitudo bonorum, quæ est in consummata, & omnibus suis numeris perfecta virtute, nulla commodiùs quam ista similitudine declaretur. Non enim putandum est perfecti qui sunt, eos priuato aliquo, aut vnus generis præditos esse bono: sed cum multiplici & vario, tum publicè cunctis hominibus saluari, atque vtili. Etenim si externi sapientes,

Math. 5.

tes eam vim esse voluerunt eius sapientiæ, quam ipsi
suis descripserunt rationibus & argumētis, quæ, quis
non videt quantum absit à vera sapientia, ut nisi qui
sapientesset, neminem hominis appellatione dignū
arbitrarentur, sapientes verò qui essent, eosdem esse
assererent solos & liberos, & ingenuos, & reges, &
omnium rerum atque artium gnaros, atque peritos,
quāto verius nos dicemus vniuersa simul bona, mul-
torumque cum publicam, cum priuatam salutem
inesse in eo, qui Christiana sit perfectè excultus vir-
tute. Itaque Christus Dominus omnium verarum
virtutum, atque bonorum, nō solū author vnicus,
sed æstimator & ponderator verus, cum perfectōrū
virtutis vim, atque naturam declarat, non alijs vti-
tur, quam nominibus earum rerum, quarum est la-
tissimè patens, atque utilissimus vsus. Primum enim
eos lucem nominat, luce autem quid non dico dū-
cius, sed magis utile ac necessarium, non hominibus
solū, sed cunctis, sine exceptione rebus, esse omni-
nō potest? Deinde salem appellat, in quo quodam-
modo vita quædam, & ut ita dicam, immortalitas
omnium corporum inest, & commune, aduersus ta-
bem, corruptionemque præsidium. Postremò, quod
ad hunc locum spectat, vrbi illos & ciuitati dicit simi-
les esse: quia quemadmodum in vrbe, artes omne ge-
nus, & artificia continentur, suntque in ea & domus
ad inhabitandum multæ, & ad repellendos hostes,
multa firma præsidia, commoditasque, & copia ma-
xima omnium ferè eorum, quæ ad vitæ vsus sunt ne-

Nn 3 cessaria,

cessaria: sic perfectæ virtutis amplitudo, atque capacitas multiplicia in se se continens bona, innumeras habet artes atque rationes, quibus prodesse in communi cunctis mortalibus possit. Quod ut planius fiat nobis proponamus ante oculos vnum aliquem eorum, qui in hac Christiana virtute perfecti & excellentes fuerunt: sitque is Apostolus Paulus, qui necessitate quadam, ut de se diceret aliquando coactus, ita prædicat de se se. Instantia mea & sollicitudo quotidiana omnium ecclesiarum, quis infirmatur, & ego non infirmor, quis scandalizatur, & ego non vror? Et alibi gentibus gentilem se, & Iudæis, Iudæum factum, & ad singulorum ingenia, atque mores, quo lucri faceret vniuersos, suam naturam versasse, & accommodasse commemorat. Idem Galatas iterum parturiebat: Corinthios monitis castigabat: docebat Romanos: cunctas denique nationes ac populos, imò verò terrarum cuncta, ceu Sol quidam se circumagens, radijs veritatis splendidissimis illustrabat. At quibus ipse, quantisque abundabat cælestibus bonis? Quali ex Deo lætitia, atque voluptate perfundebatur? Portamus, inquit, thesaurum in vasis fictilibus. & alibi: Scio hominē in Christo, siue in corpore, siue extra corpus nescio, Deus scit, raptum huiusmodi usque ad tertium cælum, & scio huiusmodi hominē, siue in corpore, siue extra corpus nescio, Deus scit, quoniā raptus est in paradysum, & audiuit arcana verba, quæ non licet homini loqui. Ex quibus intelligitur, quam aptè conferatur iustus, & perfectus vir cum Thirsa & Hieru-

2. Cor. II.

1. Cor. IX.

2. Cor. 4.

2. Cor. 12.

& Hierusalem regijs Iudæorum vrbibus. Quod si nō
solūm ipsas res quarum ista sunt nomina, sed nomi-
num etiam ipsorum notationes sequamur (horum
em̄ nominū, vnum à suauitate ducitur, alterū à pace,
aut pacis contemplatione) hoc igitur si sequamur,
verissimè de perfectis viris dicetur Thirsæ & Hieru-
salem eos esse similes, id est, possidere eos solos, & in-
tra se se cōtinere pacis, atq; suauitatis omnē vim. Nā
vt de suauitate dicā (suauitatis namque nomine cæ-
lestes animi voluptates, atque lætities, quantē maxi-
mæ in hac vita esse possunt, intelligo) itaque, vt de
suauitate prius dicam: quæ potest esse corporis, at-
que sensuum voluptas tanta, quæ ex diuitijs lætitia,
quod ex hominum celebritate, & honoribus gaudiū,
conferri quod possit cum eius hominis gaudio, qui
charitate, morumque imitatione Christo similis ef-
fectus, & eius in se se portans imaginem, Deumque,
cum quo, non solūm amoris necessitudo intercedit
illi, sed quanta nec intelligi quidem potest naturarū
coniunctio, & salutis suæ præsidem, & voluptatis ef-
fectorem habens, cum summa præterea, & facultate,
& voluntate alijs beneficiendi, tanquam mortalis,
quidam Deus sibi foelix cæteris salutaris in terris ver-
satur? Pacem verò qua fruuntur istiusmodi, quis vn-
quam queat dicere, ea quāta sit? Nam primum, quod
totius vitæ tranquillæ caput, atque fundamentum
est, iustificati per Christum, vt Paulus scribit, pacem *Roma. 5.*
ad Deum habent: qui sicut cum iratus est, cum, cui
iratus est, maximis terroribus exagitat, ita quibus est
pacatus

pacatus & amicus, eorum in animo pacem maximā & tranquillitatem constituit. Deinde: sibi ipsis, suisque cupiditatibus imperant, easque ita regunt, & rationi subijciunt, ut cupide non solum facile rationis imperata capeant: certè eius iniussu commouere se, vix audeant. Postremò cum cæteris hominibus, ita se gerunt amicè, atque placidè, ut plurimis prosint, noceant nemini, & quod in ipsis est, cum omnibus perpetuam pacem conseruent: cum accidere non possit, ut qui ipsi omnia mala cupiditate sint vacui, cum alijs in contentionem veniant, aut honoris, aut diuitiarum, aut voluptatum, quibus ex contentione discordiae omnes, & seditiones oriuntur. Quæ profectò pax talis, ac tanta est, mihi ut vel hoc nomine videantur esse maximè cæci & miserandi Iudæi, qui cum ex vatum oraculis haberent, futurum Messiam, qui æternam pacem stabiliret, in animum inducere potuerunt, ut crederent eam sibi promitti pacem, quæ externorum bellorum cessatione, & terræ bonorum copia, liberoque eorum usu contineretur: quam pacem, quoniam nondum viderunt, aut experti in se sunt, venisse illum non putant, itaque venturum vanissimè sperant. Neque attendunt miseri, neque respiciunt ad hoc, quo de agimus pacis genus, quod vnum maximè verum, atque præstans pacis genus est, in cupiditatum, videlicet, moderatione & iustitiæ cælestis adeptione consistens. Cuius incredibilem & ante id tempus hominibus vim inauditam, mundo Iesus Dominus attulit, verus ille quidem Deus, sed
ex

ex Iudæorum gente, & eorum regis Dauidis stirpe, homo genus ducens, Dauidisq̃ue non solum in regno hæres, sed suprâ quam dici potest, regni amplificator existens: eamq̃ue attulit & induxit, tum seditionum omnium, atque discordiarum authore Sathana superato, tum extincto propè, ac de medio sublato fomite omnium malorum cupiditatum libidine, additisq̃ue præterea, & infusis in animis hominum magnis quibusdam & cœlestibus bonis. Ex quo ea sequuta est animi salus, atque iustitia, quam disputando, & in angulis garriendo Stoici, argutis suis conclusionibus verbis vix expresserunt, re verò nulli præstiterunt ante illud tempus: ex eo autem tempore, deinceps innumerabilia eius exempla, in omni sexu, atq; ætate sunt visa: plura illa quidem & longè plurima, primis illis & fœlicibus Ecclesiæ temporibus, quando ipsa Christi fides, atque religio per omnes orbis nationes diffundebatur: nunc verò etsi sint multò pauciora, propterea quod nimis in angustum propter nostra delicta, respublica Christiana redigitur, non tamen omninò desunt, nec verò deesse vnquã poterunt in Ecclesia, & populo Dei aliqui, in quibus vigeat, atque regnet Deus, id est, aliqui in quorum animis hæc Christi sanguinis, atque efficacitatis, laus & gloria reluceat, quos neque metus debilitet, neq; ægritudo cōficiat: neque libido inflammet: neq; voluptas efferat inanilætitia: quiq̃ue neq; aduersis demittant animum rebus, neque inaniter erigant lētis atque secundis: sed qui in vtraque fortuna, & statu

O o in

in vno Deo gaudentes, constantiam animi & tranquillitatem conferuent, in quo pax consistit ea, quæ & sola vera, & sola ijs promissionibus ac prædictionibus Dei, quæ de illa in sacris habentur literis, digna pax est. Nam profectò nimium mihi humiliter, nimiumque malè de Dei sapientia & potestate illi sentire videntur, si existimant, vel potius quod existimant, ipsum tot ante sæculis tanta prædictionum asseueratione, & exaggeratione, tam sæpè, tam multis verbis pro magno atque præstabili, ac se effectore digno bono illis fuisse pollicitum futurum, vt sublato metu hostium, bellis vacuum, & in magna frugum copia, atq; affluentia lætam, atque quietam vitam traderent, id est, pollicitum fuisse illis, id pacis bonum, quod, primum terrenum est, ac propterea caducum. deinde eiusmodi, vt ipsi sibi homines sæpè facietate bellorum armis depositis, id stabiliant, atque constituent. postremò tale, vt eo non solum non efficiantur homines honestatis studiosi atque probi, in quo sita est humana fœlicitas, sed sæpius eo, affluentiaq; rerum ea, quæ pacem sequitur, corrumpantur, & maximis vitijs inficiantur, adeò, vt quos res aduersæ atq; duræ efficiebant industrios, eos pax atque copia luxu dissoluat: per occasionem, videlicet, efferentibus se se, atque effundentibus prauis cupiditatibus vniuersis. Quod certè Iudæi, vel ex se ipsi potuissent discere, nisi essent nimis cæci. Quando enim pace ista sua, & bonorum externorum copia abundarunt, quod non se omni tetro, & immani flagitio contaminauerint,

rint? cum contra res aduersæ atque asperæ erudirent ipsos, & pietatis studiosos efficerēt. At quid facient? Literatè enim sacræ literæ vbertatem agrorum & bellorum finem promittunt. Promittunt sanè, sed quis est tam cæcus, qui eis vocibus pacis, atque bonorum præstantius genus aliud subesse non videat: si tamen aliquid videt, si quæ considerat, vel quid dignum Deo sit, vel quæ sit fœlicitatis humanæ ratio atque natura? Nam quid obsecro, ad beatam vitam pertineat, quod sub ficu quis, atque vite sua iacens, baccaque legens, vna cum amicis suis expers belli, atque metus lætum ducat, atque iucundum diem? Quod quoniam totidem ferè verbis scriptum à Deo, Iudæi in sacris literis legunt, tanquam ob signatis tabellis cum eo agunt, & quandiu id illis representatū non fuerit, tandiu neque Deum suam fidem exoluisse arbitrantur, neque venisse Messiam credunt: credituri videlicet mox, atque deletis Iudæi nominis hostibus, suus illis Palæstinæ regionis ager fertilis, ut olim, atque vber reddatur: seque ea copia, & ab externis bellis quiete beatos putaturi: quamuis intestina bella surgant in animo, quamuisque & ira dominetur, & incendia misceat libido, metus territet, avaritia prædas agat, omne denique impurarum cupiditatum agmen, se infestis signis in animum inferat: nullamque illi vitæ pacatæ atque tranquillæ partem relinquat: quo quid absurdius dici, aut cogitari potest? Ergo illa omnino repudianda, & à promissionibus Dei reiicienda pax est, qua qui potiuntur flagi-

O o 2 ticli

Philip. 4. tiosi esse, id est, omnium miserrimi possunt: illa verò
asciscenda, quam verè D. Paulus appellat pacem Dei
quæ omnem exsuperat sensum: quod neque quanta
sit intelligere, nisi Deo docente possimus, neq; com-
potes eius esse valeamus, nisi ab eodem nobis done-
tur: quodque præterea sit tam firma tamque stabilis
pax, eam ut nobis eripere nisi prodamus ipsi nos, vis
nulla possit. Itaque non sine causa, qui hoc in loco urbi
Hierosolymorū similis esse dicitur, iste tranquillita-
tis atque veræ pacis beatus possessor, idem terribilis
nominatur, sicut castrorum acies ordinata, quo in-
telligatur, nullum esse hostile robur tantum, nullum
tantum incursum atque violentiam fortunę, nullum
denique malum, ei quod nocere aliquo modo possit,
aut eius animi partium consensum & conspiratio-
nem dirimere, pacemque & charitatem Dei supera-
re eam, quæ in iusti hominis animo altè infixæ est:
Rom. 8. quod illa Pauli satis declarant. Quis nos separabit à
charitate Dei? Certus sum, quod neque mors, neque
vita, neque Angeli, neque principatus, neque pote-
states, neque præsentia, neque futura, neque altitu-
do, neq; profunditas, neq; aliqua alia creatura poterit
nos separare à charitate Dei, quæ est in Christi Iesu
Domino nostro. &c. Etenim quod vnum. maximè
contrariū est & inimicum ei paci, quam omnes vul-
gò vocamus pacem, bellum, videlicet, atque hostes
multi & infestis: id huic verè, de qua agimus paci, quæ
in animi tranquillitate, & cupiditatum moderatio-
ne consistit: non solum contrarium non est, nec mo-
do

do eam non extinguit, sed auget etiam interdum atque confirmat. Nam, ut maximè qui bellum bonis viris inferunt, ipsis nocere cupiant, quid quæso, noceant? quidve illis eripiant? opes credo. at eas, vel abijciunt ipsi, vel pro graui onere habent: itaque se leuari eo gaudebunt. At honores. quos illi certè tantifaciunt, quanti quis faciendos eos magistratus putet, quos illis honoribus similes pueri inter se se per lufum instituunt. Sed eripient voluptates. at eas aduersum inexpiabile illi bellum gerunt. At libertatem. sed quonam id quæso, modo possint, quando eripere illis animi virtutem non possunt? At eripient vitam. at hoc iam beneficium est, ab omni, scilicet, dimicationis molestia, & periculo liberatos, eò illos transmittere, quò peruenire ipsi maximè cupiunt. Ex quo intelligitur istos homines tanquam vulcanijs armis tectos, ab externis hostibus superari, lædi què non posse: esse què quod hîc dicitur, instructa acie firmiores. Sequitur. AVERTE OCULOS TVOS, QVIA IPSI ME AVOLARE FECERVNT. Animaduerti debet, perfectos non alijs pollere animi virtutibus, quam proficientes, sed easdem ipsas virtutes, quas proficientes, aut inchoatas, aut certè parum perfectas habent, perfectiores & absolutiores habere. Quam ob causam hoc loco Solomon eadem, atque ijsdem ferè verbis laudat, què superius cum de proficientium charitate agebatur, laudavit. Ibi primùm laudabat oculos: hîc ab eisdem laudandi principiū ducit: sed columbarum similes esse dicebat tunc, nunc ut intelligatur eos, hoc est, quod

Oo 3 eis

eis significatur, voluntatis, scilicet, intentionem in Deum, in viris perfectis, supra quam dici potest esse perfectam, non adhibet aliquid simile, sed ea orationis ratione, atque figura utitur, quæ ex omnibus maximam vim ad amplificandum id, quo de agitur, & exaggerandum haberet. Nam cum dicit: Auerte oculos tuos. hoc planè dicit, sibi illos ita pulchros videri. itaque se ab ipsis affici, ut eorum non possit sustinere aciem atque vim, ne dum laudare pulchritudinẽ. Eam autem cum laudari posse negat: laudat ut antè diximus maximè. Atque huic perfectioni oculorum, id est, intentioni animæ in Deum consentiunt, quæ ex ea fluunt, atque manant virtutes reliquæ: eæ autem sunt. CAPILLI TVI SICVT GREX CAPRARVM QVÆ APPARVERVNT DE GALAAD. DENTES TVI SICVT GREX OVIVM QVÆ ASCENDERVNT DE LAVACRO, OMNES GEMELLIS FOLTIBVS, ET STERILIS NON EST IN EIS. Quæ etsi laudatur hinc eisdem verbis, quibus superius sunt laudatæ, tamẽ proportionẽ eius charitatis, à qua omnes ortum & originem ducunt, hinc, id est, in perfecto viro, cuius multò perfectissima charitas est, maiores & perfectiores esse, satis docet quod sequitur. SEXAGINTA SVNT REGINAE. Nam quemadmodum sponsa præcedere & superare dicitur tot istas fœminas, quibus erat cū ipsa idẽ coniux cõmunis: sic intelligi debet, viros perfectos in ijs virtutibus, quas cum cæteris amatoribus Dei, vel proficientibus, vel incipientibus communes habent, suo & proprio eminere modo, ita, ut quod in alijs, vel exiguum, vel mediocre

August.
lib. 83.
quest. 9.
55. Hier.
lib. 2. ad-
uersus Io-
nani.

cre est, id omne sit in illis perfectum: qua ex perfectione virtutum, & omnis generis laudum praestantia id efficitur, meritò ut de illis dicatur, tum hoc.

VNICA EST COLUMBA MEA. tum id quod proximè sequitur. VIDERUNT EAM FILIAE SION, ET BEATISSIMAM

PRÆDICAVERUNT REGINAE ET CONCUBINAE, ET LAUDAVERUNT EAM. Nā perfecti omniā invidia sunt superiores. Itaque illos cuncti laudant. Et certè tametsi illi

quos peccare delectat, virtutis splendorem in aliquo se efferentem ferre non queant, ipsumque quibuscumque possunt, & rebus, & verbis obscurare nitantur: tamen reginae, & concubinae, & adolescentulae, quibus idem est, & communis vir, id est, omnes illi qui simili etiam ipsi virtutis studio tenentur, suspi-

ciunt profectò ipsum, & quibus possunt maximis laudibus prosequuntur. Nam probi qui sunt atque religiosi, & inter se amant, & aliorum bona pro suis ducunt, & laetantur aliorum laudibus æquè ac suis: ut

potè qui & invidētia careāt, & libidine detrahendi alterius industria: sicut scriptum est. Charitas nō emu-

latur, non agit perperam, non quærit quæ sua sunt.

I. Cor. 4.

Religiosos verò quos dico, eos intelligo, qui re tales sunt, non qui solum nominantur tales: illis enim nihil est, neque invidētius, neque bonis & industrijs

viris inimicius. At probi de præstantibus & perfectis viris quid? Quid? QVÆ EST ISTA, inquiunt, VEL UTI

AVRORA CONSVRGENS, PVLCHRA UT LVNA, ELECTA UT SOL, TERRIBILIS UT CASTRORVM ACIES ORDINATA.

Quam copiosè, atque ad eò effusè, fatis ut appareat

ipfos

iplos ex animo loqui. Auroræ portò, & Lunæ, & Solis in vnum collecta nomina, id planè significant viros perfectos per omnes laudis, atque virtutis gradus ad summum euasisse. Nam in aurora lucis initia sunt, & tanquam rudimēta, Luna luminis incrementis augetur: Sol autem in eo genere omnium est perfectissimus. DESCENDI IN HORTVM NVCV M VT VIDEREM POMA CONVALLIVM. Hætenus Deus in animam sanctam influebat cum voluptate: est quæ iste illapsus proximè superiore oratione à Solomone expositus, quam aptè atque commodè verbis exponi potuit: nā pro dignitate vix ullis explicetur verbis. Attamen si de eo aliquid est dicendum, isto profectò modo dicendum est, quo dixit Solomon. Nam qui Deum tanquam amatorem aliquem induci vident, mollissimo & dulcissimo carmine laudantem amicam suam, nonne videre sibi videntur, illum veluti infusum in sanctæ animæ gremium, ei quæ præbentem infinitas ex se se voluptates, atque lætities? Itaque istis verbis voluptas quam ex Deo sancta percipit anima significata est. His autè, quæ sequuntur doctrina quædam eiusdem, & eruditio continetur, quæ est altera pars huius diuini illapsus, quem suprà diximus ex voluptatis effectione, & eruditione constare. At quid docetur. DESCENDI, inquit, IN HORTVM NVCV M, VT VIDEREM POMA CONVALLIVM, ET SI FLORVISSENT MALA PVNICA. Hoc est, discessi abs te, & ad quoddam tempus me subtraxi, tibi quæ de negavi dulcem illum fructum amoris mei, non animi causa, sed explorandi gratia,

gratia, vtrum vineæ, malaque punica germinassent. hoc autem est, quo rebus asperis & difficilibus patientiam tuam, & humilitatem, charitatemque per- tentarem, notumque ista ratione tibi facerem, quos illæ virtutes in te, & quantos fructus edidissent, quā- tum profecisses ipsa, quidve tibi ad summum con- tendenti deesset. Ex quo intelligimus neminem in hac mortali vita, quamvis & multum in virtute pro- fecisse, & strenuè aduersus vitia certauisse, & plurima bella bellasse, & victorias maximas reportauisse se vi- deat: idcirco existimare debere, posse se tanquam pe- riculis, atque bellis perfunctum, otiosam degere æta- tem reliquam. Nam hinc profectò altissimus virtutis gradus describitur: in quo tamen qui erat constitu- tus subitò spoliatus fauore Dei, & nocte malorum oppressus, tolerasse dicitur multa grauiā, atque aspe- ra: quod item de se omnes, quamvis pij atque perfe- cti cogitare semper debent, & ad huius vitæ tãquam perpetuam militiam, & quasi belli dubios euentus se comparare. Voluit enim Deus hanc vitæ nostræ con- ditionem esse, vt, neque proficiendi in virtute nobis vllus præfixus esset terminus, neque verò à periculo, atque metu deficiendi, atque cadēdi tempus aliquod immune, atque vacuum daretur: quo his timoris, at- que cautionis stimulis incitati, attentioresque effe- cti, omnibus animi in vnum collectis viribus, acrius ipsum amaremus. Quo de timore, atq; cautione scri- ptum in Psalmo est. Seruite Domino in timore, & ex *Psal. 2.* ultate ei cum tremore. Atque hæc sunt, quæ isto in

Pp

loco


loco sanctam animam docet Deus, vel potius significat docere. Quæ sanè eruditio atque doctrina cum omnibus hominibus apta est, tum in primis ijs conuenit, quos hoc loco Solomon describere instituit perfectis nimirum, & in virtutis stadio magnos progressus habentibus viris. Nā hi nisi ista securitatis falsa persuasione decipiantur, ad quam tamen persuasionem diuturnum ipsum studium quod in virtute, nō sine magno successu posuerunt, ipsos quodammodo aptos, ac pronos reddit, difficillimè loco moueri possunt, aut de eo gradu deijci, quem tenuerūt. Hæc igitur Deus, cui iusti, atque sancti respondent. Nesci-

VI ANIMA MEA POSUIT ME SICUT CVRRVS AMINADAB.

Quibus verbis fatentur, & agnoscunt, quod instar curruum aminadab cursum suum magna celeritate confecerunt, id autem est, quod ad exemplum hominum sui populi principum, virorum, scilicet, optimorum, & sanctissimorum vitæ suæ cursum direxerunt, ad summūq; ita contenderūt semper, ipsos vt nulla res aduersa incidēs, aut retro vertere, aut omninò retardare potuerit, id non à se habuisse, aut suis vllis viribus esse assequutos (hæc enim vis subiecta est illi voci nesciui) sed id omne ab eo studio & desiderio Deo placendi, quod in ipsorum animis idem accendisset Deus, manasse. Itaque quam agnitionem sui humilem, atque veram viri isti perfecti, tunc cū malis opprimebantur, habuerunt, eandem etiam nunc retinent, liberati à malis: quæ certè agnitio ita Deo grata & probata est, omnem vt ferè virtutem continere

nere videatur. Sed quoniam fieri nō potest, quin huiusmodi absoluta, scilicet, atque perfecta virtus foras emanans, & in hominum oculos incurrens, eos primum admiratione afficiat, deinde amore accendat: postremò inducat ad id, vt summis ipsā efferre laudibus studeant, atque cupiant: quod id exprimeret Solomon sponsam fingit, cum à scena iā discessura esset, à choro foeminarum reuocatam his verbis. REVERTE RI, REVERTERE SVNAMITIS, VT INTVEAMVR TI. Eamque ad ipsas conuersam, quærentem isto modo, atque respondentem inducit. QUID VIDEBIS IN SVLAMITE NISI CHOROS CASTRORVM? Quæ iam verba ad cap. quod proximè sequitur, spectant: de quibus cum ad id loci peruentum nobis fuerit, dicemus.

C A P V T V I I.



VID VIDEBIS IN SVLAMITE NISI CHOROS CASTRORVM? QVAM PVLCHRI SVNT GRESSVS TVI IN CALCEAMENTIS FILIA PRINCIPIS, IVNCTVRAE IOEMINVM TVORVM SICVT MONILIA QVAE FABRICATA SVNT MANV ARTIFICIS. VMBILICVS TVVS CRATER TORNATILIS NVNQVAM INDIGENS POCVLIS, VENTER TVVS SICVT ACERVVS TRITICI VALLATVS LILIIS. DVO VBERA TVA SICVT DVO HINNVLII GEMELI CAPREAE, COLLVM TVVM SICVT TVRRIS LEBRNEA, OCVLII TVI SICVT PISCINAE IN HESBON, QVAE SVNT IN PORTA FILIAE MVLTITVDINIS. NASVS TVVS SICVT TVRRIS LIBANI, QVAE RESPICIT CONTRA DAMASCVM. CAPVT TVVM SICVT CARMELVS, COMAE CAPITIS TVI SICVT PVRPVRA

Pp 2 REGIS

REGIS IVNCTA CANALIBVS. QVAM PVLCHEA ES, ET QVAM DECORA CHARISSIMA IN DELICIIS. STATVRA TVA ASSIMILATA EST PALMAE, ET VBERA TVA BOTRIS DIXI. ASCENDAM IN PALMAM, ET APPREHENDAM FRVCTVS EIVS, ET ERVNT VBERA TVA SICVT BOTRI VINEAE, ET ODOR ORIS TVI SICVT MALORVM. GVTTVR TVVM SICVT VINVM OPTIMVM, DIGNVM DILECTO MEO AD POTANDVM, LABIISQVE ET DENTIBVS ILLIVS AD RVMINANDVM. EGO DILECTO MEO, ET AD ME CONVERSIO EIVS. VENI DILECTE MI, EGREDIAMVR IN AGRVM, COMMOREMVR IN VILLIS. MANE SVRCAMVS AD VINEAS, VIDEAMVS SI FLORVIT VINEA, SI FLORES FRVCTVS PARTVRIVNT, SI FLORVERVNT MALA PVNICA, IBI DABO TIBI VBERA MEA. MANDRAGORAE DEDERVNT ODOREM IN PORTIS NOSTRIS OMNIA POMA NOVA ET VETERA, DILECTE MI SERVAVI TIBI.

EXPLANATIO.



VID VIDEBIS IN SVLAMITE NISI CHOROS CASTRORVM? Numeri enallage est in illo. Videbis. Nam illas rogat sponsa foeminas, quæ partes chori agunt in hoc dramate, & quarum rogatu iâ abitura constitit: Quid videbis in Sulamite, id est, videbitis. itaque & Græca, & Hebræa exemplaria omnia. Quid igitur videbitis, id est, quid in me est aspici dignum, quod conspectum vos ita delectet? quid cuius aspectu oculos vestros pascere, vos quæmet oblectare velitis? aut quæ vos tanta cupido tenet inspiciendi mei? Nam illæ inspiciendæ ipsius causa.

causa, ut ne abiret ipsam rogarunt. NISI CHOROS CASTRORVM. Aut ut in Hebræo dicitur, sicut choros castrorum. Nā redeunte illa, & ad fœminas quæ ipsam vocabant conuersa, quò melius ipsam inspicerent bifariam diuisæ illæ & altrinsecùs sibi respondentes, vtrumque sponsæ latus cinxisse sunt intelligendæ. Plures igitur cū essent, & in duos ordines diuisæ aciei speciem præseferabant. Atque hæc sponsa cum dixisset, fœminarum chorus, quo ostenderet non sine causa fuisse, quod illam diligentius inspicere & contemplari voluerunt, formæ eius, atque totius corporis pulchritudinem, laudibus in cœlum ferunt, ac ita ferè dicunt. Cur te curiosius inspicere cupiamus rogas? quæ quanta es ex pulchritudine tota constas. Nā ut à minimis ordiamur, ipsi pedes tui quam pulchri sunt, quam venusti incessus? Quam inquiunt. PVLCHRI SVNT GRESSVS TVI IN CALCEAMENTIS FILIA PRINCIPIS. Pedis astricta breuitas commēdatur, nec pedis modo, sed incessus ipse, & totius corporis in incedendo motus laudatur, qui certè in pulchritudinis partibus meritò numeretur, quod ingenui, ac bene nati animi in eo indoles quædam, & species eluceat. Vnde consentaneè nominauerunt illam filiam principis, aut ut Hebraicæ vocis notationem reddamus, liberalis atq; profusi, hoc est, liberalem ipsam & generosam esse dixerūt, magnoq; & alto animo præditam iuxta proprietatē Hebraici sermonis, quo quis re eximiè præditus est, eius rei dicitur esse filius, idq; dixerūt ob eam causam, quia ab ipsa animi ex-

Pp 3 celli.

celsi indole omnis illa in incessu venustas fingitur, & existit: dicunt itaque. Primum quam concinni pedes tui, quamque ad pedem apto vteris calceo. in incessu porrò ipso quanta gratia, quæ venustas, quæ animi in ea elucēs indoles, non vt obscuris parentibus edita, ruriq̃ue educta, sed, vt regio orta sanguine, regieq̃; instituta nobis omnibus videaris. IUNCTVRÆ FOEMINVM TVORVM SICVT MONILIA QVÆ FABRICATA SVNT MANV ARTIFICIS. Pro iuncturis Hebraicè est חמך hamuq: id autem circulum, aut orbē significat: ex quo coxæ vertebra hamuq ab Hebræis appellatur, eamq̃; vertebra Hieronymus iuncturæ nomine à se significatam intelligi voluit. Significatur autem à parte totum ipsum fœmur. Itaque iunctura aut vertebra fœmoris tui, aut certè fœmora tua licebit vertere tãquam monilia, quæ fabricata sunt manu artificis. Igitur laudatur fœmur, quod neque exile sit, neque gracile, sed densum, modicèq̃ue obesum: itaque rotundum, vt si circulum exactè factum ipsi circūdes, cum ad vnguē repleturū sit. Densum igitur & succi plenū & perfectè rotundum fœmur esse dicitur sponsæ: ex quo rectè septuaginta, hoc loco verterunt *εὐθμοί, ἡ δὲ ἑξήκοντα* nam *εὐθμοί* rectè dicitur in omni eo quod modulatè atque adfabrè factum est. VMBILICVS TVVS CRATER TORNANILIS NON INDIGENS POCVLIS. Tornatilis quod dixit Hieronymus, exactè rotundus intelligi voluit: nam in Hebræo est סהר quod est rotundum, ex quo etiam Luna cum suum orbem compleuit סהרא ab Hebræis appellatur. Itaque alij vertunt, *ymbili-*

umbilicus tuus crater Lunæ, id est, ad instar plenæ Lunæ rotundus est umbilicus tuus. Pocula verò hîc quæ dicuntur, nō quibus potatur, sed id ipsum quod potatur & bibitur, id est, potiones ipsæ intelligendæ sunt, vt in illo.

Poculaq; inuentis Acheloia miscuit vuis.

Georgica .1.

Quas Hebræi מֵזֶגַם mazeg appellant, id est, mixturæ vino, scilicet, aqua diluto atque misto confectæ. Dicitur itaque venter, similis crateri rotundo, ac vini pleno: quoniam quod ad pulchritudinē attinet, in ventre hæc spectari solent, rotunditas, modicusque ac succi plenus tumor: quod ipsum alia adhibita similitudine adhuc explicat magis. VENTER TVVS, inquiūt, SICVT ACERVVS TRITICI CINCTVS LILIIS. In aceruo enim grans tritici cuncta complentibus, atque omni ex parte circumquaque se æquabiliter in orbem effudentibus, nihil aut hiat, aut subsidet, aut omnino inæquale est. DVO VBERA TVA SICVT DVO HINNVLII GEMELLI CAPREAE. Iam de hoc suprâ. COLLVM TVVM SICVT TVRRIS EBVRNEA. Et hoc ipsum per se satis est perspicuū: candor enim colli, atque nitior, eiusque iusta longitudo & rectitudo cōmendatur. OCVLII TVI SICVT PISCINAE IN HESBON, QVAE SVNT IN PORTA FILIAE MULTITVDINIS. Esbon vrbis est cis Iordanem, in sorte rubenitide, in qua olim Seonis Regis Amorrhæorū regia fuit, stagnis, aquisque abundans, vt ex Iosue libro liquet. Filia multitudinis Hebraicè Barrabim. nomen est proprium eius portæ ad quā piscinæ istæ fuisse dicuntur, quæ sic appellabatur, quod

quod iuxta illam forum esset peramplum, & multorum hominum capax. Itaque forum ipsum Barrabim appellabatur, id est, grande, & peramplum forū, cui foro vicina quæ erat vrbis porta, ex eo patrio casu porta Barrabim, id est, porta filiæ multitudinis dicebatur. Sed quid est in piscina, quod ad pulchros oculos significandos possit transferri? Primum amplitudo. Nam magni oculi, & ut Hispanè dici solet, rasgados, pulchri habentur: ex quo Homerus Iunonem ^{βουπιδεα} appellat ob magnitudinem, credo, oculorum iustam atque decetem. Deinde serenitas, ex quo existit lumen & splendor. Postremò quies & tanquam stabilitas, quæ cum ipsa in oculis grauitatis est, & decoris plena: tum certè constantis animi, atque simplicis est indicium. Nam quorum crebrò palpebræ, atque oculi magna celeritate mouentur, aut timidi sunt, aut omninò vafri atque fallaces. NASVS TVVS SICVT TVRRIS LIBANI QVÆ RESPICIT CONTRA DAMASCVM. q̄ Aph. Hebræis propriè & literatè nasum significat. Nasus porrò translātè interdum pro excandescencia ponitur, interdum pro grauitate oris, ea quæ oritur ex habitu animi celsi atq; magni: quoniam earum rerum clara signa in naribus natura impressit. nam iratis nares tu. nent, atque dilatantur, & qui animosi ipsi sunt, aut qui magnum aliquid, atq; arduum concipiunt animo, multum spiritus naribus trahere solent, atque reddere: ex quo ille inter alia generosi equi signa.

Tum si qua sonum procul arma dedere

Stare

Stare loconescit, micat auribus, & tremit artus

Collectumq; premens voluit sub naribus ignē. *Georgicon. 3*

Et Esaias, *Cauete vobis ab homine, cuius spiritus in naribus eius, id est, ab homine magni spiritus, quod Latini sermonis consuetudine dici solet, hoc est, animo magno & excelso.* Itaque se ipse exponens sacer vates protinus addit: Quoniam excelsus est ipse. Atque ea formæ species maximè pulchra est, atque admirabilis, in qua partium apta figura atque decor, oris quadam seueritate & maiestate temperatur. Nā illud ex pulchro atque graui temperamentum quicumque vident, ita amant, vt verxantur etiam, atque admirentur: excitat enim in contuentium animis, magnum omninò amorem sui, sed honestum tamē, nō leuitatis, aut lasciuiæ comitem amorem. Arbitror itaque hoc loco, Nāsi vocabulo, pro Hebraici sermonis proprietate significari, seuerum illud atque altū, quod in huius sponsæ elucebat ore: quod turris similitudo adhibita, ita esse declarat. Nam sicut illa in saltu Libani, id est, in Iudææ finibus contra Damascum, infestam Iudæis urbem locata turris, Iudæis ipsis præsidio & ornamento erat, hostibus verò Syris & Damascenis formidini atque terrori: sic illa pulchro ac formosissimo sponsæ ori adiuncta diuina grauitas, illa quæ animi in ipsa facie celsitudo elucens, tū ipsius pulchritudinem amplificabat, tum eandem tutam reddebat à petulantia & iniuria hominum, quorum ex animis eximebat omnem, non solū conandi, aut audendi turpe aliquid, aut insolens, sed etiam cu

Qq piendi

piendi, & sperandi cogitationem. CAPVT TVVM SICVT CARMELVS. Caput, id est, vertex capitis. Nam Hebraicè sic. Caput tuum quod suprà te est. Carmelus mons in Iudæa, Heliæ & Elisei vatum domicilijs nobilitatus. Dicunt igitur extare ipsam, & eminere supra cæteras fœminas, sicut Carmelus mons vicinos, & circumiacentes superat montes. Sed quod sequitur, difficiliore explicatus habet. COMÆ CAPITIS TVI SICVT PURPURA REGIS IUNCTA CANALIBVS. Huius nãque explicandi causa, primum, quod puto me antè dixisse, sciri debet in Syria & Palæstina, & toto illo Orientis tractu nigram comam, aut subrubeam, quæ ad purpureum colorem non nihil accedat, commendari: deinde aduertendum Hebraica hoc loco, ea esse ratione constructa, verti vt possint, cum hoc modo, quo à Hieronymo sunt conuersa, tum illo, quo septuaginta interpretes illa verterunt, scilicet, *και πλοχιοι κεφαλης σου ως πορφύρα βασιλεως διδρυμεις εν παραδρομαις.* id est, comæ capitis tui sicut purpura, Rex ligatus in canalibus. Est autem vtriusque versionis propè eadem sententia, nisi quod hæc posterior ad amatorium sermonem propius accedit: quare interpretemur vtramque. Igitur in priori laudantur capilli à colore, eo scilicet, qui apud Hebræos pulcherrimus habebatur. Nã dicunt videri sibi sponsæ capillos, tales, quales lanæ murice, atque purpura tinctæ apparere solent: & addunt ad epithalim, quales lanæ regiæ purpura imbutæ, & canalibus iunctæ, quo intelligatur, cum preciosissima purpura, & ea non vsu detrita, sed à tinctura recenti

recēti comparari sponsæ capillos. At in posteriori septuaginta versione, quod dicitur. Rex ligatus in canalibus. valet ad capillorum pulchritudinem amplificandam. Nam dicunt eos usque adeo pulchros esse, ut Rex ipse, id est, sponsus eis in amore ita accendatur, ut sint illi pro vinculis: vel potius eis pro vinculis ad illum illaqueandum, atque vinciendū ipse amor utatur. Capilli tui sicut purpura, hoc est, pro gentis illius more, & iudicio, pulcherrimi. Rex ligatus in canalibus. id est, illaqueatus, & irretitus amore ipsorum capillorum: quos translatè canales vocat, ducta similitudine ab aqua, quæ cum per canales decurrit, crispari dicitur: quemadmodum capilli fœminarum oblongi, & per humeros earum effusi crispantur, vndareque & ipsi dicuntur humeris, verbo ab aquis translato. QVAM PVLCHRA ES ET QVAM DECORA CHARISSIMA IN DELICIIS. Apto epiphonemate transitū ad vltiora faciunt. Sequitur enim. STATVRA TVA ASSIMILATA EST PALMAE, ET VBERA TVA BOTRIS. Vuarum, scilicet, quas ferret ea vitis, quæ palmæ adiuncta, & per eam serpens, palmæ ramos sarmentis implicabat suis. Nam, vel ex hoc loco, cōstat in Palæstina vites iuxta palmas feri solitas, sicut iuxta vltimos in Italia. Venustissimè autem procerum, atque elegans sponsæ corpus palmæ arbori, cuius item est insignis altitudo, & proceritas, simile esse dicunt: vbera autē in pectore extantia & prominentia botris vuarum ijs, qui eminebant è palma ab ea vite, quæ implicabatur cum ipsa. Sed quod addunt, id è communis na-

Qq 2 turæ

turæ affectu, atque more expressum est. DIXI, ASCENDAM IN PALMAM, ET APPREHENDAM FRUCTVS EIVS, ET ERVNT VBERA TVA SICVT BOTRI VINEAE, ET ODOR ORIS TVI SICVT MALORVM. Nam naturale est, vt pulchri species in quocunque enitens, ad se alliciat intuentes: in fœmina autē elucens etiam sui potiūdi desiderio ipsos accendat. Ad hęc fœminarum loquendi consuetudo, id habet, vt cum incidit, vt formam & pulchritudinem alterius fœminę laudent ad extremum augendi causa, ita dicant, Denique talis, tamque pulchra mihi visa est, me vt cupido inuaserit, oculos illi, atque os diffuauendi, aut in eandem sententiam aliquid simile. Dixi, id est, eximie tuę pulchritudinis vis per oculos ad animum admissa, eumque incendens, hęc illi dictat desiderij ardentissimi plena verba. O nos beatas, nobis si permitteretur te arctissime amplecti. Illum certē fœlicissimum, cui datum est isti palmę instar vitis implicari: cui manum inferere in sinum: cui contingere botros: cui dulci ex isto ore legere animam malis, atque optimo vino odoratiorem. Nam sequitur. GUTTUR TVVM SICVT VINVM OPTIMVM, DIGNVM DILECTO MEO AD POTANDVM, LABIISQUE ET DENTIBVS ILLIVS AD RVMINANDVM. Quāquam hoc loco Latinus interpres Hebraicum textū paraphrasi reddidit: nam ad verbum sic verteretur. Guttur tuum sicut vinum illud bonum, quod vadit ad dilectum meum directē, loquens labijs dormientis. Quę est vini optimi ac generosi descriptio ex cōiunctis & consequentibus. porrò ad dilectum quod dicitur

dicatur, in eo nulla certa persona significatur, sed quomodo Latini vocabulo, quis, uti sæpè solent, & Hispani voce, hulano: sic isto loco ad neminem vnũ sermo certo dirigĩt. sed quod vadit directè, siue vt in Hebræo למשרים de vino dictum, optimæ notæ significat vinum, quasi tale sit, rectè quod bibi possit, vel certè quia dum bibitur propter sui bonitatem, lenitatemque inoffenso, vt ita dicam, pede directè per os ad fauces delapsum, inde in corpus traicitur, quod est vetusti ac generosi vini proprium. id enim cum voluptate facillimè bibitur, vtpotè quod omni austeritate careat: haustum porrò tum demum se, vimque suam prodit. Nam quo propter vetustatem è tenuioribus constat partibus, eo citiùs in sublime elatum, omnes capitis sensus in suam redigit potestatem. Id igitur Hebræi vadere directè appellant, quomodo Hispani de vino eius generis dicunt: que se cuela sin sentir, vt ex illo Prouerb. 23. satis liquet, vbi dicitur. Ne aspicias vinum cum rubescit, & cum splendet in vitro: ingreditur enim blandè. id est vadit directè (sic enim Hebraicè legitur משרים) & in nouissimo mordebit, vt coluber, & sicut regulus venenum difundet. nimirum longè alium se quam quod initio pollicebatur, ostendens. Etenim initio mitis, ac lenis nihil hostile præ se ferebat, at posteaquam in pectus admissum est, in caput, atque in mentem inuadens, quas turbas non mouet? nam vt maiora illa omitam, bella debellata super mero, sermonis certè vsum propè eripit: linguam namque hesi-

Qq 3 tantem

tantem reddit: vocum in loquendo sonos immutat:
 verba literis, ac syllabis fraudat: eorumque structurā
 & ordinem rectū perturbat. Quare additur. Loquens
 labijs dormientis. id est, qualiter dormientes, hi au-
 tem sunt qui instante somni capiendi tempore som-
 no grauantur, loqui solent. EGO DILECTO MEO, ET AD
 ME CONVERSIO EIVS. Dignum amante foemina respō-
 sum. Nā dicit, qualis ipsa, aut quam pulchra sim ne-
 scio, neque verò vtrum talis vobis videar, qualem
 me esse dicitis, valdè laboro: illud vnum scio, cuius-
 uis modi sim, totam viri mei esse: à me illum amari:
 ab ipso me vicissim diligi: illi vni gratificari me, &
 placere cupere: id solū in votis esse: vestros verò de
 me sermōnes atque iudicia, & omninò laudes de me
 vestras non tanti facere. Itaque illas veluti fastidiēs,
 & ad virum conuersa. VENI, inquit, DILECTE MI, EGRE-
 DIAMVR IN AGRVM, COMMOREMVR IN VILLIS. quo nos
 scilicet, ab his turbis, & hominum molestijs subdu-
 centes, agrique amœnitate fruētes, amoris nostro li-
 berè indulgeamus. MANE, inquit, SVRGAMVS AD VI-
 NEAS, VIDEAMVS SI FLORVIT VINEA, SI FLORES FRV-
 CTVS PARTVRIVNT, SI FLORVERVNT MALA PVNICA, IBI
 DABO TIBI VBERA MEA. MANDRAGORAE DEDERVNT ODO-
 REM SVVM. & quæ sequūtur. MANE SVRGAMVS AD VI-
 NEAS. Nam sub auroram nihil est agro amœnius.
 VIDEAMVS. Aut per futurum, vt in Hebræo est, vide-
 bimus. SI FLOREAT VINEA, SI FLORES FRVCTVS PARTV-
 RIVNT. Flores inquam vince: id est, videbimus vtrum
 vites flores emittant, aut ipsi earum flores fructus iā
 edere

edere incipiant: nam in Hebræo sic. Si floruit vinea, si apparuit noua vua, si floruerunt mala punica, ibi dabo tibi vbera mea. Et ne solum, inquit, inuitari te agri amœnitate à me putes, summam ibi mei copiã tibi faciam. **MANDRAGORAE DEDERVNT ODOREM SVVM.**

Repetendum à communi superiùs verbum, nempè & videbimus si mandragoræ dederunt odorem suũ. Præstant enim odore mandragorę, vt Plinius tradit.

IN PORTIS NOSTRIS OMNIA POMA NOVA ET VETERA, DILECTE MI SERVAVI TIBI. Et ad alias, inquit, vel opportunitates, vel voluptates huius vitæ rusticæ, ad quam te voco: illud accedet etiam, quod abundabis maxima optimorum fructuum ad vescendum copia. Legam enim ipsa tibi, imò verò lecta, ac domi habeo reposita poma, atque baccas arborum omnis generis, quibus tu uti, atque vesci possis. Atque hac fini hoc caput cõcluditur, cuius iam ad principium reuertamur.

E X P L A N A T I O.



VAM PVLCHRI SVNT GRESSVS TVI IN CALCEAMENTIS FILIA PRINCIPIS. Quare in hac carminis parte, in qua de perfectis agitur, præter laudationem sponsi, nouæ personæ inducantur, quæ sponfam laudent, iam superius dictum est: nũc verò illud est dicendum, atque quærendum, quid nã causæ sit, cur ista laudatio, diuerso atque adẽ contrario

trario à superiore laudatione ordine à pedibus laudandis exorsa, In capitis laudibus terminetur. Nec enim id causa, vt arbitror, vacat. Etenim, quod iam suprà diximus in hac laudatione figuratè, vt cætera omnia significatur id, quod re ipsa accidere videmus viris virtute præstâtibus, quales sunt qui perfecti nominantur. Illos enim mortales vniuersi, quorum modo animus nō omninò profligatus sit, aut virtutum officijs infensus admirantur, & laudant: quod non æquè contingit ijs qui virtutis studio quoquo modo dediti sunt, aut qui progressus iam aliquos in eo fecerunt. Homines porrò aliorum hominum rectè facta vident, animi autem rectum atque diuinum habitū, virtutesque, quæ illi insunt, ex quibus ipsa rectè facta oriuntur, & manant, non vident, sed ex ijs quæ vident coniectura colligunt. Ex quo fit, vt cum laudare ea volunt, id primum laudibus prosequantur, quod illis primò videndum occurrit, quodque cætera, & cognoscendi, & laudandi causam ipsis attulit. Nam principio ista operum exteriorum honestate commoti, eos, à quibus ea edebantur, admirari cœperūt, & in illorum animos introspicere. Quod igitur Latini officium appellant, quo nomine quidquid ex virtutis inductu, atque præscripto, vel publicè, vel priuatim rectè & honestè fit, comprehenditur: id sacræ literæ figuratè pedes vocant: non solum quia minus dignitatis atque luminis habet ista rectè facta, quam illa animi interiora ornamenta, à quibus oriuntur: sed quia istis virtus insistit, eisque tanquam gressibus in

in hoc mortalis vitæ stadio progreditur. Nam societas hominum inter ipsos, cōmerciaque humana omnia his continentur officijs. Vocari autem ista officia pedes in arcano sermone, omnes ferè scriptores docent, in illo Christi: Qui lotus est, non indiget nisi *Ioan. 16.* vt lauet pedes. Hos ergo pedes sanctorum, cum eorū honestam speciem oculis hauriunt homines, pulchros esse dicunt: tum quod honesta sunt ista officia, & ob id dignitatis plena, tum quod sunt, vel publicè, vel priuatim vtilia, & ob eam causam, apud omnes gratiosa, & vt ita dicam, popularia: præcipuè autem ea, quæ à charitate, & à pietate Christiana ducuntur, quæ modestiæ & humilitatis specie mirabiliter commendata in benefaciendo, atq; in inseruiendo alijs ponuntur ferè omnia, quo quod populis sit gratius, profectò effici nihil potest. At quam rectè cum ista laude Christiani officij id quod sequitur, iungitur. FILIA PRINCIPIS. Nisi enim vir perfectus & sanctus filius principis esset, id est, nisi generoso, & munifico, ac digno principe animo esset præditus, ea quam diximus, officiorum dignitate careret. Quid verò si hi pedes nobis sint, id quod video rectè esse posse, humilitas ea, atque lenitas, ac māsuetudo, quæ sunt propriæ Christianæ disciplinæ virtutes, & quas perfecti in ea disciplina, & vultu, & incessu, & omni oris habitu præferunt, quibus certè virtutibus, nihil amabilius esse potest: num minus aptè cum his virtutibus cohærebit, quod sequitur filia principis? Imò verò aptissimè. Christiana enim virtus suis coloribus de-

Rr scribetur:

scribetur: si quorum pedes, hoc est, quorum humilitas & mansuetudo laudantur, iidem prædicabuntur principum filij, excelsi, scilicet, & exaggerato animo præditi. Nam ut nihil est Christiano homine humilior, atque mansuetior, ita nihil est eodem altius, atque sublimius. Etenim quod in Christi persona adoramus, & credimus ineffabili modo coniungi duas naturas, sublimem vnam, humilem alteram, nempe humanam, atque diuinam: eius exempli imaginem quodammodo videre licet in ijs, qui Christo suo capiti, virtute & morum imitatione sunt similes. Sunt enim simul & humiles & excelsi tum natiuitate, tum moribus. Natiuitate quidem excelsi sunt, quoniam ad Deum ipsum mortui sui eius, quo in nouam vitam nascuntur principium, & originem referunt, quodque eius originis in se habent præstantissima semina: humiles autem & abiecti, quoniam quod attinet ad veteres, atque primos parentes genus ducunt ab inquinatissimis fordibus. Moribus porro, & conditione vitæ propter suam modestiam, & fragilitatis suæ assiduam cogitationem & cognitionem sunt humiles. itaque modestissimè de se sentiunt, nihil sibi arrogant, tribuunt sibi nihil, cedunt omnibus, seque submittunt etiam inimicis, neque est aliquod tam abiectum, atque vile munus, quod vel se indignum putent, vel aliorum salutis causa libenter non subeant, illudque non parum sæpè vere, & ex animo optant, contemni se à cæteris, & sperni, & pro nihilo haberi. At eisdem rursus nihil est maius, atque sublimius.

mius. Nam neque seruiunt voluptatibus, neque cedunt doloribus, neque ab aliqua cupiditate praua vincuntur: neque hominum minas, neque aduersæ fortunæ tela extimescunt, & quibus rebus seruiunt mortales cæteri, ijs illi omnibus imperant, tamque alto sunt animo, ut sua præstantia indignum existiment, impertire aliquid desiderij sui atque cogitationis, nisi rebus cælestibus, atque diuinis. Itaque immortalitatem, æternas diuitias, diuinam vitam, congressum & conuictum penè familiarem cum Deo & semper, & sola cogitant. Quid illa, ea si quis pro dignitate commemoret? nam mihi his commentariorum angustijs excluso copiosè illa, & enucleatè explanare non licet. Quam igitur illa sunt animi excelsi, quod de cunctis hominibus, nihil inde præter rectè facti conscientiam ad se referentes, bene mereri student, quod infestissimis suis hostibus non grauatè commodant: quod ita sunt animo liberali, & ad benefaciendum propenso, ut non opes & facultates suas modo, sed vitam etiam pro aliorum salute profundant? Ex quo concluditur, hanc esse propriam laudē Christianæ virtutis, quod repudiatis & à se remotis, superbia & arrogantia, quibus vitijs omnis Philosophorū vita, & institutio inficebatur: modestia verò & mansuetudine, & humilitate animi ascitis, & adiunctis diuersissimas res, & quæ in vnum coire posse, non putabatur: summā, scilicet, animi celsitudinem, cum incredibili humilitate consociat. ut conuenientissimè in hac eximiae virtutis, atque probitatis imagine,

Rr 2 cum

cum pedum pulchritudine, hoc est, humilitatis virtute, sit à Solomone regij sanguinis dignitas, & illustris generis claritudo coniuncta: quibus etiam consentanea sunt, quæ sequuntur. Nam rectis officijs laudatis quatuor summæ virtutes, à quibus ducuntur omnia officia laudantur, ac primo de fortitudine dicitur. *LVNCTVRAE FOEMINVM TVORVM SICVT MONILIA QVÆ FABRICATA SVNT MANV ARTIFICIS.* Nam

Eccl. vlt.

fortitudinē fœmorum, atque tibiæ declarari nominibus ex eo intelligitur, quod retro vicissim ipsū fortitudinis nomen, ad fœmora significanda translātē vsurpatur: vt in illo. Et nutabunt viri fortissimi. in quo fœmora per metaphoram viros fortissimos, aut fortitudinis dici omnes consentiunt. Est autem Christiana fortitudo, sola vera, & perfecta fortitudo: vtpotē quæ pro pietate nullum, aut certamē fugiat, aut periculum reformidet. Itaque aptē comparatur circulo, cuius est figura perfecta, aut certē fœmori ad circuli orbem accommodato. Temperantia deinde in vētre, atque vmbilico significatur, quo de dicitur.

V. MBILICVS TVVS CRATER TORNATILIS NON INDIGENS POCVLIS. Item quæ. *VENTER TVVS, VT ACERVVS TRITICI VALLATVS LILIIS.* Nam vt in tritici aceruo propter causam superius dictam, nihil incisum angulis, nihil anfractum, nihil eminens, nihil lacunosum conspicitur, sic temperans moderationem, & æquabilitatem, & omnium rerum mediocritatem in omni vita conseruat. His succedunt. *VBERA TVA SICVT DVO MINNVLII GEMELLI CAPREAE.* Quæ ad eas virtutes spectant,

stant, quæ ad alterum referuntur: inde ascensus ad collum, & ad oculos fit. De illo. COLLVM TVVM SICVT TVRRIS EBVRNEA. De his. OCVLIVS TVI SICVT PISCINAE IN HESBON, QVAE SVNT IN PORTA FILIAE MULTITVDINIS. Quibus ea, quas suprà diximus, designantur virtutes, nisi quod, vel ex ipsa similitudinum ratione absolutiores & perfectiores, in hoc ordine, atque gradu hominum, quam in superiore intelligendæ sunt esse: ab his, ad nasum peruenitur, in quo grauitatis, atque prudētiae inest symbolum. Quæ, SICVT TVRRIS LIBANI QVAE RESPICIT CONTRA DAMASCVM. ita ipsa altè eminens, omnia longè, latèque speculatur. Vltimum atque supremum est caput. Charitas Christiana, videlicèt, quæ ita præest, atque supereminet virtutibus reliquis, vt eas non solum regat, & in viam, qua vna ad Deum perueniri potest, inducat: sed ita perficiat, & vnamquamque earum in suo genere absoluat, vt ei si desit charitatis ista perfectio, pro virtute vera habenda non sit. Meritò igitur ea, vt Carmelus esse dicitur, omnia, scilicèt, loca circumposita, longo interuallo superans. ab hac virtute cogitationes bonæ, quæ oriuntur, capilli ij sunt, qui esse dicuntur. SICVT PURPURA REGIS. Nam inest in illis, ipse idem charitatis ardor, vnde initium duxerunt. Itaque igneæ sunt, neque quales capilli, qui superius descripti sunt, quos nitorem modo, & rectum ordinem habuisse diximus: sed quales qui modo laudantur, similes optimæ purpuræ, id est, ardentes atq; flagrant. Nam qui perfecti sunt, in Deo amando, co-

R r 3 gitan-


gitandoque semper occupantur, ægrèque, atq; adeò moleste, & non nisi a bipſa neceſſitate conſtricti cogitationum ſuarum, partem aliquam terrenis rebus impertiuntur. Nam meditantur in terris cæleſtem vitam, quæ certè continenti, atque perpetua contemplatione, atque charitate Dei conſtat: eſtque ea huius cæleſtis vitæ meditatio, res Deo longè gratiſſima. Ideòque additur. REX LIGATVS IN CANALIBVS. Inter eſt enim, miſcetque ſe ſe, quemadmodum Spiritus ſanctus teſtatur eruditis cogitationibus, redamatque eum qui ſe amat, ac de ipſo continenter cogitat, & arctiſſimo charitatis vinculo cum illo conſtringitur, ac penè miſcetur: ſicut ſcriptum eſt. Qui adhæret Deo, vnus ſpiritus fit cum eo. in quo ſumma abſolutio virtutis & pietatis conſiſtit. Quare ſequitur. QVAM PVLCHRA ES, ET QVAM DECORA CHARISSIMA IN DELICTIS. Quia enim chariſſima eſt, idcirco ſupra modū & pulchra eſſe dicitur & decora, & delicijs, hoc eſt, omni cæleſti dulcedine & voluptate redundans. Tot porrò bona, totque & tam præclaræ virtutes alię alijs accumulatæ, & in vnum confluentes omnes, animi habitu efficiunt quam altiſſimum heroicūque & propè diuinum, quo de metaphoricè dicitur. STATVRA TVA ASSIMILATA EST PALMÆ. Quod autem ſequitur. ET VBERA TVA BOTRIS. Ideò dicitur, quia inter omnes iſtas virtutes quæ commemoratæ ſunt, illæ maximè eminent, atque conſpiciuntur, quæ ad alterū ſpectant, & referuntur: qualis eſt iuſtitia, charitas, liberalitas, & ſi quæ aliæ huius generis

neris sint. Nam hæ cum alicui inesse videntur, inui-
tant nos ad amandum ipsum, itaque incendunt, vt
cōiunctissimi cū illo esse cupiamus: ex quo est illud
quod sequitur. DIXI, ASCENDAM IN PALMAM, ET AP-
PREHENDAM FRUCTVS EIVS, ET ERVNT VBERA TVA SI-
CVT BOTRI VINEAE, ET ODOR ORIS TVI SICVT ODOR
MALORVM. GVTTVR TVVM SICVT VINVM OPTIMVM, DI-
GNVM DILECTO MEO AD POTANDVM, ET LABIIS AC-
DENTIBVS ILLIVS AD RVMINANDVM. Quod ideò dicūt
quia sermones bonorum virorum, quos de Deo ha-
bent, siue cum præcepta salutis edunt, siue cum flagi-
tia, & peccata hominum oratione castigant, siue cū
monent, siue cum consolantur, siue cum facta san-
ctorum, atque gesta commemorant: sunt suprà quā
dici potest dulcissimi. Nam vt scriptum est, Bonus
homo profert bona, de boni thesauro cordis sui. sic
laudati iusti ita respondent. EGO DILECTO MEO ET AD
ME CONVERSIO EIVS. Etenim laudes, quas sibi ab ho-
minibus tribui vidēt, vel nō agnoscunt, vel certè ita
sentiunt, si quid in ipsis sit laude & celebratione di-
gnum, id ipsis immerētibus, & prorsus indignis sum-
ma Dei benignitate fuisse collatum: totum alienum
esse, de quo sibi, si quicquam arrogant scelus se, & fa-
cinus inexpiabile commissuros putant. Itaque resi-
gnāt Deo plenè, atque integrè sua munera: itaque di-
cunt, se quod viuant, quod spirent, quod vigeant,
quod non postrema scelera admittant, quod se esse
bonos cupiant, aut quod omninò aliquem in ea re
conatum, & studium adhibeant, quod benè de ipsis
homines

homines & præclarè sentiant, id totum diuini muneris præcipuè esse, nihilq; proindè, aut laudis sibi, aut mercedis tribui deberi, sibi verò illud vnum curæ esse, idque maximè cauere, ne tantæ Dei aduersus ipsos indulgentiæ, atque charitati parum gratè respondisse aliquando reperiantur: ob eâq; causam dicunt, & profitentur, qui ipsos tantum nullo ipsorum merito amauerit, qui que tot bonis, atque beneficijs affecerit, quam maximè & ardentissimè amari quis potest, tam ipsum à se diligere, atque amari velle. Tamque penitè in illorum animis humilitas infedit, ut mundi laudes, & ad homines bonam æstimationè, popularesq; honores, quos qui paulò vel natura, vel virtute modestiores sunt, non nimis cupidè insequuntur, oblatos tamen sibi, & sponte ab hominibus attributos, nō ingratè suscipiunt: qui autem ambitiosiores sunt, infano propè studio & amore, & quibuscumque possunt, & modis, & rationibus quærūt, eos illi honores odio habeant, & tanquam maximā virtutis pestem fugiant, ledi que se putent, & insidias suæ virtuti fieri, cum ita vel laudantur, vel honore afficiuntur: ex quo sunt, quæ sequuntur. VENI DILECTE MI, EGREDIAMVR IN AGRVM, COMMOREMVR IN VILLIS. Ab his, scilicèt, inanis gloriæ, & adulatricis linguæ insidijs ac periculis remoti atque tuti. MANE SVRGAMVS AD VINEAS, VIDEAMVS SI FLORVIT VINEA, SI FLORES FRVCTVS PARTVRIVNT, SI FLORVERVNT MALA PVNICA. Erit enim multò præstantius, atque iucundius virtutibus alendis, atque augendis per ocium vacare,

vacare ac summo mane, id est, diligentia, atque vigilantia summa operam isti studio nauare, quam vanis hominum vocibus aures præbere, eorumque laudibus capi. IBI DABO TIBI VERA MEA. In quo vno, videlicet, omne bonorum studium, omnisque ipsorum cogitatio consumitur, si quomodo assequi id unquam possint atque perficere, ut in tota sua, & mente, & anima & corpore regnet, & dominetur Christus. Et ideo in portis, inquit, nostris. OMNIA POMA NOVA, ET VETERA DILECTE MI SERVAVI TIBI. Quasi ita dicentes, Quidquid in nobis est, siue ab te olim cum natura satum, siue industria nostra, & labore postea, te præcipue vires, atque opem suggerente, additum & adiectum, siue hoc nouum, siue antiquum illud, & vetus quemadmodum agnoscimus, habere ab te, ita reddimus tibi: seruireque tibi ipsi volumus, & animo, & corpore, & officijs omnibus sine intermissione, aut interpellatione aliqua. Hæc igitur perfecti sentiunt, & quoad homini in hac vita datum est, rectissime efficiunt: aliaque præterea, de quibus capite sequenti dicetur. quod quidem caput orditur isto modo.

SI CAPVT

IN CAPVT
CAPVT VIII.

VIS MIHI DET TE FRATREM MEVM, SV-
 GENTEM VBERA MATRIS MEAE, VT INVE-
 NIAM TE FORIS, ET DEOSCVLER, ET IAM
 ME NEMO DESPICIAT. APPREHENDAM
 TE, ET DVCAM IN DOMVM MATRIS MEAE.
 IBI ME DOCEBIS, ET DABO TIBI POCV-
 LVM EX VINO CONDITO, ET MVSTVM MALORVM GRANA-
 TORVM MEORVM. LEVA EIVS SVB CAPITE MEO, ET DEX-
 TERA ILLIVS AMPLEXABITVR ME. ADIVRO VOS FILIAE
 HIERVSALEM, NE SVSCITETIS NEQVE EVIGILARE FACIA-
 TIS DILICTAM, DONEC IPSA VELIT. QVAE EST ISTA,
 QVAE ASCENDIT DE DESERTO DELICIIIS AFFLVENS, INNI-
 XA SVPER DILECTVM, SVB ARBORE MALOSVSCITAVITE,
 IBI CORRVPTE EST MATER TVA, IBI VIOLATA EST GE-
 NITRIX TVA. PONE ME VT SIGNACVLVM SVPER COR-
 TVVM, VT SIGNACVLVM SVPER BRACHIVM TVVM, QVIA
 FORTIS EST, VT MORS DILECTIO, DVRA SICVT INFER-
 NVS AEMVLATIO, LAMPADES EIVS, SICVT LAMPADES
 IGNIS, ATQVE FLAMMARVM. AQVAE MVLTAE NON PO-
 TVERVNT EXTINGVERE CHARITATEM, NEQVE FLVMINA
 OBRVENT ILLAM, SI DEDERIT HOMO OMNEM SVBESTAN-
 TIAM DOMVS SVAE PRO DILECTIONE, QVASI NIHIL DE-
 SPICIET EAM. SOROR NOSTRA PARVULA EST, ET VBERA
 NON HABET, QVID FACIEMVS SORORI NOSTRAE IN DIE
 QVANDO ALLOQVENDA EST. SI MVRVS EST, AEDIFICE-
 MVSSVPER EVM PROPVGNACVLA ARGENTEA: SI OSTIVM
 EST, COMPINGAMVS ILLVD TABVLIS CEDRINIS. EGO MV-
 RVS, ET VBERA MEA SICVT TVRRIS, EX QVO FACTA SVM
 CORAM EO QVASI PACEM REPERIENS. VINEA FVIT PACI-
 FICO IN EA QVAE HABET POPVLOS. TRADIDIT EAM CV-
 STODIBVS, VIR AFFERT PRO FRVCTV EIVS MILLE ARGEN-
 TEOS.

TEOS. VINEA MEA CORAM ME EST, MILLE TVI PACIFI-
 CF. ET DVCENTI IIS QVI CVSTODIVNT FRVCTVS EIVS.
 QVAE HABITAS IN HORTIS AMICI AVSCVLTANT, FAC
 ME AVDIRE VOCEM TVAM. FVGE DILICTE MI, ET ASSI-
 MILARE CAPREA, HINNULOQVE CERVORVM SVPER MON-
 TES AROMATVM.

EXPLANATIO.



VANQVAM hæc capitū notis
 separantur: tamen non à nouo capite
 oratio ducitur, sed est cum superiore
 oratione coniuncta atque continēs.
 Reddit enim hîc sponsa causam, pro-
 pter quam ruri permanere vna cum sponso tâto pe-
 rè cupiat, quod proximè superiori capite dixerat se
 velle, atque cupere. Nam dicit se ad eam amoris ma-
 gnitudinem iam peruenisse, pati vt nullo modo pos-
 sit sibi vllum amore, & complexibus vacuū præteri-
 re tempus: sed qua libertate puellæ fratres suos ger-
 manos, & infantes humeris palam circungestant, &
 amplexu, atque osculo fouent: quam illis copiam at-
 que facultatem tribuit ipsa germanitas, fratrumque
 ipsorum puerilis ætas: item sibi in votis esse, domi, so-
 risque illius hære lateri semper, semperque ex ipsius
 ore dulcia oscula legere: cunctis qui id viderint, non
 solum non reprehendentibus, aut turpe ducētibus,
 sed fauentibus potius, & approbātibus. quod quoniā
 neque pudor patitur, neque mos permittit luce pa-
 lam in vrbe fieri, quoniamque ipsa hominū societas

Sf 2 multas

multas quotidie affert causas, quæ amantibus quominus continenter, sine quæ interpellatione se amēt, solent esse impedimento: idcirco rus, ac vitæ rusticæ libertatem amare. QVIS MIHI TE DET, inquit, FRATREM MEVM SVGENTEM VBERA MATRIS MEAE, VT INVENIAM TE FORIS, ET DEOSCVLER, ET IAM NEMO ME CONTEMNAT. Idque dicit, non tam interrogans alium, quam exoptans. Nam Hebraicus sermo hoc potissimum loquendi modo, in optādo uti solet. Optat autem quid? uti illo ut fratre minimo, atque pusione. Cuius verò causa? nullus ut se pudor, aut honestatis, & hominum iudiciorum respectus à deosculando prohibeat. At prohiberi se atque impediri, cur molestè fert? quia itinere quodam, iam ad summum amorem ascendit, & quia infinitum est quod amat, vni amori vacare studet. Sed cur hîc potissimum ista commemorat? quia reddere causam vult, quare, quod statim superius dixit, cuperet hominum cætus, atque vrbes fugere, quod sibi, scilicet, hunc amoris perpetuum usum, atque fructum eriperent. QVIS MIHI TE DET, FRATREM MEVM SVGENTEM VBERA MATRIS MEAE. Id autem est, ut quod attinet ad amori, atque osculis vacandi libertatem, te perinde uti possim, tanquam puero, ac mihi ipsi fratre germano, & ut quomodo cum illis agitur. INVENIAM TE FORIS ET DEOSCVLER. Id est, ut quamvis te foris inueniam, in media via, atque in ipsa publica luce liberum mihi sit, in tuos amplexus ruere, teque deosculari. ETIAM NEMO ME DESPICIAT. Nemo inquam mihi id probro, ac vitio vertat, & in

& in metaphora cœpta persistēs adiūgit. APPREHENDAM TE, ET INTRODUCAM TE IN DOMVM GENITRICIS MEAE, IBI ME DOCEBIS. Sic enim pueros sorores puellæ, si quando eos in via reperiunt, letæ & festinæ arctè complectuntur, atque dissuauiantur, in domumque deducunt, & cum deducunt, quid egerint, quove abierint, ipsos rogant: ad quæ illine rogati quidē, vt sunt pueri garruli, & ad loquendum prompti, balbutientes respondent: ac mira gratia cuncta miscēt, atque confundunt, sibi que ipsi in loquendo instant. quorum illæ singula verba, & risu, & osculo excipiūt: tum illis penmata dant, atque mellina, & illi ætati eiusmodi aptos prædulces cibos. Vnde sequitur.

ET DABO TIBI POCVLVM EX VINO CONDITO, ET MVSTVM MALORVM GRANATORVM MEORVM. Poculū ex vino cōdito melicratū, credo intelligit: cuius vsus erat in delitijs. Hæc igitur illa cum diceret, atque optaret, quæ tamen nullo modo, aut certè difficilè fieri posse videbat, tum desiderij magnitudine, tum desideratę rei difficultatis cognitione, atque ad eò fœminei sexus imbecillitate animo victa defecisse dicit, iamque deficiens opis implorandæ causa dixisse. LAEVA HVS SVB CAPITE MEQ, ET DEXTERA ILLIVS AMPLEXABITVR ME. Nam implorantis opem ista verba sunt, quamuis futuri temporis voce prolata: petens igitur se, vt collabentem manu & amplexu fulciret, exanimata corruit. Ipsam porrò collapsam, & ex deliquio animi somno oppressam, sponsus, quod ex oratione eius quæ sequitur intelligitur, molliter in lectulo collo-

St 3 casse

casse fingitur, & silentium fieri imperasse. ADIVRO, inquit, VOS FILIAE HIERVSALEM, NE SVSCITETIS, NEQVE EVIGILARE FACIATIS DILECTAM, DONEC IPSA VELIT. Qua de adiuratione iam superius, quod satis esse possit, dictum videtur. Hæc igitur ad istum modum gesta cum essent, iamque à scæna discessissent, rursus eodem redeunt, aut certè à Solomone quasi redierint, inducuntur, postremum huius carminis actû peracturi. Inducuntur verò è agro redeunt, atque ascendentes, mutuoque inter se cûplexi. Ascendentes autem dico, quia vt ante diximus, huius dramaticæ scæna ponitur Hierosolymis vrbe loco edito, atque sublimi posita. Horum ergo redeuntium, in scænâque introeuntium primo aspectu, fœminarum chorus commotus, & quod per familiariter inuicem amplexi, in scænam introirent admirans, in hæc verba prorupit. QVAE EST ISTA QVAE ASCENDIT DE DESERTO INNIXA SVPER DILECTVM. Et certè hoc sibi per omnes homines licere sponsa, paulò ante optabat: non licere autem, ægrè & dolenter ferebat, vsque eo, vt animo dicta sit defecisse, quod suo desiderio publicus mos obstaret. Quid igitur causæ est, quare eo nûc timore spreto, hominumque existimationis, ac publici moris nulla ratione habita, innixa super dilectû, in publicum prodire audeat: idque veluti suo iure vsurpet sibi, quod ei nemo vnquam quidem concederet? Est hoc ita natura comparatum, vt qui aliquândo acerba, ac luctuosa aliqua re obiecta, in ceroris magnitudine oppressi vel exanimati conciderint, vel
in

in infaniam versi, commoti fuerint, à recto mētis statu, ijdem postea luce menti reddita, recuperataque salute, sensu penè omni earum ipsarum rerum, quarum primo incurſu tam grauitè læsi sunt, extincto & amisso, eas non amplius reformident, ac vereantur. Vt si quis, exempli causa in honore & æstimatione, graui aliqua accepta ignominia læsus, ob eam causam infans ex dolore effectus sit: idem postea sanitati restitutus idem illud malum, quod tam illi graue, atque intolerabile antea videbatur, non modo leuissimè iam fert, sed etiam pro nihilo ducit. Etenim atrocitas ipsa mali, magnitudoque doloris in animū irruens, ipsumque opprimens, deinceps dolendi ex eo, atque mœrendi omnem facultatem, atque sensum eximit: id quod simili modo accidit corpori. Visu, enim audituue, aut nimia luce, aut immodico sono obrutis, hoc est, ijs ipsis rebus, in quibus proprium est eorum, & naturale bonum positum, cum modum exceſſerunt offensis, ita sæpè afficimur, ut vi sentiendi obſtupefacta, aut extincta, oculis, auribusque apertis & integris, neque audiamus ipsi, neque videamus. Quod intuens Solomon. (nihil enim ab eo in hoc carmine est positum, quod non ab ipsa natura rerum ductum fuerit & expressum) itaque id intuens, atque obseruans, quoniam sponsam primo induxerat grauitè dolentem, quod hominum existimationis metu impediretur, & palam, & passim sponſo suo frui: quoniamque ex dolore in animi deliquium inciderat: eandem post deliquium viribus recuperatis.

ratis inducit palam incumbentem viro suo, ipsumq;
 complexam, ac nihil minus quam hominum oculos
 aut iudicia curantem. Ex quo etiam hominum exi-
 stimationis, & iudiciorum contemptu est, quod fœ-
 minarum choro rei nouitatem admiranti, illa quæ su-
 periora dicenti. *QVAE EST ISTA QVAE ASCENDIT INNI-
 XA SUPER DILECTVM?* nihil ipsa respondit, sed ad suū
 virum conuersa. *SUB ARBORE,* inquit, *MALO EXCITAVI*
TE, IBI CORRVPTA EST MATER TVA, IBI VIOLATA EST
GENITRIX TVA. Aut quomodo, haud dissimilis senten-
 tia ex Hebræo ad verbum, in Latinum conuersum le-
 gimus. *IBI PEPERIT TE MATER TVA, IBI PEPERIT QVAE*
GENVIT TE. Quibus verbis hoc profectò dicit memi-
 nisse se nunc, illius diei, quo die primum in illum sub
 malo iacentem ipsa ruri errans casu cum incidisset,
 visa quæ nec opinato ab ipso esset, amari ab eo cœpta
 est, qua sub malo, inquit, mater tua, vt fama est, com-
 pressa olim fuerat, & grauida effecta: vel certè edide-
 rat te illa sub ista arbore, quemadmodum ferebatur.
 Dicit porrò hæc sponsa, aut certè dixisse fingitur à
 Solomone pro amantium ingenio, atque consuetu-
 dine aptissimè & conuenientissimè. Nam qui amant
 omnium eorum, quæ in amore illis vnquam contige-
 runt, actionum, scilicet, omnium suarum, & dictorū
 tanquam historiam propositam semper ante oculos
 habent: nulla quæ de re, aut cogitant sæpius, aut liben-
 tius loquuntur, quam de suis præteritis voluptatibus,
 easque effluere, aut sibi ex animo elabi, sæpius me-
 morando non sinunt, neque solū singuli secum,
 sed

sed vterque inter se ista conferunt, deque his mutuo colloquuntur, nullo sæpè, aut rerum aut temporum seruato ordine: sed pro re nata, aut pro eo, quod illorum animi libido fert, vt quidque illis primum se offert, vtque est illis quidque ad commemorandū dulcissimum, ita planè referunt. Sæpèque illud euenit, vt cum ad exitum, aut certè ad aliquem amorum suorum statum, vel miserum, vel fœlicem peruenerunt, commemorare gaudeant principia amoris sui ea, à quibus exorsi ad eum fœlicitatis, aut miseriarum gradum peruenerint. Sic ille Virgilianus pastor tandem indigno Nisè deceptus amore, inter alia.

*Sepibus in nostris parua me roscida mala,
Dux ego vester eram, vidi cum matre legentem.
Vix fragiles poteram à terra contingere ramos
Alter ab undecimo iam tunc me ceperat annus,
Vt vidi, vt perij, vt me malus abstulit error.*

ecloga. 8.

Sic hoc loco aptè, vt cætera Solomon, sponsam, quæ consequuta iā fuerat, ipsam vt suus vir summo amore diligeret, nunc inducit commemorantem prima exordia amoris sui. Itaque dicentem. SUB ARBORE MALO SVSCITAVI TE, IBI CORRVPTA EST MATER TVA. Nā cum ipsa secum, & cum animo suo quantum amaretur à viro suo cogitaret, ipsa rei adeptæ magnitudinis cogitatio naturæ quodam cursu, retrò mentem illius & animum reuocauit, ad ea, scilicèt, cogitanda, ex quibus ista manarunt: eademque effecit, vt omnia illa, vel tempora, vel loca, quæ ipsi, vel causam attulerunt amādi, vel quouis modo suffragata sunt in amo-

T t re

re grata, & recordatione & oratione prosequeretur.
 SVB ARBORE MALO SVSCITAVI TE. Recte id & καλα το
 πειπον. Nam fœdera amorum pastores sæpè feriunt in
 syluis, ibidemque pastores fœminæ fœtus suos plu-
 rimum edunt. Sequitur. PONE ME VT SIGNACVLVM SV-
 PER COR TVVM, VT SIGNACVLVM SVPER BRACHIVM
 TVVM, QVIA FORTIS EST, VT MORS DILECTIO, ET SI-
 CVT INFERNVS AEMVLATIO. His verbis sponsus gau-
 dio se atque lætitia efferentem sponsam monet, ne
 quid suo erga ipsam amore indignum aliquando cõ-
 mittat. Nam cum omnis lapsus in amore permole-
 stus est amantibus: tum postea quam vterque alteri
 sui copiam fecerunt, si alteruter ab altero spernatur,
 molestissimè ferunt. Quare amandi leges sponsus
 præscribit sponsæ, hoc potissimum loco atque tem-
 pore, quando, vt ex superioribus cõstat, ipforum mu-
 tuus amor ad summum peruenerat. PONE ME, inquit,
 VT SIGNACVLVM SVPER COR TVVM. Si enim ait, meus
 erga te amor, pro eo ac debet charus tibi, atque gra-
 tus est caueto, ne labe aliqua fidem, qua mihi es
 obstricta commacules, aut amorem imminuas, quo
 me hætenus es prosequuta. Volo vt me semper ge-
 stes in oculis: vt de me vno cogites exigo: quoque
 modo quis annulum signatoriũ inserit digitis, quos
 quisque in se, & facillimè, & sæpissimè videt, eodẽ mo-
 do, me tibi esse propositum cupio. Etenim, amo te
 ardētissima charitate quam plurimum. Amore verò
 eiusmodi, vt nihil est vehementius, ita nihil est ad
 quãuis minimas offensiones magis irritabile. Irrita-
 tus

tus porrò gignit suspiciones grauissimas, quo nullū est malum dirius, ipse adè vt infernus, ipsa que mors præ eis flocci facienda sit. Non enim igniti carbones sic corpus vrunt, atque illè animum a gritudine, atq; cura conficiunt. Sed conficiunt animum: amorem autem ipsum accendunt. Acciditq; hoc permirabile, vt amor suspicio addita ea, quæ maxima pestis amoris est, ipsum non modo non extinguat, sed etiā supra modum accendat & augeat, tantumque & talem efficiat, vt ne si flumina vniuersa, ipsumq; in eū infundas mare ardorem eius extinguere possis, aut te in libertatem vindicare valeas, vel periculo omnium fortunarum tuarum. Has igitur sponsus leges cum spōsæ tulisset, illa dū tacet probare eas, & sibi imponi placere indicat: & reticens isto propè modo loquitur. Hoc mihi curæ erit. intelligo enim in eo omnes spes, omnesque fortunas meas versari. at tu vicissim fororem meam curato, cuius me imbecillitas, ac solitudo sollicitat. nam, vt vides, neque forma satis, neq; compositione membrorum corporis præstat: itaque aliquid consilij atque rationis ineamus necesse est, quo illam in matrimonium collocare possimus. SOROR, inquit, NOSTRA PARVULA EST, ET VERA NON HABET: QUID FACIEMVS SORORI NOSTRÆ IN DIE QVANDO ALLOQVENDA EST. Id est, soror est mihi exiguo & perpusillo corpore, & quod deforme in fœmina habetur, depresso pectore & vberibus: quare provideamus oportet, quid facti opus sit in die quando alloquenda est: vel vt in Hebræo dicitur quando de ea

Tt 2 multum

multum, & sæpè loquendum est: id autem est cum de illa collocanda agatur. Tunc enim vtriusque coniugis parentes multa inter se agunt, & ab utroque ad alterum multi ultro, citroque commeant, iisdem de rebus acturi. Intulit autem Solomon hunc sermonem, hoc loco imitatus communem vitæ morem. Solent enim novæ nuptæ, posteaquam ex animi ipsarum sententia viris nupserunt, altero, aut tertio à nuptiis die dum calet adhuc lætitia, & nuptiarum celebritas: tunc enim facillimè, quemadmodum usu venire videmus, inducuntur parentes ad nuptui tradendos reliquos, si quos habent, filios: itaque in ipsis nuptiarum festis diebus solent novæ nuptæ, si quas habent sorores natu minores, vel ipsis audientibus, sermones, quosdam iacere de earum collocatione & futuro matrimonio: vel quia sua iam sorte contentæ, sororum eas cura sollicitat, vel certè ratæ, id quod sæpè euenit, ipsas natu minores sorores inuidētia & cura morde-ri. est enim id genus in hac præcipuè re maximè inuidū. itaque affici tacita inuidētia quadam ob fœlicitatem ipsarum, sibi quæ similem aliquam fortunam optare opinantur. Quare quo illis ex animo huiusmodi curam atque molestiam eximant, natu maiores sorores, eos, quos dixi sermones, iaciunt: ac similia loquuntur. *SOROR NOSTRA PARVULA EST, ET VBERA NON HABET, QUID FACIEMUS SORORI NOSTRÆ IN DIE QUANDO ALLOQVENDA EST. Sequitur. SI MVRVS EST, AEDIFICEMUS SVPER EVM PROPVGNA CVLA ARGENTEA: SI OSTIVM EST, COMPINGAMVS ILLVD TABVLIS CEDRINIS.* *Quod*

Quod vel sponsa ipsa dixit, vel sponsus roganti sponsa respondit. eius autē dicti hęc sententia est, vt corporis ista vitia, arte corrigāt, & quod illi minus à natura tributum est, ipsi suppleant, vestitus, atque ornamentorum exquisito aliquo genere. Quemadmodū si quis vetustos vrbis muros reficiens, eis turres atque pinnas addat auro illusas, aut egregia aliqua pictura ornatas, aut si quis ianuę fores vestiāt tabulis cedrinis. Et quoniam hęc loquens sponsa animaduertit, sibi sua pulchritudine satis commendatę opus non fuisse aliundē ascitis ornāmētis ornari, placuisseque ipsam viro suo nullo adhibito exquisito cultu, de eo sibi ipsa quodammodo gratulatur, ac subiicit. Ego MVRVS, ET VBERA MEA SICVT TVRRIS, EX QVO FACTA SVM CORAM EO QVASI PACEM REPERIENS. Id videlicet, dicens. Pro muro, & pro turribus argenteis, hoc est, pro aduentitijs & exquisitis ornāmētis suam sibi pulchritudinem fuisse: aut certē tantum fuisse viri sui erga ipsam amorem, & animi inductionem, vt quę sibi minus inerant bona, inesse tamen viderentur illi prę amore. Sed de sororis suę collocatione posteaquam dixit, iam quiddam adiungit, quod ad rem suam familiarem pertineat. VINEA, inquit, FUIT PACIFICO IN EA QVAE HABET POPVLOS: TRADIDIT EAM CVSTODIEVS, QVI AFIERVNT PRO FRVCTV EIVS MILLE ARGENTEOS. VINEA MEA CORAM ME EST, MILLE TVI PACIFICE ET DVCENTI IIS QVI CVSTODIUNT FRVCTVM EIVS. Nam solent nouę nuptę. (est enim hoc, vt cetera omnia ex media vitę consuetudine ductum & expressum.)

T t 3 Itaque

Itaque nouæ nuptæ solent, præsertim quibus res familiaris angusta est (est autem angustior ferè omnibus ijs, qui antequam paternam hæreditatem adirent, nupserunt.) ergo ille statim cum viris suis, vel ut suam illis curam probent, vel quia tunc primum rem familiarem habere & tractare cœperunt, solent agere de facultatibus suis, quo illas modo amplificare possint: quem in cultu, atq; victu sint adhibituri modum: quæque ratione pro suo censu vitam instituturi. Vnde sponsa nunc, etsi, inquit, nobis minus lauta res familiaris est: tamen non est ita angusta, quin supeditare nostris sumptibus possit. Nam, si Solomoni vinea ea, quam habet, non procul à nostra vinea in eodem vineto, reddit millenos aureos in singulos annos, & præterea alios ducenos ijs, quorum custodia illâ cōmisit: profectò par est, nos è nostra vinea, quæ ipsa à nobis colitur, quæque nobis solis tota fructificat vberiores redditus percepturos. Atq; hæc est plana horû sententia verborû: inest tamè in ipsis verbis obscuritatis non nihil. Itaq; ea illustremus necesse est. VINEA FUIT PACIFICO. Id est Solomoni. IN EA QVÆ HABET POPVLOS. Hebraicè בעלהמון Baal Hamon, quod ad verbum dominium, aut possessionem populorum significat. Videtur autem esse nomen vinei, ex eo sic dicti, quod plurimorû, ac maximè partis populi vineæ in eo essent. VINEA MEA CORAM ME EST, MILLE TVI PACIFICE ET DVCENTI IIS QVI CVSTODIUNT FRVCTVS EIVS. Argumentatur à minori, ac positis cōclusionis principijs, reticet, quod ex ipsis sequitur.

sequitur. additque eclypsim, ac recti sermonis inuersionem. Constat autem integrè, & oratio, & conclusio isto modo. Ex redditibus vineæ tuæ mille nummi tibi cedunt ô Solomon, & ducenti ijs, qui custodiunt fructum eius, vinea autem mea coram me est. Id est, mea industria atque opera custoditur, & colitur: nihilque ex eius fructu, aut cultor, aut custos decerpit. Igitur maiores nos ex ea percipiemus prouentus, quam percipit ex sua Solomon. Prætermittit autem dicere id, quod ei, quicum loquebatur, erat notum, & erat ad conclusionem efficiendam necessarium, scilicet, suam vineam, neque numero, neque genere vitium cedere Solomonis vineæ. Quæ cum illa dixisset, cumque his dictis videretur omnis ista actio concludi, pro valet & plaudite, Solomon clausulam addidit superioribus consentaneam. Nam facit sponsum hortantem sponsam suam, vt recinat aliquid, quod & ipsi voluptati sit, & riuales atque procos eos, si quierant, quos ipsorum inter se mutuus amor offenderet, mordeat, atque perurât. Hortatur autem his verbis. TV QUAE ES IN HORTIS AMICI AVSCULTANT, FAC ME AVDIRE VOCEM TVAM. Vocat autem amicos eiusdem instituti socios suos, pastores, scilicet, reliquos, è quibus nonnullos habebat æmulos amorum suorum. Igitur, inquit, quoniam illi te auscultant. FAC ME AVDIRE VOCEM TVAM. Hoc est, illis audientibus, fac vt ego te audiam canentem aliquid, quod mutuum amorem nostrum testetur. Cui illa obtemperans è vestigio. FVGE, inquit, DILECTE MI, SI-

MILIS

MILIS ESTO CAPREAE, HINNULOQUE CERVORVM SUPER
MONTES AROMATVM. Fuge, id est festina, ex proprietate

sermonis Hebræorum, apud quos receptum est, alia
verba pro alijs poni, cum res significant, aut actiones
affines aut coniunctas, aut quarum vna ex alia sequi
solet. Sic consolari dicunt pro dolere: quoniā ijs qui

Esa. c. i.

dolent, consolatio adhibetur: vt in Esaia illo. Ego
consolabor de hostibus meis. Sic mentiri pro subijce
re se victori: quoniam, qui se ita subijciunt adulantes

Psal. 65.

multa mentiuntur. Quale est illud Psalmi: Mentien-
tur tibi inimici tui. Itemque illud: Filij alieni mentiti

Psal. 7.

sunt mihi. Sic etiam fugere, pro festinare: quoniam,
qui fugiunt, festinant maximè. Ergo optat, idque se

optare cantu testatur, vt quando domo ipsum abesse
contigerit, maturet redditum sponsus: & quanta ce-

leritate hinnuli fugam arripiunt, tanta in redeundo
vtatur ipse, id est, quanta potest maxima. Quæ dum

optat, satis testatur à se ita ipsum amari, vt ne ad pun-
ctum tēporis velit diuelli ab eo. Qua attestatione &

professione amoris sui, neque sponso ipsi quid-
quam gratius accidere potuit, neque pasto-

ribus riuilibus dirius atque molestius.

Sed rursus à principio hoc ipsum
caput exponere ordiamur.

* *

EXPLA-

OCTAVVM.
EXPLANATIO.

337



VIS MIHI TE DET FRATREM MEVM, SV-
GENTEM VBERA MATRIS MEAE, VT INVE-
NIAM TE FORIS, ET DILSCVLER, ET IAM
NEMO ME CONTEMNAT. Desiderāt hoc
loco in persona sponsæ perfecti, vel
certè dum desiderare dicuntur, quid illa amoris per-
fectione præditi homines desiderare debeant, admo-
nentur, aut potius, vt id quod res est, semel dicamus,
ista desiderij indicatrice oratione, quid illi efficiant,
quoque modo se in amore gerant, explicatur. Itaque
desiderant, sibi vt iam per omnes homines liceat om-
ni tempore, atque loco palam amare Deum: hoc est,
non solùm tacitè secum de Deo agere, sed apud om-
nes se illius amatores esse profiteri, eaque sola sem-
per, & agere, & dicere, quibus hic suus amor testator
& illustrior efficiatur: siue illa homines probent, siue
quod sæpè contingit, irrideant, varièque interpreten-
tur. Etenim plurimæ sunt aduersus Dei syncerissi-
mas, & æquisimas leges inductæ in vitam hominũ,
& praua viuendi consuetudine corroboratæ senten-
tiæ, quas cuncti boni odio prosequuntur: perfective-
rò in amore Dei & virtute præstantes viri palam ne-
gligunt, atque despiciunt. Ipsa enim illos magnitudo
charitatis, qua feruent, in sublime efferens, superio-
res ipsos facit, non solùm corporis sui, eiusque cupi-
ditatem omnium, sed etiam populi iudiciorum atque
sermonum, eademque tribuit ipsis iustam, & excel-

Vv lenti

lenti virtutis licentiā debitam, cuncta semper suo arbitratu, & agendi, & dicendi. Itaque quod hīc figuratē describitur, quoad rerum natura patitur, ipsi faciunt atque imitantur: cum Christo, tanquam cum fratre germano in oculis omnium dulcissimē & coniunctissimē viuunt, neque quid de se alij iudicent, curāt: imō constantia, & libertate in amando, ipsa quē tandem veritate assequuntur, vt qui illorum amoribus obtrectabantur antea, iam ipsi sibi displiceant, illos quē admirentur: ora quē sua inopia à detrahendo & obloquendo ad laudandum & celebrandum conuertant, dicant quē & prædicent, illos ex meliore, ac diuino quodā genere homines Deo similes esse, neque in eo fanē falluntur. Sic enim censendum est, qui ad hanc magnitudinem peruenerunt amoris, qui quē id iam assequuti sunt, vt spiritu & veritate Deum colentes, nulla aut rerum humanarum, aut hominum iudiciorum ratione habita, & priuatim, & publicē in Dei amore occupētur, eos fratres Christi germanos esse, ac proindē Dei filios prædicari & haberi, vt disertē Paulus testatur de hoc genere ad Romanos scribēs: Qui spiritu Dei agūtur, hi filij Dei sunt. Verum enim verō, quamuis nulla res sit, quæ istiusmodi homines arcere, aut submouere queat ab assidua charitate, & meditatione Dei: quamquam quē vel in medijs vrbi bus, medijs quē hominum cætibus otium sibi ad vacandum Deo, & locum vacuum constituent, vt potē, qui ipsi secum circumferant altam quandam quietē, ac omnium earum rerum, quæ perturbare animum possint

possint solitudinem: tamen quodcumque illis facultas datur, vitandi atque fugiendi hominum cætus, à quibus ipsi semper animo absunt, id illis gratissimum accidit, facultatemque eam amandi Deum: amore non solum non interrupto, sed ne interpellato quidem, sibi oblatam cupidissimè amplectuntur. Itaque quod in ipsis est, vrbes fugiunt, solitudines amant, desertisque & ab hominum congressu remotis locis, vt alijs quidem videntur soli, at vt se habet ipsa res, magnis diuinarum & cælestium rerum gregibus stipati, ætatem in amore dulcissimo degunt. Quare cum soli sunt holocaustum ex se Deo integrè offerunt, traduntque se charitati super aram totos penitus inflammandos. Cum autem in vrbibus & inter homines versantur, idem quidem illi sacrificium perficiunt: sed dum timent, ne quid sibi ab hominibus obijciatur, quod ipsis modo aliquo sit impedimento, quominus integrè & perfectè id holocaustum Deo offerant, excitati atque commoti ab eo ipso desiderio inhærendi semper Deo, quod in ipsorum animis continenter versatur, ista sæpius loquuntur atque iterant. QVIS DET TE MIHI FRATREM MEVM SVGENTEM VBERA MATRIS MEAE VT INVENIAM TE FORIS. Atqui diuina natura Dei intus, extraque omnem mundum complexa non modo fouet ipsum, atque continet, & cum vniuersas, tum singulas illius partes regit, atque temperat: sed existit in earum vnaquaque & emittit ex ea, atque vibrat, tanquam radios, claras quasdam & illustres sue diuinitatis species. Sed quam

V v 2 uis

uis in sit, atque eluceat Deus in vniuersi natura: tamē quoniam ea nullo modo tanta est, vt cōtinere ipsum quātus est possit, aut vllō suo bono Dei omnem perfectionem, atque bonum exprimere: idcirco, qui ex rerum naturæ inspectione gradum sibi ad ascendendum ad Dei contemplationem & amorem constituent, non solum cognitionem de Deo habent imperfectam, & ab eo quod res est, multum distantem, sed etiam, quod in rebus creatis & visibilibus insistant, in eisque perscrutandis & inspiciendis morantur, periculum interdum adeunt inhærendi tāquam in visco, sic in amore earundem. Quam ob causam viri perfecti, qui omnes istas perueniendi ad cognitionem, & charitatem Dei explorauerūt iam, & obierunt vias impetrare à se, vel ab eo amore potiùs, qui ardentissimus erga Deum in ipsorum animis dominatur ac regnat, nō possunt, vt hac imagine Dei, quæ ad ipsorum oculos ex mundi ornatu, & ad eorumdē animos ex fidei doctrina confluit, ad cognoscendum contenti, nihil aliud præterearequirant. Sed quo magis profecerunt in amore quoque sunt magis perfecti, eo auent magis, auent dixi? estuant potiùs desiderio atque affligantur ita, vt nisi re adepta non cōquiescant, videre ipsum per se Deum. Id autem est, quod in hoc carmine dicitur FORIS, hoc est, nō in rerum vniuersitate veluti inclusum, sed extra hunc mundi ambitum, supraque æthereos omnes orbes dominantem cunctis, & præidentem rebus, nuda facie, & vt Paulus scripsit, Reuelata gloriā eius speculantes.

lantes ipsum videre: & in eandem imaginem transformari. quod profectò continget illis cum hac vita finita, quæ cum morte atque miseria omnia habet communia, ab eaque demigrantes in purissimis cæli regionibus vitam vixerint immortalem, atque beatam. quod cum euenerit, illud etiam eueniet, quod sequitur. ETIAM NEMO ME CONTEMNET. Nā de illa beata futura vita est, quod Paulus ad Colossenses scripsit: Cum Christus apparuerit, vita nostra, & vos apparebitis cum ipso in gloria. Ad hæc verò mortalis vitæ tempora pertinet, quod idem ad Romanos scribens, Omnia, dixit, subiecta esse vanitati. Vanitatem autem cum nominat Hebraica proprietate, corruptionem, instabilitatem, vicesque fortunæ alternas, & vitæ casus acerbos, & luctuosos intelligit. Quæ cū omnibus qui in hoc saeculo iactamur, communia sunt: tum nescio quomodo maiore impetu, ac magis infesto agmine in bonos inuadunt: ita vt, quod ad eum fructum attinet qui è terrenis bonis percipitur, illi maximè omnium miserrimi, & despiciatissimi ferè semper extiterint: quemadmodum pro certo Paulus scripsit. Nam si in hac vita tantum in Christo sperantes sumus, miserabiliores sumus omnibus hominibus. Et alio in loco ipsum tanquam agmen malorum infestum bonis producens, atque explicans. Sancti, inquit, ludibria & verbera experti, in super & vincula, & carceres lapidati sunt, secti sunt, tētati sunt, in occasione gladij mortui sunt: circuierunt in melotis, in pellibus caprinis egentes, angustiiati, afflicti, quibus

V v 3 dignus.

Coloss. 3.

Rom. 8.

1. ad Cor.

15.

Hebr. 11.

dignus non erat mundus. Itaque in hac vita boni tot modis contemptui habentur, at contemnet illos nemo, imò potiùs omnes admirabuntur, & beatos prædicabunt cum immortalitatem adepti, claraque luce fulgentes, & quod caput bonorum est cum Christo ipsorum capite, amoris atque eiusdem spiritus fœdere, nullo vnquam tempore dirimendo, colligati, atque coniuncti, omnibus impijs, atque bonorum inimicis, atque aduersarijs sempiterna pœna affectis in lætitia diuina, in infinita cælestium bonorum copia, in claritudine, in regno fœlicissimum eum ducet temporibus sempiternis. Opportunè autem ista commemorata sunt à Solomone hoc potissimum loco. Nam tametsi vitam hanc mortalem cum immortalitate commutare omnes cupiamus: tamen perfecti viri sunt, qui propriè cum Paulo dicunt: Desideriũ habens dissolui, & esse cum Christo. Et certè per omnes amoris Dei gradus ad summum euecto homini quid restabat aliud, nisi, vt id desiderare se diceret, cuius vnus consequendi causa tantos à principio suscepisset labores? Hoc est, vt optaret foris, id est, extra corporis huius custodiã, & terræ tenebrosa loca omnia inuentum videre Deum, in quo vno pietatis præmium collocatũ est, & vita beata. Idenim certè Paulus, vt potè, qui perfectus planè in amore esset, cū ad metam peruenisset sui cursus, optabat: Bonũ, dicens, certamen certavi, cursum consummaui, de reliquo repõsita est mihi corona iustitiæ, quam reddet mihi in illa die iustus iudex. Et quoniam iam vltior gradus

Philip. 1.

2. ad. Tim. 4.

gradus quem adderet, quoque ascenderet nullus reliquus erat: rectissimè Solomon, ut huius ultimi gradus explicationem compleret, quæ ad ecstasim pertinebant, adiecit: dicens, LAEVA EIVS SUB CAPITIS MEO, ET DEXTERA ILLIUS AMPLEXABITUR ME. Et quæ sequuntur. ADIVRO VOS FILIAE HIERUSALEM, NE SVSCITETIS NEQUE EVIGILARE FACIATIS DILECTAM, DONEC IPSA VELIT. Quæ quā vim habeant, etsi superius dictū à nobis est, tñ illud necesse est ut dicamus modo, minus accuratè hîc, quam superius, minusq; multis verbis atque obtestationibus cauere quiescentis in amore sponsæ tranquillitati, atque somno, idque fieri, non quod minus graue malum sit perfectos, quam incipientes, aut proficientes à dulcissimis suis studijs, & sanctissimo illo contemplationis ocio retrahere: sed quod minus omninò metuendum sit, atque formidandum, ut auocari, atque retrahi vllis interpellationibus possint perfecti, utpotè, qui sint præditi maiore, & firmiore virtute quam cæteri. Quæ verò deinceps sequuntur, usque ad capitis finem, non continent aliquem gradum amoris nouum, qui nullus iā erat, sed eiusdem tertij gradus qui explicabatur, absolutionem continent, & ut ita dicam, quandam expositionem. Nam explicant perfectorum cum ad summum amoris peruenerunt proprios quosdam atque intimos sensus, legesque amandi huius generis proprias. Ac primum ex illorū persona sic dicitur. SUB ARBORE MALO SVSCITAVI TE, IBI CORRUPTA EST MATER TVA, IBI VIOLATA EST GENITRIX TVA. Paulus charitatem

ritatem Dei erga genus humanum admirans, ac præ
 dicans, ea maximè ratione illam amplificat, quod ad-
 uersus eos, qui Deo & studijs aduersabantur, & mori-
 bus Deus beneficus, ac largus extiterit. Ita enim ad
 ad Rom. 5 Romanos scribit. Commendat Deus charitatem
 suam, quod cum inimici essemus, reconciliati su-
 mus Deo per mortem filij eius: Et quidem est hæc
 diuinæ charitatis erga nos cum propria laus, tum ve-
 rò ita magna atque ampla, vt ea maior ne cogitari
 quidem vlla possit. Nam si quod Christus veridico,
 Ioan. 15. ore dixit. Maiorem hac dilectionem nemo habet,
 quam vt animam suam ponat quis pro amicis suis.
 qui quod ipse fecit pro inimicis atque hostibus, atque
 adeò pro ijs, qui ad vetus odium nouum & immane
 addentes flagitium necandi illius & interimédi con-
 silium & inierunt, & ad exitum perduxerūt, mortem
 oppetijt, is vel ipsam charitatem vicisse, nouumque,
 & antè id tempus inauditum amoris exemplum in-
 duxisse in vitam putandus est, sine dubio. Quod si
 quomodo Deus à principio decreuerit, hanc suam
 tam eximiam in homines charitatem opportuno tē-
 pore declarare, si que facti huius momenta omnia ri-
 te ponderare quis velit, tam multa profectò in eo
 inueniet testimonia amoris Dei, vt charitatis diuinæ
 lumen non magis ostendatur nobis ex eo quod plu-
 rimum ad ostendendum, fidemque faciendam va-
 let, quod pro inimicis mortuus est, quam ex eo quod
 à principio ipsi causam attulit, vt pro illis mori vellet,
 atque decerneret. Nam vt multa præteream que hac
 in

in re insunt, & quamuis copiosè, & rhetoricè dici, & exaggerari possunt, quanti illud amoris signum fuit: quam magni, quam testati, quam se efferentis, neque ullis iniuriarum obicibus cohiberi se patientis, quod eo ipso tempore quo maximè iratus esse debuit hominibus, quod, videlicèt, dæmonis fallacia monita & consilia sequuti defecissent ab ipso. ipso itaq; tempore, quo illud scelus flagrabat, scelusque propè omnium maximum, & quod non exemplo solùm, sed contagione atque labe vniuersæ hominum posteritati erat nociturum, tantum valuit apud Deum sua bonitas, isque amor quo homines prosequeretur, ut quo eos liberaret à morte, in quam ipsi se præcipites dederant, hominem se fieri, & ab ijs ipsis, quos meritò auersabatur nasci, eosque parentes & maiores habere, ac denique quas illi meriti erant pœnas, pro omnibus luere, ac subire voluerit: idque se facturum pollicitus fuerit, illis ipsis qui peccauerant, eoq; ipso tempore, quo illos sceleris ipsorum, atque peccati arguebat. Et ad serpentē, inquit diuinus scriptor Moses, cōuersus inimicitias, dixit, ponam inter te, & mulierē, semen tuū, & semen illius, tu insidiaberis calcaneo illius, & ipsum cōteret caput tuum. Ipsum autē Christus est, beatum, videlicèt, semen à prima illa sœmina peccati principe, longa generationum serie, multa post sæcula nasciturum. In quo quot res sunt, quas qui ritè consideret, iure obstupescat? Primum suscepit Deus curam salutis eorum, qui à se defecissent. Deinde, qui defecissent nulla maiori vi compul-

Gene. 3.

X x si,

fi, sed leuitate quadam summa, & certè ingratitude
ne incredibili inducti. Præterea, qui se, hoc est, condi-
tore ipsorum, & amatore, & benefactore relicto dæ-
monis, cui nullo erant obstricti beneficio partes es-
sent sequuti. Ad hæc incubuit in eam curam, eo ipso-
met tempore, quo ipsorum aduersus se maximè re-
cens erat ingratitude & impietas. Deinde, quæ amā-
ter erga illos facere, & benignè decreuerat, eis ipsis
quos exosos habere oportebat, & certè peccati meri-
to habebat maximè exosos & prolixè est, & statim
pollicitus. Postremò, quod omnia superat, cum va-
rijs eos posset seruare modis, suæ erga illos caritati
fatis fieri posse non credidit, nisi ipse se eorum saluti
immisceret: remque eam omnem administraret per
se, factusque ipse homo, & humanæ conditionis su-
biens labores, quo illi benè beatèque viuerent mor-
tem ipse acerbam, & ignominiosam obiret. Atque
quemadmodum ab illo primo delicto, quo humani
generis tanquam radix vitiata est, & infecta, quid-
quid postea peccatur, vel priuatim vel publicè deri-
uatur & ducitur, omnesque nostri ex illo fonte re-
dundant mœrôres, atque dolores: sic salutis item no-
stræ, & à peccato liberationis, beatitudinisque omninò,
& fœlicitatis humanæ eodem illo tempore iacta sunt
fundamenta. Illa enim promissio Dei de futuro ali-
quo, qui à muliere genus cum duceret serpentis ca-
put, id est, impotentem illius dominationem con-
fringeret, Deum multa post sæcula in terras adduxit,
indutum humanis membris, id est, Christum nobis
dedit

dedit summum, atque vnicum & libertatis nostræ vindicem, & diuixæ vitæ nobis atque beatissimæ auctorem. Vt qui cōtempletur sanctorum & Deo charorum hominum virtutum præstantiam, & animi ipsorum dotes egregias, atque diuinas, illudque quod ex his tanquam viuis lapidibus, aureum atque gemmeum, & omniegregio opere, & artificio visendum conficitur ædificium: is si ista reuocet, ad suos fontes inueniat, illam omnium bonorum altitudinem & exaggerationem, qua vsque ad diuinitatis consortiū extollitur humana natura, & quidquid postea à Deo hominum causa est perfectum tanquam radicibus, niti illis rebus, quæ promissæ à Deo & stabilitæ sunt, illo funesto & eodem fœlici humano generi die, quo interdicta illa arbor est violata: eandemque ipsam arborem testem fuisse reperiatur, tum nostræ erga Deum summæ impietatis, tum ipsius erga nos clementiæ incredibilis: iudicaturusque sit esse verissimum, quod Paulus in eadem quidem scripsit causa, sed ad diuersa tempora spectans, nimirum, superabundauisse gratiam, vbi delictum abundauit. Quis enim id vnquam *Rom. 5.* non dico sperare futurum, sed omninò cogitando sibi fingere, aut in animum suum inducere auderet, quisve crederet, fraudibus concipiendis, & à Deo se ingratissimè alienando, prouocaturum fuisse hominem tantam illius erga ipsum beneuolentiam, tantumque amoris incendium in diuino pectore excitaturum? Quisque ista consideras, secumque reputans, non & ipse amore ardet, & charitatis aduersus

X x 2 Deum

Rom. 9.

Deum flammis corripitur? AEquum certè est, nos omnes corripieo igne atque ardere. Sed quamuis ad omnes retractare ista secum, & meditari pertineat: tamen id quomodo quidem fieri decet, illi soli faciunt, qui arcto charitatis vinculo cum Deo coniuncti ab ijs diuinis donis, quibus abundant, admonentur atq; excitantur, vt cogitent & inquirant, qua sua industria, quoque merito suo ad eum, in quo sunt, necessitudinis cum Deo & amoris gradum peruenerint: statim enim vident, vtpotè quorū mens cælesti perfusa lumine, verum quod est continuò despiciat, itaq; vident statim vasa misericordiæ, quod Paulus Hebraica scripsit proprietate, se esse: id est magnas diuini amoris, atque misericordiæ opes continentia vasa: idque videntes dum beneficia in se diuina alia ex alijs considerant, retroque memoriam referunt quā longissimè possunt, ipsa rerum inter se nexarum serie deducti ad ipsum caput, vnde iste Dei effusus amor proferre se in lucem cœpit, perueniūt: hoc est, cogitando incidunt in id, quod Deus sibi voluit esse principium declarandi, atque testificandi suum in homines ex tota æternitate iam conceptum amorem. Quò cum peruenerūt intelligunt, quod ab alienare Deū ab ipsis maximè debuit, primū hominis scelus, quod fuit omnibus nobis, qui in illo continebamur scelus commune, id Deo causam attulisse, seu potius sumpsisse sibi ex eo Deum atque arripuisse causam humanum genus multò effusius, quam à primò facere statuisset amandi: & quod ad dissidium & inexpiables.

biles inimicitias suapte natura valebat, Deo seruandorum hominum studio magnoperè incenso, non solum arctioribus necessitudinum vinculis cum eo coniunxisse nos, sed permutatione quadam, & communione bonorum facta, nostra nobis cum illo mala, ipsius item nobiscum cum ipso bona communia fecisse. Quarum ex consideratione rerum & consiliorum summi Dei maxima admiratione afficiuntur, eiusque admirationis indices sunt voces istæ. *SUB ARBORE MALO EXCITAVI TE, IBI VIOLATA EST MATER TVA, IBI CORRUPTA EST QVAE GENVIT TE, siue. IBI PERIT TE MATER TVA, IBI EDIDIT TE TVA GENITRIX.* Nam inquiunt cum tua erga nos ingentia merita, cum nostra indignitate conferimus: cumque ad nos ipsos contuendos, quos tot beneficijs & tanta liberalitate prosequeris, conuertimus oculos: quid in homine amando sequutus fueris auemus cognoscere. Itaque in eam inquisitionem ingressi, quæcumque; vel hominibus insunt, vel ab eisdem gesta sunt intuentes, aciem tandem mentis nostræ referimus, ad primum nostri generis ortum, quo in ortu, atque principio clare videmus ut nos amares, nobisque benefaceres inductum fuisse te à sola bonitate tua, adeò, ut cum in nobis nihil esset, amorem quod prouocare posset, inessent autem contra quamplurima, quæ ad incitandum odium, & accendendam indignationem valerent: quod peccandi nos, & abs te deficiendi principium fecimus, id tu tibi initium esse volueris, ad omnes amoris opes in nos effundendas, & quæ ar-

X x 3 bor

bor impietatem erga te nostram vidit, eadē testis fuerit maximi tui atque summi de nostra salute promissi. Ibi enim excitauimus te: ibi tuam in nos charitatē in lucem produximus: ibi vt se efferret iste tuus amor, & vt quātus esset testaretur, effecimus. Ibi peccando occasionem dedimus tibi, vt quo hominem redimeres, ipse homo fieri decerneres: & quia nos prācipitauimus in summas misérias, vt ipse velles te ad nostram humilitatem deijcere: & quia te fugiebamur, vt quo nos apprehenderes, in animum ipse induceres nostrum corpus induere, & inter homines ex hominibus nasci: ibi corrupta est mater tua, ibi etiam peperit te mater tua: corrupta est serpentis suasu peperit te tuo dono, atque beneficio. Ibi enim profectō cunctorum viuientium mater Eua, cum te in eius semine atque posteritate numerari velle pollicitus es, quodammodo peperit: tuncque videri potes natus fuisse, quando ex eo tempore virtus natiuitatis tuæ cōcepit esse hominibus salutaris. Nam in cuius nascituri fide, iā tūc tantū bonæ spei lumē exoriebatur: is certē natus iā tūc censeatur, & certitudine promissi, & efficacitate benefaciēdi. Ibi igitur peperit te mater tua, cumq; te peperit, simul edita in lucē est omnis nostra spes, omnis salus, omnis fœlicitas. tantumq; peccādo propter excellentiā tuā bonitatis cōsequuti abs te sumus, quantū prāclare agēdo vniuerſi homines per omnē vitam promereri nūquam possemus. Atque hæc iusti, maxima iam, videlicet, cū Deo charitate coniuncti, recolentes primā initia hu-

ius

ius amoris fui, & simul Dei admirantes benignitatē commemorant: quibus à Deo respondetur hoc modo. PONE ME VT SIGNACVLVM SVPER COR TVVM, ET VT SIGNACVLVM SVPER BRACHIVM TVVM, QVIA FORTIS EST, VT MORS DILECTIO, ET SICVT INFERNVS AEMVLATIO. LAMPADES EIVS, VT LAMPADES IGNIS ATQVE FLAMMARVM. AQVAE MVLTAE NON POTVERVNT EXTINGVERE CHARITATEM, NEQVE FLVMINA OBRVENT ILAM, SI DEDERIT HOMO OMNEM SVBSTANTIAM DOMVS SVAE PRO DILECTIONE, QVASI NIHILVM DESPICIET EVM. Quibus verbis admonet illos Deus, vt quanto se maioribus bonis ab ipso affici intelligūt, quantoq; apertius vident, ipso cum illis clementer, atque benignè agente, à summa non solū inopia, sed etiam indignitate & vilitate ad clarum & altum locum, ad ingentesq; diuitias se esse perductos: tanto maiorem solitudinem, & curam adhibeant, vt ne quid vnam vel ad voluntatē, vel ad animi cogitationē admittant, quod non eo dignitatis, atque claritatis gradu sit dignum. Sed quemadmodum piè se erga ipsum & amanter gerendo, tantum apud ipsum gratiae locum consequuti sunt, eos vt pro intimis amicis haberet: sic sciant, & intelligant in eo se statu consistere, eumq; diutius locum retinere nō posse, nisi continenter & ardenter amando. Neque verò quia ipso tam amico & penè socio, dulcissimè & familiarissimè haëtenus vsi sunt, idcirco sibi deinceps remissius agere, licitum putare esse debere: neve existimare ipsi, si quid deinceps peccauerint, atq; deliquerint, ad
veniam

*Augusti.
episto. 29.*

veniam aditum statim facillima ratione patere. Quo enim illos maiore amore & beneficijs prosequitur, eo religiosius, ac magis sollicitè ab ipsis coli se velle: & quoniam illos ad intimam suam familiaritatem admisit, idè ipsum attentius inquisiturum in singula ipsorum facta atq; dicta. Antea si quid peccabatur, id aut humanæ fragilitati, aut ignorationi potuisse concedi: iâ verò qui tanta luce perfusi sint, quiq; tot gratiæ, & charitatis donis sint ad bene agendum muniti, ijs ad inscientiam, atque imbecillitatem causandâ vix vllum locû relinqui. Quo magis sua sponte deinceps quoque minus, aut cupiditatis impulsu, aut alterius cuiusquam hortatu peccaturi sunt, eo peccaturos maiori periculo. Antea què admodum in ampla familia industriæ & officiosæ puellæ gratæ esse solēt familiæ domino, sic illos gratiæ, & amoris locû quendam apud se obtinuisse, iam eos pro coniuge habere, & quidem legitimis ceremonijs, & verissimo fœdere iuncta, & copulata secum coniuge. Quare admonere illos ut videant, qualis amor vxoris esse debeat erga suum virum, tales eos erga ipsum esse debere: certè ipsum animum maritalem eis, & amorem exhibiturum. quo amore, ut nullus est ardentior amor, ita nullus est irritabilis magis. Excubare enim semper viros in vxorum custodiam: neque ut alia à se illas, sed ut easdem secum diligere: ex quo effici, ut quo magis ipsas amant, eo maiorem, de eo quod ab eis fit contra coniugij fidem, dolorem & indignationem concipiant: eoque tum zelo illos & furore succendi, ut neque

que precibus placari possint, nec precio. ignem infusa aqua extingui: illorum, verò amore, atque ira cōstuatem & ardentem animum, ne ipsis fluminibus infusis posse mitigari. quæ duo maximè sæua, maximèq; inexorabilia esse videntur, mortem, & infernum pene exorari facilius illis posse. Et profectò res ita se habet, maximo periculo ab ijs peccatur, qui peccandi causis fere omnibus carent, quales sunt viri perfecti, & in altissimo charitatis gradu constituti. Nam quibus multa dedit Deus, ab ijs plurima exigit: & quo maiora in illòs beneficia contulit, eo ægrius fert se negligi ab illis, vixq; exorari se sinit, vt illis ignoscant. Nam in hoc genus hominum propriè, vt mihi videtur Paulus inuehitur, cum ad Hebræos magna seueritate, & verborum, & sententiarum scribit. Impossibile est eos qui semel sunt illuminati, gustauerunt etiam donum cæleste & participes facti sunt Spiritus sancti, gustauerunt nihilominus bonū Dei verbum, virtutesq; sæculi venturi, & prolapsi sunt, rursus renouari ad pœnitentiam. Quod quamuis nō sit *αδυνατον* quomodo eo verbo Dialectici vtuntur, est tamen quomodo sacræ loquuntur literæ *αδυνατον* id est, arduum & perdifficile. Nam, qui nulla maiori vi compulsi nullaq; vehementiori cupiditate obcæcati, aut in fraudem inducti vltro se & sua sponte in peccati foueā demittunt, cū alioqui essent magnis gratiæ præsidijs, aduersus omnes hostiles insidias & insultus muniti, scelus cōcipiunt prope inexpiabile. Vix enim digni sunt, quibus detur venia petentibus:

Y y aut

aut certè quoniam magnum semper fuit in clemencia Dei paratum perfugium ijs, qui se ab impicitate reuocant, & ad iustitiam regredi volūt, cuiusuis illi sint vel conditionis, vel ordinis, sunt certè isti, de quibus loquor vix digni, quibus hoc ipsum, vt displicere ipsis sua male facta incipiant, & vt deferere eam vitam & prauè à se factorum pœnitere velint, Deus in animum, atque in voluntatem immittat. At quod istorum salus vbi semel peccato aliquo amittitur, tam sit recuperatu difficilis, non tam ex Dei ingenio. (est enim placabilis & propitiabilis natura sua Deus, & ad benefaciendum semper intentus.) itaque non tã ex Dei ingenio contingit, quam ex ipsius, & delicti, & delinquentis ratione atque natura. Sunt enim omnes huiusmodi lapsus lætales atque mortiferi: propterea quod qui ista peccāt, peruersa animi atque voluntatis obstinatione quadam omnia fere salutis & bonæ valetudinis, quibus erant circumsepti præsidia, omniaque illa dona Dei, quæ in se habebant, quorū ad animos in officio continendos maxima vis esse solet, repulerunt à se & peccando veluti superarunt, atque vicerunt. Itaque suo facto effecerunt deinceps vt sibi illa adiumento minus esse possent, minusque virium ad ipsos sanandos haberent: certè minus se illis efficaciter ad bonum moueri, minusque à peccato retrahi ipsi postea sentiūt, atque experiuntur. Nō quod illa vim suam amiserint, aut quod minus quam antea, quod in ipsis est erigere, & conuertere ad Deū animum hominis possint, sed quod ipsa illorū mens oppressa.

oppressa magnitudine sceleris, cuius ipsi nulla propè
externa res causam attulit, ipsa potiùs sibi sua obsti-
natione peperit: sceleris, inquam, non aliunde nati,
sed ab ipsomet animo, & ab intimis illius sensibus or-
ti, atque profecti obtorpuerit & recti, atque honesti
sensum propè omnem amiserit. Nam sicut qui firma
& integra valetudine semper per totam vitam vsi
sunt, quod præditi essent bene constituto, atque va-
lente corpore, ubi id illis euenit, vt aliquo morbo cor-
ripiantur periculosissimè egrotant, vix vt vllis medi-
camētis possint ad sanitatē restitui: propterea quod
quæ tam firmas vires fregit, atque deiecit, ea profe-
ctò inmensa quædam mali vis fuit: quare naturæ vir-
tus magnitudini mali cedens, atque succumbens,
nec ipsa contra aliquid niti, nec oblata ipsi ab indu-
stria medicorum ad morbum propulsandum arma
potest arripere, itaque tandem opprimitur & extin-
guitur: sic certè sentiendum est, quæ iniquitas adultæ
& perfectam, & cupiditatibus profligatis, & pene de-
letis in animo latè dominantem, maximarumque
choro virtutum circumseptam charitatem è animo
expulit, ipsumque peccatis peruium fecit, eā iniqui-
tatem radices egisse in animo ita firmas, atque altas,
euelli vix vt possit. Et hoc causæ habuit Solomō, qua-
re hoc præcipuè loco, cum de perfectorum virorum
persona & amore agebatur, hac admonitione vt ere-
tur. etenim illis maxime prouidendum est, ne à cha-
ritate decendant, ne à peccato vulnerari se sinant, quā-
cumque enim plagam acceperint, ea illis plaga pro-

Yy 2 pè

pèimmedicabilis futura est. Sequitur. SOROR NOSTRA
PARVULA EST, ET VBERA NON HABET, QUID FACIEMUS
SORORI NOSTRAE IN DIE QUANDO ALLOQUENDA EST.

*Basil. in
cantica.*

Quid in hac imagine, & amorum diuinorum imita-
tione à Solomone tam accuratè descripta sibi hoc ve-
lit, quod in eius postremo tanquã actu sponsam ipse
inducat, de sorore sua minore collocanda sollicitam,
quo faciliùs intelligamus, eorum nobis vitas propo-
namus ante oculos, qui qualis hoc loco sponsa esse
describitur, tales & ipsi fuerunt in amore, scilicet, Dei
& charitate perfecti, quorum nobis sacrae literae plu-
rima exempla suppeditant: videamusque ecquis illo-
rum fuerit, cui ad tam altum amoris & foelicitatis cul-
men euecto, obiectum sit aliquid, quod ipsum cura
& solitudine affecerit. Nam is si inuentus fuerit, no-
bis dabit viam & rationem interpretationis in hoc
loco, qui sine dubio ea continet, quibus animo sollici-
tari perfecti solent. Sed quem prius inspiciamus, quã
Paulum? aut in quo potius perfecti erga Deum amo-
ris exemplum queramus? Quid verò scriptum de il-
lo est, quod ad hunc locum interpretandum & illu-
strandum pertineat? Quid? Instãtia mea quotidiana
& sollicitudo omnium ecclesiarum, quis infirmatur,
& ego non infirmor? quis scandalizatur, & ego non
vror? Et de Galath. ad ipsos. Filioli quos iterum partu-
rio donec formetur Christus in vobis. Et de suis con-
tribulibus ad Roman. Veritatem dico in Christo, nõ
mentior, quoniam tristitia mihi magna est, & conti-
nuus dolor cordi meo. Optabam enim ego ipse ana-
thema

*2. ad Cor.
II.*

Galat. 4.

Rom. 9.

thema esse à Christo pro fratribus meis, qui sunt cognati mei secundum carnem, qui sunt Israëlitaë. Ergo quod perfectis curam & sollicitudinem afferat, nihil est præter eorum, quos vel à gratia Dei decidisse, vel in ea parum valere vident salutem, atque incrementum: idque est illorum proprium, vt has minores natu sorores suas infirmas & perpusillas, id est, infirmos aut imperfectos homines, quos illa, qua Deū amant, charitate amplectuntur, velint atque cupiant charos Deo esse, & eundem obtinere apud illum gratiæ & amoris gradum quem ipsi obtineāt, aut etiam ampliorem. adhibeantque ad id non solum vota sua ipsi, sed industriam atque operam, nullum recusantes, aut deprecantes laborem, dummodo eorum saluti & vtilitati prospiciatur. Nam primum eos incitat ad hoc studium, atque stimulat amor Dei, qui in ipsis est. Nec enim ferre patiēter possunt: cui omnes deberi vident omnium amores, eum non ab omnibus certatim amari. Deinde accenduntur ad idem misericordia erga eos ipsos qui se sua sponte ab amore diuino remouent, & sanctissimam omnium, & vtilissimam Dei amicitiam discindunt. quæ ipsa in proximos misericordia, à charitate, qua Deum amant, existit, à qua omnis in proximum benignitas, atque amor exoritur. Itaque aliorum salutem æquè, atque suam curant, eosque hæc vna cura sollicitat. Nec enim sunt de illorum hominū numero, quos secundæ res obliuisci suorum faciunt, ipsa potius eorum gratiæ magnitudo atque fœlicitas ad cogitandū & agen-

Yy 3 dum

dum de aliorum salute illos inducit. Dicunt igitur.
 SOROR, NOSTRA PARVULA EST, ET VBERA NON HABET,
 QUID FACIEMVS SORORI NOSTRAE IN DIE QVANDO
 ALLOQVENDA EST. Quibus querentibus respondetur:
 vel potius ipsi sibi respondent. SI MVRVS EST, AEDI-
 FICEMVS SVPER EVM PROPVGNA CVLA ARGENTEA: SI
 OSTIVM EST, COMPINGAMVS ILLVD TABVLIS CEDRINIS.
 Id nimirum affirmantes atque dicētes Deum, quod
 sapientia eius, & moderatione ea, qua vniuersas res,
 non violēter, sed aptē & accommodatē ad earum na-
 turas administrat dignum est, ita esse semper, itaque
 fuisse, tum in vniuersos, tum in singulos animatum
 homines, vt dummodo exorari ipsi se & duci permit-
 tant, ac tantum se esse saluos non nolint propitius il-
 lis futurus sit, nec vnquam desiturus, quoad eos, non
 saluos tantum, sed florentes, etiam atque foelices effi-
 ciat. Itaque arcem illi atque solum exhibeant quod
 Deo caeleste ædificium superstruere volenti, non sit
 repugnans, ipsum certē iacturum fidei fundamenta
 firmissima, eisque iactis eas ædificiorum, id est, chari-
 tatis & bonorum operum moles excitaturum, qui-
 bus nihil fieri possit illustrius. SI MVRVS, inquit, IST
 AEDIFICABIMVS SVPER EVM PROPVGNA CVLA ARGENTEA.
 SI OSTIVM EST COMPINGEMVS ILLVD TABVLIS CEDRI-
 NIS. Duo sunt tanquam principia & fundamenta, &
 verò tanquam cardines, in quibus vitæ Christianæ ra-
 tio & institutum versatur. Vnus est, vt gratiæ Dei in
 nostra corda intrare volenti aditum præbeamus, al-
 ter, vt admissam eam & ingressam firmiter retinea-
 mus

mus, quamuis nos aliò vocent sæculi atque carnis illecebræ. alter positus est in rectè incipiendo, alter in perseverando constanter & firmiter. quod gratiæ adiutum præbemus ianua figuratè dicimur: quod perseveramus in gratia constantes, contra demonum omnes insultus, dicimur murus. Ergo quia de sorore natum minore, id est, de imperfectis & peccatoribus hominibus quærebatur quid illis faciendum esset, quò nubere Deo possent, hoc est, obtinere excellentem aliquem gradum gratiæ apud Deum, convenientissimè & verissimè respondetur, dent illi operam, ut ianua atque murus sint: ianua qua ad ipsos gratia Dei intret, murus quo inuadentē hostē repellāt. Id enim si fuerint, siq; & gratiæ faciles, & aduersus peccati impugnationes se fortes præstiterint: hoc est, si & rectè instituerint vitā suā, & in suis rectis institutis perseverauerint, additis quotidie à Deo maioribus gratiæ donis, maioribusq; in ipsos cælestium bonorū atq; virtutū ornāmētis ab eodē collatis, eos in viros magnos & illustres, & Deo charissimos euafuros. Vnde sequit̃.

EGO MVRVS, ET VBERA MEA SICVT TVRRIS, EX QVO FACTA SVM CORAM EO QVASI PACEM HABENS. Sequitur porrò. VINEA FVIT PACIFICO INEA, QVAE HABET POPVLOS: TRADIDIT EAM CVSTODIEVS, VIR AFFERT PRO FRVCTV EIVS MILLE ARGENTEOS. VINEA MEA CORAM ME EST, MILLE TVI PACIFICE ET DVCENTI IIS QVI CVSTODIVNT FRVCTVM EIVS. Vineæ nomen hoc in carmine transferri ad significandas eas res, quarum præcipuo studio quisque tenetur, & in quibus maximè elabo-

rat.

rat, quo percipiat ex eis fructum aliquem voluptatis atque lætitiæ, iam superius memini me dixisse: porro alij alijs rebus capiuntur. Nam quidam, quorum est maxima multitudo, suæ ipsorum naturæ & conditionis ignari, quasi ex corpore constarent solo, quæ corpori vtilia & iucunda sunt, ea habent in bonis: occupanturque proindè vel in coaceruandis opibus, vel in voluptatibus comparandis, vel in ambitionis studio. quidam alij meliùs eruditi à Deo ipso atq; edocti inanitate istarum omnium rerum perspecta partem sui principem, id est, mentem atque animum colunt: virtutumque omni genere, qui est animorum cultus optimus ipsum exornant. Atque ut omittamus dicere cætera quibus efficitur, ut horum institutum vitæ, aliorum omnium institutis sit multo præstantius, sunt enim innumerabilia, illud vnum quod quidem nemo neget, nunc dicam. hoc genus vitæ bonorum eo præstare cæteris viuendi rationibus, quod ex se se aptum totum est, neque ex fortunæ, aut cuiusquam alterius pendet arbitrio: cum contra in reliquis vitæ institutis, quæcumque errore cæci appetunt homines, ita dominantur casus, atque fortuna, ut quamvis boni vllam partem haberent, à quo quidem plurimum absunt. (nihil enim effici potest vel leuius illis, vel magis inane, inane magis dixi? imò magis plenum verissimis malis. nam quam polliceri videntur copiosam & iucundam vitam adeò non præstant, ut nusquam alibi neque malorum copiam maiorem, neque dolorum acriores morsus experiamur.) Sed

ut

vt illa instituta in se haberent aliquid boni, quando quidam eo sunt stupore animi præditi, vt verorum amisso sensu malorum nullo afficiantur dolore ex malis, quibus ambitiosorum atq; afortorum vita redundat: sed vt bona illa sint, illud certè, vel ipsi illi qui ea amant concedent fluxa esse, atque fugacia bona, & planè eiusmodi, vt nemo eorum, qui ipsa semel fuerit adeptus habeat in sua potestate, atque manu, ea quãdiu velit, quantumq; velit habere, ex quo effici, vt qui videant eripi sibi illa in horas singulas posse, posseq; amitti metu amittendi torqueantur sempiterno: sintq; in summa illorum copia miserrimi. Quod si id illi minus sentiunt, seque quod externis bonis florere videant, fœlicibus annumerari volunt: aut se solos fœlices atque beatos esse ducunt: sancti profectò viri multò verius ipsi sibi, de eo, quod adepti sunt, bono gratulabuntur: institutumq; & conditionem vitæ suæ magis amabunt, ac pluris ducent. Itaque colligent, si illi, quorum omne bonum fortunę temeritati subiectum extra ipsos est, fructus lætitię magnos videantur sibi ex eo percipere, seque pro beatis volunt gerere, qui quod nos facimus, toti ex se pendent, vt potè qui ea sectentur, atque possideant bona, à quibus nemo eos vnquam inuitos diuellat, neque verò impediatur quin hauriant ex eis quantum volunt, eos veriores multò quam superiores, & lætandi, & perpetuò gaudendi causas habere, verèq; ipsos beatos, atque diuites esse. Nam vinea, inquiunt. (sic enim istā allegoriā interpretor, atque id à Solomone dici arbi-

Zz

tror

tror hoc maximè loco, postquam sanctæ vitæ perfectionem & absolutionem exposuit: quo ex collatione ad alia genera magis eius præstantia enitesceret.) Ergo inquit, VINEA FACTA EST PACIFICO IN EA QVAE HABET POPVLOS. Quod de vno dictum, ad vniuersos debet intelligi pertinere qui ista sectantur externa bona, quæ ideo dicuntur popularia, vel quod sint magna bona, opinione vulgi atq; populi, vel quod populi, hoc est, multorum prædæ & direptioni sint exposita. Illi igitur habent hanc suam vineam in vineto populo communi, hoc est, in aliorum potius, quam in sua ipsorum potestate: cuius magis declarandi causa statim additur. TRADIDIT ILLAM CVSTODIBVS. Nec enim sine multorum auxilio excoli, id est, cõparari ac retineri illa bona possunt. Ex quo existit quod sequitur. VIR AFFERT PRO FRVCTV EIVS MILLE ARGENTEOS. Id est affert parum pro spe & optato prouentu: nam quæ fiat, vt quod è manibus quotidie elabi potest, quodque fallax atque fugax sit, solidam quietem afferat. Sed hæc ambitiosi & affoti: quid verò sancti, atque iusti? Quid? VINEA, inquit, MEA CORAM ME EST. Habent enim secum, & intra se bona sua, ab omni, videlicet, incursu & iniuria fortunæ libera, & ob id fructuosissima bona. At gaudet cæteri suis bonis, & pro fructuosis ea habent. At hoc magis declarat, quantum, & quam magnum sit iustorum & perfectorum hominum bonum: ideoque ex illorum persona additur. MILLE TVI PACIFICE ET DVCENTI IIS QVI CVSTODIUNT FRVCTVM EIVS. Nam, inquit, si ex eo quod
alieni

alieni iuris totum est, & cuius vos, ô auari, & avari, nullo modo estis domini, iucunde vitam, atque beatè transigitis: quod non tam ex veritate ipsa dicimus, vos iucundi aliquid atque boni sentire quam ex errore vestro & falsa opinione affirmamus: sed si ita videtur vobis, lætabilia ista vestra bona esse, & iucunda, & beatæ vitæ efficientia: quid nos dicemus quorū omne bonum positum extra fortunæ aleam, situm est in nobis ipsis? Quid nos, ad quos nullus casus aspirat: nulla externa vis potest se appellere. Qui arbitratu nostro, diuitias nobis quantas volumus, comparamus? Quibus pro volūate nostra sceleritatis modus præfigitur? Quibus deniq; vinea nostra, fundusq; is, ex quo quietis & beatæ vitæ fructum demetimus, corā oculis est, à nobis colitur, nobis solis fructificat, nihil ex eo amittendi metus, atque cura decerpit? Quæ cū essent dicta, peruentumque à Solomone esset ad eā quam exponere instituit iusti viri absolutionem, iā exequitur, quod vnū restabat adhuc, vt ad id charitatis fastigium euectus homo vna iam cum Deo semper esse cupiens redemptionem corporis sui à Deo peteret: hoc est, reuelationem, vt sacrè loquuntur literę, filiorum Dei. Quæ profectò bonis omnibus, atque iustis continget, cum Christus vita nostra apparuerit, suoque aduentu mortalitatem extinxerit: seq; qualis est mundo ostenderit, circumfusus gloria & maiestate. Id igitur quia restabat, vt huius Christi aduentus, & omnium in melius restitutionis maturitatem, orarent ac peterent, ex persona sponsi illis præ-

Zz 2 cipitur

cupitur non solum id vt cupiant, sed vt eius se cupidos cantu, id est, aperta & ingenua voce testentur. inquit. *QVAE HABITAS IN HORTIS AMICI AVSCVLTANT*

TE, FAC ME AVDIRE VOCEM TVAM. Præcipitur autē non quod perfectus homo alicuius hortatu aut imperijs in hoc indigeat: sed quia charitas Dei quæ diffusa est in illius corde, & qui in eius animo viuit Christus, hoc sui aduentus desiderio illum accendit, idcirco quasi imperio opus sit, ita describitur. Nam accendi atque incitari ad id ab Spiritu Sancto testatur Ioānes in Apocalypsi, cum dicit. Spiritus & spōsa dicunt, veni, & qui hoc legit dicat, veni, veni Domine Iesu. His porro illi hortatibus atque iussis cupide obsequitur. Itaque ex ipso personam statim subditur.

Apo. vlt.

FUGE DILECTE MI, SIMILIS ESTO CAPREAE, HINNULOQUE CERVORVM SUPER MONTES AROMATVM. Quo cantu meo quidem sensu nihil Christo est auditu iucundius. Hortatur enim illum vt maturet suum reditum, nuptias initurus cum Ecclesia, quam sibi sanguine suo, & sanctissimis ceremonijs desponsauit. Sed quoniam ante dixerat, amici auscultāt te, necesse est videamus, quos nam amicos hos esse dicat, qui sponsæ cantum ipsi obseruent, & quorum aures sponsus velit ijs cantibus circumsonari. Nō enim, etsi amicos illos nominat, veri amici censendi sunt, sed veris amicis per fraudem admixti, & specie tenus amici, re ipsa hostes acerbi: quales multi eorum sunt, qui ad Christianorum aggregantur numerum: vnde in Hebræo non tam amici nominantur, quam sodales, aut
si ver-

si verbum pro verbo redditur adiuncti, atque aggregati. Nam sub Christiano nomine, interque eos qui dici se & haberi volunt veræ pietatis cultores, multi latent, atque occultantur erga pietatem ita malè animati, ut quod ipsam à se profligarunt, eo nō contenti, etiam ex aliorum animis eliminare illam pergant, & quod in ipsis est, nullo eam loco consistere sinant. Nam quoscumque vident id agere, ut bonis & antiquis moribus suum animum ornent, seque Christo commendent, eos cōtra obstinato animo pugnant: interdum quidem aperta vi, plurimum autem dolo, atque ijs artibus, quarum ad insidiandum & occultè nocendum maxima solet esse vis. Qua in impugnatione sibi proponunt, primum, ut ad similem suæ vitæ sectam, similesque sectandos mores illos inducant: sin id non possunt illud deinde calumnijs & molestijs inferendis conantur, ut & illis vitam acerbam efficiant, & alios similium malorum timore perterrefactos absterreant à præclaris studijs, quo nullum certè est aut dirius, aut luctuosius malum. Nam & caueri qui tales sunt, difficillimè possunt propter communem religionem, qua se in nostram familiaritatē insinuant: & nocent gravissimè, quia, quo id impudius faciant, bonis que perniciem facilius creent, bonorum ipsi speciem, atque colorem induunt, & pietatis ementito nomine, religionis que armis, arman-
tur aduersus pietatem, atque religionem. Atque ut quisque optimus, ac maximè ingenuus est: ita maximè in istorum incurrit odia, eorumque est iniurijs

expositus. Sed nulla tanta vis est, quæ fide erga Deum
 & charitate in eundem ipsum perfectum animum,
 ipse ni desit sibi, loco mouere possit. Nam, vt huma-
 na omnia præsidia deficient, vtque vicisse sibi videan-
 tur ij, qui in vno casu & calamitate bonorum suam
 fœlicitatem positam esse arbitrantur: tamen illi vin-
 ci nequeunt. Habent enim quo confugiant in omni
 acerbitate & indignitate fortunæ, spei in Deo eiusq;
 iudicio inuictum præsidium. Quo fisci atque corrobo-
 rati præsidio non admodum curant, quam alij fcele-
 rati in ipsos & iniurij existant: quam ipsos aut calami-
 tate afficiant, aut falsas de ipsis opiniones in vulgus
 disseminent: persuasi futurum tempus, quando de-
 posita hac mortalitatis veste, qua nunc ipsorū animi
 splendor occultatur & tegitur, immutati ipsi in me-
 lius ab eo qui reformaturus est, vt Paulus scribit, Cor-
 pus humilitatis nostræ transfiguratum corpori clari-
 tatis suæ: hoc est, à communi bonorum vita Christo
 Iesu, qui tunc apparebit immortalis vita affecti, & lu-
 ce circumfusi cælesti, cunctis spectantibus omnium
 ætatum hominibus, ipso eodem Christo & iudice, &
 teste, & præcone, non modo restituentur in eum ho-
 noris gradum, vnde deiecti per iniuriam fuerunt,
 sed diuinis etiam celebrabuntur laudibus ad æterni-
 tatem, diceturque de illis etiam. Hi sunt, qui venerūt
 ex magna tribulatione, & lauerunt stolas suas in san-
 guine agni. Itaque tandem ad consortium regni in-
 uitati ab eodem atque assumpti, simul cum ipso in
 sempiterna gloria, & fœlicitate regnabunt. Quare
 ad

Philip. 3.

Apoc. 7.

ad hoc tempus anhelant : hunc diem suspirāt: in hūc Christi ad orbem iudicandum, aduentum votis omnibus & desiderijs feruntur: sonatque perpetuò in illorum cordibus simul à fide in Deum, & à charitate, quæ in ipsis erga eundem Deum est, elicitā ista vox.

EVGE DILECTE MI SIMILIS ESTO CAPREAE, HINNULO-
QUE CERVORVM SVPER MONTES AROMATVM. Quæ pro
fectò vox, vt illis plurimum conducit ad ægritudinē
leniendam, vtque ipsos spe optima replet, ita fucatos
illos amicos, quos sacri scriptores Græca, & apta vo-
ce pseudoprophetas, pseudoque christianos appel-
lant, ingenti mœrore afficit: Christo verò ipsi ita gra-
ta accidit, nihil vt ferè sit, quod auditu iucundius à no-
bis ad illius aures perueniat. Nā qui ab ipso petimus,
summa vt adhibita celeritate veniat orbem iudicatu-
rus, id sanè petimus, vt magnitudinem potestatis
suæ, quæ iacere nunc multis videtur orbi ostendens,
& in sublime efferens se multorum opinione iacen-
tem, peccati atque mortis imperium omninò deleat:
atque, quod quotidie oramus, cum preces illas ad
Deum patrem fundimus, quarum nobis verba ipse
Christus præiuit, eius vt regnum iam tandem adue-
niat: ditionique suæ subijciat vniuersa, nullo dein-
ceps derelicto, qui repugnare aut rebellare audeat,
aut se impiè contra ferre, erroribus in vitam diffemi-
nandis, & à vero ipsius cultu, mortalibus auertendis.
Petimusq; præterea, vt multorū de ipsius prouidētia
querelis finē imponat, vt recta quæ sunt in luce, & in
laude constituat, praua flagitiosaque notet sempiter-
na

naignominia: vt deniq; fractas iam priori suo aduentu & accisas diaboli vires, & copias, accedendi amplius ad hominem omni potestate illi sublata, ipsoq; addicto & incluso ignibus sempiternis penitus euerrens, impijs pœnas, pijs præmia persoluat. Quæ certè omnia gloriosa ipsi futura sunt, iustis lætissima, impijs verò tristia, & acerba. Ex quo fit, vt hæc spiritus atque sponsæ Christum, vt aduentum suum maturerhortantis oratio, pro eo qualisquisq; est, ita ipsum afficiat. Christo namque ipsi orari se, & tanquam ad moneri eius officij sui, quod ipsius maximè est illustraturum gloriam pergratum omninò est: boni verò sperantes fore, vt immortalem atque gloriosam vitam aliquando adepti, ab omni tandem malo atque molestia liberentur libētissimè, ac suauissimè in eius temporis atque diei assidua & cogitatione, & mentione acquiescunt: impij autem & tyranni, quo nisi iniquissimo animo vocem eam audiant, quæ ipsis cum iniustissimæ suæ dominationis abolitionem, tum luctuosissimas calamitates denuntiat? Quam ob rem hortandi sunt omnes, tales vt esse laborent, qui hanc vocem non solùm æquis auribus accipiant, sed etiam cupidè illam ipsi & libenter vsurpent: quique huius cælestis carminis cantu Christo grato, ipsis læto, impijs luctuoso atque tristi sine intermissione perfonent: hoc est, vt Christi aduentum omnes diligant. Quod si semper aliàs id fieri debuit, hoc certè tempore, & hoc misero statu Christianæ reipublicæ maximè faciendū nobis est: quando videmus pietate

tate eliminata, & omni antiquo more & disciplina de-
letis, tot vitiorum & quæ vitia semper committantur
malorū agmina in Ecclesiā, non modo inuasisse, sed
domicilium in ea posuisse, consedisseque, ac penitus
insinuasse se, & infudisse per eā vniuersam, & in mo-
res abiisse nostros ita penitus, vt omni humana de-
sperata ope, salutis & mutationis in melius, ferè nul-
la nobis reliqua sit spes, præter eam, quæ posita est in
Christi aduentu, cuius illustratione aduentus impie-
tas est extinguenda. Nā per Deum immortalē, quid
mali abest, quod si adesset, nostra tempora miseriora
efficere & calamitosiora posset? externus hostis, isq;
potentissimus, & infestissimus Christiana regna de-
uastat: nos inter nos collidimur intestinis dissidijs:
de religionis doctrina orta dissensio, à paruis primū
ducta initijs, ita creuit paulatim, vt innumerabiles po-
pulos, atq; nationes ab Ecclesiæ corpore diuidens, in
errores induxerit perniciosos & impios. Quod porro
fyncerū adhuc, & ab errore doctrinæ liberū ac fidei
veræ retinens, manet in Ecclesia, quod quam sit per-
exiguū sine graui animi dolore memorare nō possu-
mus: ita est contaminatum omni peccatorum gene-
re atq; corruptum: ijs animi morbis laborat, tam exi-
tialibus, tā immedicabilibus, nihil vt esse minus videa-
mur, quam quod dicimur, & nominamur Christiani.
Quare instemus omnes, & quo quisque apud Chri-
stum magis valet gratia, eo instet magis, vchemen-
tiusque contendat precibus, atque lachrymis, vt lu-
men vultus sui, quod infernæ omnes horrent acies,

Aaa

amplius

amplius cælis inclusum cōtinere non velit: vt oriatur
iam tandem terris, quas scelerum atq; errorum nox
densa opprimit: vt adsit denique tantoperè à se ada-
mata Ecclesiæ ruenti. id quē non tam nostri gratia,
quamquā id quoque, quam ipsius gloriæ causa prece-
mur. Nam etsi optabile sit, vt saluis nobis atque inco-
lumibus Ecclesiæ rebus perditis Christus subueniat,
suæque ipse consulat gloriæ, cuius grauer opinio
apud plurimas gentes nostra culpa laborat: id tamen
si fieri nequit, siq; necesse est, vt nostro interitu & re-
gnorum inter se collisione, & imperij ruina adueniē-
ti Christo via muniatur, suæ gloriæ seruiat ipse, de no-
bis suo arbitratu, quod volet statuatur. Statuet autem
ille, nisi quod bonum atque æquum sit, nihil. Itaque
subeamus, si ita necesse est, omnes acerbitates nos,
debitasq; nostris flagitijs pœnas luamus, dummodo
nihil sit quod illius aduentum retardet, aut quod effi-
ciat, serius vt lætus ille & optatus bonis, dies oriatur,
in quo Christus de illustri & claro cœli loco cunctis,
mortalibus se ostendens, iusque rectitudine summa
dicens, suum nomen impiorū temeritate, & pra-
uitate obscuratum, vindicabit in splendo-
rem: asseretq; sibi honorem suū. cui pro-
priè omnis debetur gloria, atque laus.
per infinita sæcula, Amen.

* *
*

A D

AD DEI GENI-
TRICEM MARIAM
CARMEN EX VOTO.

* *
*

E seruante ratem maxima virginum
Iam portum incolumis, iam teneo, licet
Iactatus grauius, dum sua Protheus
In nos suscitatur agmina.

Te fas, teque pudor, nudaque veritas
Et recti studium, & simplicitas potens,
Et frangi indocilis mens bene conscia
Coniuncto sequitur pede.

His tu me socijs æquoris improbi
Mersum vorticibus lucis ad aureæ,
Vsuram reuocas, & melioribus
Latum constituis locis.

Et donas facilis, qua sacer Idida
Mulcebat Iebusi culmina, barbito:
Dum flammæ impatiens pectora saucia
Pandit carmine nobili.

Donatum, & studijs vilibus eripis,
Illatumque polo lucis ad intima
Admittis pauidum templum, animum & noui
Inspiras mihi carminis.

Abscede impietas, iam penetralia
Cæli sacra patent, iam videor pios
Exaudire sonos, alma canentium

Aaa 2 Alterno

Alternopede gaudia.
 Et sanctos thalamos, hinc bona virginum
 Sponsum turba sonant, hinc nitidus chorus,
 Lectorum iuuenum, dulcia matris, et
 Sponsae nomina concrepant.
 Virg. Audin? Quae teneas dic bone pascua
 Quo dilecte cubes dum terit igneus
 Sol caeli medium, ne vaga montibus
 Incerto pede deferar.
 Inue. O reclude fores sydere pulchrior
 Virgo, o cur remuis, nam irruit atranox
 Et venti resonant, aethereaq. aqua
 Perfusus madeo caput.
 Virg. Quae saltus colitis, callida tendere
 Nervos turba, me dicite virgines
 Dilecto, ut properet, nam aestuo, amoreq.
 Senu saucia langueo.
 Inue. O Nymphae Hermonides sic capreas manu
 Sit certa, et celeri cuspide figere
 Dilecte placidum parcite rumpere
 Somnum, atque alta silentia.
 Virg. Ut sylvas reliquas, ardua vertice
 Praecellit Lybani culminibus sacris
 Cedrus: sic iuvenes inter amor meus
 Formosum caput extulit.
 Inue. Adnatas nitet ut purpureo rosa
 Spinas inter hians ore, Syonias
 Sic formae egregio lumine virgines
 O coniux mea praeteris.

Aure

Virg. Aure an ne cupida vocem ego amabilem?
An fallor potiùs, quin vocat abditus
Obiectis foribus, quin caput aureum
Inter reticula emicat.

Iuue. Quid cessas, abiit pulsa tepentibus
Auris frigida hyems, iam pluuiæ graues
Iam cessant, variè floribus enitet
Tellus multicoloribus.

Iam cantu querulo carmina turtures
Auditi canere, & iam crepuit iugis
Falx in vitiferis, & sua protulit
Ficus dulcia germina.

Os surge, ô propera, charior ô mihi
Ipsis vita oculis, surge columbula
Exesus paries, vel caua saxeæ
Cui dant grata cubilia.


Ostende ô faciem, vox tua personet
Aures sponsa meas, nam neque dulcius
Quicquam est eloquio, nec mage fulgidum
Aut pulchrum facie est tua.

Virg. Quantum cerua micat montibus auis
Quantumq; hinnuleus dum pauet omnia
Seu vox insonuit, seu nemus infremit
Dilecte haud secus aduola.

Hæc lecti Iuuenes, turbaq; virginum
Alternant liquido gutture, calitum
Applaudet manibus cætus, & insonant
Cæli læta palatia.

SALMANTICÆ,
Excudebat Lucas à Iunta. M D L X X X.

C V M P R I V I L E G I O.



INDEX RERVM

QVAE IN HIS EXPLANATIONIBVS CONTINENTVR.

* *
*

Numerus paginam indicat.

A

ADVERSVS fictam imputationē Lutheri. 206.
Allegoriæ duplex genus. 1.
Allegoricè scripta duplicem habere sensum. 2.
Allegoricè scripta diuidi in sonum, & sententiam. 2.
Allegoriæ non omnia transferenda esse, ad id quod subest. 3.
Allegorias ipsos scriptores interdum interpretari, interdum distinguere notis rerū, de quibus verè agūt. 20.
Alma Hebræis quid. 44.
Amatores Dei duabus rebus ab amando impediri. 233.
Amantes quid rerum natura ferat, non semper attendere. 15.
Amantes rerum à se in amore gestarum commemoratio-
ne gaudere. 328.
Amoris tres gradus in hoc cā-

tico explicari. 33.
Amoris singulos gradus constare vocatione desiderio, probatione, illapsu: amatorio sermone, raptu. 36.
Amorem erga Deum ipsa tractatione rerum diuinarum augeri. 69.
Animæ humanæ tres esse partes. 62.
Animam agentem cum Deo ipso colloquio perfici. 203.
Animarum duo genera sagacissima ad odorādum Deū. 45.
Arabica seræ descriptio. 215.
Argentum in arcano sermone quid. 157.
Aurum in arcano sermone quid. 251.
Aurum tribus nominibus vocari ab Hebræis. 252.

B

BAHALAMON vine-
ti nomen. 334.
§ Bonos

INDEX.

Bonos aduersis magis esse ob-
noxios. 341.

C

CANDOR in arcano ser-
mone quid. 251.

Canales quid translatè signifi-
cent 307.

Capillos nigros in Orientali-
bus regionibus formosos
haberi. 171.

Capilli in arcano sermone
quid. 186.

Cedrus in arcano sermone
quid. 157.

Cella vinaria in arcano sermo-
ne quid. 89.

Certamina eorum qui amant
Deum esse disparia pro ra-
tione cuiusque gradus. 136.

Charitatē quæ optat Dei cau-
la optare. 50.

Charitatem Dei potiss. decla-
rari quod pro inimicis mo-
ri voluerit. 344.

Christianam virtutem, & hu-
mitem, & excelsam. 314.

Columbas syriacas præstare
nitore oculorum. 28.

Columba in arcano sermone
quid. 116.

Columbarum in amando mo-
res & ingenium. 104.

Colles in arcano sermone
quid. 591.

Collum in arcano sermone
quid. 195.

Copher quid. 27.

Cololari pro dolore Hebræos
ponere. 336.

Conuiuas Hebræos vnguen-
to perfundere in ipso accu-
bitu. 26.

Currus AEgyptios nobiles tē-
pore Solomonis. 18.

Cultum externum ex interio-
ri fluere. 194.

Cyprus arbor Iosepho. 27.

Cyprus in arcano sermone
quid. 79.

D

DELICTA perfectorum
esse propè immedicabi-
lia. 353.

Dentes in arcano sermone
quid. 191.

Deū quo magis illi se animus
submittit eo intimius in ip-
sum illabi. 229.

Deum in maius prouehere
eos qui quæ accipiunt ab ip-
so bonaritè collocant. 113.

Deum cum auget gratiam, au-
gere etiam virtutem humi-
litem. 119.

Deum

I N D E X.

Deum duobus modis intrare
in animam iusti. 241.
Diabolus quos occultè, &
quos apertè ad peccandum
inducat 120.

E

ECCLESIAM permane
re perpetuò in vno cer-
to & delecto populo non
esse necesse. 155.
Ecclesiæ ætates quatuor fusc
declariantur. 262.
Ecclesiæ ætatem vltimam fœ
licissimam futuram in bo-
nis gratiæ. 267.
Elate quid. 222.
Electa Hebræos proceraque
sunt vocare. 226.
Eloquium quid propriè. 174.
Engaddi vrbs ad mare mor-
tuum. 27.
Esbon vrbs, in sorte Ruben.
303.
Euangelicæ legis ratio simpli-
cior quam Mosaicæ. 57.
Ex desiderio timorem & spẽ
nasci. 60.

F

FOE M O R A in arcano
sermone quid. 316.
Fiduciam aduersis augeri. 50.
Fides Dauidis quanta. 52.

Filiæ Hebræis quæ dicantur.
279.
Fugere, pro festinare Hebræis.
336.

G

GENAE in arcano sermo-
ne quid. 255.
Gladius in arcano sermone
quid. 153.
Gradum proficientium veris
appellatione significari. 115
Greges pecudû in arcano ser-
mone quid. 83.
Guil quid propriè 57.

H

HARVZIM colli orna-
mentum quale. 21.
Hieronymi sententia de signi-
ficatione çama, vtrûm pro-
bari debeat. 166.
Hebræos in amatorio sermo-
ne dicere solitos mi rex, mi
frater. 9.
Humalhazen, Arabicum ca-
pitis ornamentû quale. 21.

I

IANVA in arcano sermo-
ne quid. 359.

§ 2 In

INDEX

In incarnatione omnes virtutes Dei clucere. 160.
 Incipientes in amore Dei, quo genere voluptatis perfundantur. 41.
 Incipientium amor erga Deum imperfectus. 42.
 Incipientes quare nigri dicantur. 60.
 Incipientes vivere in conventu aliorum oportere. 73.
 Infirmorum salutis cura sollicitari perfectos. 356.
 Iusti in tribulatione positi quid faciant. 141.
 Iusti quare dicti vbertatum flores. 109.
 Iusti quare rebus aduersis torqueantur. 158.

L

LAVDEM ex iustorum bonis operibus Deum sibi vni velle tribui. 230.
 Lybanus alius in Iudæa, qui & saltus Lybani. 178.
 Lybanus mons, quare transferratur ad Christum significandum. 259.

M

Mazeg Hebræis quid. 303.
 Meghaim Hebræis quid. 257.
 Mentiri pro subijcere se victori Hebræis. 336.

Meretrices olim capite inuoluta in viarum bruijs residere solitas fuisse. 16.
 Meritum bonorum operum aduersus Lutherum defenditur. 205.
 Meritorum Christi efficacia, & vera laus. 206.
 Mesarim de vino dictum Hebræis quid significet. 309.
 Myrrha transiens quid. 217.
 Myrrhæ flores qui. 27.
 Myrrha in arcano sermone quid. 29.
 Murus in arcano sermone quid. 359.

N

Nardus Hebræis quid. proprie. 29.
 Nardus vnguentum quale. 25.
 Nardus in arcano sermone quid. 78.
 Nasus translatus quid. 304.
 Naturæ & gratiæ ingenium explicatur. 239.
 Nox in arcano sermone quid. 134.

O

OBTESTATIONIS quæ sit ratio. 97.
 Oculi in arcano sermone quid. 80.
 Odor translatus quid. 43.
Odor.

I N D E X.

Odor in arcano sermone quid. 230.	Purgatorie virtutes, quare odorata dicantur. 78.
Officij Christiani descriptio. 50.	Purpura in arcano sermone quid. 157.
Oratio virtus Christianorum propria. 196.	Q
Orationis perfectæ conditio- nes. 197.	Q V O die peccauit Adam eodem iacta fuisse sa- lutis nostræ fundamenta. 346. & 347.
P	R
P A X per Christum consti- tuenda qualis. 288.	R V B O R in arcano ser- mone quid. 251.
Peccati fons & origo. 62. & 63	S
Pedes in arcano sermone quid. 312. & 313.	S E P T V A G I N T A viri qui ambiunt lectulū So- lomonis, in arcano sermo- ne quid. 151.
Perfecti cur vrbi similes. 286.	Similitudines huius libri cur interdum nobis perabsur- dæ videantur. 165.
Perfectos paucioribus rebus egere vt induci in amorem Dei possint. 55.	Sol in arcano sermone quid. 68.
Perfecti quanta animi pace fruantur. 287.	Splendor virtutis se ipse pro- dit. 143.
Perfectos & palam & semper amare Deum cupere. 337.	T
Poeticæ præstantiam in imi- tanda natura cōsistere. 92.	T H E O L O G I A E cogni- tionem Episcopis esse necessariam. 153.
Prælati mali, quantum no- ceant populo Dei. 246.	Tharsis lapis pretiosus. 225.
Prælati quo fortitudinis gene- re præstare debeant. 151. & 152	Thirsa vrbs regia. 275.
Promissio de Christo nasci- turo, facta primis parētibus quot modis Dei erga homi- nes amorem declaret. 345.	Thus in arcano sermone quid. 202.
Purgatorie virtutis quod sit munus. 75.	Trahere quid propriè. 47.
	§ 3 Tria

INDEX.

Tria cellaria ad quæ incipien-
tes introducuntur. 53.

Turtur in arcano sermone
quid. 77.

Turtures hyeme à Palæstina
recedere. 103.

Turtures ornamentum mu-
liebre apud Hebræos. 25.

Turtures quod, & quale orna-
mentigenus. ibidem.

V

VERBA in arcano ser-
mone quid. 299.

Verba alia pro alijs ponere
Heb. cum res affines signi-
ficant. 336.

Vere excitari animantia ad
cantum. 103.

Vocationis primæ ad iustitiã,
& aliarum vocationum di-
scrimen. 37.

Voluptatis ostentatione Deû

peccatores ad iustitiam so-
lere vocare. 42.

Vt conueniant inter se corpo-
reus & incorporeus amor.
94.

Vulpibus abundare Iudæam.
106.

Vulpes in arcano sermone
quid. 121.

Veros Christi cultores aduen-
tum illius optare atque pe-
tere. 364.

Vltimi aduentus Christi spe
in aduersis bonos sustenta-
ri, & eius memoria gaude-
re. 366.

Vltimi aduentus Christi men-
tionem acerbam impijs, for-
midolosam dæmonibus ef-
se. 367. & 368.

Velatos religionis nomine ini-
micos verę Christianitatis
multos latere. 365.



00526005.